

功莫大。語德最賢。無可疑者。上從之。丁未。立平王隆基為太子。隆基復表讓成器。不許。○則天大聖皇后復舊號。為天后。追諡雍王賢曰章懷太子。○戊申。以宋王成器為雍州牧。揚州大都督。太子太師。○置溫王重茂於內宅。○以太常少卿薛稷為黃門侍郎。參知機務。稷以工書。事上於藩邸。其子伯陽。尚仙源公主。故為相。○追削武三思。武崇訓。爵諡。斲棺暴尸。平其墳墓。○以許州刺史姚元之為兵部尚書。同中書門下三品。宋州刺史韋嗣立。許州刺史蕭至忠。為中書令。絳州刺史趙彥昭。為中書侍郎。華州刺史崔湜。為吏部侍郎。並同平章事。○越州長史宋之問。饒州刺史冉祖雍。坐諂附韋武。皆流嶺表。○己酉。立衡陽王成義為中王。巴陵王隆範為岐王。彭城王隆業為薛王。加太平公主實封。滿萬戶。太平公主。沈敏多權略。武后以為類己。故於諸子中獨愛幸。頗得預密謀。然尚畏武后之嚴。未敢招權。及誅張易之。公主有力焉。中宗之世。韋后安樂公主皆畏之。又與太子共誅韋氏。既屢立大功。益尊重。上常與之圖議大政。每入奏事。坐語移時。或時不朝謁。則宰相就第咨之。每宰相奏事。上輒問。嘗與太平議否。又問。與三郎議否。然後可之。三郎謂太子也。公主所欲。上無不聽。自宰相以下進退。繫其一言。其餘薦士。驟歷清顯者。不可勝數。權傾人主。趨附其門者如市。子薛崇養。擬於宮掖。○追贈郎岌。燕欽。融。諫大夫。○秋。七月。庚戌朔。贈韋月將宣州刺史。○癸丑。以兵部侍郎崔日用為黃門侍郎。參知機務。○追復故太子重俊位號。雪敬暉。桓彥範。崔玄暉。張柬之。袁恕己。成王千里。李多祚等罪。復其官爵。○丁巳。以洛州長史宋璟。檢校吏部尚書。同中書門下三品。岑羲。罷為右散騎常侍。兼刑部尚書。璟與姚元之協心。革中宗弊政。進忠良。退不肖。賞罰盡公。請託不行。綱紀修舉。當時翕然。以為復有貞觀永徽之風。○壬戌。崔湜。罷為尚書左丞。張錫。為絳州刺史。蕭至忠。為晉州刺史。韋嗣立。為許州刺史。趙彥昭。為

宋州刺史。丙寅。姚元之兼中書令。兵部尚書。同中書門下三品。李嶠。貶懷州刺史。丁卯。太子少師。同中書門下三品。唐休璟。致仕。右武衛大將軍。同中書門下三品。張仁愿。罷為左衛大將軍。○黃門侍郎參知機務。崔日用。與中書侍郎參知機務。薛稷。爭於上前。稷曰。日用傾側。曷附武三思。非忠臣。賣友邀功。非義士。日用曰。臣往雖有過。今立大功。稷外託國姻。內附張易之。宗楚客。非傾側而何。上由是兩罷之。戊辰。以日用為雍州長史。稷為左散騎常侍。○己巳。赦天下。改元。凡韋氏餘黨未施行者。咸赦之。○乙亥。廢武氏崇恩廟。及吳陵。順陵。追廢韋后。為庶人。安樂公主為悖逆庶人。○韋后之臨朝也。吏部侍郎鄭愷。貶江州司馬。潛過均州。與刺史譙王重福。及洛陽人張靈均。謀舉兵誅韋氏。未發。而韋氏敗。重福遷集州刺史。未行。靈均說重福曰。大王地居嫡長。當為天子。相王雖有功。不當繼統。東都士庶。皆願王來。若潛入洛陽。發左右屯營兵。襲殺留守。據東都。如從天而下也。然後西取陝州。東取河南。北天下指麾可定。重福從之。靈均乃密與愷結謀。聚徒數十人。時愷自祕書少監。左遷沅州刺史。遲留洛陽。以俟重福。草制。立重福為帝。改元為中元。克復尊上為皇季叔。以溫王為皇太弟。愷為左丞相。知內外文事。靈均為右丞相。天柱大將軍。知武事。右散騎常侍。嚴善思。為禮部尚書。知吏部事。重福與靈均詐乘驛詣東都。愷先供張駙馬都尉裴巽第。以待重福。洛陽縣官微聞其謀。

資治通鑑卷第一百九

唐紀 睿宗 支真大聖大興孝皇帝 上景雲元年



# 資治通鑑卷第二百一十

## 唐紀二十六

### 睿宗玄真大聖大興孝皇帝下

景雲元年八月庚寅往巽第按問重福奄至縣官馳出白留守羣官皆逃匿洛州長史崔日知獨帥衆討之留臺侍御史李邕遇重福於天津橋從者已數百人馳至屯營告之曰譙王得罪先帝今無故入都此必爲亂君等宜立功取富貴又告皇城使閉諸門重福先趣左右屯營營中射之矢如雨下乃還趣左掖門欲取留守兵見門閉大怒命焚之火未及然左右營兵出逼之重福窘迫策馬出上東逃匿山谷明日留守大出兵搜捕重福赴漕渠溺死日知日用之從父兄也以功拜東都留守鄭愷貌醜多須既敗梳髻著婦人服匿車中擒獲被鞫股慄不能對張靈均神氣自若顧愷曰吾與此人舉事宜其敗也與愷皆斬於東都市初愷附來俊臣得進俊臣誅附張易之易之誅附韋氏韋氏敗又附譙王重福竟坐族誅嚴善思免死流靜州○萬騎特討諸韋之功多暴橫長安中苦之詔並除外官又停以戶奴爲萬騎更置飛騎隸左右羽林○姚元之宋璟及御史大夫畢構上言先朝斜封官悉宜停廢上從之癸巳罷斜封官凡數千人○刑部尚書同中書門下三品裴談貶蒲州刺史○贈蘇安恒諫議大夫○九月辛未以太子少師致仕唐休璟爲朔方道大總管○冬十月甲申禮儀使姚元之宋璟奏大行皇帝神主應祔太廟請遷義宗神主於東都別立廟從之○乙未追復天后尊號爲大聖天后○丁酉以幽州鎮守經略節度大使薛訥爲左武衛大將軍兼幽

州都督節度使之名自訥始○太平公主以太子年少意頗易之既而憚其英武欲更擇闇弱者立之以久其權數爲流言云太子非長不當立己亥制戒諭中外以息浮議公主每覬伺太子所爲纖介必聞於上太子左右亦往往爲公主耳目太子深不自安○諡故太子重俊曰節愍太府少卿萬年韋湊上書以爲賞罰所不加者則考行立諡以褒貶之故太子重俊與李多祚等稱兵入宮中宗登玄武門以避之太子據鞍督兵自若及其徒倒戈多祚等死太子方逃竄驛使宿衛不守其爲禍也胡可忍言明日中宗兩泣謂供奉官曰幾不與卿等相見其危如此今聖朝禮葬諡爲節愍臣竊惑之夫臣子之禮過廟必下過位必趨漢成帝之爲太子不敢絕馳道而重俊稱兵宮內跨馬御前無禮甚矣若以其誅武三思父子而嘉之則興兵以誅姦臣而尊君父可也今欲自取之是與三思競爲逆也又足嘉乎若以其欲廢韋氏而嘉之則韋氏於時逆狀未彰大義未絕苟無中宗之命而廢之是脅父廢母也庸可乎漢戾太子困於江充之讒發忿殺充雖與兵交戰非圍逼君父也兵敗而死及其孫爲天子始得改葬猶諡曰戾況重俊可諡之曰節愍乎臣恐後之亂臣賊子得引以爲比開悖逆之原非所以彰善癉惡也請改其諡多祚等從重俊興兵不爲無罪陛下今宥之可也名之爲雪亦所未安上甚然其言而執政以爲制命已行不爲追改但停多祚等贈官而已○十一月戊申朔以姚元之爲中書令○己酉葬孝和皇帝于定陵廟號中宗朝議以韋后有罪不應祔葬追諡故英王妃趙氏曰和思順聖皇后求其瘞莫有知者乃以禕衣招魂覆以夷衾祔葬定陵○壬子侍中韋安石罷爲太子少保左僕射同中書門下三品蘇瓌罷爲少傅○甲寅追復裴炎官爵初裴仙先自嶺南逃歸復杖一百徙北庭至徙所殖貨任俠常遣客訶都下事武后之誅流人也仙先先知之逃奔胡中北庭都護追獲囚之以聞使者至流人盡死仙先以待報未殺既而武后下制安撫流人有未死者悉放還仙先由是得歸至



是求炎後。獨仙先在。拜詹事丞。○壬戌。追復王同皎官爵。○庚午。許文貞公蘇瓌薨。制起復其子。題爲工部侍郎。題固辭。上使李日知諭旨。日知終坐不言而還。奏曰。臣見其哀毀。不忍發言。恐其隕絕。上乃聽其終制。○十二月。癸未。上以二女西城隆昌公主爲女官。以資天皇太后之福。仍欲於城西造觀。諫議大夫竇原悌上言。以爲先朝悖逆庶人。以愛女驕盈。而及禍。新城宜都。以庶孽抑損。而獲全。又釋道二家。皆以清淨爲本。不當廣營寺觀。勞人費財。梁武帝致敗於前。先帝取災於後。殷鑒不遠。今二公主入道。將爲之置觀。不宜過爲崇麗。取謗四方。又先朝所親狎諸僧。尙在左右。宜加屏斥。上覽而善之。○宦者閻興貴。以事屬長安令李朝隱。朝隱繫于獄。上聞之。召見朝隱。勞之曰。卿爲赤縣令。能如此。朕復何憂。因御承天門。集百官及諸州朝集使。宣示以朝隱所爲。且下制稱。宦官遇寬柔之代。必弄威權。朕覽前載。每所歎息。能副朕意。實在斯人。可加一階。爲太中大夫。賜中上考。及絹百匹。○壬辰。奚醫犯塞。掠漁陽雍奴。出盧龍塞而去。幽州都督薛訥追擊之。弗克。○舊制。三品以上官冊授。五品以上制授。六品以下敕授。皆委尙書省奏擬。文屬吏部。武屬兵部。尙書曰。中銓。侍郎曰。東西銓。中宗之末。嬖倖用事。選舉混淆。無復綱紀。至是以宋璟爲吏部尙書。李乂。盧從愿爲侍郎。皆不畏彊禦。請謁路絕。集者萬餘人。留者三銓。不過二千。人服其公。以姚元之爲兵部尙書。陸象先。盧懷慎爲侍郎。武選亦治。從愿承慶之族。子象先。元方之子也。○侍御史藁城倪若水。奏彈國子祭酒祝欽明。司業郭山暉。亂常改作。希旨病君。於是左授欽明饒州刺史。山暉括州長史。○侍御史楊孚。彈糾不避權貴。權貴毀之。上曰。鷹搏狡兔。須急救之。不爾。必反爲所噬。御史繩姦慝。亦然。苟非人主保衛之。則亦爲奸慝所噬矣。孚。隋文帝之姪孫也。○置河西節度支度營田等使。領涼甘肅伊瓜沙西七州。治涼州。○姚州羣蠻。先附吐蕃。攝監察御史李知古。請發兵擊之。既降。又請築城。列置州縣。重稅之。黃門侍郎徐堅。以爲不可。○不從。

知古發劍南兵築城。因欲誅其豪傑。掠子女爲奴婢。羣蠻怨怒。蠻酋傍名引吐蕃。攻知古。殺之。以其尸祭天。由是姚嶠路絕。連年不通。安西都護張玄表。侵掠吐蕃北境。吐蕃雖怨。而未絕和親。乃賂鄯州都督楊矩。請河西九曲之地。以爲公主湯沐邑。矩奏與之。○乙丑。追立竝同平章事。○以溫王重茂爲襄王。充集州刺史。遣中郎將。將兵五百。就防之。○乙丑。追立妃劉氏曰肅明皇后。陵曰惠陵。德妃竇氏曰昭成皇后。陵曰靖陵。皆招魂葬於東都城南。立廟京師。號儀坤廟。竇氏。太子之母也。○太平公主與益州長史竇懷貞等。結爲朋黨。欲以危太子。使其婿唐峻。邀韋安石。至其第。安石固辭不往。上嘗密召安石。謂曰。聞朝廷皆傾心東宮。卿宜察之。對曰。陛下安得亡國之言。此必太平之謀耳。太子有功於社稷。仁明孝友。天下所知。願陛下無惑讒言。上瞿然曰。朕知之矣。卿勿言。時公主在籬下。竊聽之。以飛語陷安石。欲收按之。賴郭元振救之。得免。公主又嘗乘輦。邀宰相於光範門內。諷以易置東宮。衆皆失色。宋璟抗言曰。東宮有大功於天下。真宗廟社稷之主。公主奈何忽有此議。璟與姚元之。密言於上曰。宋王陛下之元子。幽王。高宗之長孫。太平公主交構其間。將使東宮不安。請出宋王及幽王。皆爲刺史。罷岐薛二王。左右羽林。使爲左右率。以事太子。太平公主請與武攸暨。皆於東都安置。上曰。朕更無兄弟。惟太平一妹。豈可遠置東都。諸王惟卿所處。乃先下制云。諸王駙馬。自今毋得典禁兵。見任者。皆改它官。頃之。上謂侍臣曰。術者言。五日中午。當有急兵入宮。卿等爲朕備之。張說曰。此必讒人欲離間東宮。願陛下使太子監國。則流言自息矣。姚元之曰。張說所言。社稷之至計也。上說。二月。丙子朔。以宋王成器爲同州刺史。幽王守禮爲幽州刺史。左羽林大將軍岐王隆範爲左衛率。右羽林大將軍薛王隆業爲右衛率。太平公主蒲州安置。丁丑。命太子監國。六品以下除官。及徒罪以下。竝取太子處分。○殿中侍御史



崔蒞。太子中允薛昭素言於上曰。斜封官。皆先帝所除。恩命已布。姚元之等建議。一朝盡奪之。彰先帝之過。為陛下招怨。今衆口沸騰。徧於海內。恐生非常之變。太平公主亦言之。上以為然。戊寅。制諸緣斜封。別敕授官。先停任者。並量材敍用。○太平公主聞姚元之宋璟之謀。大怒。以讓太子。太子懼。奏元之璟離間。姑兄請從極法。甲申。貶元之為申州刺史。璟為楚州刺史。丙戌。宋王嗣王亦寢。刺史之命。○中書舍人參知機務劉幽求。罷為戶部尚書。以太子少保韋安石為侍中。安石與李日知代姚宋為政。自是綱紀紊亂。復如景龍之世矣。前右率府鎧曹參軍柳澤上疏。以為斜封官。皆因僕妾汲引。豈出孝和之意。陛下一切黜之。天下莫不稱明。一旦忽盡收斂。善惡不定。反覆相攻。何陛下政令之不一也。議者咸稱太平公主。令胡僧慧範。曲引此曹。誑誤陛下。臣恐積小成大。為禍不細。上弗聽。澤。亨之孫也。○左右萬騎。與左右羽林。為北門四軍。使葛福順等將之。○三月。以宋王成器女為金山公主。許嫁突厥。默啜。○夏。四月。甲申。宋王成器讓司徒。許之。以為太子賓客。以韋安石為中書令。○上召羣臣。三品以上。謂曰。朕素懷澹泊。不以萬乘為貴。曩為皇嗣。又為太弟。皆辭不處。今欲傳位太子。何如。羣臣莫對。太子使右庶子李景伯固辭。不許。殿中侍御史和逢堯附太平公主言於上曰。陛下春秋未高。方為四海所依仰。豈得遽爾。上乃止。戊子。制凡政事。皆取太子處分。其軍旅死刑。及五品已上除授。皆先與太子議之。然後以聞。○辛卯。以李日知守侍中。○壬寅。赦天下。○五月。太子請讓位於宋王成器。不許。請召太平公主。還京師。許之。○庚戌。制則天皇后父母墳。仍舊為吳陵。順陵。量置官屬。太平公主為武攸暨請之也。○辛酉。更以西城為金仙公主。隆昌為玉真公主。各為之造觀。逼奪民居甚多。用功數百萬。右散騎常侍魏知古。黃門侍郎李乂。諫不聽。○壬戌。殿中監竇懷貞為御史大夫。同平章事。○僧慧範恃太平公主。教逼奪民產。御史大夫薛謙光與殿中侍御史慕容珣奏彈之。公主訴於上。出謙光為岐

州刺史。○時遣使按察十道。議者以山南所部闊遠。乃分為東西道。又分隴右為河西道。六月。壬午。又分天下置汴齊兗魏冀并蒲鄜涇秦益緜遂荆岐通梁襄揚安閩越洪潭二十四都督。各糾察所部刺史以下善惡。惟洛及近畿州。不隸都督府。太子右庶子李景伯。舍人盧備等上言。都督專殺生之柄。權任太重。或用非其人。為害不細。今御史秩卑望重。以時巡察。奸宄自禁。其後竟罷都督。但置十道按察使而已。○秋。七月。癸巳。追復上官昭容諡曰惠文。○乙卯。以高祖故宅枯柿復生。赦天下。○己巳。以右御史大夫解琬為朔方大總管。琬考按三城戍兵。奏減十萬人。○庚午。以中書令韋安石為左僕射。兼太子賓客。同中書門下三品。太平公主以安石不附己。故崇以虛名。實去其權也。○九月。庚辰。以竇懷貞為侍中。懷貞每退朝。必詣太平公主第。時修金仙玉真二觀。羣臣多諫。懷貞獨勸成之。身自督役。時人謂懷貞前為皇后阿瞞。今為公主邑司。○冬。十月。甲辰。上御承天門。引韋安石。郭元振。竇懷貞。李日知。張說。宣制。責以政教多闕。水旱為災。府庫益竭。僚吏日滋。雖朕之薄德。亦輔佐非才。安石可佐僕射。東都留守。元振可吏部尚書。懷貞可左御史大夫。日知可戶部尚書。說可左丞。竇罷政事。以吏部尚書劉幽求為侍中。右散騎常侍魏知古為左散騎常侍。太子詹事崔湜為中書侍郎。竇同中書門下三品。中書侍郎陸象先同平章事。皆太平公主之志也。象先清淨寡欲。言論高遠。為時人所重。湜私侍太平公主。公主欲引以為相。湜請與象先同升。公主不可。湜曰。然則湜亦不敢當。公主乃為之并言於上。上不欲用湜。公主涕泣以請。乃從之。○右補闕辛替否上疏。以為自古失道。破國亡家者。口說不如身逢。耳聞不如目覩。臣請以陛下所目覩者言之。太宗皇帝陛下之祖也。撥亂反正。開基立極。官不虛授。財無枉費。不多造寺觀。而有福不多度。僧尼而無災。天地垂祐。風雨時若。粟帛充溢。蠻夷率服。享國久長。名高萬古。陛下何不取而法之。中宗皇帝陛下之兄。棄祖宗之業。徇女子之意。無能而祿者數千



人無功而封者百餘家。造寺不止。費財貨者數百億。度人無窮。免租庸者數十萬。所出日滋。所入口寡。奪百姓口中之食。以養貪殘。剝萬人體上之衣。以塗土木。於是人怨神怒。衆叛親離。水旱竝臻。公私俱罄。享國不永。禍及其身。陛下何不懲而改之。自頃以來。水旱相繼。兼以霜蝗。人無所食。未聞賑恤。而爲二女造觀。用錢百萬餘緡。陛下豈可不計當時府庫之蓄積。有幾。中外之經費。有幾。而輕用百餘萬緡。以供無用之役乎。陛下族韋氏之家。而不去韋氏之惡。忍棄太宗之法。不忍棄中宗之政乎。且陛下與太子。當韋氏用事之時。日夕憂危。切齒於羣兇。今幸而除之。乃不改其所爲。臣恐復有切齒於陛下者也。然則陛下又何惡於羣兇而誅之。昔先帝之憐悖逆也。宗晉卿爲之造第。趙履溫爲之葺園。殫國財。竭人力。第成不暇。居園成不暇遊。而身爲戮沒。今之造觀崇侈者。必非陛下公主之本意。殆有宗趙之徒。從而勸之。不可不察也。陛下不停斯役。臣恐人之愁怨。不減前朝之時。人人知其禍敗。而口不敢言。言則刑戮隨之矣。韋月將。燕欽融之徒。先朝誅之。陛下賞之。豈非陛下知直言之有益於國乎。臣今所言。亦先朝之直也。惟陛下察之。上雖不能從。而嘉其切直。○御史中丞和逢堯。攝鴻臚卿。使于突厥。說默啜曰。處密堅昆。聞可汗結昏於唐。皆當歸附。可汗何不襲唐冠帶。使諸胡知之。豈不美哉。默啜許諾。明日。襍頭衣紫衫。南向再拜稱臣。遣其子楊我支。及國相。隨逢堯入朝。十一月。戊寅。至京師。逢堯以奉使功。遷戶部侍郎。○壬辰。令天下百姓。二十五入軍。五十五免。○十二月。癸卯。以興昔亡可汗阿史那獻爲招慰十姓使。○上召天台山道士司馬承禎。問以陰陽數術。對曰。道者損之又損。以至于無爲。安肯勞心。以學術數乎。上曰。理身無爲則高矣。如理國何。對曰。國猶身也。順物自然。而心無所私。則天下理矣。上歎曰。廣成之言。無以過也。承禎固請還山。上許之。尙書左丞盧藏用。指終南山。謂承禎曰。此中大有佳處。何必天台。承禎曰。以愚觀之。此乃仕宦之捷徑耳。藏用嘗隱終南。則天時。徵爲左拾遺。故承禎言之。

故承禎言之

### 玄宗至道大聖大明孝皇帝上之上

先天元年。春。正月。辛巳。睿宗祀南郊。初。因諫議大夫賈曾。議合祭天地。曾言。忠之子也。○戊子。幸滄東。耕藉田。○己丑。赦天下。改元太極。○乙未。上御安福門。宴突厥楊我支。以金山公主示之。既而會上傳位。昏竟不成。○以左御史大夫竇懷貞。戶部尙書岑羲。竝同中書門下三品。○二月。辛酉。廢右御史臺。○蒲州刺史蕭至忠。自託於太平公主。公主引爲刑部尙書。華州刺史蔣欽緒。其妹夫也。謂之曰。如子之才。何憂不達。勿爲非分妄求。至忠不應。欽緒退。歎曰。九代卿族。一舉滅之。可哀也哉。至忠素有雅望。嘗自公主第門出。遇宋璟。璟曰。非所望於蕭君也。至忠笑曰。善乎宋生之言。遽策馬而去。○幽州大都督薛訥。鎮幽州二十餘年。吏民安之。未嘗舉兵出塞。虜亦不敢犯。與燕州刺史李瓚。有隙。瓚毀之於劉幽求。幽求薦左羽林將軍孫佺代之。三月。丁丑。以佺爲幽州大都督。徙訥爲并州長史。○夏。五月。益州獠反。○戊寅。上祭北郊。○辛巳。赦天下。改元延和。○六月。丁未。右散騎常侍武攸暨卒。追封定王。○上以節愍太子之亂。岑羲有保護之功。癸丑。以羲爲侍中。○庚申。幽州大都督孫佺。與奚會。李大酺。戰于冷陁。全軍覆沒。是時。佺帥左驍衛將軍李楷洛。左威衛將軍周以悌。發兵二萬。騎八千。分爲三軍。以襲奚契丹。將軍烏可利諫曰。道險而天熱。懸軍遠襲。往必敗。佺曰。薛訥在邊積年。竟不能爲國家復營州。○今乘其無備。往必有功。使楷洛將騎四千前驅。遇奚騎八千。楷洛戰不利。佺怯懦不敢救。引兵欲還。虜乘之。唐兵大敗。佺阻山爲方陳。以自固。大酺謂佺曰。朝廷既與我和親。今大軍何爲而來。佺曰。吾奉敕來招慰耳。楷洛不稟節度。輒與汝戰。請斬以謝。大酺曰。若然。國信安在。佺悉斂軍中帛。得萬餘段。并紫袍金帶魚袋。以贈之。



大酺曰。請將軍南還。勿相驚擾。將士懼。無復部伍。虜追擊之。士卒皆潰。佗以悌爲虜所擒。獻於突厥。默啜皆殺之。楷洛可利脫歸。○秋七月。彗星出西方。經軒轅。入太微。至于大角。○有相者。謂同中書門下三品竇懷貞曰。公有刑厄。懷貞懼。請解官爲安國寺奴。敕聽。解官。乙亥。復以懷貞爲左僕射。兼御史大夫。平章軍國重事。○太平公主使術者言於上曰。彗所以除舊布新。又帝座及心前星皆有變。皇太子當爲天子。上曰。傳德避災。吾志決矣。太平公主及其黨。皆力諫。以爲不可。上曰。中宗之時。羣姦用事。天變屢臻。朕時請中宗擇賢子立之。以應災異。中宗不悅。朕憂恐。數日不食。豈可在彼則能勸之。在己則不能邪。太子聞之。馳入見。自投於地。叩頭請曰。臣以微功。不次爲嗣。懼不克堪。未審陛下遽以大位傳之。何也。上曰。社稷所以再安。吾之所以得天下。皆汝力也。今帝座有災。故以授汝。轉禍爲福。汝何疑邪。太子固辭。上曰。汝爲孝子。何必待朕前。然後即位邪。太子流涕而出。壬辰。制傳位於太子。太子上表固辭。太平公主勸上。雖傳位。猶宜自總大政。上乃謂太子曰。汝以天下事重。欲朕兼理之邪。昔舜禪禹。猶親巡狩。朕雖傳位。豈忘家國。其軍國大事。當兼省之。○八月庚子。玄宗卽位。尊睿宗爲太上皇。上皇自稱曰朕。命曰誥。五日一受朝於太極殿。皇帝自稱曰予。命曰制。敕曰受朝於武德殿。三品以上除授。及大刑政。決於上皇。餘皆決於皇帝。○壬寅。上大聖天后尊號曰聖帝天后。○甲辰。赦天下。改元。○乙巳。於鄭州北置渤海軍。恒定州境置恒陽軍。媯蔚州境置懷柔軍。屯兵五萬。○丙午。立妃王氏爲皇后。以后父仁皎爲大僕卿。仁皎下邳人也。戊申。立皇子許昌王嗣直爲鄴王。眞定王嗣謙爲郢王。○以劉幽求爲右僕射。同中書門下三品。魏知古爲侍中。崔湜爲檢校中書令。○初。河內人王琚。預於王同皎之謀。亡命。傭書於江都。上之爲太子也。琚還長安。選補諸賢主簿。過謝太子。琚至廷中。故徐行高視。宦者曰。殿下在簾內。琚曰。何謂殿下。當今獨有太平公主耳。太子遽召見與語。琚曰。韋庶人弑逆。人心

不服。誅之易耳。太平公主。武后之子。凶猾無比。大臣多爲之用。琚竊憂之。太子引與同榻坐。泣曰。主上同氣。唯有太平言之。恐傷主上之意。不言。爲患日深。爲之奈何。琚曰。天子之孝。異於匹夫。當以安宗廟社稷爲事。蓋主漢昭帝之姊。自幼供養。有罪猶誅之。爲天下者。豈顧小節。太子悅曰。君有何藝。可以與寡人遊。琚曰。能飛煉談嘲。太子乃奏。爲詹事府司直。日與遊處。累遷太子中舍人。及卽位。以爲中書侍郎。是時宰相多太平公主之黨。劉幽求與右羽林將軍張暉。謀以羽林兵誅之。使暉密言於上曰。竇懷貞。崔湜。岑羲。皆因公主得進。日夜爲謀。不軌。若不早圖。一旦事起。太上皇何以得安。請速誅之。臣已與幽求定計。惟俟陛下之命。上深以爲然。暉洩其謀於侍御史鄧光賓。上大懼。遽列上其狀。丙辰。幽求下獄。有司奏。幽求等離間骨肉。罪當死。上爲言。幽求有大功。不可殺。癸亥。流幽求于封州。張暉于峰州。光賓于繡州。初。崔湜爲襄州刺史。密與譙王重福通書。重福遣之金帶。重福敗。湜當死。張說。劉幽求。營護得免。既而湜附太平公主。與公主謀。罷說政事。以左丞分司東都。及幽求流封州。湜諷廣州都督周利貞。使殺之。桂州都督王峻。知其謀。留幽求不遣。利貞屢移牒索之。峻不應。利貞以聞。湜屢逼峻。使遣幽求。幽求謂峻曰。公拒執政。而保流人。勢不能全。徒仰累耳。固請詣廣州。峻曰。公所坐。非可絕於朋友者也。峻因公獲罪。無所恨。竟逗遛不遣。幽求由是得免。○九月。丁卯朔。日有食之。○辛卯。立皇子嗣昇爲陝王。嗣昇母楊氏。士達之曾孫也。王后無子。母養之。○冬十月。庚子。上謁太廟。赦天下。○癸卯。上幸新豐。獵於驪山之下。○辛酉。沙陀金山遣使入貢。沙陀者。處月之別種也。姓朱邪氏。○十一月。乙酉。奚契丹二萬騎。寇漁陽。幽州都督宋璟。閉城不出。虜大掠而去。○上皇誥。遣皇帝巡邊。西自河隴。東及燕薊。選將練卒。甲午。以幽州都督宋璟爲左軍大總管。并州長史薛訥爲中軍大總管。朔方大總管。兵部尚書郭元振爲右軍大總管。○十二月。刑部尚書李日知。請致仕。日知在官。不行捶撻。而事集。刑部



有令史受敕三日。忘不行。日知怒索杖。集羣吏欲捶之。既而謂曰。我欲捶汝。天下人必謂汝能撩李日知。嗔受李日知杖。不得比於人。妻子亦將棄汝矣。遂釋之。吏皆感悅。無敢犯者。脫有稽失。衆共譎之。

開元元年春正月乙亥。誥衛士。自今二十五入軍。五十免。羽林飛騎。竝以衛士簡補。○以吏部尚書蕭至忠爲中書令。○皇帝巡邊改期。所募兵各散遣。約八月復集。竟不成行。○二月庚子夜。開門然燈。又追作去年大酺。大合伎樂。上皇與上。御門樓臨觀。或以夜繼晝。凡月餘。左拾遺華陰嚴挺之。上疏諫。以爲酺者。因人所利。合釀爲歡。今乃損萬人之力。營百戲之資。非所以光聖德。美風化也。乃止。○初高麗既亡。其別種大祚榮。徙居營州。及李盡忠反。祚榮與靺鞨乞四北羽。聚衆東走。阻險自固。盡忠死。武后使將軍李楷固討其餘黨。楷固擊乞四北羽。斬之。引兵踰天門嶺。逼祚榮。祚榮逆戰。楷固大敗。僅以身免。祚榮遂帥其衆。東據東牟山。築城居之。祚榮驍勇善戰。高麗靺鞨之人。稍稍歸之。地方二千里。戶十餘萬。勝兵數萬人。自稱振國王。附于突厥。時奚契丹皆叛。道路阻絕。武后不能討。中宗卽位。遣侍御史張行岌招慰之。祚榮遣子入侍。至是以祚榮爲左驍衛大將軍。渤海郡王。以其所部爲忽汗州。令祚榮兼都督。○庚申。勅以嚴挺之忠直。宣示百官。厚償之。○三月辛巳。皇后親蠶。○晉陵尉楊相如。上疏言時政其略曰。煬帝自恃其彊。不憂時政。雖制敕交行。而聲實舛謬。言同堯舜。迹如桀紂。舉天下之大。一擲而棄之。又曰。隋氏縱欲而亡。太宗抑欲而昌。願陛下詳擇之。又曰。人主莫不好忠正而惡佞邪。然忠正者常疎。佞邪者常親。以至於覆國危身。而不寤者。何哉。誠由忠正者多忤意。佞邪者多順指。積忤生憎。積順生愛。此親疎之所以分也。明主則不然。愛其忤。以收忠賢。惡其順。以去佞邪。則太宗太平之業。將何遠哉。又曰。夫法貴簡而能禁。罰貴輕而必行。陛下方興崇至德。大布新政。請一切除去碎密。不察小過。小過不察。則無煩苛。

大罪不漏。則止奸慝。使簡而難犯。寬而能制。則善矣。上覽而善之。○先是。修大明宮未畢。夏五月庚寅。敕以農務方勤。罷之。以待閑月。○六月丙辰。以兵部尚書郭元振同中書門下三品。○太平公主依上皇之執擅權用事。與上有隙。宰相七人。五出其門。文武之臣。大半附之。與竇懷貞。岑羲。蕭至忠。崔湜。及太子少保薛稷。雍州長史新興王晉。左羽林大將軍常元楷。知右羽林將軍事李慈。左金吾將軍李欽。中書舍人李猷。右散騎常侍賈膺福。鴻臚卿唐峻。及僧慧範等。謀廢立。又與宮人元氏。謀于赤箭粉中。寘毒。進於上。晉德良之孫也。元楷慈數往來主第。相與結謀。王琚言于上曰。事迫矣。不可不速發。左丞張說自東都遣人遺上佩刀。意欲上斷割。荆州長史崔日用入奏事。言於上曰。太平謀逆有日。陛下往在東宮。猶爲臣子。若欲討之。須用謀力。今既光臨大寶。但下一制書。誰敢不從。萬一奸宄得志。悔之何及。上曰。誠如卿言。直恐驚動上皇。日用曰。天子之孝。在於安四海。若奸人得志。則社稷爲墟。安在其爲孝乎。請先定北軍。後收逆黨。則不驚動上皇矣。上以爲然。以日用爲吏部侍郎。秋七月。魏知古告公主。欲以是月四日作亂。令元楷慈。以羽林兵突入武德殿。懷貞至。忠。羲等於南牙舉兵應之。上乃與岐王範。薛王業。郭元振。及龍武將軍王毛仲。殿中少監姜皎。太僕少卿李令問。尚乘奉御王守一。內給事高力士。果毅李守德等。定計誅之。皎。睿之曾孫。令問。靖弟。客師之孫。守一。仁皎之子。力士。潘州人也。甲子。上因王毛仲。取閑廐馬。及兵三百餘人。自武德殿入。虔化門。召元楷慈。先斬之。禽膺福。猷於內客省。以出。執至忠。羲於朝堂。皆斬之。懷貞逃入溝中。自縊死。戮其尸。改姓曰毒。上皇聞變。登承天門樓。郭元振奏。皇帝前奉誥。誅竇懷貞等。無它也。上尋至樓上。上皇乃下詔罪狀懷貞等。因赦天下。惟逆人親黨不赦。薛稷賜死于萬年獄。乙丑。上皇誥。自今軍國政刑。一皆取皇帝處分。朕方無爲養志。以遂素心。是日。徙居百福殿。太平公主逃入山寺。三日乃出。賜死于家。公主諸子。及黨與死者數十人。薛崇簡以



數諫其母。被撻特免死。賜姓李。官爵如故。籍公主家。財貨山積。珍物侔於御府。廐牧羊馬。田園息錢。收之數年不盡。慧範家亦數十萬緡。改新興王晉之姓曰厲。初上謀誅竇懷貞等。召崔湜。將託以心腹。湜弟滌謂湜曰。主上有問。勿有所隱。湜不從。懷貞等既誅。湜與右丞盧藏用俱坐私侍太平公主。湜流竇州。藏用流瀧州。新興王晉臨刑歎曰。本爲此謀者。崔湜。今吾死。湜生。不亦冤乎。會有司鞠宮人元氏。元氏引湜同謀進毒。乃追賜死于荊州。薛稷之子伯陽。以尙主免死。流嶺南。於道自殺。初太平公主與其黨謀廢立。竇懷貞。蕭至忠。岑羲。崔湜。皆以爲然。陸象先獨以爲不可。公主曰。廢長立少。已爲不順。且又失德。若之何不去。象先曰。既以功立。當以罪廢。今實無罪。象先終不敢從。公主怒而去。上既誅懷貞等。召象先謂曰。歲寒知松柏信哉。時窮治公主枝黨。當坐者衆。象先密爲申理。所全甚多。然未嘗自言。當時無知者。百官素爲公主所善。及惡之者。或黜或陟。終歲不盡。丁卯。上御承天門樓。赦天下。己巳。賞功臣郭元振等官爵。第舍金帛有差。以高力士爲右監門將軍。知內侍省事。初太宗定制。內侍省不置三品官。黃衣廩食。守門傳命而已。天后雖女主。宦官亦不用事。中宗時。嬖倖猥多。至是以誅蕭岑功賞之。是後宦官稍增至三千餘人。除三品將軍者浸多。衣緋紫至千餘人。宦官之盛自此始。○壬申。遣益州長史畢構等六人宣撫十道。○乙亥。以左丞張說爲中書令。○庚辰。中書侍郎同平章事陸象先罷爲益州長史。劍南按察使八月癸巳。以封州流人劉幽求爲左僕射。平章軍國大事。○丙辰。突厥可汗默啜遣其子楊我支來求昏。丁巳。許以蜀王女南和縣主妻之。中宗之崩也。同中書門下三品李嶠密表韋后請出相王諸子於外。上卽位於禁中。得其表。以示侍臣。嶠時以特進致仕。或請誅之。張說曰。嶠雖不識逆順。然爲當時之謀。則忠矣。上然之。九月壬戌。以嶠子率更令暢爲虔州刺史。令嶠隨暢之官。○庚午。

以劉幽求同中書門下三品。○丙戌。復置右御史臺。督察諸州罷諸道按察使。○冬十月辛卯。引見京畿縣令。戒以歲飢。惠養黎元之意。○己亥。上幸新豐。癸卯。講武於驪山之下。徵兵二十萬。旌旗連亙五十餘里。以軍容不整。坐兵部尙書郭元振於纛下。將斬之。劉幽求張說跪於馬前。諫曰。元振有大功於社稷。不可殺。乃流新州。斬給事中知禮儀事唐紹。以其制軍禮不肅故也。上始欲立威。亦無殺紹之意。金吾衛將軍李邕。遽宣敕斬之。上尋罷邕官。廢棄終身。時二大臣得罪。諸軍多震懾。失次。惟左軍節度薛訥。朔方道大總管解琬。二軍不動。上遣輕騎召之。皆不得入。其陳上深歎美。慰勉之。甲辰。獵于渭川。上欲以同州刺史姚元之爲相。張說疾之。使御史大夫趙彥昭彈之。上不納。又使殿中監姜皎言於上曰。陛下常欲擇河東總管。而難其人。臣今得之矣。上問爲誰。皎曰。姚元之文武全才。真其人也。上曰。此張說之意也。汝何得面欺罪當死。皎叩頭首服。上卽遣中使召元之詣行在。既至。上方獵。引見。卽拜兵部尙書。同中書門下三品。元之吏事明敏。三爲宰相。皆兼兵部尙書。緣邊屯戍斥候。士馬儲械。無不默記。上初卽位。勵精爲治。每事訪於元之。元之應答如響。同僚唯諾而已。故上專委任之。元之請抑權倖。愛爵賞。納諫諍。却貢獻。不與羣臣褻狎。上皆納之。○乙巳。車駕還京師。○姚元之嘗奏。請序進郎吏。上仰視殿屋。元之再三言之。終不應。元之懼。趨出。罷朝。高力士諫曰。陛下新總萬機。幸臣奏事。當面加可否。奈何一不省察。上曰。朕任元之以庶政。大事當奏聞共議之。郎吏卑秩。乃一一以煩朕邪。會力士宣事至省中。爲元之道上語。元之乃喜。聞者皆服。上識君人之體。左拾遺曲江張九齡。以元之有重望。爲上所信任。奏記勸其遠。諂躁。進純厚。其略曰。任人當才。爲政大體。與之共理。無出此途。而曩之用才。非無知人之鑒。其所以失溺。在緣情之舉。又曰。自君侯職相國之重。持用人之權。而淺中弱植之徒。已延頸企踵而至。諂親戚以求譽。媚賓客以取容。其間豈不有才。所失在於無恥。元之嘉納其言。新興。



王晉之誅也。僚吏皆奔散。惟司功李撝步從。不失在官之禮。仍哭其尸。姚元之聞之曰。樂布之儔也。及為相。擢為尚書郎。○己酉。以刑部尚書趙彥昭為朔方道大總管。○十一月乙丑。劉幽求兼侍中。○辛巳。羣臣上表。請加尊號。為開元神武皇帝。從之。戊子。受冊。○中書侍郎王琚。為上所親厚。羣臣莫及。每進見。侍笑語。逮夜方出。或時休沐。往往遣中使召之。或言於上曰。王琚。權譎縱橫之才。可與之定禍亂。難與之守承平。上由是浸疎之。是月。命琚兼御史大夫。按行北邊諸軍。○十二月庚寅。赦天下。改元。尚書左右僕射為左右丞相。中書省為紫微省。門下省為黃門省。侍中為監。雍州為京兆府。洛州為河南府。長史為尹。司馬為少尹。○甲午。吐蕃遣其大臣來求和。○壬寅。以姚元之兼紫微令。元之避開元尊號。復名崇。○敕都督刺史。都護將之官。皆引面辭畢。側門取進止。○姚崇既為相。紫微令張說懼。乃潛詣岐王申款。它日。崇對於便殿。行微蹇。上問有足疾乎。對曰。臣有腹心之疾。非足疾也。上問其故。對曰。岐王陛下愛為。張說為輔臣。而密乘車入王家。恐為所誤。故憂之。癸丑。說左遷相州刺史。右僕射同中書門下三品劉幽求亦罷。為太子少保。甲寅。以黃門侍郎盧懷慎同紫微黃門平章事。

資治通鑑卷第二百一十

資治通鑑卷第二百一十一

唐紀二十七

玄宗至道大聖大明孝皇帝上之中

開元二年春正月壬申。制選京官有才識者。除都督刺史。都督刺史有政迹者。除京官。使出入常均。永為恒式。○己卯。以盧懷慎檢校黃門監。○舊制。雅俗之樂。皆隸太常。上精曉音律。以太常禮樂之司。不應典倡優雜伎。乃更置左右教坊。以教俗樂。命右驍衛將軍范及為之使。又選樂工數百人。自教法曲於梨園。謂之皇帝梨園弟子。又教宮女使習之。又選伎女置宜春院。給賜其家。禮部侍郎張廷珪。酸棗尉袁孝客。皆上疏。以為上春秋鼎盛。宜崇經術。邇端士。尚樸素。深以悅鄭聲。好遊獵為戒。上雖不能用。咸嘉賞之。○中宗以來。貴戚爭營佛寺。奏度人為僧。兼以偽妄。富戶彊丁。多削髮以避徭役。所在充滿。姚崇上言。佛圖澄不能存趙鳩摩羅什。不能存秦齊襄梁武。未免禍殃。但使蒼生安樂。即是福身。何用妄度。姦人使壞正法。上從之。丙寅。命有司。沙汰天下僧尼。以偽妄還俗者。萬二千餘人。○初。營州都督治柳城。以鎮撫奚契丹。則天之世。都督趙文翹失政。奚契丹攻陷之。是後。寄治幽州東漁陽城。或言。靺鞨奚魯大欲降唐。止以唐不建營州。無所依投。為默啜所侵擾。故且附之。若唐復建營州。則相帥歸化矣。并州長史和戎大武等。軍州節度大使薛訥信之。奏請擊契丹。復置營州。上亦以冷陁之役。欲討契丹。羣臣姚崇等多諫。甲申。以訥同紫微黃門三品。將兵擊契丹。羣臣乃不敢言。○薛王業之舅王仙童。侵暴百姓。御史彈奏。業為之請。敕紫微黃門覆按。姚崇盧



懷慎等奏。仙童罪狀明白。御史所言。無所枉。不可縱捨。上從之。由是貴戚束手。○二月庚寅朔。太史奏。太陽應虧。不虧。姚崇表賀。請書之史冊。從之。○乙未。突厥可汗默啜遣其子同俄特勒。及妹夫火拔頡利發。石阿失畢。將兵圍北庭都護府。都護郭虔瓘擊敗之。同俄單騎逼城下。虔瓘伏壯士於道側。突起斬之。突厥請悉軍中資糧。以贖同俄。聞其已死。慟哭而去。○丁未。敕。自今所在。毋得創建佛寺。舊寺頽壞。應葺者。詣有司陳牒。檢視然後聽之。○閏月。以鴻臚少卿朔方軍副大總管王陵兼安北大都護。朔方道行軍大總管令豐安定遠三受降城。及旁側諸軍。皆受陵節度。徙大都護府於中受降城。置兵屯田。○丁卯。復置十道按察使。以益州長史陸象先等爲之。上思徐有功用法平直。乙亥。以其子大理司直愉爲恭陵令。寶孝謀之子光祿卿翽公希城等。請以己官爵讓愉。以報其德。由是愉累遷。申王府司馬。○丙子。申王成義。請以其府錄事閣楚珪爲其府參軍。上許之。姚崇慮懷慎上言。先嘗得旨云。王公駙馬有所奏。請非墨敕。皆勿行。臣竊以量材授官。當歸有司。若緣親故之恩。得以官爵爲惠。踵習近事。實紊紀綱。事遂寢。由是請謁不行。○突厥石阿失畢既失同俄。不敢歸。癸未。與其妻來奔。以爲右衛大將軍。封燕北郡王。命其妻曰金山公主。○或告太子少保劉幽求。太子詹事鍾紹京。有怨望語。下紫微省按問。幽求等不服。姚崇慮懷慎薛訥言於上曰。幽求等皆功臣。乍就閑職。微有沮喪。人情或然。功業既大。榮寵亦深。一朝下獄。恐驚遠聽。戊子。貶幽求爲睦州刺史。紹京爲果州刺史。紫微侍郎王琚行邊軍未還。亦坐幽求黨。貶澤州刺史。○救涪州刺史周利貞等十三人。皆天后時酷吏。比周興等。情狀差輕。宜放歸艸澤。終身勿齒。○西突厥十姓酋長都擔叛。三月己亥。磧西節度使阿史那獻克碎葉等鎮。擒斬都擔。降其部落二萬餘帳。○御史中丞姜晦。以宗楚客等改中宗遺詔。青州刺史韋安石。太子賓客韋嗣立。刑部尚書趙彥昭。特進致仕李嶠。於時同爲宰相。不能匡正。令監察御史郭震彈之。且

言。彥昭拜巫趙氏爲姑。蒙婦人服。與妻乘車詣其家。甲辰。貶安石爲沔州別駕。嗣立爲岳州別駕。彥昭爲袁州別駕。嶠爲滁州別駕。安石至沔州。晦又奏。安石嘗檢校定陵盜隱官物。下州徵贖。安石歎曰。此祇應須我死耳。憤恚而卒。晦之弟也。○毀天樞。發匠鎔其鐵錢。歷月不盡。先是。韋后亦於天街作石臺高數丈。以頌功德。至是并毀之。○夏四月辛巳。突厥可汗默啜復遣使求昏。自稱乾和永清太駙馬。天上得果報。天男突厥聖天骨咄祿可汗。五月己丑。以歲飢。悉罷員外試檢校官。自今非有戰功。及別勅。毋得注擬。○己酉。吐蕃相全達延遣宰相書。請先遣解琬至河源。正二國封疆。然後結盟。琬嘗爲朔方大總管。故吐蕃請之前。此琬以金紫光祿大夫致仕。復召拜左散騎常侍。而遣之。又命宰相復全達延書。招懷之。琬上言。吐蕃必陰懷叛計。請預屯兵十萬於秦渭等州。以備之。○黃門監魏知古。本起小吏。因姚崇引薦。以至同爲相。崇意輕之。請知古攝吏部尚書。知東都選事。遣吏部尚書宋璟於門下過官。知古銜之。崇二子分司東都。恃其父有德於知古。頗招權請託。知古歸。悉以聞。它日。上從容問崇。卿子才性何如。今何官也。崇揣知上意。對曰。臣有二子。兩在東都。爲人多欲而不謹。是必以事干魏知古。臣未及問之耳。上始以崇必爲其子隱。及聞崇奏。喜問。卿安從知之。對曰。知古微時。臣卵而翼之。臣子愚。以爲知古必德臣。容其爲非。故敢于之耳。上於是崇爲無私。而薄知古。崇欲斥之。崇固請曰。臣子無狀。撓陛下法。陛下赦其罪。已幸矣。苟因臣逐知古。天下必以陛下爲私於臣。累聖政矣。上乃許之。辛亥。知古罷爲工部尚書。○宋王成器。申王成義。於上見也。岐王範。薛王業。上之弟也。幽王守禮。上之從兄也。上素友愛。近世帝王莫能及。初卽位。爲長枕大被。與兄弟同寢。諸王每旦朝於側門。退則相從宴飲。鬪雞擊毬。或獵於近郊。遊賞別墅。中使存問。相望於道。上聽朝罷。多從諸王遊。在禁中。拜跪如家人禮。飲食起居。相與同之。於殿中設五幄。與諸王更處其中。或講論賦詩。間以飲酒博奕遊獵。



或自執絲竹成器善笛。範善琵琶。與上更奏之。諸王或有疾。上為之終日不食。終夜不寢。業嘗疾。上方臨朝。須臾之間。使者十返。上親為業煮藥。回飆吹火。誤燕上。須左右驚救之。上曰。但使王飲此藥而愈。須何足惜。成器尤恭慎。未嘗議及時政。與人交結。上愈信重之。故讒間之言。無自而入。然專以聲色畜養。娛樂之。不任以職事。羣臣以成器等地逼。請循故事。出刺外州。六月丁巳。以宋王成器兼岐州刺史。申王成義兼幽州刺史。幽王守禮兼虢州刺史。令到官。但領大綱。自餘州務。皆委上佐主之。是後。諸王為都護。都督。刺史者。竝準此。○丙寅。吐蕃使其宰相尚飲藏。來獻盟書。○上以風俗奢靡。秋七月乙未。制乘輿服御。金銀器玩。宜令有司銷毀。以供軍國之用。其珠玉錦繡。焚于殿前。后妃以下。皆毋得服珠玉錦繡。戊戌。敕百官所服帶及酒器。馬銜。鑾三品以上。聽飾以玉。四品以金。五品以銀。自餘皆禁之。婦人服飾。從其夫子。其舊成錦繡。聽染為皂。自今天下。更毋得采珠玉。織錦繡等物。違者杖一百。工人減一等。罷兩京織錦坊。

臣光曰。明皇之始欲為治。能自刻厲節儉。如此。晚節猶以奢敗。甚哉奢靡之易以溺人也。詩云。靡不有初。鮮克有終。可不慎哉。

薛訥與左監門衛將軍杜賓客。定州刺史崔宣道等。將兵六萬。出檀州。擊契丹。賓客以為士卒盛夏負戈。甲齋資糧。深入寇境。難以成功。訥曰。盛夏草肥。羔犢孳息。因糧於敵。正得天時。一舉滅虜。不可失也。行至灤水山峽中。契丹伏兵。遮其前後。從山上擊之。唐兵大敗。死者什八九。訥與數十騎。突圍得免。虜中嗤之。謂之薛婆。崔宣道將後軍。聞訥敗。亦走。訥歸罪於宣道。及胡將李思敬等八人。制悉斬之於幽州。庚子。敕免訥死。削除其官爵。獨赦杜賓客之罪。○壬寅。以北庭都護郭虔瓘為涼州刺史。河西諸軍州節度使。○果州刺史鍾紹京。心怨望。數上疏。妄陳休咎。乙巳。貶漆州刺史。○丁未。房州刺史襄王重茂薨。輟朝三日。追諡曰。殤皇。

帝。○戊申。禁百官家。毋得與僧尼道士往還。壬子。禁人間鑄佛寫經。○宋王成器等。請獻與慶坊宅。為離宮。甲寅。制許之。始作興慶宮。仍各賜成器等宅。環於宮側。又於宮西南置樓。題其西曰。花萼相輝之樓。南曰。勤政務本之樓。上或登樓。聞王奏樂。則召升樓同宴。或幸其所。居。盡歡賞賚優渥。○乙卯。以岐王範兼絳州刺史。薛王業兼同州刺史。仍敕宋王以下。每季二人入朝。周而復始。○民間訛言。上采擇女子。以充掖庭。上聞之。八月乙丑。令有司具車牛於崇明門。自選後宮無用者。載還其家。敕曰。燕寢之內。尚令罷遣。閭閻之間。足可知悉。○乙亥。吐蕃將盆達延。乞力徐。帥眾十萬。寇臨洮。軍蘭州。至于渭源。掠取牧馬。命薛訥。白衣攝左羽林將軍。為隴右防禦使。以右驍衛將軍常樂。郭知運為副使。與大僕少卿王峻。帥兵擊之。辛巳。大募勇士。詣河隴。就訥教習。初。鄯州都督楊矩。以九曲之地。與吐蕃。其地肥饒。吐蕃就之。畜牧。因以入寇。矩悔懼自殺。○乙酉。太子賓客薛謙光。獻武后所製豫州鼎銘。其末云。上玄降鑒。方建隆基。以為上受命之符。姚崇表賀。且請宣示史官。頒告中外。

臣光曰。日食不驗。太史之過也。而君臣相賀。是誣天也。采偶然之文。以為符命。小臣之諂也。而宰相因而實之。是侮其君也。上誣於天下。侮其君。以明皇之明。姚崇之賢。猶不免於是。豈不惜哉。

九月戊申。上幸驪山溫湯。○敕以歲稔。傷農。令諸州修常平倉法。江嶺淮浙劍南。地下濕。不堪貯積。不在此例。○突厥可汗默啜衰老。昏虐愈甚。壬子。葛邏祿等部落。詣涼州降。○冬十月。吐蕃復寇渭源。丙辰。上下詔。欲親征。發兵十餘萬人。馬四萬匹。○戊午。上還宮。○甲子。薛訥與吐蕃戰于武街。大破之。時大僕少卿隴右羣牧使王峻。帥所部二千人。與訥會。擊吐蕃。盆達延將吐蕃兵十萬。屯大來谷。峻選勇士七百。衣胡服。夜襲之。多置鼓角於其後五里。前軍遇敵大呼。後人鳴鼓角以應之。虜以為大軍至。驚懼。自相殺傷。死者萬計。訥時在武街。去大



來谷二十里。虜軍塞其中間。晡復夜出襲之。虜大潰。始得與訥軍合。追奔至洮水。復戰于長城堡。又敗之。前後殺獲數萬人。豐安軍使王海賓戰死。戊辰。姚崇、盧懷慎等奏。頃者吐蕃以河爲境。神龍中。尙公主。遂踰河築城。置獨山九曲兩軍。去積石三百里。又於河上造橋。今吐蕃既叛。宜毀橋拔城。從之。以王海賓之子忠嗣爲朝散大夫。尙輦奉御。養之宮中。○己巳。突厥可汗默啜。又遣使求昏。上許以來歲迎公主。○突厥十姓。胡祿屋等諸部。詣北庭請降。命都護郭虔瓘撫存之。○乙酉。命左驍衛郎將尉遲瓌。使于吐蕃。宣慰金城公主。吐蕃遣其大臣宗俄。因牙。至洮水。請和用敵國禮。上不許。自是連歲犯邊。○十一月。辛卯。葬殤皇帝。○丙申。遣左散騎常侍解琬。詣北庭宣慰突厥降者。隨便宜區處。十二月。壬戌。沙陀金山入朝。○甲子。置隴右節度大使。須嗣部奉河渭蘭臨武洮岷郭壘宕十二州。以隴右防禦副使郭知運爲之。○乙丑。立皇子嗣眞爲鄆王。嗣初爲鄂王。嗣主爲鄆王。辛巳。立郢王嗣謙爲皇太子。嗣眞上之長子。母曰劉華妃。嗣謙次子也。母曰趙麗妃。麗妃以倡進。有寵于上。故立之。○是歲。置幽州節度。經略鎮守大使。領幽易平檀媯燕六州。○突騎施可汗守忠之弟遮弩。恨所分部落少於其兄。遂叛入突厥。請爲鄉導。以伐守忠。默啜遣兵二萬擊守忠。虜之而還。謂遮弩曰。汝叛其兄。何有於我。遂并殺之。

三年春正月癸卯。以盧懷慎檢校吏部尙書兼黃門監。懷慎清謹儉素。不營資產。雖貴爲卿相。所得俸賜。隨散親舊。妻子不免飢寒。所居不蔽風雨。姚崇嘗有子喪。謁告十餘日。政事委積。懷慎不能決。惶恐入謝於上。上曰。朕以天下事委姚崇。以卿坐鎮雅俗耳。崇既出。須臾裁決俱盡。頗有得色。顧謂紫微舍人齊澣曰。予爲相。可比何人。澣未對。崇曰。何如管晏。澣曰。管晏之法。雖不能施於後。猶能沒身。公所爲法。隨復更之。似不及也。崇曰。然則竟如何。澣曰。公可謂救時之相耳。崇喜投筆曰。救時之相。豈易得乎。懷慎與崇同爲相。自以才不及崇。每事

推之。時人謂之伴食宰相。

臣光曰。昔鮑叔之於管仲。子皮之於子產。皆位居其上。能知其賢而下之。授以國政。孔子美之。曹參自謂不及蕭何。一遵其法。無所變更。漢業以成。夫不肖用事。爲其僚者。愛身保祿而從之。不顧國家之安危。是誠罪人也。賢智用事。爲其僚者。愚惑以亂其治。專固以分其權。娼嫉以毀其功。愎戾以竊其名。是亦罪人也。崇、唐之賢相。懷慎與之同心勳力。以濟明皇太平之政。夫何罪哉。秦誓曰。如有一介。斷斷猗。無它技。其心休休焉。其如有容。人之有技。若己有之。人之彥聖。其心好之。不啻如自其口出。寔能容之。以保我子孫。黎民亦職有利哉。懷慎之謂矣。

御史大夫宋璟。坐監朝堂杖人杖輕。貶睦州刺史。○突厥十姓降者。前後萬餘帳。高麗莫離支文簡。十姓之壻也。二月。與跌跌都督思泰等。亦自突厥帥衆來降。制皆以河南地處之。○三月。胡祿屋酋長支旬忌等入朝。上以十姓降者浸多。夏四月。庚申。以右羽林大將軍薛訥爲涼州鎮大總管。赤水等軍。竝受節度。居涼州。左衛大將軍郭虔瓘爲朔州鎮大總管。和戎等軍。竝受節度。居并州。勒兵以備默啜。默啜發兵擊葛邏祿。胡祿屋、鼠尼施等屢破之。敕北庭都護湯嘉惠。左散騎常侍解琬等發兵救之。五月。壬辰。敕嘉惠等與葛邏祿。胡祿屋、鼠尼施。及定邊道大總管阿史那獻。互相應援。○山東大蝗。民或於田旁焚香膜拜。設祭而不敢殺。姚崇奏。遣御史督州縣捕而瘞之。議者以爲蝗衆多。除不可盡。上亦疑之。崇曰。今蝗滿山東。河南北之人。流亡殆盡。豈可坐視食苗。曾不救乎。借使除之不盡。猶勝養以成災。上乃從之。盧懷慎以爲殺蝗太多。恐傷和氣。崇曰。昔楚莊吞蛭而愈疾。孫叔殺蛇而致福。奈何不忍於蝗。而忍人之飢死乎。若使殺蝗有禍。崇請當之。○秋七月。庚辰朔。日有食之。○上謂宰相曰。朕每讀書。有所疑滯。無從質問。可選儒學之士。日使入內侍讀。盧懷慎薦太常卿馬懷素。



九月戊寅。以懷素爲左散騎常侍。使與右散騎常侍褚無量。更日侍讀。每至閣門。令乘肩輿以進。或在別館道遠。聽于宮中。乘馬親送迎之。待以師傅之禮。以無量羸老。特爲之造腰輿。在內殿。令內侍舁之。九姓思結都督磨散等來降。己未。悉除官遣還。○西南蠻寇邊。遣右驍衛將軍李玄道發戎瀘夔巴梁鳳等州兵三萬人。并舊屯兵討之。○壬戌。以涼州大總管薛訥爲朔方道行軍大總管。大僕卿呂延祚。靈州刺史杜賓客。副之。以討突厥。○甲子。上幸鳳泉湯。十一月己卯。還京師。○劉幽求自杭州刺史徙郴州刺史。憤恚。甲申。卒于道。○丁酉。以左羽林大將軍郭虔瓘兼安西大都護。四鎮經略大使。虔瓘請自募關中兵萬人。詣安西討擊。皆給遞馱及熟食。救許之。將作大匠韋湊。上疏以爲今西域服從。雖或時有小盜竊。舊鎮兵足以制之。關中常宜充實。以彊幹弱枝。自頃西北二虜寇邊。凡在丁壯。征行略盡。豈宜更募驍勇。遠資荒服。又一萬征人。行六千餘里。咸給遞馱熟食。道次州縣。將何以供。秦隴之西。戶口漸少。涼州已往。沙磧悠然。遣彼居人。如何取濟。縱令必克。其獲幾何。儻稽天誅。毋乃甚損。請計所用所得。校其多少。則知利害。昔唐堯之代。兼愛夷夏。中外乂安。漢武窮兵遠征。雖多克獲。而中國疲耗。今論帝王之盛德者。皆歸唐堯。不歸漢武。況邀功不成者。復何足比議乎。時姚崇亦以虔瓘之策爲不然。既而虔瓘卒無功。○初監察御史張孝嵩。奉使廓州還。陳積西利害。請往察其形勢。上許之。聽以便宜從事。拔汗那者。古烏孫也。內附歲久。吐蕃與大食共立。阿了達爲王。發兵攻之。拔汗那王兵敗。奔安西求救。孝嵩謂都護呂休璟曰。不救則無以號令西域。遂帥旁側戎落兵萬餘人。出龜茲西數千里。下數百城。長驅而進。是月。攻阿了達于連城。孝嵩自擐甲督士卒急攻。自巳至酉。屠其三城。俘斬千餘級。阿了達與數騎逃入山谷。孝嵩傳檄諸國。威振西域。大食康居大宛罽賓等八國。皆遣使請降。會有言其賊污者。坐繫涼州獄。貶靈州兵曹參軍。○京兆尹崔日知貪暴不法。御史大夫李傑將糾之。日知反

構傑罪。十二月。侍御史楊瑒奏曰。若糾彈之。司使奸人得而恐。則御史臺可廢矣。上遽命傑視事如故。貶日知爲歙縣丞。○或上言。按察使徒煩擾公私。請精簡刺史縣令。停按察使。上命召尚書省官議之。姚崇以爲今止擇十使。猶患未盡得人。況天下三百餘州。縣多數倍。安得刺史縣令。皆稱其職乎。乃止。○尚書左丞韋瓘奏。郎官多不舉職。請沙汰改授它官。瓘尋出爲刺史。宰相奏擬冀州。改改小州。姚崇奏言。臺郎寬怠。及不稱職。瓘請沙汰。乃是奉公。臺郎甫爾改官。瓘即貶黜於外。議者皆謂郎官謗傷。臣恐後來左右丞。指以爲戒。則省事何從而舉矣。伏望聖慈詳察。使當官者無所疑懼。乃除冀州刺史。○突騎施守忠既死。默啜兵還。守忠部將蘇祿鳩集餘衆。爲之會長。蘇祿頗善綏撫。十姓部落稍稍歸之。有衆二十萬。遂據有西方。尋遣使入見。是歲。以蘇祿爲左羽林大將軍。金方道經略大使。○皇后妹夫尚衣奉御長孫昕。以細故與御史大夫李傑不協。

四年春正月。昕與其妹夫楊仙玉於里巷伺傑而毆之。傑上表自訴曰。髮膚見毀。雖則痛身。冠冕被陵。誠爲辱國。上大怒。命於朝堂杖殺。以謝百僚。仍以敕書慰傑曰。昕等朕之密戚。不能訓導。使陵犯衣冠。雖寘以極刑。未足謝罪。卿宜以剛腸疾惡。勿以凶人介意。○丁亥。宋王成器更名憲。申王成義更名撝。○乙酉。隴右節度使郭虔瓘奏。奴石良才等八人。皆有戰功。請除遊擊將軍。敕下。盧懷慎等奏曰。郭虔瓘恃其微效。輒侮彝章。爲奴請五品實亂綱紀。不可許。上從之。○丙午。以鄜王嗣真爲安北大都護。安撫河東關內隴右諸蕃大使。以安北大都護張知運爲之副。陝王嗣昇爲安西大都護。安撫河西四鎮諸蕃大使。以安西都護郭虔瓘爲之副。二王皆不出閣。諸王遙領節度。自此始。○二月丙辰。上幸驪山溫湯。○吐蕃圍松州。○丁卯。上還宮。○辛未。以尚書右丞倪若水爲汴州刺史。兼河南採訪使。上雖欲重都督刺史。選京官才望者爲之。然當時士大夫猶輕外任。揚州採訪使班景倩入爲大理少卿。過



大梁。若水餞之行。立望其行塵。久之乃返。謂官屬曰。班生此行。何異登仙。○癸酉。松州都督孫仁獻襲擊吐蕃於城下。大破之。○上嘗遣宦官詣江南。取鵝鵝鸚鵡等。欲置苑中。使者所至。煩擾。道過汴州。倪若水上言。今農桑方急。而羅捕禽鳥。以供園池之翫。遠自江嶺。水陸傳送。食以粱肉。道路觀者。豈不以陛下賤人而貴鳥乎。陛下當以鳳皇爲凡鳥。麒麟爲凡獸。況鵝鵝鸚鵡。曷足貴也。上手敕謝。若水賜帛四十段。縱散其鳥。○山東蝗復大起。姚崇又命捕之。倪若水謂蝗乃天災。非人力所及。宜修德以禳之。劉聰時。常捕埋之。爲害益甚。拒御史不從。其命崇牒若水曰。劉聰僞主。復不勝妖。今日聖朝。妖不勝德。古之良守。蝗不入境。若其修德可免。彼豈無德致然。若水乃不敢違。夏五月甲辰。勅委使者詳察州縣捕蝗勤惰者。各以名聞。由是連歲蝗災不至。大飢。○或言於上曰。今歲選叙大濫。縣令非才。及入謝。上悉召縣令於宣政殿。試以理人策。惟鄆城今韋濟詞理第一。擢爲醴泉令。餘二百餘人。不入第。且令之官。四十五人。放歸學問。吏部侍郎盧從愿。左遷豫州刺史。李朝隱。左遷滑州刺史。從愿。典選六年。與朝隱皆名稱職。初高宗之世。馬載。裴行儉。在吏部。最有名。時人稱吏部前有馬裴。後有盧李。濟。嗣立之子也。○有胡人上言。海南多珠翠奇寶。可往營致。因言市舶之利。又欲往師子國。求靈藥。及善醫之嫗。寘之宮掖。上命監察御史楊範臣。與胡人偕往。求之。範臣從容奏曰。陛下前年焚珠玉錦繡。示不復用。今所求者。何以異於所焚者乎。彼市舶。與商賈爭利。殆非王者之體。胡藥之性。中國多不能知。況於胡嫗。豈宜寘之宮掖。夫御史。天子耳目之官。必有軍國大事。臣雖觸冒炎瘴。死不敢辭。此特胡人眩惑求媚。無益聖德。竊恐非陛下之意。願熟思之。上遽自引咎。慰諭而罷之。○六月癸亥。上皇崩于百福殿。己巳。以上女萬安公主爲女官。欲以追福。○癸酉。拔曳固斬突厥可汗默啜首來獻。時默啜北擊拔曳固。大破之。於獨樂水。恃勝輕歸。不復設備。遇拔曳固。逆卒頡質略。自柳林突出。斬之。時大武軍子

將郝靈荃。奉使在突厥。頡質略以其首歸之。與偕詣闕。懸其首於廣街。拔曳固。回紇。同羅。醫僕固五部。皆來降。置於大武軍北。默啜之子小可汗立。骨咄祿之子闕特勤。擊殺之。及默啜諸子親信。略盡。立其兄右賢王默棘連。是爲毗伽可汗。國人謂之小殺。毗伽以國固讓闕特勤。闕特勤不受。乃以爲左賢王。專典兵馬。○秋七月壬辰。太常博士陳貞節。蘇獻。以太廟七室已滿。請遷中宗神主於別廟。奉睿宗神主於太廟。從之。又奏。遷昭成皇后神主於太廟。肅明皇后留祀於儀坤廟。八月乙巳。立中宗廟於太廟之西。○辛未。契丹李失活。奚李大酺。帥所部來降。制以失活爲松漠郡王。行金吾大將軍。兼松漠都督。因其八部落酋長。拜爲刺史。又以將軍薛泰督軍。鎮撫之。大酺爲饒樂郡王。行金吾大將軍。兼饒樂都督。失活。盡忠之從父弟也。○吐蕃復請和。上許之。○突厥默啜既死。奚契丹拔曳固等諸部。皆內附。突騎施蘇祿復自立爲可汗。突厥部落多離散。毗伽可汗患之。乃召默啜時牙官噉欲谷。以爲謀主。噉欲谷年七十餘。多智略。國人信服之。突厥降戶處河曲者。聞毗伽立。多復叛歸之。并州長史王峻。上言。此屬徒以其國喪亂。故相帥來降。若彼安寧。必復叛去。今置之河曲。此屬桀黠。實難制御。往往不受軍州約束。興兵剽掠。聞其逃者已多。與虜聲問往來。通傳委曲。乃是畜養此屬。使爲間諜。日月滋久。奸詐逾深。窺伺邊隙。將成大患。虜騎南牧。必爲內應。來逼軍州。表裏受敵。雖有韓彭。不能取勝矣。願以秋冬之交。大集兵衆。諭以利害。給其資糧。徙之內地。二十年外。漸變舊俗。皆成勁兵。雖一時暫勞。然永久安靖。比者。守邊將吏。及出境使人。多爲諛辭。皆非事實。或云。北虜破滅。或云。降戶妥帖。皆欲自衒其功。非能盡忠。狗國。願察斯利口。勿忘遠慮。議者必曰。國家曩時。已嘗寘降戶於河曲。皆獲安寧。今何所疑。此則事同時異。不可不察。曩者頡利既亡。降者無復異心。故得久安無變。今北虜尚存。此屬或畏其威。或懷其惠。或其親屬。豈樂南來。較之彼時。固不侔矣。以臣愚慮。徙之內地。上也。多屯土馬。大爲之備。華夷



相參。人勞費廣。次也。正如今日下也。願審茲三策。擇利而行。縱使因徙逃亡。得者皆爲唐有。若留至河水。恐必有變。疏奏未報。降戶跌跌思泰。阿悉爛等。果叛。冬十月甲辰。命朔方大總管薛訥發兵追討之。王峻引并州兵。西濟河。晝夜兼行。追擊叛者。破之。斬獲三千級。先是。單于副都護張知運。悉收降戶兵仗。令度河而南。降戶怨怒。御史中丞姜晦。爲巡邊使。降戶訴無弓矢。不得射獵。晦悉還之。降戶得之。遂叛。張知運不設備。與之戰于青剛嶺。爲虜所擒。欲送突厥。至綏州境。將軍郭知運。以朔方兵邀擊之。大破其衆於黑山。呼延谷。虜釋張知運而去。上以張知運喪師。斬之以徇。毗伽可汗既得思泰等。欲南入爲寇。噉欲谷曰。唐主英武。民和年豐。未有間隙。不可動也。我衆新集。力尙疲羸。且當息養數年。始可觀變而舉。毗伽又欲築城。并立寺觀。噉欲谷曰。不可。突厥人徒稀少。不及唐家百分之一。所以能與爲敵者。正以逐水草。居處無常。射獵爲業。人皆習武。彊則進兵抄掠。弱則竄伏山林。唐兵雖多。無所施用。若築城而居。變更舊俗。一朝失利。必爲所滅。釋老之法。教人仁弱。非用武爭勝之術。不可崇也。毗伽乃止。○庚午。葬大聖皇帝于橋陵。廟號睿宗。御史大夫李傑。護橋陵作判官。王旭犯賊。傑按之。反爲所構。左遷衢州刺史。○十一月己卯。黃門監盧懷慎疾亟。上表薦宋璟。李傑。李朝隱。盧從愿。竝明時重器。所坐者小。所弃者大。望垂矜錄。上深納之。乙未。薨。家無餘蓄。惟一老蒼頭。請自鬻以辯喪事。○丙申。以尙書左丞源乾曜爲黃門侍郎。同平章事。姚崇無居第。寓居罔極寺。以病牯謁告。上遣使問飲食起居狀。日數十輩。源乾曜奏事。或稱旨。上輒曰。此必姚崇之謀也。或不稱旨。輒曰。何不與姚崇議之。乾曜常謝實然。每有大事。上常令乾曜就寺問崇。癸卯。乾曜請遷崇於四方館。仍聽家人入侍疾。上許之。崇以四方館有簿書。非病者所宜處。固辭。上曰。設四方館爲官吏也。使卿居之。爲社稷也。恨不可使卿居禁中耳。此何足辭。崇子光祿少卿彝。宗正少卿昇。廣通賓客。頗受饋遺。爲時所譏。主書趙誨。爲崇所親信。

受胡人賂。事覺。上親鞫問。下獄當死。崇復營救。上由是不悅。會曲赦京城。敕特標誨名。杖之一百。流嶺南。崇由是憂懼。數請避相位。薦廣州都督宋璟自代。十二月。上將幸東都。以璟爲刑部尙書。西京留守。令馳驛詣闕。遣內侍將軍楊思勗迎之。璟風度凝遠。人莫測其際。在塗竟不與思勗交言。思勗素貴。幸歸訴于上。上嗟歎良久。益重璟。○丙辰。上幸驪山溫湯。乙丑。還宮。○閏月己亥。姚崇罷爲開府儀同三司。源乾曜罷爲京兆尹。西京留守。以刑部尙書宋璟守吏部尙書。兼黃門監。紫微侍郎蘇頌。同平章事。璟爲相。務在擇人。隨材授任。使百官各稱其職。刑賞無私。敢犯顏直諫。上甚敬憚之。雖不合意。亦曲從之。突厥默啜。自則天世爲中國患。朝廷旰食。傾天下之力。不能克。郝靈荃得其首。自謂不世之功。璟以天子好武功。恐好事者競生。心微倖。痛抑其賞。逾年始授郎將。靈荃慟哭而死。璟與蘇頌相得甚厚。頌遇事多讓於璟。璟每論事。則頌爲之助。璟嘗謂人曰。吾與蘇氏父子。皆同居相府。僕射寬厚。誠爲國器。然獻可替否。吏事精敏。則黃門過其父矣。姚宋相繼爲相。崇善應變。成務。璟善守法。持正。二人志操不同。然協心輔佐。使賦役寬平。刑罰清省。百姓富庶。唐世賢相。前稱房杜。後稱姚宋。它人莫得比焉。二人每進見。上輒爲之起。去則臨軒送之。及李林甫爲相。雖寵任過於姚宋。然禮遇殊卑薄矣。紫微舍人高仲舒。博通典籍。齊澣。練習時務。姚宋每坐二人。以質所疑。既而歎曰。欲知古問。高君欲知今問。齊君可以無闕政矣。○辛丑。罷十道按察使。舊制。六品以下官。皆委尙書省奏擬。是歲始制。員外郎。御史。起居。遺補。不擬。五年春正月癸卯。太廟四室壞。上素服避正殿。時上將幸東都。以問宋璟。蘇頌對曰。陛下三年之制未終。遽爾行幸。恐未契天心。災異爲戒。願且停車。駕又問姚崇。對曰。太廟屋材皆荷堅時物。歲久朽腐而壞。適與行期相會。何足異也。且王者以四海爲家。陛下以關中不稔。幸東都。百司供擬已備。不可失信。但應遷神主于太極殿。更修太廟。如期自行耳。上大喜。從之。



賜崇絹二百匹。己酉，上行享禮於太極殿，命姚崇五日一朝，仍入閣供奉，恩禮更厚。有太政，輒訪焉。右散騎常侍褚無量上言：隋文帝富有天下，遷都之日，豈取苻氏舊材，以立太廟乎？此特諛臣之言耳。願陛下克謹天戒，納忠諫，遠諂諛，上弗聽。辛亥，行幸東都，過崑谷，道隘不治。上欲免河南尹，及知頓使官宋璟諫曰：陛下方事巡幸，今以此罪二臣，臣恐將來民受其弊。上遽命釋之。璟曰：陛下罪之，以臣言而免之，是臣代陛下受德也。請令待罪朝堂，而後赦之。上從之。○二月，甲戌，至東都，赦天下。○奚契丹既內附，貝州刺史宋慶禮建議，請復營州。三月，庚戌，制復置營州都督於柳城，兼平盧軍使，管內州縣鎮戍，皆如其舊。以太子詹事姜師度為營田支度使，與慶禮等築之。三旬而畢。慶禮清勤嚴肅，開屯田八十餘所，招安流散，數年之間，倉廩充實，市里浸繁。○夏，四月，甲戌，賜奚王李大酺妃辛氏號固安公主。○己丑，皇子嗣一卒，追立為夏王。諡曰悼，嗣一母武惠妃，攸止之女也。○突騎施酋長左羽林大將軍蘇祿部衆浸彊，雖職貢不乏，陰有窺邊之志。五月，十姓可汗阿史那獻欲發葛邏祿兵擊之。上不許。○初，上微時，與太常卿姜皎親善，及誅竇懷貞等，皎預有功，由是寵遇。羣臣莫及。常出入臥內，與后妃連榻宴飲，賞賜不可勝紀。弟晦亦以皎故，累遷吏部侍郎。宋璟言：皎兄弟權寵太盛，非所以安之。上亦以為然。秋，七月，庚子，以晦為宗正卿，因下制曰：西漢諸將，以權貴不全。南陽故人，以優閑自保。皎宜放歸田園，散官勳封皆如故。○壬寅，隴右節度使郭知運大破吐蕃於九曲。○安西副大都護湯惠奏：突騎施引大食吐蕃謀取四鎮，圍鉢換及大石城，已發三姓葛邏祿兵與阿史那獻擊之。○并州長史張嘉貞上言：突厥九姓新降者，散居太原以北，請宿重兵以鎮之。辛酉，置天兵軍於并州，集兵八萬，以嘉貞為天兵軍大使。○太常少卿王仁惠奏：則天立明堂，不合古制。又明堂尚質，而窮極奢侈，密邇宮掖，人神雜擾。甲子，制復以明堂為乾元殿。冬至，元日，受朝賀。季秋大享，復就圓丘。○九月，中書門下

省及侍中，皆復舊名。○貞觀之制，中書門下及三品官入奏事，必使諫官、史官隨之。有失則匡正，美惡必記之。諸司皆於正牙奏事，御史彈百官，服豸冠，對仗讀彈文。故大臣不得專君，而小臣不得為讒慝。及許敬宗、李義府用事，政多私僻，奏事官多俟仗下，於御坐前屏左右，密奏。監奏御史及待制官，遠立以俟其退。諫官、御史皆隨仗出，仗下後事不復預聞。武后以法制羣下，諫官、御史得以風聞言事，自御史大夫至監察，得互相彈奏，率以險詖相傾覆。及宋璟為相，欲復貞觀之政。戊申，制自今事非的須祕密者，皆令對仗奏聞。史官自依故事。○冬，十月，癸酉，伊闕人孫平子上言：春秋譏魯躋僖公，今遷中宗於別廟，而祀睿宗，正與魯同。兄臣於弟，猶不可躋。況弟臣於兄，可躋之於兄上乎？若以兄弟同昭，則不應出兄置於別廟。願下羣臣博議。遷中宗入廟，事下禮官。太常博士陳貞節、馮宗、蘇獻議以為七代之廟，不數兄弟，殷代或兄弟四人，相繼為君，若數以為代，則無祖禰之祭矣。今睿宗之室，當亞高宗，故為中宗，特立別廟。中宗既升新廟，睿宗乃祔高宗，何嘗躋居中宗之上，而平子引躋僖公為證，誣罔聖朝，漸不可長。時論多是平子。上亦以為然。故議久不決。蘇獻、趙之從祖兄也。故趙右之卒，從禮官議，平子論之不已。請為康州都城尉。○新廟成，戊寅，神主祔廟。○上命宋璟、蘇頌為諸皇子制名及國邑之號。又令別制一佳名及佳號，進之。璟等上言：七子均養，著於國風。今臣等所制名號，各三十餘，輒混同以進，以彰陛下覆燾無偏之德，上甚善之。○十一月，丙申，契丹王李失活入朝。十二月，壬午，以東平王外孫楊氏為永樂公主。妻之。祕書監馬懷素奏：省中書，散亂訛缺，請選學術之士二十人，整比校補，從之。於是搜訪逸書，選吏繕寫。命國子博士尹知章、桑泉、尉韋述等二十人，同刊正。以左散騎常侍褚無量為之使，於乾元殿前編校羣書。



開元六年春正月辛丑突厥毗伽可汗來請和許之○廣州吏民為宋璟立遺愛碑璟上言臣在州無它異迹今以臣光寵成彼諂諛欲革此風望自臣始請敕下禁止上從之於是它州皆不敢立○辛酉敕禁惡錢重二銖四分以上乃得行斂人間惡錢鎔之更鑄如式錢於是京城紛然賣買殆絕宋璟蘇頲請出太府錢二萬緡置南北市以平價買百姓不售之物可充官用者及聽兩京百官豫假俸錢庶使良錢流布人間從之○二月戊子移蔚州橫野軍於山北屯兵三萬為九姓之援以拔曳固都督頡質略同羅都督毗伽未啜豐都督比言回紇都督夷健頡利發僕固都督曳勒歌等各出騎兵為前後左右軍討擊大使皆受天兵軍節度有所討捕量宜追集無事各歸部落營生仍常加存撫○三月乙巳徵嵩山處士盧鴻入見拜諫議大夫鴻固辭○天兵軍使張嘉貞入朝有告其在軍奢僭及贓賄者按驗無狀上欲反坐告者嘉貞奏曰今若罪之恐塞言路使天下之事無由上達願特赦之其人遂得減死上由是以嘉貞為忠有大用之意○有薦山人范知璿文學者并獻其所為文宋璟判之曰觀其良宰論頗涉佞諛山人當極言讜議豈宜偷合苟容文章若高自宜從選舉求試不可別奏○夏四月戊子河南參軍鄭銑朱陽丞郭仙舟投匭獻詩敕曰觀其文理乃崇道法至於時用不切事情宜各從所好竝罷官度為道士○五月辛亥以突騎施都督蘇祿

資治通鑑卷第二百一十一

資治通鑑卷第二百一十二

唐紀二十八

玄宗至道大聖大明孝皇帝上之下

開元六年春正月辛丑突厥毗伽可汗來請和許之○廣州吏民為宋璟立遺愛碑璟上言臣在州無它異迹今以臣光寵成彼諂諛欲革此風望自臣始請敕下禁止上從之於是它州皆不敢立○辛酉敕禁惡錢重二銖四分以上乃得行斂人間惡錢鎔之更鑄如式錢於是京城紛然賣買殆絕宋璟蘇頲請出太府錢二萬緡置南北市以平價買百姓不售之物可充官用者及聽兩京百官豫假俸錢庶使良錢流布人間從之○二月戊子移蔚州橫野軍於山北屯兵三萬為九姓之援以拔曳固都督頡質略同羅都督毗伽未啜豐都督比言回紇都督夷健頡利發僕固都督曳勒歌等各出騎兵為前後左右軍討擊大使皆受天兵軍節度有所討捕量宜追集無事各歸部落營生仍常加存撫○三月乙巳徵嵩山處士盧鴻入見拜諫議大夫鴻固辭○天兵軍使張嘉貞入朝有告其在軍奢僭及贓賄者按驗無狀上欲反坐告者嘉貞奏曰今若罪之恐塞言路使天下之事無由上達願特赦之其人遂得減死上由是以嘉貞為忠有大用之意○有薦山人范知璿文學者并獻其所為文宋璟判之曰觀其良宰論頗涉佞諛山人當極言讜議豈宜偷合苟容文章若高自宜從選舉求試不可別奏○夏四月戊子河南參軍鄭銑朱陽丞郭仙舟投匭獻詩敕曰觀其文理乃崇道法至於時用不切事情宜各從所好竝罷官度為道士○五月辛亥以突騎施都督蘇祿



爲左羽林大將軍。順國公充金方道經略大使。○契丹王李活卒。癸巳。以其弟婆固代之。○秋。八月。頒鄉飲酒禮于州縣。令每歲十二月行之。○唐初。州縣官俸。皆令富戶掌錢出息以給之。息至倍稱。多破產者。祕書少監崔沔上言。請計州縣官所得俸。于百姓常賦之外。微有所加以給之。從之。○冬。十一月。辛卯。車駕至西京。○戊辰。吐蕃奉表請和。乞舅甥親署誓文。又令彼此宰相。皆著名于其上。○宋璟奏。括州員外司馬李邕。儀州司馬鄭勉。竝有才略。文詞。但性多異端。好是非。改變。若全引進。則咎悔必至。若長弃捐。則才用可惜。請除渝硤二州刺史。又奏。大理卿元行冲。素稱才行。初用之時。實允僉議。當事之後。頗非稱職。請復以爲左散騎常侍。以李朝隱代之。陸象先。閑於政體。寬不容非。請以爲河南尹。從之。○七年。春。二月。俱密王那羅延。康王烏勒伽。安王篤薩波提。皆上表。言爲大食所侵掠。乞兵救援。○敕。太府及府縣。出粟十萬石。糴之。以斂人間惡錢。送少府銷毀。○三月。乙卯。以左武衛大將軍檢校內外閑廐使。苑內營田使。王毛仲。行大僕卿。毛仲嚴察有幹力。萬騎功臣。閑廐官吏。皆憚之。苑內所收常豐溢。上以爲能。故有寵。雖有外第。常居閑廐側內宅。上或時不見。則悄然若有所失。宦官楊思勗。高力士。皆畏避之。○渤海王大祚榮卒。丙辰。命其子武藝襲位。○夏。四月。壬午。開府儀同三司。祁公王仁皎薨。其子駙馬都尉守一。請用寶孝。誥例築墳。高五丈一尺。上許之。宋璟蘇頌固爭。以爲準令。一品墳。高一丈九尺。其陪陵者。高出三丈而已。寶太尉墳。議者頗譏其高大。當時無人極言其失。豈可今日復踵而爲之。昔太宗嫁女。資送過于長公主。魏徵進諫。太宗既用其言。文德皇后亦賞之。豈若韋庶人崇其父墳。號曰鄴陵。以自速其禍乎。夫以后父之尊。欲高大其墳。何足爲難。而臣等再三進言者。蓋欲成中宮之美耳。況今日所爲。當傳無窮。永以爲法。可不慎乎。上悅。曰。朕每欲正身率下。況于妻子。何敢私之。然此乃人所難言。卿能固守典禮。以成朕美。垂法將來。誠所望也。賜璟廼帛四百匹。

○五月。己丑朔。日有食之。上素服以俟變。徹樂減膳。命。中書門下。察繫囚。賑飢乏。勸農功。辛卯。宋璟等奏曰。陛下勤恤人隱。此誠蒼生之福。然臣聞日食修德。月食修刑。親君子。遠小人。絕女謁。除讒慝。所謂修德也。君子恥言浮。子行。苟推至誠。而行之。不必數下制書也。○六月。戊辰。吐蕃復遣使。請上親署誓文。上不許。曰。昔歲誓約已定。苟信不由衷。亟誓何益。○秋。閏七月。右補闕盧履冰上言。禮。父在。爲母服周年。則天皇太后改服齊衰三年。請復其舊。上下其議。左散騎常侍褚無量。以履冰議爲是。諸人爭論。連年不決。八月。辛卯。敕。自今五服。竝依喪服傳文。然士大夫議論。猶不息。行之各從其意。無量歎曰。聖人豈不知母恩之厚乎。厭降之禮。所以明尊卑。異戎狄也。俗情膚淺。不知聖人之心。一紊其制。誰能正之。○九月。甲戌。徙宋王憲爲寧王。上嘗從復道中。見衛士食畢。弃餘食于竇中。怒欲杖殺之。左右莫敢言。憲從容諫曰。陛下從復道中。窺人過失。而殺之。臣恐人人不自安。且陛下惡弃食於地者。爲食可以養人也。今以餘食殺人。無乃失其本乎。上大悟。蹶然起曰。微兒幾至濫刑。遽釋衛士。是日。上宴飲極歡。自解紅玉帶。并所乘馬。以賜憲。○冬。十月。辛卯。上幸驪山溫湯。癸卯。還宮。○壬子。冊拜突騎施蘇祿爲忠順可汗。○十一月。壬申。上以岐山令王仁琛。潘邱故吏。墨敕。令與五品官。宋璟奏。故舊恩私。則有大例。除官資歷。非無公道。仁琛緣舊恩。已獲優改。今若再蒙超獎。遂于諸人不類。又是后族。須杜輿言。乞下吏部檢勘。苟無負犯。於格應留。請依資稍優注擬。從之。選人宋元超。于吏部自言。侍中璟之叔父。冀得優假。璟聞之。牒吏部云。元超。璟之三從叔。常在洛城。不多參見。既不敢緣尊輒隱。又不願以私害公。向者無言。自依大例。既有聲聽。事須矯枉。請放。寧王憲奏。選人薛嗣先。請授微官。事下中書門下。璟奏。嗣先兩選齋郎。雖非灼然。應留。以懿親之故。固應微假官資。在景龍中。常有墨敕處分。謂之斜封。自大明臨御。茲事杜絕。行一賞命。一官。必是緣功與才。皆歷中書門下。至公之道。唯聖能行。嗣先幸預



姻戚不爲屈法。許臣等商量望付吏部知。不出正敕。從之。先是朝集使往往齎貨入京師。及春將還。多遷官。宋璟奏。一切勒還。以革其弊。○是歲置劔南節度使。領益彭等二十五州。八年春正月丙辰。左散騎常侍褚無量卒。辛酉。命右散騎常侍元行冲。整比羣書。○侍中宋璟。疾負罪而妄訴不已者。悉付御史臺治之。謂中丞李謹度曰。服不更訴者出之。尙訴未已者且繫。由是人多怨者。會天旱有魃。優人作魃狀。戲於上前。問魃何爲出。對曰。奉相公處分。又問何故。魃曰。負冤者三百餘人。相公悉以繫獄抑之。故魃不得不出。上心以爲然。時璟與中書侍郎同平章事蘇頌。建議嚴禁惡錢。江淮間惡錢尤甚。璟以監察御史蕭隱之充使。括惡錢。隱之嚴急煩擾。怨嗟盈路。上於是貶隱之官。辛巳。罷璟爲開府儀同三司。題爲禮部尚書。以京兆尹源乾曜爲黃門侍郎。并州長史張嘉貞爲中書侍郎。竝同平章事。於是弛錢禁。惡錢復行矣。○二月戊戌。皇子敏卒。追立爲懷王。諡曰哀。○壬子。敕以役莫重於軍府。一爲衛士。六十乃免。宜促其歲限。使百姓更迭爲之。○夏四月丙午。遣使賜烏長王骨咄王。俱位王册命。三國皆在大食之西。大食欲誘之叛唐。三國不從。故褒之。○五月辛酉。復置十道按察使。○丁卯。以源乾曜爲侍中。張嘉貞爲中書令。乾曜上言。形要之家。多任京官。使俊父之士。沈廢于外。臣三子皆在京。請出其二。上從之。因下制。稱乾曜之公。命文武官劾之。於是出者百餘人。張嘉貞吏事彊敏。而剛躁自用。中書舍人苗延嗣。呂大一。考功員外郎員嘉靜。殿中侍御史崔訓。皆嘉貞所引進。常與之議政事。四人頗招權。時人語曰。令公四俊。苗呂崔員。○六月。灑穀漲溢。漂溺幾二千人。突厥降戶僕固都督勺磨。及跌跌部落。散居受降城側。朔方大使王峻。言其陰引突厥。謀陷軍城。密奏請誅之。誘勺磨等。宴於受降城。伏兵悉殺之。河曲降戶殆盡。拔曳固同羅諸部。在大同橫野軍之側者。聞之皆懼。秋。并州長史天兵節度大使張說。引二十騎持節。卽其部落慰撫之。因宿其帳下。副使李憲。以虜情難信。馳書止

之。說復書曰。吾肉非黃羊。必不畏食。血非野馬。必不畏刺。士見危致命。此吾效死之秋也。拔曳固同羅由是遂安。○冬十月辛巳。上行幸長春宮。壬午。敕于下邳。○上禁約諸王。不使與羣臣交結。光祿少卿駙馬都尉裴虛己。與岐王範遊宴。仍私挾讖緯。戊子。流虛己於新州。離其公主。萬年尉劉庭琦。太祝張諤。數與範飲酒賦詩。貶庭琦雅州司戶。諤山莊丞。然待範如故。謂左右曰。吾兄弟自無間。但趨競之徒。彊相託附耳。吾終不以此責兄弟也。上嘗不豫。薛王業。妃弟內直郎韋賓。與殿中監皇甫恂。私議休咎。事覺。賓杖死。恂貶錦州刺史。業與妃惶懼待罪。上降階執業手曰。吾若有心猜兄弟者。天地實殛之。卽與之宴飲。仍慰諭妃。令復位。○十一月乙卯。上還京師。○辛未。突寇冠甘涼等州。敗河西節度使楊敬述。掠契苾部落而去。先是。朔方大總管王峻奏。請西發拔悉密。東發奚契丹。期以今秋掩毗伽牙帳于稽落水。上毗伽聞之。大懼。噉欲谷曰。不足畏也。拔悉密在北庭。與奚契丹相去絕遠。勢不相及。朔方兵計亦不能來。此若必能來。俟其垂至。徙牙帳北行三日。唐兵食盡。自去矣。且拔悉密輕而好利。得王峻之約。必喜而先至。峻與張嘉貞不相悅。奏請多不相應。不敢出兵。峻兵不出。拔悉密獨至。擊而取之。勢甚易耳。旣而拔悉密果發兵。逼突厥牙帳。而朔方及奚契丹兵不至。拔悉密懼引退。毗伽欲擊之。噉欲谷曰。此屬去家千里。將死戰。未可擊也。不知以兵躡之。去北庭二百里。噉欲谷分兵圍道。先圍北庭。因縱兵擊拔悉密。大破之。拔悉密衆潰。走趨北庭。不得入。盡爲突厥所虜。噉欲谷引兵還。出赤亭。掠涼州羊馬。楊敬述遣裨將盧公利。判官元澄。將兵邀擊之。噉欲谷謂其衆曰。吾乘勝而來。敬述出兵。破之必矣。公利等至。刪丹與噉欲谷遇。唐兵大敗。公利澄脫身走。毗伽由是大振。盡有默啜之衆。○契丹牙官可突干。驍勇得衆心。李娑固猜畏。欲去之。是歲可突干舉兵擊娑固。娑固敗奔營州。營州都督許欽澹遣安東都護薛泰。帥驍勇五百。與奚王李大酺奉娑固以討之。戰敗。娑固李大酺皆爲可突干所



殺生擒薛泰。營州震恐。許欽澹移軍入渝關。可突干立娑固從父弟鬱干爲主。遣使請罪。上赦可突干之罪。以鬱干爲松漢都督。以李大酺之弟魯蘇爲饒樂都督。九年春正月。制削楊敬述官爵。以白衣檢校涼州都督。仍充諸使。○丙辰。改蒲州爲河中府。置中都官僚。一準京兆河南。○丙寅。上幸驪山溫湯。乙亥。還宮。○監察御史宇文融上言。天下戶口逃移。巧僞甚衆。請加檢括。融攷之。玄孫也。源乾曜素愛其才。贊成之。二月乙酉。敕有司議招集流移。按詰巧僞之法。以聞。○丙戌。突厥毗伽復使來求和。上賜書諭以曩昔國家與突厥和親。華夷安逸。甲兵休息。國家買突厥羊馬。突厥受國家繒帛。彼此豐給。自數十年來。不復如舊。正由默啜無信。口和心叛。數出盜兵。寇抄邊鄙。人怨神怒。隕身喪元。吉凶之驗。皆可汗所見。今復蹈前迹。掩襲甘涼。隨遣使人。更來求好。國家如天之覆。如海之容。但取來情。不追往咎。可汗果有誠心。則共保遐福。不然無煩使者徒爾往來。若其侵邊。亦有以待。可汗其審圖之。○丁亥。制州縣逃亡戶口。聽百日自首。或于所在附籍。或牒歸故鄉。各從所欲。過期不首。卽加檢括。謫徙邊州。公私敢容庇者。抵罪。以宇文融充使。括逃移戶口及籍外田。所獲巧僞甚衆。遷兵部員外郎。兼侍御史。融奏。置勸農判官十人。竝攝御史。分行天下。其新附客戶。免六年賦調。使者競爲刻急。州縣承風勞擾。百姓苦之。陽翟尉皇甫憬。上疏言其狀。上方任融。貶憬盈川尉。州縣希旨。務于獲多。虛張其數。或以實戶爲客。凡得戶八十餘萬。田亦稱是。蘭池州胡康待賓。誘諸降戶同反。夏四月。攻陷六胡州。有衆七萬。進逼夏州。命朔方大總管王峻。隴右節度使郭知運。共討之。○戊戌。敕京官五品以上。外官刺史。四府上佐。各舉縣令一人。視其政善惡。爲舉者賞罰。○以太僕卿王毛仲爲朔方道防禦討擊大使。與王峻。及天兵軍節度大使張說。相知。討康待賓。○六月己卯。罷中都。復爲蒲州。蒲州刺史陸象先。政尙寬簡。吏民右罪。多曉諭遣之。州錄事言于象先曰。明公不施箠撻。何以示威。象先曰。

人情不遠。此屬豈不解吾言邪。必欲箠撻以示威。當從汝始。錄事慙而退。象先嘗謂人曰。天下本無事。但庸人擾之耳。苟清其源。何憂不治。○秋七月己酉。王峻大破康待賓。生擒之。殺叛胡萬五千人。辛酉。集四夷酋長。腰斬康待賓于西市。先是。叛胡潛與党項通謀。攻銀城連谷。據其倉庾。張說將步騎萬人。出合河關。掩擊大破之。追至駱駝堰。党項乃更與胡戰。胡衆潰西走。入鐵建山。說安集党項。使復其居業。討擊使阿史那獻。以党項反覆。請并誅之。說曰。王者之師。當伐叛柔服。豈可殺已降邪。因奏置麟州。以鎮撫党項餘衆。○九月乙巳朔。日有食之。○康待賓之反也。詔郭知運與王峻相知。討之。峻上言。朔方兵自有餘力。請敕知運還本軍。未報。知運已至。由是與峻上協。峻所招降者。知運復縱兵擊之。虜以峻爲賣己。由是復叛。上以峻不能遂定羣胡。丙午。貶峻爲梓州刺史。○丁未。梁文獻公姚崇薨。遣令佛以清淨慈悲爲本。而愚者寫經造像。冀以求福。昔周齊分據天下。周則毀經像。而修甲兵。齊則崇塔廟。而弛刑政。一朝合戰。齊滅周興。近者諸武諸韋。造寺度人。不可勝紀。無救族誅。汝曹勿效兒女子。終身不寤。追薦冥福。道士見僧獲利。效其所爲。尤不可延之於家。當永爲後法。○癸亥。以張說爲兵部尙書。同中書門下三品。○冬十月。河西隴右節度大使郭知運卒。知運與同縣右衛副率王君奭。皆以驍勇善騎射。著名西陲。爲虜所憚。時人謂之王郭。奭遂自知運麾下。代爲河西隴右節度使。判涼州都督。○十一月丙辰。國子祭酒元行冲。上羣書四錄。凡書四萬八千一百六十九卷。○庚午。赦天下。○十二月乙酉。上幸驪山溫湯。壬辰。還宮。○是歲諸王爲都督刺史者。悉召還京師。○新作蒲津橋。鎔鐵爲牛。以繫絙。○安州別駕劉子玄卒。子玄卽知幾也。避上嫌名。以字行。著作郎吳兢撰則天實錄。言宋璟激張說。使證魏元忠事。說修史見之。知兢所爲。謬曰。劉五殊不相借。兢起對曰。此乃兢所爲。史草具在。不可使明公枉怨死者。同僚皆失色。其後說陰祈兢。改數字。兢終不許曰。若徇公請。則此史不爲直筆。



何以取信于後。○太史上言。麟德曆浸疎。日食屢不効。上命僧一行。更造新曆。率府兵曹梁令瓚。造黃道遊儀。以測候七政。置朔方節度使。領單于都護府。夏鹽等六州。定遠豐安二軍。三受降城。

十年春正月丁巳。上行幸東都。以刑部尚書王志愔爲西京留守。○癸亥。命有司收公廩錢。以稅錢充百官俸。○乙丑。收職田。畝率給倉粟二斗。○二月戊寅。上至東都。○夏四月己亥。以張說兼知朔方軍節度使。○五月伊汝水溢。漂溺數千家。○閏月壬申。張說如朔方巡邊。○己丑。以餘姚縣主女慕容氏爲燕郡公主。妻契丹王鬱干。○六月丁巳。博州河決。命按察使蕭嵩等治之。嵩。梁明帝之孫也。○己巳。制增太廟爲九室。遷中宗主還太廟。秋八月癸卯。武彊令裴景仙坐贓五千匹。事覺亡命。上怒。命集衆斬之。大理卿李朝隱奏。景仙贓皆乞取。罪不至死。又其曾祖寂。有建義大功。載初中。以非罪破家。惟景仙獨存。今爲承嫡。宜宥其死。投之荒遠。其辭略曰。十代宥賢。功實宜錄。一門絕祀。情或可哀。制令杖殺朝隱。又奏曰。生殺之柄。人主得專。輕重有條。臣下當守。今若乞取得罪。便處斬刑。後有枉法當科。欲如何辟。所以爲國惜法。期守律文。非敢以法隨人。曲矜仙命。又曰。若寂勳都棄。仙罪特加。則叔向之賢。何足稱者。若赦之鬼。不其餒而。上乃許之。杖景仙一百。流嶺南惡處。○安南賊帥梅叔焉等。攻圍川縣。遣驃騎將軍兼內侍楊思勗討之。思勗募羣蠻子弟。得兵十餘萬。襲擊大破之。斬叔焉。積尸爲京觀。而還。○初上之誅韋氏也。王皇后頗預密謀。及即位數年。色衰愛弛。武惠妃有寵。陰懷傾奪之志。后心不平。時對上。有不遜語。上愈不悅。密與祕書監姜皎謀。以后無子廢之。皎泄其言。嗣滕王嶠。后之妹夫也。奏之。上怒。張嘉貞希旨。構成其罪。云皎妄談休咎。甲戌。杖皎六十。流欽州。弟吏部侍郎晦。貶春州司馬。親黨坐流死者數人。皎卒于道。乙亥。敕宗室外戚駙馬。非至親。毋得往還。其卜相占候之人。皆不得出入百官之家。○己卯夜。左領

軍兵曹權楚璧。與其黨李齊損等作亂。立楚璧兄子梁山爲光帝。詐稱襄王之子。擁左屯營兵數百人。入宮城。求留守王志愔。不獲。比曉。屯營兵自潰。斬楚璧等。傳首東都。志愔驚怖而薨。楚璧懷恩之姪。齊損。迴秀之子也。壬午。遣河南尹王怡。如京師。按問宣慰。○癸未。吐蕃圍小勃律王沒謹忙。謹忙求救于北庭節度使張嵩。曰。勃律唐之西門。勃律亡。則西域皆爲吐蕃矣。嵩乃遣疏勒副使張思禮。將蕃漢步騎四千救之。晝夜倍道。與謹忙合擊。吐蕃大破之。斬獲數萬。自是累歲吐蕃不敢犯邊。○王怡治權楚璧獄。連逮其衆。久之不決。上乃以開府儀同三司宋璟爲西京留守。璟至。止誅同謀數人。餘皆奏原之。○康待賓餘黨康願子反。自稱可汗。張說發兵追討。擒之。其黨悉平。徙河曲六州殘胡五萬餘口於許汝唐鄧仙豫等州。空河南朔方千里之地。先是。緣邊戍兵常六十餘萬。說以時無疆寇。奏罷二十餘萬。使還農。上以爲疑。說曰。臣久在疆場。具知其情。將帥苟以自衛。及役使營私而已。若禦敵制勝。不必多擁冗卒。以妨農務。陛下若以爲疑。臣請以閩門百口保之。上乃從之。初。諸衛府兵自成丁。從軍。六十而免。其家又不免雜徭。浸以貧弱。逃亡略盡。百姓苦之。張說建議。請召募壯士。充宿衛。不問色役。優爲之制。逋逃者必爭出應募。上從之。旬日得精兵十三萬。分隸諸衛。更番上下。兵農之分。從此始矣。○冬十月癸丑。復以乾元殿爲明堂。○甲寅。上幸壽安興泰宮。獵于上宜川。庚申。還宮。○上欲耀兵北邊。丁卯。以秦州都督張守潔等爲諸衛將軍。○十一月乙未。初令宰相共食實封三百戶。○前廣州都督裴仙先下獄。上與宰相議其罪。張嘉貞請杖之。張說曰。臣聞刑不上大夫。爲其近于君。且所以養廉恥也。故士可殺。不可辱。臣竊巡北邊。聞杖姜皎于朝堂。皎官登三品。亦有微功。有罪應死。則死。應流。則流。奈何輕加笞辱。以卑隸待之。姜皎事往。不可復追。仙先據狀當流。豈可復蹈前失。上深然之。嘉貞不悅。退謂說曰。何論事之深也。說曰。宰相時來則爲之。若國之大臣。皆可笞辱。但恐行及吾輩。吾此言。非爲



仙先乃爲天下士君子也。嘉貞無以應。○十二月庚子。以十姓可汗阿史那懷道女爲交河公主。嫁突騎施可汗蘇祿。○上將幸晉陽。因還長安。張說言于上曰。汾陰睢上有漢家后土祠。其禮久廢。陛下宜因巡幸修之。爲農祈穀。上從之。○上女永穆公主將下嫁。敕資送如太平公主故事。僧一行諫曰。武后惟太平一女。故資送特厚。卒以驕敗。奈何爲法。上遽止之。十一年春正月己巳。車駕自東都北巡。庚辰至潞州。給復五年。辛卯至并州。置北都。以并州爲太原府。刺史爲尹。二月戊申。還至晉州。○張說與張嘉貞不平。會嘉貞弟金吾將軍嘉祐。賊發說勸嘉貞素服待罪于外。己酉。左遷嘉貞幽州刺史。○壬子。祭后土于汾陰。乙卯。貶平遙令王同慶爲潁尉。坐廣爲儲備。煩擾百姓也。○癸亥。以張說兼中書令。○己巳。罷天兵大武等軍。以大同軍爲太原。以北節度使領太原遼石嵐汾代忻朔蔚雲十州。○三月庚午。車駕至京師。○夏四月甲子。以吏部尚書王峻爲兵部尚書。同中書門下三品。○五月己丑。以王峻兼朔方軍節度大使。巡河西北諸軍。○上置麗正書院。聚文學之士。祕書監徐堅。太常博士會稽賀知章。監察御史鼓城趙冬曦等。或修書。或侍講。以張說爲修書使。以總之。有司供給優厚。中書舍人洛陽陸堅。以爲此屬無益于國。徒爲糜費。欲悉奏罷之。張說曰。自古帝王。于國家無事之時。莫不崇宮室。廣聲色。今天子獨延禮文儒。發揮典籍。所益者大。所損者微。陸子之言。何不達也。上聞之。重說而薄堅。○秋八月癸卯。敕前令檢括逃人。慮成煩擾。天下大同。宜各從所樂。令所在州縣安集。遂其生業。○戊申。追尊宣皇帝廟號獻祖。光皇帝廟號懿祖。祔于太廟九室。先是吐谷渾畏吐蕃之彊。附之者數年。○九月壬申。帥衆詣沙州降。河西節度使張敬忠撫納之。○冬十月丁酉。上幸驪山。作溫泉宮。甲寅。還宮。○十一月。禮儀使張說等奏。以高祖配昊天上帝。罷三祖竝配之禮。戊寅。上祀南郊。赦天下。○戊子。命尚書左丞蕭嵩與京兆蒲同岐華州長官。選府兵。及白丁一十二萬。謂之長從宿衛。

一年兩番。州縣毋得雜役使。○十二月甲午。上幸鳳泉湯。戊申。還宮。○庚申。兵部尚書同中書門下三品王峻。坐黨引疎族。貶蕪州刺史。○是歲。張說奏。改政事堂曰中書門下。列五房于其後。分掌庶政。○初。監察御史濮陽杜暹。因按事至突騎施。突騎施饋之金。暹固辭。左右曰。君寄身異域。不宜逆其情。乃受之。理于幕下。出境移牒令取之。虜大驚。度暹追之不及。及安西都護闕。或薦暹。往使安西。入服其清慎。時暹自給事中。居母憂。十二年春三月甲子。起暹爲安西副大都護。磧西節度等使。○神龍初。追復澤王上金官爵。求得庶子義珣於嶺南。紹其故封。許王素節之子瓘。利其爵邑。與弟璆謀。使人告義珣。非上金子。妄冒襲封。復流嶺南。以璆繼上金後。爲嗣澤王。至是。玉真公主表。義珣實上金子。爲瓘兄弟所擯。夏四月庚子。復立義珣爲嗣澤王。削璆爵。貶瓘鄂州別駕。壬寅。敕宗室旁繼爲嗣王者。竝令歸宗。○壬子。命太史監南宮說等。於河南北平地。測日晷。及極星。夏至日中。立八尺之表。同時候之。陽城晷長一尺四寸八分弱。夜視北極。出地高三十四度十分度之四。浚儀岳臺。晷長一尺五寸微強。極高三十四度八分。南至朗州。晷長七寸七分。極高二十九度半。北至蔚州。谷長二尺二寸九分。極高四十四度。南北相距三千六百八十八里九十步。晷差一尺五寸二分。極差十度半。又南至交州。晷出表南三寸三分。八月海中。南望老人星。下衆星粲然。皆古所未名。大率去南極二十度以上。皆見。○五月丁亥。停諸道按察使。六月壬辰。制聽逃戶自首。闕所在。開田。隨宜收稅。毋得差科。征役租庸。一皆蠲免。仍以兵部員外郎兼侍御史宇文融爲勸農使。巡行州縣。與吏民議。定賦役。○上以山東旱。命臺閣名臣。以補刺史。壬午。以黃門侍郎王丘。中書侍郎長安崔沔。禮部侍郎知制誥韓休等五人。出爲刺史。丘同皎之從父兄子。休。大敏之孫也。初。張說引崔沔爲中書侍郎。故事。承宣制。皆出宰相。侍郎署位而已。沔曰。設官分職。上下相維。各申所見。事乃無失。侍郎令之貳也。豈得拱默而已。由



是遇事多所異同。說不悅。故因是出之。○秋七月。突厥可汗遣其臣哥解頡利發來求昏。○  
溪州蠻軍行璋反。以監門衛大將軍楊思勗為黔中道招討使。將兵擊之。癸亥。思勗生擒行  
璋。斬首三萬級而歸。加思勗輔國大將軍。俸祿防閣。皆依品給。赦行璋。以為洵水府別駕。○  
姜皎既得罪。王皇后愈憂畏不安。然待下有恩。故無隨而譖之者。上猶豫不決者累歲。后兄  
太子少保守一。以后無子。使僧明悟為后祭。南北斗。剖霹靂木書天地字。及上名。合而佩之。  
祝曰。佩此有子。當如則天皇后事。覺己卯。廢為庶人。移別室安置。貶守一潭州別駕。中路賜  
死。戶部尚書張嘉貞坐與守一交通。貶台州刺史。○八月丙申。突厥哥解頡利發還其國。以  
其使者輕禮數不備。未許昏。○己亥。以宇文融為御史中丞。融乘驛周流天下。事無大小。諸  
州先牒上。勸農使。後申中書省。司亦待融指。然後處決。時上將大攘四夷。急于用度。州縣  
畏融多張虛數。凡得客戶八十餘萬。田亦稱是。歲終增緡錢數百萬。悉進入官。由是有寵。議  
者多言。煩擾不利百姓。上亦令集百寮於尚書省。議之。公卿已下畏融恩勢。不敢立異。惟戶  
部侍郎楊瑒獨抗議。以為括客免稅。不利居人。徵籍外田稅。使百姓困弊。所得不補所失。未  
幾。瑒出為華州刺史。○壬寅。以開府儀同三司宋璟為西京留守。○冬十月丁酉。謝颺王特  
勒遣使入奏稱。去年五月金城公主遣使詣箇失密國云。欲走歸汝箇失密王。從臣國王借  
兵。共拒吐蕃。王遣臣入取進止。上以為然。賜帛遣之。○廢后王氏卒。後宮思慕后不已。上亦  
悔之。○十一月庚午。上幸東都。戊寅。至東都。○辛巳。司徒申王撝薨。贈諡惠莊太子。○羣臣  
屢上表請封禪。閏月丁卯。制以明年十一月十日有事于泰山。時張說首建封禪之議。而源  
乾曜不欲為之。由是與說不平。○是歲契丹王李鬱于卒。弟吐于襲位。  
十三年春二月庚申。以御史中丞宇文融兼戶部侍郎。制以所得客戶稅錢均充所在常平  
倉本。又委使司與州縣議作勸農社。使貧富相恤。耕耘以時。○乙亥。更命長從宿衛之士曰

曠騎。分隸十二衛。總十二萬人。為六番。○上自選諸司長官。有聲望者大理卿源光裕。尚書  
左丞楊承令。兵部侍郎寇泚等十一人。為刺史。命宰相諸王及諸司長官。臺郎御史。餞于洛  
濱。供張甚盛。賜以御膳。太常具樂。內坊歌妓。上自書十韻詩。賜之光裕。乾曜之從孫也。○三  
月甲午。太子嗣謙更名鴻。徙郟王。嗣直為慶王。更名渾。陝王嗣昇為忠王。更名浚。郟王嗣真  
為棣王。更名洽。鄂王嗣初更名涓。鄆王嗣玄為榮王。更名湜。又立子琚為光王。濼為儀王。溧  
為潁王。澤為永王。清為壽王。洄為延王。洙為盛王。溢為濟王。○丙申。御史大夫程行湛奏。周  
朝酷吏。來俊臣等二十三人。情狀尤重。子孫請皆禁錮。傳遊藝等四人。差輕。子孫不聽。近任  
從之。○汾州刺史楊承令。不欲外補。意快快。自言吾出守有由。上聞之怒。壬寅。貶睦州別駕。  
○張說草封禪儀。獻之。夏四月丙辰。上與中書門下及禮官學士。宴于集賢殿。其書院官五品以上  
為學士。六品以下為直學士。以張說知院事。右散騎常侍徐堅副之。上欲以說為大學士。說  
固辭而止。○說以大駕東巡。恐突厥乘間入寇。議加兵守邊。召兵部道中裴光庭謀之。光庭  
曰。封禪者告成功也。今將升中天。而戎狄是懼。非所以昭盛德也。說曰。然則若之何。光庭  
曰。四夷之中。突厥為大。比屢求和親。而朝廷羈縻未決。許也。今遣一使。徵其大臣。從封泰山。  
彼必欣然承命。突厥來。則戎狄君長無不皆來。可以偃旗臥鼓。高枕有餘矣。說曰。善。說所不  
及。即奏行之。光庭行儉之子也。上遣中書直省袁振。攝鴻臚卿。諭旨於突厥。小殺與闕特勒。  
嗽欲谷。環坐帳中。置酒。謂振曰。吐蕃狗種。奚契丹本突厥奴也。皆得尙主。突厥前後求昏。獨  
不許何也。且吾亦知入蕃公主。皆非天子女。今豈問真偽。但屢請不獲。愧見諸蕃耳。振許為  
之奏請。小殺乃使其大臣阿史德頡利發入貢。因扈從東巡。○五月庚寅。妖賊劉定高帥眾。  
夜犯通洛門。悉捕斬之。○秋八月。張說議封禪儀。請以睿宗配皇地祇。從之。○九月丙戌。上



謂宰臣曰。春秋不書祥瑞。惟記有年。敕自今。州縣毋得更奏祥瑞。○冬十月癸丑。作水運渾天。成。上具列宿。注水激輪。令其自轉。晝夜一周。別置二輪。絡在天外。綴以日月。逆天而行。淹速合度。置木匱爲地平。令儀半在地下。又立二木人。每刻擊鼓。每辰擊鐘。機械皆藏匱中。○辛酉。車駕發東都。百官貴戚。四夷酋長。從行。每置頓數十里。人畜被野。有司輦載供具之物。數百里不絕。○十一月丙戌。至泰山下。御馬登山。留從官於谷口。獨與宰相及祠官俱登。儀衛環列於山下。百餘里。上問禮部侍郎賀知章曰。前代玉牒之文。何故祕之。對曰。或密求神仙。故不欲人見。上曰。吾爲蒼生祈福耳。乃出玉牒。宣示羣臣。庚寅。上祀昊天上帝於山上。羣臣祀五帝百神於山下之壇。其餘。做乾封故事。辛卯。祭皇地祇于社首。壬辰。上御帳殿。受朝覲。赦天下。封泰山神爲天齊王。禮秩加三公一等。張說多引兩省吏。及以所親攝官登山。禮畢。推恩往往加階。超入五品。而不及百官。中書舍人張九齡諫不聽。又扈從士卒。但加勳而無賜物。由是中外怨之。○初。隋末。國馬皆爲盜賊。及戎狄所掠。唐初。纔得牝牡三千匹。於赤岸澤。徙之隴右。命太僕張萬歲掌之。萬歲善于其職。自貞觀至麟德。馬蕃息及七十萬匹。分爲八坊。四十八監。各置使以領之。是時。天下以一縑易一馬。垂拱以後。馬潛耗太半。上初卽位。牧馬有二十四萬匹。以太僕卿王毛仲爲內外閑廐使。少卿張景順副之。至是有馬四十三萬匹。牛羊稱是。上之東封。以牧馬數萬匹。從。色別爲羣。望之如雲。錦上嘉毛仲之功。癸巳。加毛仲開府儀同三司。甲午。車駕發泰山。丙申。幸孔子宅。致祭。上還至宋州。宴從官于樓上。刺史寇泚預焉。酒酣。上謂張說曰。曩者屢遣使臣。分巡諸道。察吏善惡。今因封禪。歷諸州。乃知使臣負我多矣。懷州刺史王丘。餽牽之外。一無它獻。魏州刺史崔沔。供張無錦繡。示我以儉。濟州刺史裴耀卿。表數百言。莫非規諫。且曰。人或重擾。則不足以告成。朕常寘之坐隅。且以戒左右。如三人者。不勞人以市恩。真良吏矣。顧謂寇泚曰。比亦屢有以酒饌不豐訴于

朕者。知卿不借譽於左右也。自舉酒賜之。宰臣帥羣臣起賀樓上。皆稱萬歲。由是。以丘爲尙書左丞。沔爲散騎侍郎。耀卿爲定州刺史。耀卿叔業之七世孫也。十二月己巳。還東都。○突厥頡利發辭歸。上厚賜而遣之。竟不許昏。○王毛仲有寵于上。百官附之者輻湊。毛仲嫁女。上問何須。毛仲頓首對曰。臣萬事已備。但未得客。上曰。張說。源乾曜輩。豈不可呼邪。對曰。此則得之。上曰。知汝所不能致者一人耳。必宋璟也。對曰。然。上笑曰。朕明日爲汝召客。明日。上謂宰相。朕奴毛仲有昏事。卿等宜與諸達官。悉詣其第。既而日中。衆客未敢舉筯。待璟。久之。方至。先執酒。西向拜謝。飲不盡。卮。遽稱腹痛而歸。璟之剛直。老而彌篤。○先是。契丹王李吐干。與可突于。復相猜忌。攜公主來奔。不敢復還。更封遼陽王。留宿衛。可突于立李盡忠之弟邵固爲主。車駕東巡。邵固詣行在。因從至泰山。拜左羽林大將軍。靜折軍。經略大使。○上疑吏部選試不公。時選期已迫。御史中丞宇文融密奏。請分吏部爲十銓。甲戌。以禮部尙書蘇颺等十人。掌吏部選試。判將畢。遽召入禁中。決定吏部尙書侍郎皆不得預。左庶子吳兢上表。以爲陛下曲受讒言。不信有司。非居上臨人。推誠感物之道。昔陳平。丙吉。漢之宰相。尙不對錢穀之數。不問鬪死之人。況大唐萬乘之君。豈得下行銓選之事乎。凡選人書判。竝請委之有司。停此十銓。上雖不卽從。明年復故。○是歲。東都斗米十五錢。青齊五錢。粟三錢。○于闐王尉遲眺。陰結突厥及諸胡謀叛。安西副大都護杜暹。發兵捕斬之。更爲立王。

資治通鑑卷第二百一十二

唐紀 玄宗至道大聖大明孝皇帝上之下開元十三年



# 資治通鑑卷第二百一十三

## 唐紀二十九

### 玄宗至道大聖大明孝皇帝中之上

開元十四年春正月癸未更立契丹松漠王李邵固為廣化王奚饒樂王李魯蘇為奉誠王以上從甥陳氏為東華公主妻邵固以成安公主之女韋氏為東光公主妻魯蘇○張說奏今之五禮貞觀顯慶兩會修纂前後頗有不同其中或未折衷望與學士等討論古今刪改施行制從之○邕州封陵獠梁大海等據賓橫州反二月己酉遣內侍楊思勗發兵討之○上召河南尹崔隱甫欲用之中書令張說薄其無文奏擬金吾大將軍前殿中監崔日知素與說善說薦為御史大夫上不從丙辰以日知為左羽林大將軍丁巳以隱甫為御史大夫隱甫由是與說有隙說有才智而好賄百官白事有不合者好面折之至於叱罵惡御史中丞宇文融之為人且患其權重融所建白多抑之中書舍人張九齡言於說曰宇文融承恩用事辨給多權數不可不備說曰鼠輩何能為夏四月壬子隱甫融及御史中丞李林甫共奏彈說引術士占星徇私僭侈受納賄賂敕源乾曜及刑部尚書韋抗大理少卿明珪與隱甫等同於御史臺鞠之林甫叔良之曾孫抗安石之從父兄子也○丁巳以戶部侍郎李元紘為中書侍郎同平章事元紘以清儉著故上用為相○源乾曜等鞠張說事頗有狀上使高力士視說力士還奏說蓬首垢面席藁食以瓦器惶懼待罪上意憐之力士因言說有功於國上以為然庚申但罷說中書令餘如故○丁卯太子太傅岐王範薨贈諡惠文太子上

為之徹膳累旬百官上表固請然後復常○丁亥太原尹張孝嵩奏有李子嶠者自稱皇子云生於潞州母曰趙妃上命杖殺之○辛丑於定恒莫易滄五州置軍以備突厥○上欲以武惠妃為皇后或上言武氏乃不戴天之讐豈可以為國母人間盛言張說欲取立后之功更圖入相之計且太子非惠妃所生惠妃復自有子若登宸極太子必危上乃止然宮中禮秩一如皇后○五月癸卯戶部奏今歲戶七百六萬九千五百六十五口四千一百四十一萬九千七百一十二○秋七月河南北大水溺死者以千計○八月丙午朔魏州言河溢○九月己丑以安西副大都護積西節度使杜暹同平章事自王孝傑克復四鎮復於龜茲置安西都護府以唐兵三萬戍之百姓苦其役為都護者惟田揚名郭元振張嵩及暹皆有善政為人所稱○冬十月庚申上幸汝州廣成湯己巳還宮○十二月丁巳上幸壽安獵於方秀川壬戌還宮○楊思勗討反獠生禽梁大海等三千餘人斬首二萬級而還○是歲黑水靺鞨遣使入見上以其國為黑水州仍為置長史以鎮之渤海靺鞨王武藝曰黑水入唐道由我境往者請吐屯於突厥先告我與我偕行今不告我而請吏於唐是必與唐合謀欲腹背攻我也遣其弟門藝與其舅任雅將兵擊黑水門藝嘗為質子于唐諫曰黑水請吏于唐而我以其故擊之是叛唐也唐大國也昔高麗全盛之時彊兵三十餘萬不遵唐命掃地無遺況我兵不及高麗什之一二一旦與唐為怨此亡國之教也武藝不從彊遣之門藝至境上復以書力諫武藝怒遣其從兄大壹夏代之將兵召欲殺之門藝奔衆間道來奔制以為左驍衛將軍武藝遣使上表罪狀門藝請殺之上密遣門藝詣安西留其使者別遣報云已流門藝於嶺南武藝知之上表稱大國當示人以信豈得為此欺誑固請殺門藝上以鴻臚少卿李道邃源復不能督察官屬致有漏泄皆坐左遷暫遣門藝詣嶺南以報之

臣光曰王者所以服四夷威信而已門藝以忠獲罪自歸天子天子當察其枉直賞門藝



而罰武藝爲政之體也。縱不能討，猶當正以門藝之無辜告之。今明皇威不能服武藝，思不能庇門藝，顧效小人爲欺誑之語，以取困於小國，乃罪鴻臚之漏洩，不亦可羞哉。杜暹爲安西都護，突騎施交河公主遣牙官以馬千匹詣安西互市，使者宣公主教，暹怒曰：阿史那女，何得宣教於我？杖其使者，留不遣。馬經雪死盡，突騎施可汗蘇祿大怒，發兵寇四鎮，會暹入朝，趙順貞代爲安西都護，嬰城自守，四鎮人畜儲積，皆爲蘇祿所掠，安西僅存。旣而蘇祿聞暹入相，稍引退，尋遣使入貢。

十五年春正月辛丑，涼州都督王君奐破吐蕃於青海之西。初，吐蕃自恃其彊，致書用敵國禮，辭指悖慢，上意常怒之。返自東封，張說言於上曰：吐蕃無禮，誠宜誅夷，但連兵十餘年，甘涼河鄯不勝其弊，雖師屢捷，所得不償所亡，聞其悔過求和，願聽其款服，以紓邊人。上曰：俟吾與王君奐議之。說退，謂源乾曜曰：君奐勇而無謀，常思僥幸，若二國和親，何以爲功？吾言必不用矣。及君奐入朝，果請深入討之。去冬，吐蕃大將悉諾邏寇大斗谷，進攻甘州，焚掠而去。君奐度其兵疲，勒兵躡其後，會大雪，虜凍死者甚衆，自積石軍西歸。君奐先遣人間道入虜境，燒道旁艸，悉諾邏至大非川，欲休士馬，而草皆盡，馬死過半。君奐與秦州都督張景順追之，及於青海之西，乘冰而度，悉諾邏已去，破其後軍，獲其輜重羊馬萬計而還。君奐以功遷左羽林大將軍，拜其父壽爲少府監，致仕。上由是益事邊功。○初，洛陽人劉宗器上言：請塞汜水舊汴口，更於熒澤引河入汴，擢宗器爲左衛率府胄曹。至是新渠填塞不通，貶宗器爲循州安懷戍王，命將作大匠范安及發河南懷鄭汴滑衛三萬人，疏舊渠，旬日而畢。○御史大夫崔隱甫中丞宇文融恐右丞相張說復用，數奏毀之，各爲朋黨，上惡之。二月乙巳，制說致仕，隱甫免官，侍母，融出爲魏州刺史。○乙卯，制諸州逃戶，先經勸農使括定，按比後復有逃來者，隨到，準白丁例，輸當年租庸，有征役者先差。○夏五月癸酉，上悉以諸子慶王

潭等領州牧，刺史都督節度大使，大都護，經略使，實不出外。初，太宗愛晉王，不使出閣，豫王亦以武后少子不出閣，及自皇嗣爲相王，始出閣。中宗之世，譙王失愛，謫居外州，溫王年十七，猶居禁中，上卽位，附苑城爲十王宅，以居皇子，宦官押之，就夾城參起居，自是不復出閣。雖開府置官屬，及領藩鎮，惟侍讀時入授書，自餘王府官屬，但歲時通名起居，其藩鎮官屬亦不通名，及諸孫浸多，又置百孫院，太子亦不居東宮，常在乘輿所幸之別院。○上命妃嬪以下，宮中育蠶，欲使之知女功。丁酉，夏至，賜貴近絲人一綬。○秋七月戊寅，冀州河溢。○己卯，禮部尚書許文憲公蘇頌薨。○九月丙子，吐蕃大將悉諾邏恭祿及燭龍莽布支攻陷瓜州，執刺史田元獻及河西節度使王君奐之父，進攻玉門軍，縱所虜僧使歸涼州，謂君奐曰：將軍常以忠勇許國，何不一戰？君奐登城西望而泣，竟不敢出兵。莽布支別攻常樂縣，縣令賈師順帥衆拒守，及瓜州陷，悉諾邏悉兵會攻之。旬餘日，吐蕃力盡，不能克，使人說降之，不從。吐蕃曰：明府旣不降，宜斂城中財相贈，吾當退。師順請脫士卒衣，悉諾邏知無財，乃引去。毀瓜州城，師順遽開門，收器械，修守備，虜果復遣精騎還覘城中，知有備，乃去。師順岐州人。也。○初，突厥默啜之彊也，迫奪鐵勒之地，故回紇契苾思結渾四部，度磧徙居甘涼之間，以避之。王君奐微時，往來四部，爲其所輕，及爲河西節度使，以法繩之，四部恥怨，密遣使詣東都自訴。君奐遽發驛，奏四部難制，潛有叛計，上遣中使往察之，諸部竟不得直。於是瀚海大都督回紇承宗流瀼州，渾大德流吉州，賀蘭都督契苾承明流藤州，廬山都督思結歸國，流瓊州，以回紇伏帝難爲瀚海大都督。己卯，貶右散騎常侍李令問爲撫州別駕，坐其子與承宗交游故也。○丙戌，突厥毗伽可汗遣其大臣梅錄啜入貢，吐蕃之寇瓜州也。遣毗伽書，欲與之俱入寇，毗伽并獻其書，上嘉之，聽於西受降城爲互市，每歲齎緜帛數十萬匹，就市戎馬，以助軍旅，且爲監牧之種，由是國馬益壯焉。○閏月庚子，吐蕃贊普與突騎施蘇祿圍安



西城。安西副大都護趙順貞擊破之。○回紇承宗族子瀚海司馬護輸糾合黨衆爲承宗報仇。會吐蕃遣使問道詣突厥。王君奐帥精騎邀之於肅州。還至甘州南鞏筆驛。護輸伏兵突起。奪君奐旌節。先殺其判官宋貞。剖其心。曰：始謀者汝也。君奐帥左右數十人力戰。自朝至晡。左右盡死。護輸殺君奐。載其尸。奔吐蕃。涼州兵追及之。護輸奔尸而走。○庚申。車駕發東都。冬。己卯。至西京。○辛巳。以左金吾衛大將軍信安王禕爲朔方節度等副大使。禕。恪之孫也。以朔方節度使蕭嵩爲河西節度等副大使。時王君奐新敗。河隴震駭。嵩引刑部員外郎裴寬爲判官。與君奐判官牛仙客俱掌軍政。人心浸安。寬。淮之從弟也。仙客。本鶻觚小吏。以才幹軍功累遷至河西節度判官。爲君奐腹心。嵩又奏。以建康軍使河北張守珪爲瓜州刺史。帥餘衆築故城。板榦裁立。吐蕃猝至。城中相顧失色。莫有鬪志。守珪曰：彼衆我寡。又瘡痍之餘。不可以矢刃相持。當以奇計取勝。乃於城上置酒作樂。虜疑其有備。不敢攻而退。守珪縱兵擊之。虜敗走。守珪乃修復城市。收合流散。皆復舊業。朝廷嘉其功。以瓜州爲都督府。以守珪爲都督。悉諾邏威名甚盛。蕭嵩縱反問於吐蕃。云：與中國通謀。贊普召而誅之。吐蕃由是少衰。○十二月。戊寅。制以吐蕃爲邊患。令隴右道及諸軍團兵五萬六千人。河西道及諸軍團兵四萬人。又徵關中兵萬人。集臨洮。朔方兵萬人。集會州。防秋。至冬初無寇而罷。同虜入寇。互出兵。腹背擊之。○乙亥。上幸驪山溫泉。丙戌。還宮。十六年。春。正月。壬寅。安西副大都護趙順貞敗吐蕃于曲子城。○甲寅。以魏州刺史宇文融爲戶部侍郎。兼魏州刺史。充河北道宣撫使。乙卯。春。瀧等州獠陳行範。廣州獠馮璘。何遊魯反。陷四十餘城。行範稱帝。遊魯稱定國大將軍。璘稱南越王。欲據嶺表。命內侍楊思勗發桂州及嶺北近道兵討之。○丙寅。以魏州刺史宇文融檢校汴州刺史。充河南北溝渠堤堰決九河使。融請用禹貢九河故道。開稻田。并回易陸運錢。官收其利。興役不息。事多不就。○二

月。壬申。以尙書右丞相致仕張說兼集賢殿學士。說雖罷政事。專文史之任。朝廷每有大事。上常遣中使訪之。○壬辰。改驍騎爲左右羽林軍。飛騎。○秋。七月。吐蕃大將悉末朗寇瓜州。都督張守珪擊走之。乙巳。河西節度使蕭嵩隴右節度使張忠亮大破吐蕃於渴波谷。忠亮追之。拔其大莫門城。擒獲甚衆。焚其駱駝橋而還。○八月。己巳。特進張說上開元大衍曆行之。○辛卯。左金吾將軍杜賓客破破蕃于祁連山下。時吐蕃復入寇。蕭嵩遣賓客將彊弩四千擊之。戰自辰至暮。吐蕃大潰。獲其大將一人。虜散走投山。哭聲四合。○冬。十月。己卯。上幸驪山溫泉。己丑。還宮。○十一月。癸巳。以河西節度副大使蕭嵩爲兵部尙書。同平章事。○十二月。丙寅。敕長征兵。無有還期。人情難堪。宜分五番。歲遣一番。還家洗沐。五年。酬勳五轉。○是歲。制戶籍。三歲一定。分爲九等。○楊思勗討陳行範。至瀧州。破之。擒何遊魯。馮璘行範逃於雲際。盤遼二洞。思勗追捕。竟生擒斬之。凡斬首六萬。思勗爲人嚴。偏裨白事者。不敢仰視。故用兵所向有功。然性忍酷。所得俘虜。或生剝面皮。或以刀髻髮際。掣去頭皮。蠻夷憚之。十七年。春。二月。丁卯。嵩州都督張守素破西南蠻。拔昆明及鹽城。殺獲萬人。○三月。瓜州都督張守珪。沙州刺史賈師順。擊吐蕃大同軍。大破之。○甲寅。朔方節度使信安王禕攻吐蕃石堡城。拔之。初。吐蕃陷石堡城。留兵據之。侵擾河右。上命禕與河西隴右同議攻取。諸將咸以爲石堡據險而道遠。攻之不克。將無以自還。且宜按兵觀釁。禕不聽。引兵深入。急攻拔之。乃分兵據守要害。令虜不得前。自是。河隴諸軍。遊奕拓境。千餘里。上聞大悅。更命石堡城曰振武軍。○丙辰。國子祭酒楊瑒上言。以爲省司奏。限天下明經進士及第。每年不過百人。竊見。流外出身。每歲二千餘人。而明經進士。不能居其什一。則是服勤道業之士。不如胥史之得仕也。臣恐儒風浸墜。廉恥日衰。若以出身人太多。則應諸色裁損。不應獨抑明經進士也。又奏。諸司帖試明經。不務求述作大指。專取難知。問以孤經絕句。或年月日。請自今。竝帖平



文上甚然之。○夏四月庚午。禘于太廟。唐初禘則序昭穆。禘則各祀於其室。至是。太常少卿韋縉等奏。如此。禘與常饗不異。請禘祫皆序昭穆。從之。縉安石之兄子也。○五月壬辰。復置十道及京都兩畿按察使。○初張說。張嘉貞。李元紘。杜暹。相繼爲相。用事。源乾曜以清謹自守。常讓事於說等。唯諾署名而已。元紘。暹。議事多異。同。遂有隙。更相奏列。上不悅。六月甲戌。貶黃門侍郎同平章事杜暹。荆州長史中書侍郎同平章事李元紘。曹州刺史罷乾曜兼侍中。止爲左丞相。以戶部侍郎宇文融爲黃門侍郎。兵部侍郎裴光庭爲中書侍郎。竝同平章事。蕭嵩兼中書令。遙領河西。○開府王毛仲。與龍武將軍葛福順爲昏。毛仲爲上所信任。言無不從。故北門諸將多附之。進退唯其指使。吏部侍郎齊澣。乘間言於上曰。福順典禁兵。不宜與毛仲爲昏。毛仲小人。寵過則生姦。不早爲之所。恐成後患。上悅曰。知卿忠誠。朕徐思其宜。澣曰。君不密則失臣。願陛下密之。會大理丞麻察。坐事左遷。興州別駕澣素與察善。出城餞之。因道禁中諫語。察性輕險。遽奏之。上怒。召澣責之曰。卿疑朕不密。而以語麻察。詎爲密邪。且察素無行。卿豈不知邪。澣頓首謝。秋七月丁巳。下制。澣察交構將相。離間君臣。澣可高州良德丞。察可潯州皇化尉。○八月癸亥。上以生日。宴百官於花萼樓下。左丞相乾曜。右丞相說。帥百官上表。請以每歲八月五日爲千秋節。布于天下。咸令宴樂。尋又移社。就千秋節。○庚辰。工部尙書張嘉貞薨。嘉貞不營家產。有勸其市田宅者。嘉貞曰。吾貴爲將相。何憂寒餒。若其獲罪。雖有田宅。亦無所用。比見朝士。廣占良田。身沒之日。適足爲無賴子弟酒色之資。吾不取也。聞者是之。○辛巳。敕。以人間多盜。鑄錢。始禁私賣銅鉛錫。及以銅爲器皿。其采銅鉛錫者。官爲市取。○宇文融性精敏。應對辨給。以治財賦。得幸於上。始廣置諸使。競爲聚斂。由是百官浸失其職。而上心益侈。百姓皆怨苦之。爲人疎躁多言。好自矜伐。在相位。謂人曰。使吾居此數月。則海內無事矣。信安王禕以軍功有寵於上。融疾之。禕入朝。融使御史李

寅彈之。泄於所親。禕聞之。先以白上。明日寅奏果入。上怒。九月壬子。融坐貶汝州刺史。凡爲相百日而罷。是後言財利。以取貴仕者。皆祖於融。○冬十月戊午朔。日有食之。不盡如鉤。○宇文融既得罪。國用不足。上復思之。謂裴光庭曰。卿等皆言融之惡。朕既黜之矣。今國用不足。將若之何。卿等何以佐朕。光庭等懼不能對。會有飛狀告融賄事。又貶平樂尉。至嶺外。歲餘。司農少卿蔣岑奏。融在汴州。隱沒官錢鉅萬計。制窮治其事。融坐流巖州。道卒。○十一月辛卯。上行謁橋定獻昭乾五陵。戊申。還宮。赦天下。百姓今年地稅。悉蠲其半。○十二月辛酉。上幸新豐溫泉。壬申。還宮。十八年春正月辛卯。以裴光庭爲侍中。○二月癸酉。初令百官於春月旬休。選勝行樂。自宰相至員外郎。凡十二筵。各賜錢五千緡。上或御花萼樓。邀其歸騎留飲。送使起舞。盡歡而去。○三月丁酉。復給京官職田。○夏四月乙卯。築西京外郭。九旬而畢。○乙丑。以裴光庭兼吏部尙書。先是選司注官。惟視其人之能否。或不次超遷。或老於下位。有出身二十餘年不得祿者。又州縣亦無等級。或自大入小。或初久後遠。皆無定制。光庭始奏。用循資格。各以罷官若干。選而集。官高者選少。卑者選多。無問能否。選滿卽注。限年躡級。毋得踰越。非負譴者。皆有升無降。其庸愚沈滯者。皆喜。謂之聖書。而才俊之士。無不怨歎。宋璟爭之。不能得。光庭又令流外行署。亦過門下省審。○五月吐蕃遣使致書于境上。求和。○初契丹王李邵固遣可突于入貢。同平章事李元紘不禮焉。左丞相張說謂人曰。奚契丹必叛。可突于狡而狠。專其國政久矣。人心附之。今失其心。必不來矣。己酉。可突于弑邵固。帥其國人。并脅奚衆。叛降突厥。奚王李魯蘇及其妻韋氏。邵固妻陳氏。皆來奔。制幽州長史趙含章討之。又命。中書舍人裴寬。給事中薛侃等。於關內河東河南北。分道募勇士。六月丙子。以單于大都護忠王浚。領河北道行軍元帥。以御史大夫李朝隱。京兆尹裴奭。先副之。帥十八總管。以討奚契丹。命浚



與百官相見於光順門。張說退，謂學士孫逖、韋述曰：「吾嘗觀太宗畫像，雅類忠王。此社稷之福也。可突于寇平盧，先鋒使張掖烏承瑊破之於捺祿山。○壬午，洛水溢，溺東都千餘家。○秋九月丁巳，以忠王浚兼河東道元帥，然竟不行。○吐蕃兵數敗而懼，乃求和親。忠王友皇甫惟明因奏事，從容言和親之利。上曰：「贊普嘗遺吾書，悖慢，此何可捨？」對曰：「贊普當開元之初，年尚幼穉，安能爲此書？殆邊將詐爲之，欲以激怒陛下耳。夫邊境有事，則將吏得以因緣盜匿官物，妄述功狀，以取勳爵，此皆姦臣之利，非國家之福也。兵連不解，日費千金。河西隴右由茲困敝，陛下誠命一使往視公主，因與贊普面相約結，使之稽顙稱臣，永息邊患，豈非御夷狄之長策乎？」上悅，命惟明與內侍張元方使于吐蕃，贊普大喜，悉出貞觀以來所得敕書以示惟明。冬十月，遣其大臣論名悉獵隨惟明入貢，表稱甥世尚公主，義同一家。中間張玄表等先與兵寇鈔，遂使二境交惡。甥深識尊卑，安敢失禮，正爲邊將交構，致獲罪於舅，屢遣使者入朝，皆爲邊將所遏。今蒙遠降，使臣來視公主，甥不勝喜荷。僕使復修舊好，死無所恨。自是吐蕃復欵附。○庚寅，上幸鳳泉湯。癸卯，還京師。甲寅，護密王羅真檀入朝，留宿衛。○十一月丁卯，上幸驪山溫泉。丁丑，還宮。○是歲，天下奏死罪止二十四人。○突騎施遣使入貢，上宴之於丹鳳樓，突厥使者預焉。二使爭長，突厥曰：「突騎施小國，本突厥之臣，不可居我上。突騎施曰：「今日之宴，爲我設也，我不可以居其下。」上乃命設東西幕，突厥在東，突騎施在西。○開府儀同三司內外閑廐監牧都使霍國公王毛仲恃寵驕恣，日甚。上每優容之。毛仲與左領軍大將軍葛福順、左監門將軍唐地文、左武衛將軍李守德、右威衛將軍王景耀、高廣濟親善。福順等倚其執，多爲不法。毛仲求兵部尚書，不得，怏怏形於辭色。上由是不悅。是時，上頗寵任宦官，往往爲三品將軍。門施檠戟，奉使過諸州，官吏奉之，惟恐不及。所得賂遺少者不減千緡。由是京城郊畿田園參半皆宦官矣。楊思勗、高力士尤貴幸。思勗屢將兵征

討力士常居中侍衛，而毛仲視宦官貴近者，若無人，甚卑品者，小忤意，輒詈辱如僮僕。力士等皆害其寵，而未敢言。會毛仲妻產子三日，上命力士賜之酒饌，金帛甚厚，且授其兒五品官。力士還，上問毛仲喜乎？對曰：「毛仲抱其襁中兒，示臣曰：『此兒豈不堪作三品邪？』上大怒曰：『昔誅韋氏，此賊心持兩端，朕不欲言之。今日乃敢以赤子怨我。』力士因言北門奴官太盛，相與一心，不早除之，必生大患。上恐其黨驚懼爲變。」

十九年春正月壬戌，下制，但述毛仲不忠，怨望，貶瀋州別駕。福順、地文、守德、景耀、廣濟皆貶。遠州別駕毛仲四子皆貶。遠州參軍連坐者數十人。毛仲行至永州，追賜死。自是宦官勢益盛。高力士尤爲上所寵信。嘗曰：「力士上直，吾寢則安。故力士多留禁中，稀至外第。四方表奏皆先呈力士，然後奏御。小者力士即決之，勢傾內外。金吾大將軍程伯獻，少府監馮紹正，與力士約爲兄弟。力士母麥氏卒，伯獻等被髮受弔，擗踊哭泣。過於已親。力士娶瀛州呂玄晤女爲妻，擢玄晤爲少卿。子弟皆王傅。呂氏卒，朝野爭致祭。自第至墓，車馬不絕。然力士小心恭恪，故上終親任之。○辛未，遣鴻臚卿崔琳使于吐蕃，琳，神慶之子也。吐蕃使者稱公主求毛詩春秋禮記正字于休烈。上疏以爲東平王漢之懿親，求史記諸子漢猶不與，況吐蕃國之寇讐，今資之以書，使知用兵權略，愈生變詐，非中國之利也。事下中書門下議之。裴光庭等奏：「吐蕃聾昧頑騫，久叛新服，因其有請，賜以詩書，庶使之漸陶聲教，化流無外。休烈徒知書有權略變詐之語，不知忠信禮義皆從書出也。」上曰：「善。」遂與之。休烈志寧之玄孫也。○丙子，上躬耕於興慶宮側，盡三百步。○三月，突厥左賢王闕特勤卒，賜書弔之。○丙申，初令兩京諸州各置太公廟，以張良配享。選古名將以備十哲。以二八月上戊致祭。如孔子禮。○人臣光曰：經緯天地之謂文，戡定禍亂之謂武。自古不兼斯二者而稱聖人，未之有也。故黃帝堯舜禹湯文武伊尹周公莫不有征伐之功。孔子雖不試，猶能兵萊夷，却費人曰：我戰。」



則克。豈孔子專文。而太公專武乎。孔子所以祀於學者。禮有先聖先師故也。自生民以來。未有如孔子者。豈太公得與之抗衡哉。古者有發則命大司徒。教士以車甲。贏股肱。決射御。受成獻馘。莫不在學。所以然者。欲其先禮義而後勇力也。君子有勇而無義爲亂。小人力相勝。狙詐相高。豈足以數於聖賢之門。而謂之武哉。乃復誣引。以偶十哲之目。爲後世學者之師。使太公有神。必羞與之同食矣。

五月壬戌。初立五嶽真君祠。○秋九月辛未。吐蕃遣其相論尙它碑。入見。請於赤嶺爲互市。許之。○冬十月丙申。上幸東都。○或告嵩州都督解人張審素。賊汚制。遣監察御史楊汪按之。總管董元禮。將兵七百圍汪。殺告者。謂汪曰。善奏審素。則生。不然則死。會救兵至。擊斬之。汪奏審素謀反。十二月。審素坐斬。籍沒其家。○浚苑中洛水。六旬而罷。

二十年春正月乙卯。以朔方節度副大使信安王禕爲河東河北行軍副大總管。將兵擊奚契丹。壬申。以戶部侍郎裴耀卿爲副總管。○二月癸酉朔。日有食之。○上思右驍衛將軍安金藏忠烈。三月。賜爵代國公。仍於東西岳立碑。以銘其功。金藏竟以壽終。○信安王禕。帥裴耀卿及幽州節度使趙含章。分道擊契丹。含章與虜遇。虜望風遁去。平盧先鋒將烏承玘。言於含章曰。二虜劇賊也。前日遁去。非畏我。乃誘我也。宜按兵以觀其變。含章不從。與虜戰於白山。果大敗。承玘別引兵出其右。擊虜破之。己巳。禕等大破奚契丹。俘斬甚衆。可突干帥麾下遠遁。餘黨潛竄山谷。奚酋李詩瑣高帥五千餘帳。來降。禕引兵還。賜李詩瑣歸義王。充歸義州都督。徙其部落置幽州境內。○夏四月乙亥。宴百官於上陽東洲。醉者賜以衾褥。肩輿以歸。相屬于路。○六月丁丑。加信安王禕開府儀同三司。上命裴耀卿。齎絹二十萬匹。分賜立功奚官。耀卿謂其徒曰。戎狄貪婪。今齎重貨。深入其境。不可不備。乃命先期而往。分道竝

進。一日給之俱畢。突厥室韋果發兵邀隘道。欲掠之。比至。耀卿已還。趙含章坐賊巨萬。杖于朝堂。流瀼州道死。○秋七月。蕭嵩奏。自祠后土以來。屢獲豐年。宜因還京賽祠。上從之。○敕裴光庭蕭嵩分押左右廂兵。○八月辛未朔。日有食之。○初。上命張說與諸學士。刊定五禮說。蕭嵩繼之。起居舍人王仲丘。請依明慶禮。祈穀大雩。明堂皆祀昊天上帝。嵩又請。依上元敕。父在。爲母齊衰三年。皆從之。以高祖配圓丘。方丘。太宗配雩祀。及神州地祇。睿宗配明堂。九月乙巳。新禮成。上之。號曰開元禮。○勃海靺鞨王武藝。遣其將張文休。帥海賊寇登州。殺刺史韋俊。上命右領軍將軍葛福順。發兵討之。○壬子。河西節度使牛仙客加六階。初。蕭嵩在河西。委軍政於仙客。仙客廉勤。善於其職。嵩屢薦之。竟代嵩爲節度使。○冬十月壬午。上發東都。辛卯。幸潞州。辛丑。至北都。十一月庚申。祀后土于汾陰。赦天下。十二月辛未。還西京。○是歲。以幽州節度使兼河北采訪處置使。增領衛相洛貝冀魏深趙恒定邢德博棣營鄭十六州。及安東都護府。○天下戶七百八十六萬一千二百三十六。口四千五百四十三萬一千二百六十五。

二十一年春正月乙巳。祔肅明皇后于太廟。毀儀坤廟。○丁巳。上幸驪山溫泉。○上遣大門藝詣幽州發兵。以討勃海王武藝。庚申。命太僕員外卿金思蘭。使于新羅。發兵擊其南鄙。會大雪丈餘。山路阻隘。士卒死者過半。無功而還。武藝怨門藝不已。密遣刺客。刺門藝於天津橋南不死。上命河南搜捕賊黨。盡殺之。○二月丁酉。金城公主請立碑於赤嶺。以分唐與吐蕃之境。許之。○三月乙巳。侍中裴光庭薨。太常博士孫琬議。光庭用循資格。失勸獎之道。請諡曰克。其子稹訟之。上賜諡忠獻。上問蕭嵩。可以代光庭者。嵩與右散騎常侍王丘善。將薦之。固讓於右丞韓休。嵩言休於上。甲寅。以休爲黃門侍郎。同平章事。休爲人峭直。不于榮利。及爲相。甚允時望。始嵩以休恬和。謂其易制。故引之。及與共事。休守正不阿。嵩漸惡之。宋璟歎



曰。不意韓休乃能如是。上或宮中宴樂。及後苑遊獵。小有過差。輒謂左右曰。韓休知否。言終。諫疏已至。上嘗臨鏡。默然不樂。左右曰。韓休爲相。陛下殊瘦於舊。何不逐之。上歎曰。吾貌雖瘦。天下必肥。蕭嵩奏。事常順指。既退。吾寢不安。韓休常力爭。既退。吾寢乃安。吾用韓休。爲社稷耳。非爲身也。有供奉侏儒。名黃鴈。性警黠。上常馮之以行。謂之肉几。寵賜甚厚。一日晚入。上恠之。對曰。臣歸入宮。道逢捕盜官。與臣爭道。臣揪之。墜馬。故晚。因下階叩頭。上曰。但使外無章奏。汝亦無憂。有頃。京兆奏其狀。上卽叱出。付有司杖殺之。○閏月。癸酉。幽州道副總管郭英傑。與契丹戰于都山。敗死。時節度薛楚玉遣英傑將精騎一萬。及降奚擊契丹。屯於榆關之外。可突干引突厥之衆來合戰。奚持兩端。散走保險。唐兵不利。英傑戰死。餘衆六千餘人。猶力戰不已。虜以英傑首示之。竟不降。盡爲虜所殺。楚玉訥之弟也。○夏。六月。癸亥。制。自今選人。有才業。操行。委吏部。臨時擢用。流外奏用。不復引過門下。雖有此制。而有司以循資格。便於己。猶踵行之。○是時。官自三師以下。一萬七千六百八十六員。吏自佐史以上。五萬七千四百一十六員。而入仕之塗甚多。不可勝紀。○秋。七月。乙丑朔。日有食之。○九月。壬午。立皇子沔爲信王。泚爲義王。濯爲陳王。澄爲豐王。漙爲恒王。澹爲梁王。滔爲汴王。○關中久雨穀貴。上將幸東都。召京兆尹裴耀卿謀之。對曰。關中。帝業所興。當百代不易。但以地狹穀少。故乘輿時幸東都。以寬之。臣聞貞觀永徽之際。祿廩不多。歲漕關東一二十萬石。足以周贍。乘輿得以安居。今用度浸廣。運數倍於前。猶不能給。故使陛下數冒寒暑。以恤西人。今若使司農租米。悉輸東都。自都轉漕。稍實關中。苟關中有數年之儲。則不憂水旱矣。且吳人不習河漕。所在停留。日月既久。遂生隱盜。臣請於河口置倉。使吳船至彼。卽輸米而去。官自雇載。分入河洛。又於三門東西。各置一倉。至者貯納。水險則止。水通則下。或開山路。車運而過。則無復留滯。省費鉅萬矣。河渭之濱。皆有漢隋舊倉。葺之非難也。上深然其言。○冬。十月。庚

戌。上幸驪山溫泉。己未。還宮。○戊子。左丞相宋璟致仕歸東都。○韓休數與蕭嵩爭論於上前。面折嵩短。上頗不悅。嵩因乞駭骨。上曰。朕未厭卿。卿何爲遽去。對曰。臣蒙厚恩。待罪宰相。富貴已極。及陛下未厭臣。故臣得從容引去。若已厭臣。臣首領且不保。安能自遂。因泣下。上爲之動容。曰。卿且歸。朕徐思之。丁巳。嵩罷爲左丞相。休罷爲工部尚書。以京兆尹裴耀卿爲黃門侍郎。前中書侍郎張九齡。時居母喪。起復中書侍郎。竝同平章事。○是歲。分天下爲京畿。都畿。關內。河南。河東。河北。隴右。山南。東道。山南。西道。劍南。淮南。江南。東道。江南。西道。黔中。嶺南。凡十五道。各置採訪使。以六條檢察非法。兩畿以中丞領之。餘皆擇賢刺史領之。非官有遷免。則使無廢更。惟變革舊章。乃須報可。自餘聽便。宜從事。先行後聞。○太府卿楊崇禮。政道之子也。在太府二十餘年。前後爲太府者。莫能及。時承平日久。財貨山積。嘗經楊卿者。無不精美。每歲句駁省便。出錢數百萬緡。是歲。以戶部尚書致仕。年九十餘矣。上問宰相。崇禮諸子。誰能繼其父者。對曰。崇禮三子。慎餘。慎矜。慎名。皆廉勤有才。而慎矜爲優。上乃擢慎矜。自汝陽令。爲監察御史。知太府出納。慎名。攝監察御史。知含嘉倉出給。亦皆稱職。上甚悅之。慎矜奏。諸州所輸布帛。有漬污穿破者。皆下本州。徵折估錢。轉市輕貨。徵調始繁矣。

資治通鑑卷第一百二十三

唐紀 玄宗至道大聖大明孝皇帝中之上開元二十一年



# 資治通鑑卷第二百一十四

## 唐紀三十

### 玄宗至道大聖大明孝皇帝中之中

開元二十二年春正月己巳。上發西京。己丑。至東都。張九齡自韶州入見。求終喪。不許。○二月壬寅。秦州地震。壞公私屋殆盡。吏民壓死者四千餘人。命左丞相蕭嵩賑恤。○方士張果自言有神仙術。誑人云。堯時爲侍中。於今數千歲。多往來恒山中。則天以來。屢徵不至。相州刺史韋濟薦之。上遣中書舍人徐嶠齎書迎之。庚寅。至東都。肩輿入宮。恩禮甚厚。○張九齡請不禁鑄錢。三月庚辰。敕百官議之。裴耀卿等皆曰。一啓此門。恐小人棄農逐利。而濫惡更甚。祕書監崔沔曰。若稅銅折役。則官治可成。計估度庸。則私鑄無利。易而可久。簡而難誣。且夫錢之爲物。貴以通貨。利不在多。何待私鑄。然後足用也。右監門錄事參軍劉秩曰。夫入富則不可以賞勸。貧則不可以威禁。若許其私鑄。貧者必不能爲之。臣恐貧者益貧。而役於富者益富。而逞其欲。漢文帝時。吳王濞富埒天子。鑄錢所致也。上乃止。秩子女之。子也。○夏四月壬辰。以朔方節度使信安王禕兼關內道採訪處置使。增領涇原等十二州。○吏部侍郎李林甫。柔佞多狡。數深結宦官及妃嬪家。伺候上動靜。無不知之。由是每奏對。常稱旨。上悅之。時武惠妃寵幸傾後宮。生壽王清。諸子莫得爲比。太子浸疎薄。林甫乃因宦官言於惠妃。願盡力保護壽王。惠妃德之。陰爲內助。由是擢黃門侍郎。五月戊子。以裴耀卿爲侍中。張九齡爲中書令。林甫爲禮部尚書。同中書門下三品。○上種麥於苑中。帥太子以下親

往芟之。謂曰。此所以薦宗廟。故不敢不親。且欲使汝曹知稼穡艱難耳。又徧以賜侍臣曰。比遣人視田中。稼多不得實。故自種以觀之。○六月壬辰。幽州節度使張守珪大破契丹。遣使獻捷。○薛王業疾病。上憂之。容髮爲變。七月己巳。薨。贈諡惠宣太子。○上以裴耀卿爲江淮河南轉運使。於河口置輸場。八月壬寅。於輸場東置河陰倉。西置柏崖倉。三門東置集津倉。西置鹽倉。鑿漕渠十八里。以避三門之險。先是。舟運江淮之米。至東都。舍嘉倉。儲車陸運三百里。至陝。率兩斛用十錢。耀卿令江淮舟運。悉輸河陰倉。更用河舟運。至含嘉倉。及太原倉。自太原倉入渭。輸關中。凡三歲。運米七百萬斛。省儲車錢三十萬緡。或說耀卿獻所省錢。耀卿曰。此公家贏縮之利耳。奈何以之市寵乎。悉奏以爲市糴錢。○張果固請歸恒山。制以爲銀青光祿大夫。號通玄先生。厚賜而遣之。後卒。好異者。奏以爲尸解。上由是頗信神仙。○冬十二月戊子朔。日有食之。○乙巳。幽州節度使張守珪。斬契丹王屈烈。及可突干。傳首。時可突干連年爲邊患。趙含章。薛楚玉。皆不能討。守珪到官。屢擊破之。可突干困迫。遣使詐降。守珪使管記王悔。就撫之。悔至。其牙帳察契丹上下。殊無降意。但稍徙營帳。近西北。密遣人引突厥。謀殺悔。以叛。悔知之。牙官李過折。與可突干分典兵馬。爭權不叶。悔說過折。使圖之。過折夜勒兵。斬屈烈。及可突干。盡誅其黨。帥餘衆來降。守珪出師紫蒙川。大閱。以鎮撫之。梟屈烈。可突干首于天津之南。○突厥毗伽可汗。爲其大臣梅錄啜所毒。未死。討誅梅錄啜。及其族黨。既卒。子伊然可汗立。尋卒。弟登利可汗立。庚戌。來告喪。○禁京城旬者。置病坊。以廩之。二十三年春正月。契丹知兵馬中郎李過折。來獻捷。制以過折爲北平王。檢校松漠州都督。○乙亥。上耕籍田。九推乃止。公卿以下。皆終畝。赦天下。都城酺三日。上御五鳳樓。酺宴。觀者諠隘。樂不得奏。金吾白挺如雨。不能遏。上患之。高力士奏。河南丞嚴安之。爲理嚴。爲人所畏。請使止之。上從之。安之至。以手板繞場。畫地曰。犯此者死。於是盡三日。人指其畫。以相戒。無



敢犯者。時命三百里內刺史縣令各帥所部音樂集于樓下。各較勝負。懷州刺史以車載樂工數百。皆衣文繡。服箱之牛。皆為虎豹犀象之狀。魯山令元德秀。惟遣樂工數人。連袂歌于焉。上曰。懷州之人。其塗炭乎。立以刺史為散官。德秀性介潔質樸。士大夫皆服其高。○上美張守珪之功。欲以為相。張九齡諫曰。宰相者。代天理物。非賞功之官也。上曰。假以其名。而不使任其職。可乎。對曰。不可。惟名與器。不可以假人。君之所司也。且守珪纔破契丹。陛下即以為宰相。若盡滅奚厥。將以何官賞之。上乃止。二月。守珪詣東都。獻捷拜右羽林大將軍。兼御史大夫。賜二子官。賞賚甚厚。○初。殿中侍御史楊汪。既殺張審素。更名萬頃。審素二子瑄。瑒。皆幼。坐流嶺表。尋逃歸。謀伺復讐。三月。丁卯。手殺萬頃於都城。繫表於斧。言又冤狀。欲之江外。殺與萬頃同謀陷其父者。至汜水。為有司所得。議者多言。二子父死非罪。釋年。孝烈能復父讐。宜加矜宥。張九齡亦欲活之。裴耀卿李林甫。以為如此壞國法。上亦以為然。謂九齡曰。孝子之情。義不顧死。然殺人而赦之。此塗不可啓也。乃下敕曰。國家設法。期於止殺。各伸為子之志。誰非徇孝之人。展轉相讐。何有限極。咎繇作士。法在必行。曾參殺人。亦不可恕。宜付河南府杖殺。士民皆憐之。為作哀誄。勝於衢路。市人斂錢。葬之於北邙。恐萬頃家發之。仍為疑冢數處。○唐初公主。實封止三百戶。中宗時。太平公主至五千戶。率以七丁為限。開元以來。皇妹止千戶。皇女又半之。皆以三丁為限。駙馬皆除三品員外官。而不任以職事。公主邑入至少。至不能具車服。左右或言其太薄。上曰。百姓租賦。非我所有。戰士出死力。賞不過東帛。女子何功。而享多戶邪。且欲使之知儉嗇耳。秋。七月。咸宜公主將下嫁。始加實封至千戶。公主武惠妃之女也。於是諸公主皆加至千戶。○冬。十月。戊申。突騎施寇北庭。及安西撥換城。○閏月。壬午朔。日有食之。○十二月。乙亥。冊故蜀州司戶楊玄琰女為壽王妃。玄琰。汪之曾孫也。○是歲。契丹王過折。為其臣涅禮所殺。并其諸子。一子刺乾。奔安東得免。涅禮上

言。過折用刑殘虐。衆情不安。故殺之。上赦其罪。因以涅禮為松漠都督。且賜書責之曰。卿之蕃法。多無義於君長。自昔如此。朕亦知之。然過折是卿之王。有惡輒殺之。為此王者。不亦難乎。但恐卿為王。後人亦爾。常不自保。誰願作王。亦應防慮後事。豈得取快目前。突厥尋引兵東侵。奚契丹。涅禮與奚王李歸國擊破之。

二十四年春。正月。庚寅。敕天下逃戶。聽盡今年內自首。有舊產者。令還本貫。無者。別俟進止。踰限不首。當命專使搜求。散配諸軍。○北庭都護蓋嘉運。擊突騎施。大破之。○二月。甲寅。宴新除縣令於朝堂。上作令長新戒一篇。賜天下縣令。○庚午。更皇子名。鴻曰瑛。潭曰琮。浚曰輿。洽曰琰。洧曰瑤。混曰琬。澗曰琚。澠曰瑤。澧曰璵。澤曰璘。清曰瑁。洄曰玢。沐曰琦。溢曰環。沔曰理。泚曰玼。淮曰玟。澄曰洪。漣曰瑱。澹曰璿。滔曰璵。○舊制。考功員外郎。掌試貢舉人。有進士李權。陵。梅。哉。外。李昂。議者以員外郎位卑。不能服衆。三月。壬辰。敕自今。委禮部侍郎。試貢舉人。○張守珪使平盧。討擊使左驍衛將軍安祿山。討奚契丹叛者。祿山恃勇輕進。為虜所敗。夏。四月。辛亥。守珪奏請斬之。祿山臨刑呼曰。大夫不欲滅奚契丹邪。奈何殺祿山。守珪亦惜其驍勇。乃更執送京師。張九齡批曰。昔穰苴誅莊賈。孫武斬宮嬪。守珪軍令若行。祿山不宜免死。上惜其才。敕令免官。以白衣將領。九齡固爭曰。祿山失律喪師。於法不可不誅。且臣觀其貌。有反相。不殺必為後患。上曰。卿勿以王夷甫識石勒。枉害忠良。竟赦之。安祿山者。本營州雜胡。初名阿鞞山。其母巫也。父死。母攜之。再適突厥安延偃。會其部落破散。與延偃兄子思順。俱逃來。故冒姓安氏。名祿山。又有史宰于者。與祿山同里閭。先後一日生。及長。相親愛。皆為互市牙郎。以驍勇聞。張守珪以祿山為捉生將。祿山每與數騎出。輒擒契丹數十人。而返。狡猾善揣人情。守珪愛之。養以為子。宰于嘗負官債。亡入奚中。為奚遊奕。所得欲殺之。宰于給曰。我唐之和親使也。汝殺我。禍且及汝國。遊奕信之。送詣牙帳。宰于見奚王。長揖不



拜。奚王雖怒而畏唐，不敢殺。以客禮館之，使百人隨宰于入朝。宰于謂奚王曰：王遣人雖多，觀其才皆不足以見天子。聞王有良將瑣高者，何不使之入朝？奚王即命瑣高與牙下三百人，隨宰于入朝。宰于將至平盧，先使人謂軍使裴休子曰：奚使瑣高與精銳俱來，聲云入朝，實欲襲軍城，宜謹爲之備。先事圖之。休子乃具軍容，出迎至館，悉阮殺其從兵，執瑣高送幽州。張守珪以宰于爲有功，奏爲果毅，累遷將軍。後入奏事，上與語悅之，賜名思明。○故連州司馬武攸望之子溫育，坐交通權貴杖死。乙丑朔，方河東節度使信安王禕貶衢州刺史。廣武王承宏貶房州別駕。涇州刺史薛自勸貶澧州別駕。皆坐與溫育交遊故也。承宏守禮之子也。辛未朔，蒲州刺史王琚貶通州刺史，坐與禕交書也。○五月，醴泉妖人劉志誠作亂，驅掠路人，將趣咸陽。村民走告縣官，焚橋斷路以拒之。其衆遂潰，數日悉擒斬之。○六月初，分月給百官俸錢。○初上因籍田赦，命有司議增宗廟籩豆之薦，及服紀未通者。太常卿韋縉奏：請宗廟每坐籩豆十二，兵部侍郎張均職方郎中韋述議曰：聖人知孝子之情深而物類之無限，故爲之節制。人之嗜好本無憑準，宴私之饌與時遷移，故聖人一切同歸於古，屈到嗜芟，屈建不以薦，以爲不以私欲干國之典。今欲取甘旨肥濃，皆充祭用，苟踰舊制，其何限焉？書曰：黍稷非馨，明德惟馨。若以今之珍饈，平生所習，求神無方，何必泥古？則簠簋可去，而盤盂盃按當在御矣。韶濩可息，而箜篌箏笛當在奏矣。既非正物，後嗣何觀？夫神以精明臨人者，也不求豐大，苟失於禮，雖多何爲？豈可廢棄禮經，以從流俗？且君子愛人以禮，不求苟合。況在宗廟，敢忘舊章？太子賓客崔沔議曰：祭祀之興，肇於太古。茹毛飲血，則有毛血之薦，未有麩糞。則有玄酒之奠。施及後王，禮物漸備。然以神道致敬，不敢廢也。籩豆簠簋樽彝之實，皆周人之時饌也。其用通於宴饗賓客，而周公制禮，與毛血玄酒同薦鬼神。國家由禮立訓，因時制範。清廟時饗，禮饌畢陳，用周制也。園陵上食，時膳具設，遵漢法也。職貢來祭，致遠物也。

有新必薦，順時令也。苑囿之內，躬稼所收，蒐狩之時，親發所中，莫不薦而後食，盡誠敬也。若此至矣。復何加焉？但當申敕有司，無或簡怠，則鮮美肥濃，盡在是矣。不必加籩豆之數也。上固欲量加品味，縉又奏：每室加籩豆各六，四時各實以新果珍羞，從之。縉又奏：喪服，舅總麻三月，從母外祖父母，皆小功五月。外祖至尊，同於從母之服。姨舅一等服，則輕重有殊。堂姨舅親，即未疎，恩絕不相爲服。舅母來承外族，不如同爨之禮，竊以古意，猶有所未暢者也。請加外祖父母爲大功九月，姨舅皆小功五月。堂舅堂姨舅母，竝加至袒免。崔沔議曰：正家之道，不可以貳。總一定義，理歸本宗。是以內有齊斬，外皆總麻。尊名所加，不過一等。此先王不易之道也。願守八年明旨，一依古禮，以爲萬代成法。韋述議曰：喪服傳曰：禽獸知母而不知父。野人曰：父母何等焉？都邑之士，則知尊禰矣。大夫及學士，則知尊祖矣。聖人究天道而厚於祖禰，繫族姓而親其子孫，母黨比於本族，不可同貫明矣。今若外祖與舅，加服一等，堂舅及姨，列於服紀，則中外之制，相去幾何？廢禮徇情，所務者末，古之制，作者知人情之易搖，恐及於禮之將漸，別其同異，輕重相懸，欲使後來之人，永不相雜，微旨斯在。豈徒然哉？苟可加也，亦可減也。往聖可得而非，則禮經可得而隳矣。先王之制，謂之彝倫，奉以周旋，猶恐失墜。一紊其叙，庸可止乎？請依儀禮喪服爲定。禮部員外郎楊仲昌議曰：鄭文貞公魏徵始加舅服，至小功五月，雖文貞賢也，而周孔聖也，以賢改聖，後學何從？竊恐內外乖序，親疎奪倫，情之所沿，何所不至？昔子路有姊之喪，而不除，孔子曰：先王制禮，行道之人，皆不忍也。子路除之，此則聖人援事抑情之明例也。記曰：母輕議禮，明其蟠於天地，竝彼日月，賢者由之，安敢損益也？敕：姨舅既服小功，舅母不得全降，宜服總麻。堂姨舅宜服袒免。均說之子也。○秋八月，廢之源爲書五卷，謂之千秋金鏡錄。上之上賜書褒美。○甲寅，突騎施遣其大臣胡祿達于。



來請降許之。○御史大夫李適之承乾之孫也。以才幹得幸於上。數爲承乾論辯。甲戌。追贈承乾恒山愍王。○乙亥。汴哀王璵薨。○冬。十月。戊申。車駕發東都。先是。敕以來年二月二日。行幸西京。會宮中有恠。明日。上召宰相。即議西還。裴耀卿張九齡曰。今農收未畢。請俟仲冬。李林甫潛知。上指二相退。林甫獨留。言於上曰。長安洛陽。陛下東西宮耳。往來行幸。何更擇時。借使妨於農收。但應蠲所過租稅而已。臣請宣示百司。即日西行。上悅。從之。過陝州。以刺史盧奐有善政。題贊於其聽事而去。奐懷憤之子也。丁卯。至西京。○朔方節度使牛仙客前在河西。能節用度。勤職業。倉庫充實。器械精利。上聞而嘉之。欲加尙書。張九齡曰。不可。尙書古之納言。唐興以來。惟舊相及揚歷中外有德望者。乃爲之。仙客本河湟使典。今驟居清要。恐羞朝廷。上曰。然則但加實封可乎。對曰。不可。封爵所以勸有功也。邊將實倉庫。修器械。乃常務耳。不足爲功。陛下賞其勤。賜之金帛。可也。裂土封之。恐非其宜。上默然。李林甫言於上曰。仙客宰相才也。何有於尙書。九齡書生。不達大體。上悅。明日。復以仙客實封爲言。九齡固執如初。上怒。變色曰。事皆由卿邪。九齡頓首謝曰。陛下不知臣愚。使待罪宰相。事有未允。臣不敢不盡言。上曰。卿嫌仙客寒微。如卿有何閥閱。九齡曰。臣嶺海孤賤。不如仙客。生於中華。然臣出入臺閣。典司誥命。有年矣。仙客邊隅小吏。目不知書。若大任之。恐不愜衆望。林甫退而言曰。苟有才識。何必辭學。天子用人。有何不可。十一月。戊戌。賜仙客爵隴西縣公。食實封三百戶。○初。上欲以李林甫爲相。問於中書令張九齡。九齡對曰。宰相繫國安危。陛下相林甫。臣恐異日爲廟社之憂。上不從。時九齡方以文學爲上所重。林甫雖恨。猶曲意事之。侍中裴耀卿與九齡善。林甫并疾之。是時。上在位歲久。漸肆奢欲。怠於政事。而九齡遇事無細大。皆力爭。林甫巧伺上意。日思所以中傷之。上之爲臨淄王也。趙麗妃。皇甫德儀。劉才人。皆有寵。麗妃生太子瑛。德儀生鄂王瑒。才人生光王琒。及即位。幸武惠妃。麗妃等愛皆弛。惠妃生

壽王瑁。寵冠諸子。太子與瑒瑒會於內弟。各以母失職有怨望語。駙馬都尉楊洵尙咸宜公主。常伺二子過失。以告惠妃。惠妃泣訴於上曰。太子陰結黨與。將害妾母子。亦指斥至尊。上大怒。以語宰相。欲皆廢之。九齡曰。陛下踐阼垂三十年。太子諸王不離深宮。日受聖訓。天下之人皆慶陛下享國久長。子孫蕃昌。今三子皆已成。不聞大過。陛下奈何一旦以無根之語。喜怒之際。盡廢之乎。且太子天下本不可輕搖。昔晉獻公聽驪姬之讒。殺申生。三世大亂。漢武帝信江充之誣。罪戾太子。京城流血。晉惠帝用賈后之譖。廢愍懷太子。中原塗炭。隋文帝納獨孤后之言。黜太子勇。妃煬帝遂失天下。由此觀之。不可不慎。陛下必欲爲此。臣不敢奉詔。上不悅。林甫初無所言。退而私謂宦官之貴幸者曰。此主上家事。何必問外人。上猶豫未決。惠妃密使宦奴牛貴兒謂九齡曰。有廢必有興。公爲之援。宰相可長處。九齡叱之。以其語白上。上爲之動色。故詔九齡罷相。太子得無動。林甫日夜短九齡於上。上浸疎之。林甫引蕭昊爲戶部侍郎。昊素不學。嘗對中書侍郎嚴挺之。讀伏臘爲伏獵。挺之言於九齡曰。省中豈容有伏獵侍郎。由是出。昊爲岐州刺史。故林甫怨挺之。九齡與挺之善。欲引以爲相。嘗謂之曰。李尙書方承恩。足下宜一造門。與之款暱。挺之素負氣。薄林甫爲人。竟不之詣。林甫恨之。益深。挺之先娶妻出之。更嫁蔚州刺史王元琰。元琰坐贓罪。下三司按鞫。挺之爲之營解。林甫因左右使於禁中。白上。上謂宰相曰。挺之爲罪人。請屬所由。九齡曰。此乃挺之出妻。不宜有情。上曰。雖離乃復有私。於是上積前事。以耀卿九齡爲阿黨。壬寅。以耀卿爲左丞相。九齡爲右丞相。竝罷政事。以林甫兼中書令。仙客爲工部尙書。同中書門下三品。領朔方節度。如故。嚴挺之貶洛州刺史。王元琰流嶺南。上即位以來。所用之相。姚崇尙通。宋璟尙法。張嘉貞尙吏。張說尙文。李元紘。杜暹尙儉。韓休。張九齡尙直。各其所長也。九齡既得罪。自是朝廷之士。皆容身保位。無復直言。李林甫欲蔽塞人主視聽。自專大權。明召諸諫官。謂曰。今明主



在上。羣臣將順之。不暇。烏用多言。諸君不見立。仗馬乎。食三品料。一鳴輒斥去。悔之何及。補闕杜璉。嘗上書言事。明日。黜爲下邳令。自是。諫爭路絕矣。牛仙客既爲林甫所引。專給唯諾而已。然二人皆謹守格式。百官遷除。各有常度。雖奇才異行。不免終老常調。其以巧諂邪險自進者。則超騰不次。自有它蹊矣。林甫城府深密。人莫窺其際。好以甘言啗人。而陰中傷之。不露辭色。凡爲上所厚者。始則親結之。及位執稍逼。輒以計去之。雖老奸巨猾。無能逃於其術者。

二十五年春正月。初置玄學博士。每歲依明經舉。○二月。敕曰。進士以聲韻爲學。多昧古今。明經以帖誦爲功。罕窮旨趣。自今明經。問大義十條。對時務策三首。進士試大經十帖。○戊辰。新羅王興光卒。子承慶襲位。○乙酉。幽州節度使張守珪。破契丹於捺祿山。○己亥。河西節度使崔希逸。襲吐蕃破之於青海西。初。希逸遣使謂吐蕃乞力徐曰。兩國通好。今爲一家。何必更置兵守捉。妨人耕牧。請皆罷之。乞力徐曰。常侍忠厚。言必不欺。然朝廷未必專以邊事相委。萬一有姦人交關。其間掩吾不備。悔之何及。希逸固請。乃刑白狗爲盟。各去守備。於是吐蕃畜牧被野。時吐蕃西擊勃律。勃律來告急。上命吐蕃罷兵。吐蕃不奉詔。遂破勃律。上甚怒。會希逸僉人孫誨入奏。事自欲求功。奏稱吐蕃無備。請掩擊。必大獲。上命內給事趙惠琮與誨偕往。審察事宜。惠琮等至。則矯詔令希逸襲之。希逸不得已發兵。自涼州南入吐蕃。二千餘里。至青海西。與吐蕃戰。大破之。斬首二千餘級。乞力徐脫身走。惠琮誨皆受厚賞。自是吐蕃復絕朝貢。○夏四月辛酉。監察御史周子諒彈牛仙客非才。引讖書爲證。上怒。命左右擲于殿庭。絕而復蘇。仍杖之朝堂。流瀼州。至藍田而死。牛林甫言。子諒張九齡所薦也。甲子。貶九齡荊州長史。○楊洄又奏太子瑛。鄂王瑤。光王琚。云與太子妃兄駙馬薛鏞潛構異謀。上召宰相謀之。牛林甫對曰。此陛下家事。非臣等所宜豫。上意乃決。乙丑。使宦者宣制於

宮中。廢瑛瑤瑒爲庶人。流鏞於瀼州。瑛瑤瑒尋賜死。城東驛鏞賜死於藍田。瑒皆好學。有才識。死不以罪。人皆惜之。丙寅。瑛舅家趙氏。妃家薛氏。瑒舅家皇甫氏。坐流貶者數十人。惟瑒妃家韋氏。以妃賢得免。○五月。夷州刺史楊濟坐賊當死。上命杖之六十。流古州。左丞相裴耀卿上疏。以爲決杖贖死。恩則甚優。解體受笞。事頗爲辱。止可施之徒隸。不當及於士人。上從之。○癸未。放以方隅底定。令中書門下與諸道節度使量軍鎮閑劇利害。審計兵防定額。於諸色征人及客戶中。召募丁壯。長充邊軍。增給田宅。務加優恤。○辛丑。上命有司。選宗子有才者。授以臺省及法官京縣官。敕曰。遠道慢常。義無私於王法。修身効節。恩豈薄於它人。期於帥先。勵我風俗。○秋七月己卯。大理少卿徐嶠奏。今歲天下斷死刑五十八。大理獄院由來相傳。殺氣太盛。鳥雀不栖。今有鵲巢其樹。於是百官以幾致刑措。上表稱賀。上歸功宰輔。庚辰。賜牛林甫爵晉國公。牛仙客幽國公。上命牛林甫。牛仙客與法官刪修律令格式。成。九月壬申。頒行之。○先是。西北邊數十州多宿重兵。地租營田。皆不能贍。始用和糴之法。有彭果者。因牛仙客獻策。請行糴法於關中。戊子。敕以歲稔穀賤。傷農命增時價。什二三。和糴東西畿粟各數百萬斛。停今年江淮所運租。自是關中蓄積羨溢。車駕不復幸東都矣。○癸巳。敕。河南北租。應輸含嘉太原倉者。皆留輸本州。○太常博士王璵上疏。請立青帝壇。以迎春。從之。冬十月辛丑。制。自今立春親迎春於東郊。時上頗好祀神鬼。故璵專習祠祭之禮。以于時上悅之。以爲侍御史。領祠祭使。璵祈禱。或焚紙錢。類巫覡習禮者羞之。○壬申。上幸驪山溫泉。乙酉。還宮。○己丑。開府儀同三司廣平文貞公宋璟薨。○十二月丙午。惠妃武氏薨。贈諡貞順皇后。○是歲。命將作大匠康譽素之東都。毀明堂。譽素上言。毀之勞人。請去上層。卑於舊九十五尺。仍舊爲乾元殿。從之。○初。令租庸調資課。皆以土物輸京都。○二十六



募向足。自今鎮兵勿復遣。在彼者縱還。○令天下州縣里別置學。○壬辰。以李林甫領隴右節度副大使。以鄯州都督杜希望知留後。二月乙卯。以牛仙客兼河東節度副大使。○己未。葬真順皇后于敬陵。○壬戌。敕河曲六州胡。坐康待賓散隸諸州者。聽還故土。於鹽夏之間。置宥州。以處之。○三月。吐蕃寇河西。節度使崔希逸擊破之。鄯州都督知隴右留後杜希望。攻吐蕃新城。拔之。以其地爲威戎軍。置兵一千戍之。○夏五月乙酉。李林甫兼河西節度使。丙申。以崔希逸爲河南尹。希逸自念失信於吐蕃。內懷愧恨。未幾而卒。○太子瑛既死。李林甫數勸上立壽王瑁。上以忠王璿年長。且仁孝恭謹。又好學。意欲立之。猶豫歲餘不決。自念春秋浸高。三子同日誅死。繼嗣未定。常忽忽不樂。寢膳爲之減。高力士乘間請其故。上曰。汝我家老奴。豈不能揣我意。力士曰。得非以郎君未定邪。上曰。然。對曰。大家何必如此。虛勞聖心。但推長而立。誰敢復爭。上曰。汝言是也。汝言是也。由是遂定。六月庚子。立瑛爲太子。○辛丑。以岐州刺史蕭昊爲河西節度使。總留後事。鄯州都督杜希望爲隴右節度使。太僕卿王昱爲劍南節度使。分道經略吐蕃。仍毀所立赤嶺碑。○突騎施可汗蘇祿素廉儉。每攻戰所得。輒與諸部分之。不留私蓄。由是衆樂爲用。既尙唐公主。又潛通突厥及吐蕃。突厥吐蕃各以女妻之。蘇祿以三國女爲可敦。又立數子爲葉護。用度浸廣。由是攻戰所得。不復更分。晚年病風。一手攣縮。諸部離心。會長莫賀達干。都摩度兩部最彊。其部落。又分爲黃姓黑姓。互相乖阻。於是莫賀達干勒兵。夜襲蘇祿。殺之。都摩度初與莫賀達干連謀。既而復與之異。立蘇祿之子骨啜爲吐火仙可汗。以收其餘衆。與莫賀達干相攻。莫賀達干遣使告磧西節度使蓋嘉運。上命嘉運招集突騎施。拔汗那。以西諸國。吐火仙與都摩度據碎葉城。黑姓可汗爾微特勒。據恒邏斯城。相與連兵。以拒唐。○太子將受冊命。儀注有中嚴外辦。及絳紗袍。太子嫌與至尊同稱。表請易之。左丞相裴耀卿奏。停中嚴。改外辦。曰外備。改絳紗袍爲朱明服。

秋七月己巳。上御宣政殿。冊太子故事。太子乘輅。至殿門。至是太子不就輅。自其宮步入。是日。敕天下己卯。冊忠王妃韋氏爲太子妃。○杜希望將鄯州之衆。奪吐蕃河橋。築鹽泉城於河左。吐蕃發兵三萬逆戰。希望衆少不敵。將卒皆懼。左威衛郎將王忠嗣帥所部先犯其陳。所向闢易。殺數百人。虜陳亂。希望縱兵乘之。虜遂大敗。置鎮西軍於鹽泉。忠嗣以功遷左金吾將軍。○八月辛巳。勃海王武藝卒。子欽茂立。○九月丙申朔。日有食之。○初儀鳳中。吐蕃陷安戎城而據之。其地險要。唐屢攻之。不克。劍南節度使王昱築兩城於其側。頓軍蒲婆嶺下。運資糧以逼之。吐蕃大發兵救安戎城。昱衆大敗。死者數千人。昱脫身走。糧仗軍資皆棄之。昱括州刺史。再貶高要尉而死。○戊午。冊南詔蒙歸義爲雲南王。歸義之先本哀牢夷地。居姚州之西。東南接交趾。西北接吐蕃。蠻語謂王曰詔。先有六詔。曰蒙舍。曰蒙越。曰越析。曰浪穹。曰樣備。曰越澹。兵力相埒。莫能相壹。歷代因之。以分其勢。蒙舍最在南。故謂之南詔。高宗時。蒙舍細奴邏初入朝。細奴邏生邏盛。邏盛生盛邏皮。盛邏皮生皮邏閣。皮邏閣浸彊大。而五詔微弱。會有破洱河蠻之功。乃賂王昱。求合六詔爲一。昱爲之奏請。朝廷許之。仍賜名歸義。於是兵威脅服。羣蠻不從者滅之。遂擊破吐蕃。徙居大和城。其後卒爲邊患。○冬十月戊寅。上幸驪山溫泉。○壬辰。上還宮。○是歲。於西京東都往來之路。作行宮千餘間。○分左右羽林。置龍武軍。以萬騎營隸焉。○潤州刺史齊澣奏。自瓜步濟江。迂六十里。請自京口埭下。直濟江。穿伊婁河。二十五里。卽達楊子縣。立伊婁埭。從之。○二十七年春正月壬寅。命隴右節度大使榮王琬。自至本道。巡按處置諸軍。選募關內河東壯士三五萬人。詣隴右防遏。至秋末無寇。聽還。○羣臣請加尊號。曰聖文。二月己巳。許之。因赦天下。免百姓今年田租。○夏四月癸酉。敕諸陰陽術數。自非昏喪卜擇。皆禁之。○己丑。以牛仙客爲兵部尚書。兼侍中。李林甫爲吏部尚書。兼中書令。總文武選事。○六月癸酉。以御



史大夫李適之兼幽州節度使。幽州將趙堪、白真、隋羅、矯節度使張守珪之命，使平盧軍使烏知義擊叛奚餘黨於橫水之北。知義不從，白真、隋羅矯稱制指以迫之。知義不得已，出師與虜遇，先勝後敗。守珪隱其敗狀以克獲聞，事頗泄。上令內謁者監牛仙童往察之。守珪重賂仙童，歸罪於白真、隋羅，逼令自縊死。仙童有寵於上，衆宦官疾之，共發其事。上怒，甲戌命楊思勗杖殺之。思勗縛格杖之數百，剝取其心，割其肉啗之。守珪坐貶括州刺史。太子太師蕭嵩嘗賂仙童，以城南良田數頃。李林甫發之，嵩坐貶青州刺史。○秋八月乙亥，磧西節度使蓋嘉運擒突騎施可汗吐火仙。嘉運攻碎葉城，吐火仙出戰敗走，擒之於賀邏嶺，分遣疏勒、鎮守使夫蒙靈筥與拔汗那王阿悉爛達干潛引兵突入怛邏斯城，擒黑姓可汗爾微，遂入曳建城，取交河公主，悉收散髮之民數萬，以與拔汗那王威震西陲。○壬午，吐蕃寇白草安人等軍，隴右節度使蕭昊擊破之。○甲申，追諡孔子爲文宣王。先是，祀先聖先師，周公南向，孔子東向坐，制自今孔子南向坐。被王者之服，釋奠用宮懸，追贈弟子皆爲公侯伯。○九月戊午，處木昆鼠尼施弓月等諸部先隸突騎施者皆帥衆內附，仍請徙居安西管內。○太子更名紹。○冬十月辛巳，改修東都明堂。○丙戌，上幸驪山溫泉。十一月辛丑，還宮。○甲辰，明堂成。○劍南節度使張宥、文吏不習軍旅，悉以軍政委團練副使章仇兼瓊兼瓊入奏，事盛言安戎城可取，上悅之。丁巳，以宥爲光祿卿。十二月，以兼瓊爲劍南節度使。○初，睿宗喪既除，祫于太廟，自是三年一祫，五年一禘，是歲夏既禘，冬又當祫，太常議以爲祭數則瀆，請停今年祫祭，自是通計五年一祫一禘從之。

二十八年春正月癸巳，上幸驪山溫泉。庚子，還宮。○二月，荊州長史張九齡卒。上雖以九齡忤旨逐之，然終愛重其人，每宰相薦士，輒問曰：「風度得如九齡不？」○三月丁亥朔，日有食之。○章仇兼瓊潛與安戎城中吐蕃翟都局及維州別駕董承晏結謀，使局開門引內唐兵，盡

殺吐蕃將卒，使監察御史許遠將兵守之。遠，敬宗之曾孫也。○甲寅，蓋嘉運入獻捷。上赦吐火仙罪，以爲左金吾大將軍。嘉運請立阿史那懷道之子昕爲十姓可汗，從之。○夏四月辛未，以昕妻李氏爲交河公主。○六月，吐蕃圍安戎城。○上蓋嘉運之功，以爲河西隴右節度使，使之經略吐蕃。嘉運恃恩流連，不時發。左丞相裴耀卿上疏，以爲臣近與嘉運同班，觀其舉措，誠勇烈有餘，然言氣矜誇，恐難成事。昔莫敖狃于蒲騷之役，卒喪楚師。今嘉運有驕敵之色，臣竊憂之。況防秋非遠，未言發日，若臨事始去，則士卒尙未相識，何以制敵？且將軍受命，鑿凶門而出，今乃酣飲朝夕，殆非憂國愛人之心。若不可改易，宜速遣進塗，仍乞聖恩，嚴加訓勵。上乃趣嘉運行，已而嘉運竟無功。○秋八月甲戌，幽州奏破奚契丹。○冬十月甲子，上幸驪山溫泉。辛巳，還宮。○吐蕃寇安戎城，及維州發關中彊騎救之。吐蕃引去，更命安戎城曰平戎。○十一月，罷牛仙客朔方河東節度使。○突騎施莫賀達干聞阿史那昕爲可汗，怒曰：「首誅蘇祿，我之謀也。今立史昕，何以賞我？」遂帥諸部叛。上乃立莫賀達干爲可汗，使統突騎施之衆，命蓋嘉運招諭之。十二月乙卯，莫賀達干降。○金城公主薨。吐蕃告喪，且請和。上不許。○是歲，天下縣千五百七十三，戶八百四十一萬二千八百七十一，口四千八百一十四萬三千六百九。西京東都米斛直錢不滿二百，絹匹亦如之。海內富安，行者雖萬里，不持寸兵。

二十九年春正月癸巳，上幸驪山溫泉。○丁酉，制承前諸州飢饉，皆待奏報，然始開倉賑給，道路悠遠，何救懸絕？自今委州縣長官與採訪使量事給訖奏聞。○庚子，上還宮。○上夢玄元皇帝告云：「吾有像在京城西，西南百餘里，汝遣人求之。吾當與汝與慶宮相見。」上遣使求得之於藍屋樓觀山間。夏閏四月，迎置興慶宮。五月，命畫玄元真容，分置諸州。開元觀。○六月，吐蕃四十萬衆入寇，至安仁軍，渾峯峰騎將臧希液帥衆五千擊破之。○秋七月丙寅，突厥



遣使來告登利可汗之喪。初，登利從叔二人，分典兵馬，號左右殺。登利患兩殺之專，與其母謀，誘右殺斬之，自將其衆。左殺判闕特勒勒兵，攻登利，殺之。立毗伽可汗之子爲可汗。俄爲骨咄葉護所殺，更立其弟，尋又殺之。骨咄葉護自立爲可汗，上以突厥內亂，癸酉命左羽林將軍孫老奴招諭回紇，葛邏祿拔悉密等部落。○乙亥，東都洛水溢，溺死者千餘人。○平盧兵馬使安祿山傾巧善事人，人多譽之。上左右至平盧者，祿山皆厚賂之。由是上益以爲賢。御史中丞張利貞爲河北採訪使，至平盧，祿山曲事利貞，乃至左右皆有賂。利貞入奏，盛稱祿山之美。八月乙未，以祿山爲營州都督，充平盧軍使，兩蕃渤海黑水四府經略使。○冬十月丙申，上幸驪山溫泉。○壬寅，分北庭安西爲二節度。○十一月庚戌，司空邢王守禮薨。守禮庸鄙無方識，每天將雨及霽，守禮必先言之，已而皆驗。岐薛諸王言於上曰：「邢兄有術，上問其故，對曰：『臣無術，則天時以章懷之故，幽閉宮中十餘年，歲賜杖者數四，背癢甚厚，將雨則沈悶，將霽則輕爽，臣以此知之耳。』因流涕霑襟，上亦爲之慘然。○辛酉，上還宮。○辛未，太尉寧王憲薨，上哀惋特甚，曰：「天下兄之天下也。兄固讓於我，爲唐太伯，常名不足以處之。」乃諡曰讓皇帝。其子汝陽王璿，上表追述先志，謙冲不敢當帝號。上不許，斂日內，出服以手書致於靈座，書稱隆基白，又名其墓曰惠陵。追諡其妃元氏曰恭皇后，祔葬焉。○十二月乙巳，吐蕃屠達化縣，陷石堡城，蓋嘉運不能禦。

資治通鑑卷第二百一十四

資治通鑑卷第二百一十五

唐紀三十一

玄宗至道大聖大明孝皇帝中之下

天寶元年春正月丁未朔，上御勤政樓，受朝賀，赦天下，改元。○壬子，分平盧別爲節度，以安祿山爲節度使。是時天下聲教所被之州三百二十一，羈縻之州八百，置十節度，經略使以備邊。安西節度撫寧西域，統龜茲焉耆于闐疎勒四鎮，治龜茲城，兵二萬四千。北庭節度防制突騎施，堅昆，統瀚海天山伊吾三軍，屯伊西二州之境，治北庭都護府，兵二萬人。河西節度斷隔吐蕃突厥，統赤水大斗建康寧寇玉門墨離盧新泉八軍，張掖交城白亭三守捉。屯涼肅瓜沙會五州之境，治涼州，兵七萬三千人。朔方節度捍禦突厥，統經略豐安定遠三軍，三受降城。安北單于二都護府，屯靈夏豐三州之境，治靈州，兵六萬四千七百人。河東節度與朔方犄角，以禦突厥，統天兵大同橫野岢嵐四軍，雲中守捉，屯太原府忻代嵐三州之境。治太原府，兵五萬五千人。范陽節度臨奚契丹，統經略威武清夷靜塞恒陽北平高陽唐興橫海九軍，屯幽薊媯檀易恒定漠滄九州之境，治幽州，兵九萬一千四百人。平盧節度鎮撫室韋靺鞨，統平盧檀龍二軍，榆關守捉，安東都護府，屯營平二州之境，治營州，兵三萬七千五百人。隴右節度備禦吐蕃，統臨洮河源白水安人振威威戎漢門寧塞積石鎮西十軍。綏和合川平夷三守捉，屯鄯廓洮河之境，治鄯州，兵七萬五千人。劍南節度西抗吐蕃，南撫蠻獠，統天寶平戎昆明寧遠澄川南江六軍，屯益翼茂當嶺柘松維恭雅黎姚悉十三州。



之境。治益州兵三萬九百人。嶺南五府經略。綏靜夷獠。統經略清海二軍。桂容邕交四管。治廣州兵萬五千四百人。此外又有長樂經略。福州領之。兵千五百人。東萊守捉。萊州領之。東牟守捉。登州領之。兵各千人。凡鎮兵四十九萬人。馬八萬餘匹。開元之前。每歲供邊兵衣糧。費不過二百萬。天寶之後。邊將奏益兵浸多。每歲用衣千二十萬疋。糧百九十萬斛。公私勞費。民始困苦矣。○甲寅。陳王府參軍田同秀。上言。見玄元皇帝於丹鳳門之空中。告以我藏靈符。在尹喜故宅。上遣使於故函谷關。尹喜臺旁。求得之。陝州刺史李齊物。穿三門運渠。辛未。渠成。齊物。神通之曾孫也。○壬辰。羣臣上表。以函谷靈符。潛應年號。先天不違。請於尊號。加天寶字。從之。○二月。辛卯。上享玄元皇帝於新廟。甲午。享太廟。丙申。合祀天地於南郊。赦天下。改侍中爲左相。中書令爲右相。尚書度右丞相。復爲僕射。東都北都皆爲京。州爲郡。刺史爲太守。改桃林縣曰靈寶。田同秀除朝散大夫。時人皆疑寶符。同秀所爲。問一歲。清河人崔以清復言。見玄元皇帝於天津橋北。云。藏符在武城紫微山。敕使往來。亦得之。東都留守王倕。知其詐。按問。果首服。奏之。上亦不深罪。流之而已。○三月。以長安令韋堅爲陝郡太守。領江淮租庸轉運使。初。宇文融既敗。言利者稍息。及楊慎矜得幸。於是韋堅。王鉷之徒。競以利進。百司有利權者。稍稍別置。使以領之。舊官充位而已。堅。太子之妃兄也。爲吏。以幹敏稱。上使之督江淮租運。歲增巨萬。上以爲能。故擢任之。王鉷。方翼之曾孫也。亦以善治租賦。爲戶部員外郎。兼侍御史。○李林甫爲相。凡才望功業。出己右。及爲上所厚。勢位將逼己者。必百計去之。尤忌文學之士。或陽與之善。啗以甘言。而陰陷之。世謂李林甫口有蜜。腹有劍。上嘗陳樂於勤政樓。垂簾觀之。兵部侍郎盧絢。謂上已起。垂鞭按轡。橫過樓下。絢風標清粹。上目送之。深歎其蘊藉。林甫常厚以金帛。賂上左右。上舉動必知之。乃召絢子弟。謂曰。尊君素望清崇。今交廣藉才。聖上欲以尊君爲之。可乎。若憚遠行。則當左遷。不然。則以賓詹分務。東

洛亦優賢之命也。何如。絢懼。以賓詹爲請。林甫恐垂衆望。乃除華州刺史。到官未幾。誣其有疾。州事不理。除詹事員外正。上又嘗問林甫。以嚴挺之。今安在。是人亦可用。挺之時爲絳州刺史。林甫退。召挺之弟損之。諭以上待尊兄意甚厚。蓋爲見上之策。奏稱風疾。求還京師。就醫。挺之從之。林甫以其奏。白上云。挺之衰老。得風疾。宜且授以散秩。使便醫藥。上歎吒久之。夏。四月。壬寅。以爲詹事。又以汴州刺史河南采訪使齊澣。爲少詹事。皆員外正。於東京。養疾。澣亦朝廷宿望。故并忌之。○上發兵。納十姓可汗阿史那昕於突騎施。至俱蘭城。爲莫賀達干所殺。突騎施大讎官都摩度來降。六月。乙未。冊都摩度爲三姓葉護。○秋。七月。癸卯朔。日有食之。○辛未。左相牛仙客薨。八月。丁丑。以刑部尚書李適之爲左相。○突厥拔悉密。回紇。葛邏祿三部。共攻骨咄葉護殺之。推拔悉密酋長爲頡跌伊施可汗。回紇。葛邏祿。自爲左右葉護。突厥餘衆。共立判闕特勒之子爲烏蘇米施可汗。以其子葛臘哆爲西殺。上遣使諭烏蘇。令內附。烏蘇不從。朔方節度使王忠嗣。盛兵磧口。以威之。烏蘇懼。請降。而遷延不至。忠嗣知其詐。乃遣使說拔悉密。回紇。葛邏祿。使攻之。烏蘇遁去。忠嗣因出兵擊之。取其右廂。以歸。丁亥。突厥西葉護阿不思。及西殺葛臘哆。默啜之孫勃德支。伊然小妻毗伽登利之女。帥部衆千餘帳。相次來降。突厥遂微。九月。辛亥。上御花萼樓。宴突厥降者。賞賜甚厚。○護密先附吐蕃。戊午。其王頡吉里。匍遣使請降。○冬。十月。丁酉。上幸驪山溫泉。己巳。還宮。○十二月。隴右節度使皇甫惟明。奏破吐蕃大嶺等軍。戊戌。又奏破青海道莽布支營三萬餘衆。斬獲五千餘級。庚子。河西節度使王倕。奏破吐蕃漁海及遊奕等軍。○是歲。天下縣一千五百二十八。鄉一萬六千八百二十九。戶八百五十二萬五千七百六十三。口四千八百九十九萬九千八百。○回紇葉護骨力裴羅遣使入貢。賜爵奉義王。二年。春。正月。安祿山入朝。上寵待甚厚。謁見無時。祿山奏言。去年營州蟲食苗。臣焚香祝天



云。臣若操心不正。事君不忠。願使蟲食臣心。若不負神祇。願使蟲散。即有羣鳥。從北來食蟲。立盡。請宣付史官。從之。○李林甫領吏部尚書。日在政府。選事悉委侍郎宋遙。苗晉卿。御史中丞張倚。新得幸於上。遙。晉卿欲附之。時選人集者以萬計。入等者六十四人。倚子爽爲之首。羣議沸騰。前勸令蘇孝韞。以告安祿山。山入言於上。上悉召入等人。面試之。爽手持試紙。終日不成一字。時人謂之曳白。癸亥。遙。晉卿武當太守。晉卿貶安康太守。倚貶淮陽太守。同考判官禮部郎中裴朏等。皆貶嶺南官。晉卿壺關人也。○三月。壬子。追尊玄宗皇帝。父周上御大夫。爲先天太皇。又尊臯繇。爲德明皇帝。涼武昭王。爲興聖皇帝。○江淮南租庸等使韋堅。引滻水。抵苑東。望春樓。下爲潭。以聚江淮運船。役夫匠通漕渠。發人丘壘。自江淮至京城。民間蕭然。愁怨。二年而成。丙寅。上幸望春樓。觀新潭。堅以新船數百艘。扁榜郡名。各陳郡中珍貨於船背。陝尉崔成甫。著錦半臂。缺勝綠衫。以楊之。紅栢首。居前船。唱得寶歌。使美婦百人。盛飾而和之。連檣數里。堅跪進諸郡輕貨。仍上百牙盤食。上置宴。竟日而罷。觀者山積。夏四月。加堅左散騎常侍。其僚屬吏卒。褒賞有差。名其潭曰廣運。時京兆尹韓朝宗。亦引渭水。置潭於西街。以貯材木。○丁亥。皇甫惟明引軍出西平。擊吐蕃。行千餘里。攻洪濟城。破之。○上以右贊善大夫楊慎矜。知御史中丞事。時李林甫專權。公卿之進。有不出其門者。必以罪去之。慎矜由是固辭。不敢受。五月。辛丑。以慎矜爲諫議大夫。○冬。十月。戊寅。上幸驪山溫泉。乙卯。還宮。

三載。春。正月。丙申朔。改年曰載。○辛丑。上幸驪山溫泉。二月。庚午。還宮。○辛卯。太子更名亨。海賊吳令光等。抄掠台明。命河南尹裴敦復。將兵討之。○三月。己巳。以平盧節度使安祿山。兼范陽節度使。以范陽節度使裴寬。爲戶部尚書。禮部尚書。席建侯。爲河北黜陟使。稱祿山公直。李林甫。裴寬。皆順旨。稱其美。三人皆上所信任。由是祿山之寵益固。不搖矣。○夏。四月。

裴敦復破吳令光擒之。○五月。河西節度使夫蒙靈詵。討突騎施莫賀達干。斬之。更請立黑姓伊里底蜜施骨咄祿毗伽。○六月。甲辰。冊拜骨咄祿毗伽爲十姓可汗。○秋。八月。拔悉蜜攻斬突厥烏蘇可汗。傳首京師。國人立其弟鶻隴匄白眉特勒。是爲白眉可汗。於是突厥大亂。敕朔方節度使王忠嗣。出兵乘之。至薩河內山。破其左廂阿波達干等十一部。右廂未下。會回紇葛邏祿。共攻拔悉蜜。頡跌伊施可汗。殺之。回紇骨力裴羅。自立爲骨咄祿毗伽。可汗。遣使言狀。上冊拜裴羅爲懷仁可汗。於是懷仁南據突厥故地。立牙帳於烏德隴山。舊統藥邏葛等九姓。其後。又并拔悉蜜。葛邏祿。凡十一部。各置都督。每戰。則以二客部爲先。○李林甫以楊慎矜。屈附於己。九月。甲戌。復以慎矜爲御史中丞。充諸道鑄錢使。○冬。十月。癸巳。上幸驪山溫泉。十一月。丁卯。還宮。○術士蘇嘉慶。上言。逐甲術。有九宮貴神。典司水旱。請立壇於東郊。祀以四孟月。從之。禮在昊天上帝下。太清宮太廟上。所用牲玉。皆俸天地。○十二月。癸巳。置會昌縣於溫泉宮下。○戶部尚書裴寬。素爲上所重。李林甫恐其入相。忌之。刑部尚書裴敦復。擊海賊。還。受請託。廣序軍功。寬微奏其事。林甫以告敦復。敦復言。寬亦嘗以親故。屬敦復。林甫曰。君速奏之。勿後於人。敦復乃以五百金賂女官楊太真之姊。使言於上。甲午。寬坐貶睢陽太守。初。武惠妃薨。上悼念不已。後宮數千。無當意者。或言壽王妃楊氏之美。絕世無雙。上見而悅之。乃令妃自以其意。乞爲女官。號太真。更爲壽王娶。左衛郎將韋昭訓女。潛內太真宮中。太真肌態豐豔。曉音律。性警穎。善承迎。上意不替。歲。寵遇如惠妃。宮中號曰娘子。凡儀體。皆如皇后。○癸卯。以宗女。爲和義公主。嫁寧遠奉化王阿悉爛達干。○癸丑。上祀九宮貴神。赦天下。○初。令百姓。十八爲中。二十三成丁。○初。上自東都還。李林甫知上厭巡幸。乃與牛仙客謀。增近道粟賦。及和糴。以實關中。數年。蓄積稍豐。上從容謂高力士曰。朕不出長安。近十年。天下無事。朕欲高居無爲。悉以政事委林甫。何如。對曰。天子巡狩。古之



制也。且天下大柄不可假人。我威勢既成。誰敢復議之者。上不悅。力士頓首自陳。臣狂疾發。妄言罪當死。上乃爲力士置酒。左右皆呼萬歲。力士自是不敢深言天下事矣。

四載春正月庚午。上謂宰相曰。朕比以甲子日於宮中爲壇。爲百姓祈福。朕自草黃素。置案上。俄飛升天。聞空中語云。聖壽延長。又朕於嵩山鍊藥成。亦置壇上。及夜。左右欲收之。又聞空中語云。藥未須收。此自守護。遂曙。乃收之。太子諸王宰相皆上表賀。○回紇懷仁可汗擊突厥白眉可汗。殺之。傳首京師。突厥毗伽可敦帥衆來降。於是北邊晏然。烽燧無警矣。回紇斥地愈廣。東際室韋。西抵金山。南跨大漠。盡有突厥故地。懷仁卒。子磨延啜立。號葛勒可汗。二月己酉。以朔方節度使王忠嗣兼河東節度使。忠嗣少以勇敢自負。及鎮方面。專以持重安邊爲務。常曰。太平之將。但當撫循訓練士卒而已。不可疲中國之力。以邀功名。有漆弓百五十斤。常貯之囊中。以示不用。軍中日夜思戰。忠嗣多遣諜人伺其間隙。見可勝。然後興師。故出必有功。既兼兩道節制。自朔方至雲中。邊陲數千里。要害之地。悉列置城堡。斥地各數百里。邊人以爲自張仁奩之後。將帥皆不及。三月壬申。上以外孫獨孤氏爲靜樂公主。嫁契丹王李懷節。甥楊氏爲宜芳公主。嫁奚王李延寵。○乙巳。以刑部尚書裴敦復充嶺南五府經略等使。五月壬申。敦復坐逗留不之官。貶淄川太守。以光祿少卿彭杲代之。上嘉敦復平海賊之功。故李林甫陷之。○李適之與李林甫爭權有隙。適之領兵部尚書。駙馬張垆爲侍郎。林甫亦惡之。使人發兵部銓曹姦利事。收吏六十餘人。付京兆。與御史對鞠之。數日竟不得其情。京兆尹蕭冕使法曹吉溫鞠之。溫入院。置兵部吏於外。先於後廳取二重囚。訊之。或杖或壓。號呼之聲。所不忍聞。皆曰。苟存餘生。乞紙盡答。兵部吏素聞溫之慘酷。引入。皆自誣服。無敢違溫意者。頃刻而獄成。驗囚。無榜掠之迹。六月辛亥。敕誚責前後知銓侍郎。及判南曹郎官。而宥之。垆均之兄溫。頊之弟子也。溫始爲新豐丞。太子文學薛巖薦溫才。上召見。顧

巖曰。是一不良人。朕不用也。蕭冕爲河南尹。嘗坐事西臺。遣溫往按之。溫治冕甚急。及溫爲萬年丞。未幾。冕爲京兆尹。溫素與高力士相結。力士自禁中歸。溫度冕必往謝官。乃先詣力士。與之談。握手甚歡。冕後至。溫陽爲驚避。力士呼曰。吉七。不須避。謂冕曰。此亦吾故人也。召還。與冕坐。冕接之甚恭。不敢以前事爲怨。它日。溫謁冕曰。曩者。溫不敢墮國家法。自今請洗心事。公。冕遂與盡歡。引爲法曹。及林甫欲除不附己者。求治獄吏。冕薦溫於林甫。林甫得之大喜。溫常曰。若遇知己。南山白額虎。不足縛也。時又有杭州人羅希夷。爲吏深刻。林甫引之。自御史臺主簿。再遷殿中侍御史。二人皆隨林甫所欲。深淺鍛鍊成獄。無能自脫者。時人謂之羅鉗吉網。○秋七月壬午。冊韋昭訓女爲壽王妃。八月壬寅。冊楊大真爲貴妃。贈其父玄琰兵部尚書。以其叔父玄珪爲光祿卿。從兄銛爲殿中少監。錡爲駙馬都尉。癸卯。冊武惠妃女爲太華公主。命錡尚之。及貴妃三姊皆賜第京師。寵貴赫然。楊釗貴妃之從祖兄也。不學無行。爲宗黨所鄙。從軍於蜀。得新都尉。考滿。家貧不能自歸。新政富民鮮于仲通。常資給之。楊玄琰卒於蜀。釗往來其家。遂與其女通。鮮于仲通名向。以字行。頗讀書。有材智。劍南節度使章仇兼瓊引爲采訪支使。委以心腹。嘗從容謂仲通曰。今吾獨爲上所厚。苟無內援。必爲李林甫所危。聞楊妃新得幸。人未敢附之。子能爲我至長安。與其家相結。吾無患矣。仲通曰。仲通蜀人。未嘗遊上國。恐敗公事。今爲公更求得一人。因言釗本末。兼瓊引見。釗儀觀豐偉。言辭敏給。兼瓊大喜。卽辟爲推官。往來浸親密。乃使人獻春綵於京師。將別。謂曰。有少物在。卽以具。一日之糧。子過可取之。釗至。兼瓊使親信大齋蜀貨精美者。遺之。可直萬緡。釗大喜。過望。晝夜兼行。至長安。歷抵諸妹。以蜀貨遺之。曰。此章仇公所贈也。時中女新寡。釗遂館於其室中。分蜀貨以與之。於是諸楊日夜譽兼瓊。且言釗善樛蒲。引之見上。得隨供奉官出入禁中。改金吾兵曹參軍。○九月癸未。以陝郡太守江淮租庸轉運使韋堅爲刑部尚



書罷其諸使。以御史中丞楊慎矜代之。堅妻姜氏。皎之女。林甫之舅子也。故林甫昵之。及堅以通漕。有寵於上。遂有入相之志。又與李適之善。林甫由是惡之。故遷以美官。實奪之權也。○安祿山欲以邊功市寵。數侵掠奚契丹。奚契丹各殺公主。以叛。祿山討破之。○隴右節度使皇甫惟明。與吐蕃戰于石堡城。為虜所敗。副將褚誦戰死。○冬十月甲午。安祿山奏。臣討契丹。至北平郡。夢先朝名將李靖。李勣。從臣求食。遂命立廟。又奏。薦奠之日。廟梁產芝。○丁酉。上幸驪山溫泉。○上以戶部郎中王鉷為戶口色役使。敕賜百姓復除。鉷奏。徵其輦運之費。廣張錢數。又使市本郡輕貨。百姓所輸。乃甚於不復除。舊制。戍邊者。免其租庸。六歲而更。時邊將恥敗。士卒死者。皆不申牒。貫籍不除。王鉷志在聚斂。以有籍無人者。皆為避課。按籍戍邊。六歲之外。悉徵其租庸。有併徵三十年者。民無所訴。上在位久。用度日侈。後宮賞賜無節。不欲數於左右。藏取之。鉷探知。上指歲貢額外錢百億萬。貯於內庫。以供宮中宴賜。曰。此皆不出於租庸調。無預經費。上以鉷為能富國。益厚遇之。鉷務為割剝。以求媚。中外嗟怨。丙子。以鉷為御史中丞。京畿采訪使。楊釗侍宴禁中。專掌樛蒲文簿。鈎校精密。上賞其彊明。曰。好度支郎。諸楊數徵。此言於上。又以屬王鉷。鉷因奏。充判官。○十二月戊戌。上還宮。五載。春正月乙丑。以隴右節度使皇甫惟明兼河西節度使。李適之性疎率。李林甫嘗謂適之曰。華山有金礦。采之可以富國。主上未之知也。它日適之因奏事言之。上以問林甫。對曰。臣久知之。但華山陛下本命。王氣所在。鑿之非宜。故不敢言。上以林甫為愛己。薄適之慮事不熟。謂曰。自今奏事。宜先與林甫議之。無得輕脫。適之由是束手矣。適之既失恩。韋堅失權。益相親密。林甫愈惡之。初太子之立。非林甫意。林甫恐異日為己禍。常有動搖東宮之志。而堅又太子之妃兄也。皇甫惟明嘗為忠王友。時破吐蕃。入獻捷。見林甫專權。意頗不平。時因見上。乘間微勸上去。林甫林甫知之。使楊慎矜密伺其所為。會正月望夜。太子出遊。與堅相

見。堅又與惟明會於景龍觀道士之室。慎矜發其事。以為堅戚里。不應與邊將狎暱。林甫因奏。堅與惟明結謀。欲共立太子。堅惟明下獄。林甫使慎矜與御史中丞王鉷。京兆府法曹吉溫。共鞠文。上亦疑堅與惟明有謀。而不顯其罪。癸酉。下制。責堅以干進不已。貶縉雲太守。惟明以離間君臣。貶播川太守。仍別下制戒百官。○以王忠嗣為河西隴右節度使。兼知朔方河東節度事。忠嗣始在朔方河東。每互市。高估馬價。諸胡聞之。爭賣馬於唐。忠嗣皆買之。由是胡馬少。唐兵益壯。及徙隴右河西。復請分朔方河東馬九千匹。以賞之。其軍亦壯。忠嗣仗四節。控制萬里。天下勁兵重鎮。皆在掌握。與吐蕃戰於青海積石。皆大捷。又討吐谷渾於墨離軍。虜其全部而歸。○夏四月癸未。立奚會婆固為昭信王。契丹會楷洛為恭仁王。○己亥。制。自今。四孟月皆擇吉日。祀天地九宮。○韋堅等既貶。左相李適之懼。自求散地。庚寅。以適之為太子少保。罷政事。其子衛尉少卿雲。嘗盛饌召客。客畏李林甫。竟日無一人敢往者。○以門下侍郎崇玄館大學士陳希烈同平章事。希烈宋州人。以講老莊得進。專用神仙符瑞。取媚於上。李林甫以希烈為上所愛。且柔佞易制。故引以為相。凡政事。一決於林甫。希烈但給唯諾。故事。宰相午後六刻乃出。林甫奏。今太平無事。已時即還第。軍國機務。皆決於私家。主書抱成案。詣希烈書名而已。○五月壬子朔。日有食之。○乙亥。以劍南節度使章仇兼瓊為戶部尚書。諸楊引之也。○秋七月丙辰。敕流貶人。多在道逗留。自今。左降官。日馳十驛。以上。是後。流貶者。多不全矣。○楊貴妃方有寵。每乘馬。則高力士執轡授鞭。織繡之工。專供貴妃院者。七百人。中外爭獻器服珍玩。嶺南經略使張九章。廣陵長史王翼。以所獻精美。九章加三品翼。入為戶部侍郎。天下從風而靡。民間歌之曰。生男勿喜。女勿悲。君今看女作門楣。妃欲得生荔支。歲命嶺南馳驛致之。比至長安。色味不變。至是。妃以妬悍不遜。上怒。命送歸兄銛之第。是日。上不懌。比日中猶未食。左右動不稱旨。橫被捶撻。高力士欲嘗上意。請悉載



院中儲僭。送貴妃。凡百餘車。上自分御膳。以賜之。及夜。力士伏奏。請迎貴妃歸院。遂開禁門而入。自是恩遇愈隆。後宮莫得進矣。○將作少匠韋蘭。兵部員外郎韋芝。為其兄堅訟冤。且引太子為言。上益怒。太子懼。表請與妃離昏。乞不以親廢法。丙子。再貶堅。江夏別駕。蘭芝皆貶嶺南。然上素知太子孝謹。故譴怒不及。李林甫因言。堅與李適之等為朋黨。後數日。堅長流臨封。適之貶宜春太守。太常少卿韋斌貶巴陵太守。嗣薛王瑊貶夷陵別駕。睢陽太守裴寬貶安陸別駕。河南尹李齊物貶竟陵太守。凡堅親黨。坐流貶者數十人。斌安石之子。瑊業之子。堅之甥也。瑊母亦令隨瑊之官。○冬。十月。戊戌。上幸驪山溫泉。十一月。乙巳。還宮。○贊善大夫杜有鄰女。為太子良娣。良娣之姊。為左驍衛兵曹柳勣妻。勣性狂疎。好功名。喜交結豪傑。淄川太守裴敦復薦於北海太守李邕。邕與之定交。勣至京師。與著作郎王曾等為友。皆當時名士也。勣與妻族不協。欲陷之。為飛語。告有鄰。妄稱圖讖。交構東宮。指斥乘輿。林甫令京兆士曹吉溫與御史鞠之。乃勣首謀也。溫令勣連引曾等入臺。十二月。甲戌。有鄰勣及曾等皆杖死。積尸大理。妻子流遠方。中外震慄。嗣虢王巨貶義陽司馬。巨邕之子也。別遣監察御史羅希夷往按李邕。太子亦出良娣為庶人。乙亥。鄴郡太守王琚坐贓貶江華司馬。琚性豪侈。與李邕皆自謂耆舊。久在外。意怏怏。李林甫惡其負材使氣。故因事除之。六載。春。正月。辛巳。李邕裴敦復皆杖死。邕才藝出眾。盧藏用常語之曰。君如干將莫邪。難與爭鋒。然終虞缺折耳。邕不能用。林甫又奏。分遣御史。即貶所。賜皇甫惟明。韋堅兄弟等死。羅希夷自青州如嶺南。所過殺遷謫者。郡縣惶駭。排馬牒至宜春。李適之憂懼。仰藥自殺。至江華。王琚仰藥不死。聞希夷已至。即自縊。希夷又迂路過安陸。欲怖殺寬。寬向希夷叩頭祈生。希夷不宿而過。乃得免。李適之子嘗迎父喪至東京。李林甫令人誣告。杖死於河南府。給事中房琯坐與適之善。貶宜春太守。琯融之子也。林甫恨韋堅不已。遣使於循河及江淮。

州縣求堅罪。收繫綱典船夫。溢於牢獄。微剝逋負。延及鄰伍。皆裸露死於公府。至林甫薨。乃止。○丁亥。上享太廟。戊子。合祭天地於南郊。赦天下。制免百姓今載田租。又令削絞斬條。上慕好生之名。故令應絞斬者。百重杖流嶺南。其實有司率杖殺之。又令天下為嫁母服三載。上欲廣求天下之士。命通一藝以上。皆詣京師。李林甫恐草野之士對策斥言其姦惡。建言舉人多卑賤愚。恐有俚言。污濁聖聽。乃令郡縣長官精加試練。灼然超絕者。具名送省。委尚書覆試。御史中丞監之。取名實相副者。聞奏。既而至者。皆試以詩賦論。遂無一人及第者。林甫乃上表。賀野無遺賢。○戊寅。以范陽平盧節度使安祿山兼御史大夫。祿山體充肥。腹垂過膝。嘗自稱。腹重三百斤。外若癡直。內實狡黠。常令其將劉駱谷留京師。誦朝廷指趣。動靜皆報之。或應有賤表者。駱谷即為代作通之。歲獻俘虜。雜畜奇禽異獸。珍玩之物。不絕於路。郡縣疲於遞運。祿山在上前。應對敏給。雜以詼諧。上嘗戲指其腹曰。此胡腹中何所有。其大乃爾。對曰。更無餘物。止有赤心耳。上悅。又嘗命見太子。祿山不拜。左右趣之拜。祿山拱立曰。臣愚。羈者。惟知有陛下。一人。不知乃更有儲君。不得已。然後拜。上以為信然。益愛之。上嘗宴勤政樓。百官列坐樓下。獨為祿山於御座東間。設金雞障。榻使坐其前。仍命卷簾。以示榮寵。命楊銛。楊錡。貴妃三姊。皆與祿山敘兄弟。祿山得出入禁中。因請為貴妃兒。上與貴妃共坐。祿山先拜貴妃。上問何故。對曰。胡人先母而後父。上悅。○李林甫以王忠嗣功名日盛。恐其入相。忌之。安祿山潛蓄異志。託以禦寇。築雄武城。大貯兵器。請忠嗣助役。因欲留其兵。忠嗣先期而往。不見祿山。而還。數上言。祿山必反。林甫益惡之。○夏。四月。忠嗣固辭兼河東朔方節度。許之。○冬。十月。己酉。上幸驪山溫泉。改溫泉宮曰華清宮。○河西隴右節度使王忠嗣以部將哥舒翰為大斗軍副使。李光弼為河西兵馬使。充赤水軍使。翰父祖本突騎施。



別部會長。光弼契丹王楷洛之子也。皆以勇略爲忠嗣所重。忠嗣使翰擊吐蕃。有同列爲之副。倨慢不爲用。翰槌殺之。軍中股慄。累功至隴右節度副使。每歲積石軍麥熟。吐蕃輒來穫之。無能禦者。邊人謂之吐蕃麥莊。翰先伏兵於其側。虜至。斷其後。夾擊之。無一人得返者。自是不敢復來。上欲使王忠嗣攻吐蕃石堡城。忠嗣上言。石堡險固。吐蕃舉國守之。今頓兵其下。非殺數萬人。不能克。臣恐所得不如所亡。不如且厲兵秣馬。俟其有釁。然後取之。上意不快。將軍董延光自請將兵。取石堡城。上命忠嗣分兵助之。忠嗣不得已。奉詔而不盡副延光所欲。延光怨之。李光弼言於忠嗣曰。大夫以愛士卒之故。不欲成延光之功。雖迫於制書。實奪其謀也。何以知之。今以數萬衆授之。而不立重賞。士卒安肯爲之盡力乎。然此天子意也。彼無功。必歸罪於大夫。大夫軍府充牣。何愛數萬段帛。不以杜其讒口乎。忠嗣曰。今以數萬之衆爭一城。得之未足以制敵。不得亦無害於國。故忠嗣不欲爲之。忠嗣今受責天子。不過以金吾羽林一將軍歸宿衛。其次不過黔中上佐。忠嗣豈以數萬人之命。易一官乎。李將軍子誠愛我矣。然吾志決矣。子勿復言。光弼曰。曩者恐爲大夫之累。故不敢言。今大夫能行古人之事。非光弼所及也。遂趨出。延光過期不克。言忠嗣沮撓軍計。上怒。李林甫因使濟陽別駕魏林告忠嗣。嘗自言我幼養宮中。與忠王相愛狎。欲擁兵以尊奉太子。敕徵忠嗣入朝。委三司鞠之。上聞哥舒翰名。召見華清宮。與語悅之。十一月辛卯。以翰判西平太守。充隴右節度使。以朔方節度使安思順判武威郡事。充河西節度使。○戶部侍郎兼御史中丞楊慎矜。爲上所厚。李林甫浸忌之。慎矜與王鉞父晉中表兄弟也。少與鉞狎。鉞之入臺。頗因慎矜推引。及鉞遷中丞。慎矜與語。猶名之。鉞自恃與林甫善。意稍不平。慎矜奪鉞職田。鉞母本賤。慎矜嘗以語人。鉞深銜之。慎矜猶以故意待之。嘗與之私語。識書。慎矜與術士史敬忠善。敬忠言。天下將亂。勸慎矜於臨汝山中買莊。爲避亂之所。會慎矜父墓田中。草木皆流血。慎矜

惡之。以問敬忠。敬忠請禳之。設道場於後園。慎矜退朝。輒裸貫桎。坐其中。旬日血止。慎矜德之。慎矜有侍婢明珠。色美。敬忠屢目之。慎矜即以遺敬忠。車載過貴妃姊柳氏樓下。姊邀敬忠上樓。求車中美人。敬忠不敢拒。明日。姊入宮。以明珠自隨。上見而異之。問所從來。明珠具以實對。上以慎矜與術士爲妖法惡之。含怒未發。楊釗以告鉞。鉞心喜。因侮慢慎矜。慎矜怒。林甫知鉞與慎矜有隙。密誘使圖之。鉞乃遣人以飛語告慎矜。隋煬帝孫與凶人往來。家有讖書。謀復祖業。上大怒。收慎矜繫獄。命刑部大理與侍御史楊釗。殿中侍御史盧鉉。同鞠之。太府少卿張瑄。慎矜所薦也。盧鉉誣瑄。嘗與慎矜論讖。拷掠百端。瑄不肯答辯。乃以木綴其足。使人引其枷柄。向前挽之。身加長數尺。腰細欲絕。眼鼻出血。瑄竟不答。又使吉溫捕史敬忠於汝州。敬忠與溫父素善。溫之幼也。敬忠常抱撫之。及捕獲。溫不與交言。鎖其頸。以布蒙首。驅之馬前。至戲水。溫使吏誘之曰。楊慎矜已歿。服。惟須子一辯。若解人意。則生。不然必死。前至溫湯。則求首不獲矣。敬忠顧謂溫曰。七郎求一紙。溫陽不應。去。溫湯十餘里。敬忠祈請哀切。乃於桑下。令答三紙。辯皆如溫意。溫徐謂曰。丈人且勿恠。因起拜之。至會昌。始鞠慎矜。以敬忠爲證。慎矜皆引服。惟搜讖書不獲。林甫危之。使盧鉉入長安。搜慎矜家。鉉袖讖書入闈中。詬而出曰。逆賊深藏祕記。至會昌。以示慎矜。慎矜歎曰。吾不蓄讖書。此何從在。吾家哉。吾應死而已。丁酉。賜慎矜及兄少府少監慎餘。洛陽令慎名。自盡。敬忠杖百。妻子皆流嶺南。瑄杖六十。流臨封。死於會昌。嗣號王巨。雖不預謀。坐與敬忠相識。解官。南賓安置。自餘連坐者數十人。慎名聞赦。神色不變。爲書別姊。慎餘合掌指天而縊。○三司按王忠嗣。上曰。吾兒居深宮。安得與外人通謀。此必妄也。但劾忠嗣沮撓軍功。哥舒翰之入朝也。或勸多齎金帛。以救忠嗣。翰曰。若直道尚存。王公必不冤死。如其將喪。多賂何爲。遂單囊而行。三司奏。忠嗣罪當死。翰始遇知於上。力陳忠嗣之冤。且請以己官爵贖忠嗣罪。上起入禁中。翰叩頭隨



之。言與淚俱。上感寤。己亥。貶忠嗣漢陽太守。○李林甫屢起大獄。別置推事院於長安。以楊釗有掖庭之親。出入禁闈。所言多聽。乃引以為援。擢為御史。事有微涉東宮者。皆指撻使之。奏劾。付羅希夷。吉溫鞠之。釗因得逞其私志。所擠陷誅夷者數百家。皆釗發之。幸太子仁孝。謹靜。張垆。高力士常保護於上前。故林甫終不能間也。○十二月。壬戌。發馮翊華陰民夫築會昌城。置百司。王公各置第舍。土畝直千金。癸亥。上還宮。○丙寅。命百官閱天下歲貢物於尚書省。既而悉以車載。賜李林甫家。上或時不視朝。百司悉集林甫第門。臺省為空。陳希烈雖坐府。無一人入謁者。林甫子岫為將作監。頗以滿盈為懼。嘗從林甫遊。後園指役夫。言於林甫曰。大人久處鈞軸。怨仇滿天下。一朝禍至。欲為此。得乎。林甫不樂曰。勢已如此。將若之何。先是。宰相皆以德度自處。不事威勢。騶從不過數人。士民或不之避。林甫自以多結怨。常虞刺客。出則步騎百餘人。為左右翼。金吾靜街前驅。在數百步外。公卿走避。居則重關複壁。以石甃地。牆中置板。如防大敵。一夕屢徙牀。雖家人莫知其處。宰相騶從之盛。自林甫始。○初將軍高仙芝。本高麗人。從軍安西。仙芝驍勇善騎射。節度使夫蒙靈詵屢薦至安西副都護。都知兵馬使。充四鎮節度副使。吐蕃以女妻小勃律王。及其旁二十餘國。皆附吐蕃。貢獻不入。前後節度使討之。皆不能克。制以仙芝為行營節度使。將萬騎討之。自安西行百餘日。乃至特勒滿川。分軍為三道。期以七月十三日會吐蕃連雲堡下。有兵近萬人。不意唐兵猝至。大驚。依山拒戰。礮柵如雨。仙芝以郎將高陵李嗣業為陌刀將。令之曰。不及日中。決須破虜。嗣業執一旗。引陌刀。緣險先登力戰。自辰至巳。大破之。斬首五千級。捕虜千餘人。餘皆逃潰。中使邊令誠以入虜境已深。懼不敢進。仙芝乃使令誠以羸弱三千守其城。復進三日。至坦駒嶺下。峻阪四十餘重。前有阿弩越城。仙芝恐士卒憚險不肯下。先令人胡服詐為阿弩越城守者。迎降。云阿弩越赤心歸唐。娑夷水藤橋已斫斷矣。娑夷水即弱水也。其水不能勝

草芥。藤橋者。通吐蕃之路也。仙芝陽喜。士卒乃下。又三日。阿弩越城迎者果至。明日。仙芝入阿弩越城。遣將軍席元慶將千騎前行。謂曰。小勃律聞大軍至。其君臣百姓必走山谷。第呼出取繒帛稱敕賜之。大臣至。盡縛之以待我。元慶如其言。悉縛諸大臣。王及吐蕃公主。逃入石窟。取不可得。仙芝至。斬其附吐蕃者大臣數人。藤橋去城猶六十里。仙芝急遣元慶往斫之。甫畢。吐蕃兵大至。已無及矣。藤橋闔盡一矢力。修之。暮年乃成。八月。仙芝虜小勃律王及吐蕃公主而還。九月。至連雲堡。與邊令誠俱。月末。至播密川。遣使奏狀。至河西。夫蒙靈詵怒。仙芝不先言己。而遽發奏。一不迎勞。罵仙芝曰。噉狗糞高麗奴。汝官皆因誰得。而不待我處分。擅奏捷書。高麗奴。汝罪當斬。但以汝新有功。不忍耳。仙芝但謝罪。邊令誠奏。仙芝深入萬里。立奇功。今日夕憂死。

資治通鑑卷第一百二十五

十六

唐紀 玄宗至道大聖大明孝皇帝中之下天寶六載



# 資治通鑑卷第二百一十六

## 唐紀三十一

### 玄宗至道大聖大明孝皇帝下之上

天寶六載十二月己巳。上以仙芝爲安西四鎮節度使。徵靈管入朝。靈管大懼。仙芝見靈管趨走如故。靈管益懼。副都護京兆程千里。押牙畢思琛。及行官王滔等。皆平日構仙芝於靈管者也。仙芝面責千里。思琛曰。公面如男子。心如婦人。何也。又捽滔等。欲笞之。既而皆釋之。謂曰。吾素所恨於汝者。欲不言。恐汝懷憂。今既言之。則無事矣。軍中乃安。初仙芝爲都知兵馬使。猗氏人封常清。少孤貧。細瘦類目。一足偏短。求爲仙芝僮。不納。常清日候仙芝出入。不離其門。凡數十日。仙芝不得已留之。會達奚部叛。夫蒙靈管使仙芝追之。斬獲略盡。常清私作捷書。以示仙芝。皆仙芝心所欲言者。由是一府奇之。仙芝爲節度使。卽署常清判官。仙芝出征。常爲留後。仙芝乳母子鄭德詮。爲郎將。仙芝遇之如兄弟。使典家事。威行軍中。常清嘗出。德詮自後走馬突之而過。常清至使院。使召德詮。每過一門。輒闔之。既至。常清離席謂曰。常清本出寒微。郎將所知。今日中丞命爲留後。郎將何得於衆中相陵突。因叱之曰。郎將須斃死。以肅軍政。遂杖之六十。面仆地。曳出。仙芝妻及乳母。於門外號哭救之。不及。因以狀白仙芝。仙芝覽之。驚曰。已死邪。及見常清。遂不復言。常清亦不之謝。軍中畏之。惕息。自唐興以來。邊帥皆用忠厚名臣。不久任。不遙領。不兼統。功名著者。往往入爲宰相。其四夷之將。雖才略如阿史那社爾。契苾何力。猶不專大將之任。皆以大臣爲使。以制之。及開元中。天子有吞

四夷之志。爲邊將者。十餘年不易。始久任矣。皇子則慶忠諸王。宰相則蕭嵩。牛仙客。始遙領矣。蓋嘉運。王忠嗣。專制數道。始兼統矣。李林甫欲杜邊帥入相之路。以胡人不知書。乃奏言。文臣爲將。怯當矢石。不若用寒畯胡人。胡人則勇決習戰。寒族則孤立無黨。陛下誠以恩洽其心。彼必能爲朝廷盡死。上悅其言。始用安祿山。至是。諸道節度。盡用胡人。精兵咸戍北邊。天下之教偏重。卒使祿山傾覆天下。皆出於林甫專寵固位之謀也。

七載夏四月辛丑。左監門大將軍知內侍省事高力士。加驃騎大將軍。力士承恩歲久。中外畏之。太子亦呼之爲兄。諸王公呼之爲翁。駙馬輩直謂之爺。自李林甫。安祿山輩。皆因之以取將相。其家富厚不貲。於西京作寶壽寺。寺鐘成。力士作齋以慶之。舉朝畢集。擊鐘一杵。施錢百緡。有求媚者。至二十杵。少者不減十杵。然性和謹。少過。善觀時。俯仰不敢驕橫。故天子終親任之。士大夫亦不疾惡也。○五月壬午。羣臣上尊號。曰開元天寶聖文神武應道皇帝。赦天下。免百姓來載租庸。擇後魏子孫一人。爲三恪。○六月庚子。賜安祿山鐵券。○度支郎中兼侍御史揚劍。善窺上意。所愛惡而迎之。以聚斂驟遷。歲中領十五餘使。甲辰。遷給事中。兼御史中丞。專判度支事。恩幸日隆。

蘇冕論曰。設官分職。各有司存。政有恒而易守。事歸本而難失。經遠之理。捨此奚據。洎奸臣廣言利以邀恩。多立使以示寵。刻下民以厚斂。張虛數以獻狀。上心蕩而益奢。人望怨而成禍。使天子有司守其位而無其事。受厚祿而虛其用。宇文融首唱其端。楊慎矜。王鉞。繼遵其軌。楊國忠終成其亂。仲尼云。寧有盜臣。而無聚斂之臣。誠哉是言。前車既覆。後轍未改。求達化本。不亦難乎。

冬十月庚戌。上幸華清宮。○十一月癸未。以貴妃姊適崔氏者爲韓國夫人。適裴氏者爲虢國夫人。適柳氏者爲秦國夫人。三人皆有才色。上呼之爲嬖。出入宮掖。竝承恩澤。教傾天下。



每命婦入見。玉真公主等皆讓不敢就位。三姊與銛錡五家。凡有請託。府縣承迎。峻於制敕。四方賂遺。輻湊其門。惟恐居後。朝夕如市。十宅諸王。及百孫院昏嫁。皆以錢千緡賂韓。韓使請。無不如志。上所賜與。及四方獻遺。五家如一。競開第舍。極其壯麗。一堂之費。動踰千萬。既成。見它人有勝己者。輒毀而改爲。魏國尤爲豪蕩。一旦帥工徒。突入韋嗣立宅。卽撤去舊屋。自爲新第。但授韋氏。以隙地十畝而已。中堂既成。召工巧。約錢二百萬。復求賞技。魏國以絳羅五百段賞之。嗤而不顧。曰。請取螻蟻蜥蜴。記其數。置堂中。苟失一物。不敢受直。○十二月。戊戌。或言。玄宗皇帝降于朝元閣。制改會昌縣曰昭應。廢新豐入昭應。辛酉。上還宮。○哥舒翰築神威軍於青海上。吐蕃至。翰擊破之。又築城於青海中。龍駒島。謂之應龍城。吐蕃屏跡。不敢近青海。○是歲。雲南王歸義卒。子閣羅鳳嗣。以其子鳳迦異爲陽瓜州刺史。○八載。春。二月。戊申。引百官觀左藏。賜帛有差。是時州縣殷富。倉庫積粟。帛動以萬計。楊釗奏。請所在糶。變爲輕貨。及徵丁租地稅。皆變布帛。輸京師。屢奏帑藏充牣。古今罕儔。故上帥羣臣觀之。賜釗紫衣金魚。以賞之。上以國用豐衍。故視金帛如糞壤。賞賜貴寵之家。無有限極。○三月。朔方節度使張齊丘。於中受降城西北五百餘里。木刺山。築橫塞軍。以振遠軍使鄭人郭子儀爲橫塞軍使。○夏。四月。咸寧太守趙奉璋。告李林甫罪二十餘條。狀未達。林甫知之。諷御史逮捕。以爲妖言。杖殺之。○先是。折衝府皆有木契銅魚。朝廷徵發。下敕書契魚。都督郡府參驗。皆合。然後遣之。自募置曠騎。府兵日益墮壞。死及逃亡者。有司不復點補。其六馱馬牛。器械糗糧。耗散略盡。府兵入宿衛者。謂之侍官。言其爲天子侍衛也。其後。本衛多以假人。役使如奴隸。長安人羞之。至以相詬病。其戍邊者。又多爲邊將苦使。利其死而沒其財。由是。應爲府兵者。皆逃匿。至是。無兵可交。五月。癸酉。李林甫奏。停折衝府上下魚書。是後。府兵徒有官吏而已。其折衝果毅。又歷年不遷。士大夫亦恥爲之。其曠騎之法。天寶以後。稍

亦變廢。應募者。皆市井負販。無賴子弟。未嘗習兵。時承平日久。議者多謂中國兵可銷。於是民間挾兵器者有禁。子弟爲武官。父兄擯不齒。猛將精兵。皆聚於西北。中國無武備矣。○太白山人李渾等。上言。見神人言。金星洞有玉板石記。聖主福壽之符。命御史中丞王錡。入仙遊谷。求而獲之。上以符瑞相繼。皆祖宗休烈。六月。戊申。上聖祖號曰大道玄元皇帝。上高祖號曰神堯大聖皇帝。太宗號曰文武大聖皇帝。高宗號曰天皇大聖皇帝。中宗號曰孝和大聖皇帝。睿宗號曰玄真大聖皇帝。寶太后以下。皆加號曰順聖皇后。○辛亥。刑部尚書京兆尹蕭昊。坐贓。左遷汝陰太守。○上命隴右節度使哥舒翰。帥隴右。河西。及突厥阿不思兵。益以朔方河東兵。凡六萬三千。攻吐蕃石堡城。其城三面險絕。惟一徑可上。吐蕃但以數百人守之。多貯糧食。積樁木及石。唐兵前後屢攻之。不能克。翰進攻。數日不拔。召裨將高秀巖。張守瑜。欲斬之。二人請。三日期可克。如期拔之。獲吐蕃鐵刀。悉諾羅等四百人。唐士卒死者數萬。果如王忠嗣之言。頃之。翰又遣兵於赤嶺。西開屯田。以諄卒二千戍龍駒島。冬。冰合。吐蕃大集。戍者盡沒。○閏月。乙丑。以石堡城爲神武軍。又於劔南西山索磨川。置保寧都護府。○丙寅。上謁太清宮。丁卯。羣臣上尊號。曰開元天地大寶聖文武應道皇帝。赦天下。禘祫自今於太清宮。聖祖前。設位序。正。○秋。七月。冊突騎施移撥爲十姓可汗。○八月。乙亥。護密王羅真檀。入朝。請留宿衛。許之。拜左武衛將軍。○冬。十月。乙丑。上幸華清宮。○十一月。乙未。吐火羅葉護失里怛伽羅。遣使表稱。竭師王親附吐蕃。困苦小勃律鎮軍。阻其糧道。臣思破凶徒。望發安西兵。以來歲正月。至小勃律。六月。至大勃律。上許之。○九載。春。正月。己亥。上還宮。○羣臣屢表請。封西嶽。許之。○二月。楊貴妃復忤旨。送歸私第。戶部郎中吉溫。因宦官言於上。曰。婦人識慮不遠。違忤聖心。陛下何愛宮中一席之地。不使之就死。豈忍辱之於外舍邪。上亦悔之。遣中使賜以御膳。妃對使者。涕泣曰。妾罪當死。陛下幸



不殺而歸之。今當永離掖庭。金玉珍玩。皆陛下所賜。不足爲獻。惟髮者父母所與。敢以薦誠。乃剪髮一縷而獻之。上遽使高力士召還。寵待益深。時諸貴戚競以進食相尚。上命宦官姚思藝爲檢校進食使。水陸珍羞數千盤。一盤費中人十家之產。中書舍人竇華嘗退朝。值公主進食。列于中衢。傳呼按轡出其間。宮苑小兒數百。奮挺於前。華僅以身免。○安西節度使高仙芝破羯師。虜其王勃特沒。三月庚子。立勃特沒之兄素迦爲羯師王。○上命御史大夫王鉷鑿華山路。設壇場於其上。是春關中旱。辛亥。嶽祠災。制罷封西嶽。○夏四月己巳。御史大夫宋渾坐贓巨萬。流潮陽。初吉溫因李林甫得進。及兵部侍郎兼御史中丞楊釗恩遇深。溫遂去林甫而附之。爲釗畫代林甫執政之策。蕭吳及渾皆林甫所厚也。求得其罪。使釗奏而逐之。以翦其心腹。林甫不能救也。○五月乙卯。賜安祿山爵東平郡王。唐將帥封王自此始。○秋七月乙亥。置廣文館於國子監。以教諸生習進士者。○八月丁巳。以安祿山兼河北道萊訪處置使。○朔方節度使張齊丘給糧失宜。軍士怒。毆其判官。兵馬使郭子儀以身捍齊丘。乃得免。癸亥。齊丘左遷濟陰太守。以河西節度使安思順權知朔方節度事。○辛卯。處士崔昌上言。國家宜承周漢。以土代火。周隋皆閔位。不當以其子孫爲二王後。事下公卿集議。集賢殿學士衛包上言。集議之夜。四星聚於尾。天意昭然。上乃命求殷周漢後爲三恪。廢韓介鄙公。以昌爲左贊善大夫。包爲虞部員外郎。○冬十月庚申。上幸華清宮。○太白山人王玄翼上言。見玄元皇帝言寶仙洞有妙寶真符。命刑部尚書張均等往求得之。時上尊道教。慕長生。故所在爭言符瑞。羣臣表賀無虛月。李林甫等皆請捨宅爲觀。以祝聖壽。上悅。○安祿山屢誘奚契丹爲設會。飲以苜蓿酒。醉而阮之。動數千人。函其酋長之首以獻。前後數四。至是請入朝。上命有司先爲起第於昭應。祿山至。戲水。楊釗兄弟姊妹皆往迎之。冠蓋蔽野。上自幸望春宮以待之。辛未。祿山獻奚俘八千人。上命考課之日。書上上考。前此聽祿

山於上谷鑄錢五壚。祿山乃獻錢樣千緡。○楊釗張易之之甥也。奏乞昭雪易之兄弟。庚辰。制引易之兄弟。迎中宗於房陵之功。復其官爵。仍賜一子官。釗以圖讖有金刀。請更名。上賜名國忠。○十二月乙亥。上還宮。○關西遊弈使王難得擊吐蕃。克五橋。拔樹敦城。以難得爲白水軍使。○安西四鎮節度使高仙芝僞與石國約和。引兵襲之。虜其王及部衆。以難得爲其老弱。仙芝性貪。掠得瑟瑟十餘斛。黃金五六橐。其餘口馬雜貨。稱是皆入其家。○楊國忠德鮮于仲通薦爲劍南節度使。仲通性褊急。失蠻夷心。故事。南詔常與妻子俱謁都督。過雲南。雲南太守張虔陀皆私之。又多所徵求。南詔王閣羅鳳不應。虔陀遣人冒辱之。仍密奏其罪。閣羅鳳忿怨。是歲發兵反。攻陷雲南。殺虔陀。取夷州三十二。○春正月壬辰。上朝獻太清宮。癸巳。朝享太廟。甲子。合祭天地於南郊。赦天下。免天下今十載地稅。○丁酉。命李林甫遙領朔方節度使。以戶部侍郎李暉知留後事。○庚子。楊氏五宅夜遊。與廣平公主從者爭西市門。楊氏奴揮鞭。及公主墜馬。駙馬程昌裔下扶之。亦被數鞭。公主泣訴於上。上爲之杖殺楊氏奴。明日。免昌裔官。不聽朝謁。○上命有司爲安祿山治第於親仁坊。敕令但窮壯麗。不限財力。既成。具幄帟器皿。充物其中。有帖白檀床二。皆長丈闊六尺。銀平脫屏風帳。方丈六尺。於厨廐之物。皆飾以金銀。金飯罌二。銀淘盆二。皆受五斗。織銀絲篋。及箎籬各一。它物稱是。雖禁中服御之物。殆不及也。上每令中使爲祿山護役。築第及造儲。侍賜物。常戒之曰。胡眼大。勿令笑我。祿山入新第。置酒。乞降墨敕。請宰相至第。是日上欲於樓下擊毬。遽爲罷戲。命宰相赴之。日遣諸楊與之選勝遊宴。侑以梨園教坊樂。上每食一物。稍美。或後苑校獵獲鮮禽。輒遣中使走馬賜之。絡繹於路。甲辰。祿山生日。上及貴妃賜衣服寶器。酒饌甚厚。後三日。召祿山入禁中。貴妃以錦繡爲大襪。襪祿山。使宮人以綵輿昇之。上聞後宮歡笑。問其故。左右以貴妃三百洗祿兒對。上自往觀之。喜。賜貴妃



洗兒金銀錢。復厚賜祿山。盡歡而罷。自是祿山出入宮掖不禁。或與貴妃對食。或通宵不出。頗有醜聲聞於外。上亦不疑也。○安西節度使高仙芝入朝。獻所擒突騎施可汗吐蕃酋長石國王。竭師王。加仙芝開府儀同三司。尋以仙芝爲河西節度使。代安思順。思順諷羣胡割耳勞面。請留己制。復留思順於河西。○安祿山求兼河東節度。二月丙辰。以河東節度使韓休珉爲左羽林將軍。以祿山代之。戶部郎中吉溫見祿山有寵。又附之。約爲兄弟。說祿山曰。李右丞相雖以時事親三兄。不必肯以兄爲相。溫雖蒙驅使。終不得超擢。兄若薦溫於上。溫卽奏。兄堪大任。共排林甫出之。爲相必矣。祿山悅其言。數稱溫才於上。上亦忘曩日之言。會祿山領河東。因奏溫爲節度副使。知留後。以大理司直張通儒爲留後判官。河東事悉以委之。是時楊國忠爲御史中丞。方承恩用事。祿山登殿階。國忠常扶掖之。祿山與王鉞俱爲大夫。鉞權任亞於李林甫。祿山見林甫禮貌頗倨。林甫陽以它事召王大夫。鉞至。趨拜甚謹。祿山不覺自失。容貌益恭。林甫與祿山語。每揣知其情。先言之。祿山驚服。祿山於公卿皆慢侮之。獨憚林甫。每見。雖盛冬。常汗沾衣。林甫乃引與坐於中書廳。撫以溫言。自解披袍以覆之。祿山忻荷。言無不盡。謂林甫爲十郎。旣歸范陽。劉駱谷每自長安來。必問十郎何言。得美言則喜。或但云語安大夫。須好檢校。輒反手據牀曰。噫嘻。我死矣。祿山旣兼領三鎮。賞刑已出。日益驕恣。自以曩時不拜太子。見上春秋高。頗內懼。又見武備墮弛。有輕中國之心。孔目官嚴莊。掌書記高尙。因爲之解圖讖。勸之作亂。祿山養同羅奚契丹降者八千餘人。謂之曳落河。曳落河者。胡言壯士也。及家僮百餘人。皆驍勇善戰。一可當百。又畜戰馬數萬匹。多聚兵仗。分遣商胡詣諸道販鬻。歲輸珍貨數百萬。私作緋紫袍魚袋。以百萬計。以高尙嚴莊張通儒及將軍孫孝哲爲腹心。史思明安守忠李歸仁蔡希德牛廷玠向潤容李庭望崔乾祐尹子奇何千年武令珣能元皓田承嗣田乾真阿史那承慶爲爪牙。尙雍奴人。本名不危。頗

有辭學。薄遊河朔。貧困不得志。常歎曰。高不危。當舉大事而死。豈能齧艸根求活邪。祿山引置幕府。出入臥內。尙典牋奏。莊治簿書。通儒萬歲之子。孝哲契丹也。承嗣世爲盧龍小校。祿山以爲前鋒兵馬使。嘗大雪。祿山按行諸營。至承嗣營。寂若無人。入閱士卒。無一人不在者。祿山以是重之。○夏四月壬午。劔南節度使鮮于仲通討南詔蠻。大敗於瀘南。時仲通將兵八萬分二道出。戎嶺州。至曲州靖州。南詔王閣羅鳳謝罪請還所俘掠城雲南而去。且曰。今吐蕃大兵壓境。若不許我。我將歸命吐蕃。雲南非唐有也。仲通不許。囚其使。進軍至西洱河。與閣羅鳳戰。軍大敗。士卒死者六萬人。仲通僅以身免。楊國忠掩其敗狀。仍敍其戰功。閣羅鳳斂戰尸。築爲京觀。遂北。臣於吐蕃。蠻語謂弟爲鍾。吐蕃命閣羅鳳爲贊普鍾。號曰東帝。給以金印。閣羅鳳刻碑於國門。言己不得已而叛唐。且曰。我世世事唐。受其封爵。後世容復歸唐。當指碑以示唐使者。知吾之叛非本心也。制大募兩京及河南北兵。以擊南詔。人聞雲南多瘴癘。未戰。士卒死者什八九。莫肯應募。楊國忠遣御史分道捕人。連枷送詣軍所。舊制。百姓有勲者。免征役。時調兵既多。國忠奏。先取高勲。於是行者愁怨。父母妻子送之。所在哭聲振野。○高仙芝之虜石國王也。石國王子逃詣諸胡。具告仙芝欺誘貪暴之狀。諸胡皆怒。潛引大食。欲共攻四鎮。仙芝聞之。將蕃漢三萬衆。擊大食。深入七百餘里。至恒羅斯城。與大食遇。相持五日。葛羅祿部衆叛。與大食夾攻唐軍。仙芝大敗。士卒死亡略盡。所餘纔數千人。右威衛將軍李嗣業勸仙芝宵遁。道路阻隘。拔汗那部衆在前。人畜塞路。嗣業前驅。奮大槌擊之。人馬俱斃。仙芝乃得過。將士相失。別將汧陽段秀實聞嗣業之聲。詬曰。避敵先奔。無勇也。全已奔衆。不仁也。幸而得達。獨無愧乎。嗣業執其手謝之。留拒追兵。收散卒。得俱免。還至安西。言於仙芝。以秀實兼都知兵馬使。爲己判官。○八月丙辰。武庫火。燒兵器三十七萬。○安祿山將三道兵六萬。以討契丹。以奚騎二千爲鄉導。過平盧千餘里。至土護真水。遇雨。祿山



引兵。晝兵兼行。三百餘里。至契丹牙帳。契丹大駭。時久雨。弓弩筋膠皆弛。大將何思德言於祿山曰。吾兵雖多。遠來疲弊。實不可用。不如按甲息兵。以臨之。不過三日。虜必降。祿山怒。欲斬之。思德請前驅效死。思德貌類祿山。虜爭繫殺之。以爲已得祿山。勇氣增倍。奚復叛。與契丹合。夾擊唐兵。傷殆盡。射祿山中鞍。折冠簪。失履。獨與麾下二十騎走。會夜追騎解得入。師州。歸罪於左賢王哥解。河東兵馬使魚承仙而斬之。平盧兵馬使史思明懼。逃入山谷。近二旬。收散卒得七百人。平盧守將史定方將精兵二千救祿山。契丹引去。祿山乃得免。至平盧。麾下皆逃。不知所出。史思明出見祿山。祿山喜。起執其手曰。吾得汝。復何憂。思明退。謂人曰。曷使早出。已與哥解并斬矣。契丹圍師州。祿山使思明擊却之。○冬。十月。壬子。上幸華清宮。○楊國忠使鮮于仲通表請已遙領劔南。十一月。丙午。以國忠領劔南節度使。

十一載。春。正月。丁亥。上還宮。○二月。庚午。命有司出粟帛。及庫錢數十萬緡。於兩市易惡錢。先是。江淮多惡錢。貴戚大商。往往以良錢一易惡錢五。載入長安市。并不勝其弊。故李林甫奏。請禁之。官爲易取。期一月。不輸。官者罪之。於是商賈囂然。不以爲便。衆共遮楊國忠馬。自言國忠爲之言於上。乃更命。非鉛錫所鑄。及穿穴者。皆聽用之。如故。○三月。安祿山發蕃漢步騎二十萬。擊契丹。欲以雪去秋之恥。初。突厥阿布思來降。上厚禮之。賜姓名李獻忠。累遷朔方節度副使。賜爵奉信王。獻忠有才略。不爲安祿山下。祿山恨之。至是。奏請獻忠。帥同羅數萬騎。與俱擊契丹。獻忠恐爲祿山所害。白留後張暉。請奏留不行。暉不許。獻忠乃帥所部。大掠倉庫。叛歸漠北。祿山遂頓兵不進。○乙巳。改吏部爲文部。兵部爲武部。刑部爲憲部。○戶部侍郎兼御史大夫。京兆尹王鉞。權寵日盛。領二十餘使。宅旁爲使院。文案盈積。吏求署一字。累日不得。前中使賜賚。不絕於門。雖李林甫亦畏避之。林甫子岫爲將。作監。鉞子準爲衛尉少卿。俱供奉禁中。準陵侮岫。岫常下之。然鉞事林甫。謹。林甫雖忌其寵。不忍害也。準嘗

帥其徒。過駙馬都尉王緜。緜望塵拜伏。準挾彈。命中於緜冠。折其玉簪。以爲戲笑。既而緜延準置酒。緜所尚永穆公主。上之愛女也。爲準親執刀匕。準去。或謂緜曰。鼠雖挾其父。執君乃使公主爲之具食。有如上聞。無乃非宜。緜曰。上雖怒無害。至于七郎。死生所繫。不敢不爾。鉞弟戶部郎中錗。凶險不法。召術士任海川問。我有王者之相否。海川懼亡。匿錗恐事洩。捕得。託以它事。杖殺之。王府司馬韋會。定安公主之子。王緜之同產也。話之私庭。錗使長安尉賈季鄰收會繫獄。緜殺之。緜不敢言。錗所善邢縉。與龍武萬騎謀殺龍武將軍。以其兵作亂。殺李林甫。陳希烈。楊國忠。前期二日。有告之者。夏。四月。乙酉。上臨朝。以告狀。面授錗。使捕之。錗意錗在絳所。先使人召之。日晏。乃命賈季鄰等捕錗。錗居金城坊。季鄰等至門。絳帥其黨數十人。持弓刀。格鬪突出。錗與楊國忠引兵繼至。絳黨曰。勿傷大夫人。國忠之儻。密謂國忠曰。賊有號。不可戰也。絳鬪且走。至皇城西南隅。會高力士。引飛龍禁軍四百至。擊斬絳。捕其黨。皆擒之。國忠以狀白。上曰。錗必預謀。上以錗任遇深。不應與同逆。李林甫亦爲之辯解。上乃特命原錗不問。然意欲錗表請罪之。使國忠諷之。錗不忍。上怒。會陳希烈極言錗大逆。當誅。戊子。赦希烈。與國忠鞠之。仍以國忠兼京兆尹。於是任海川。韋會等事皆發。獄具。錗賜自盡。錗杖死於朝堂。錗子準。僞流嶺南。尋殺之。有司籍其第舍。數日不能備。錗賓佐莫敢窺其門。獨采訪判官裴冕。收其尸。葬之。○初。李林甫以陳希烈易制。引爲相。政事常隨林甫。左右晚節。遂與林甫爲敵。林甫懼。會李獻忠叛。林甫乃請解朔方節制。且薦河西節度使安思順。自代。庚子。以思順爲朔方節度使。○五月。戊申。慶王琮薨。贈靖德太子。○丙辰。京兆尹楊國忠加御史大夫。京畿關內采訪等使。凡王鉞所縮使務。悉歸國忠。初。李林甫以國忠微才。且貴妃之族。故善遇之。國忠與王鉞俱爲中丞。錗用林甫薦。爲大夫。故國不悅。遂深探邢縉獄。令引林甫交私。錗兄弟及阿布思事狀。陳希烈哥舒翰從而證之。上由是疏林甫。國忠貴震天



下始與林甫為仇敵矣。○六月甲子。楊國忠奏吐蕃兵六十萬。救南詔。劔南兵擊破之於雲南。克故隰州等三城。捕虜六千三百。以道遠。簡壯者千餘人。及酋長降者。獻之。○秋八月乙丑。上復幸左藏。賜羣臣帛。癸巳。楊國忠奏。有鳳皇見左藏庫屋。出納判官魏仲犀言。鳳集庫西通訓門。○九月。阿布思入寇。圍永清柵。柵使張元軌拒却之。○冬十月戊寅。上幸華清宮。○己亥。改通訓門曰鳳集門。魏仲犀遷殿中侍御史。楊國忠屬吏。率以鳳皇優得調。○南詔數寇邊。蜀人請楊國忠赴鎮。左僕射兼右相李林甫奏。遣之。國忠將行。泣辭。上言。必為林甫所害。貴妃亦為之請。上謂國忠曰。卿薨到蜀。區處軍事。朕屈指待卿。還當入相。林甫時已有疾。憂懣不知所為。巫言一見上。可小愈。上欲就視之。左右固諫。上乃令林甫出。庭中。上登降聖閣。遙望。以紅巾招之。林甫不能拜。使人代拜。國忠比至蜀。上遣中使召還。至昭應。謁林甫。拜於牀下。林甫流涕。謂曰。林甫死矣。公必為相。以後事累公。國忠謝不敢當。汗出覆面。十一月乙卯。林甫薨。上晚年自恃承平。以為天下無復可憂。遂深居禁中。專以聲色自娛。悉委政事於林甫。林甫媚事左右。迎合上意。以固其寵。杜絕言路。掩蔽聰明。以成其姦。妬賢疾能。排抑勝己。以保其位。屢起大獄。誅逐貴臣。以張其勢。自皇太子以下。畏之側足。凡在相位十九年。養成天下之亂。而上不之寤也。○庚申。以楊國忠為右相。兼文部尚書。其判使竝如故。國忠為人頽辯。而輕躁無威儀。既為相。以天下為己任。裁決機務。果敢不疑。居朝廷。攘袂扼腕。公卿以下。頽指氣使。莫不震懼。自侍御史至為相。凡領四十餘使。臺省官。有才行時名。不為己用者。皆出之。或勸陝郡進士張彥。謂國忠曰。見之富貴立可圖。彥曰。君輩倚楊右相。如泰山。吾以為水山耳。若皎日既出。君輩得無失所恃乎。遂隱居嵩山。國忠以司勳員外郎崔圓為劔南留後。徵魏郡太守吉溫為御史中丞。充京畿關內採訪等使。溫詣范陽。辭安祿山。祿山令其子慶緒。送至境。為溫控馬。出驛數十步。溫至長安。凡朝廷動靜。輒報祿山。信宿而達。

○十二月。楊國忠欲收人望。建議文部選人。無問賢不肖。選深者留之。依資據闕。注官。滯淹者。翕然稱之。國忠凡所施置。皆曲徇人所欲。故頗得衆譽。○甲申。以平盧兵馬使史思明兼北平太守。充盧龍軍使。○丁亥。上還宮。○丁酉。以安西行軍司馬封常清為安西四鎮節度使。○哥舒翰素與安祿山安思順不協。上常和解之。使為兄弟。是冬。三人俱入朝。上使高力士宴之於城東。祿山謂翰曰。我父胡。母突厥。公父突厥。母胡。族類頗同。何得不相親。翰曰。古人云。狐向窟。嗥不祥。為其忘本故也。兄苟見親。翰敢不盡心。祿山以為譏。其胡也。大怒。罵翰曰。突厥敢爾。翰欲應之。力士目翰。翰乃止。陽醉而散。自是為怨愈深。○棣王琰有二孺人。爭寵。其一使巫書符。置琰履中。以求媚。琰與監院宦者有隙。宦者知之。密奏。琰祝詛上。上使人掩其履。而獲之。大怒。琰頓首謝。臣實不知有符。上使鞠之。果孺人所為。上猶疑琰知之。囚于鷹狗坊。絕朝請。憂憤而薨。○故事。兵吏部尚書知政事者。選事。悉委侍郎以下。三注三唱。仍過門下省。審自春及夏。其事乃畢。及楊國忠以宰相領文部尚書。欲自示精敏。乃遣令史先於私第。密定名闕。○十二載。春正月壬戌。國忠召左相陳希烈。及給事中諸司長官。皆集尚書都堂。唱注選人。一日而畢。曰。今左相給事中。俱在座。已過門下矣。其間資格。差繆甚衆。無敢言者。於是門下不復過官。侍郎但掌試判而已。侍郎韋見素。張倚。趨走門庭。與主事無異。見素湊之子也。京兆尹鮮于仲通。諷選人。請為國忠刻頌。立於省門。制仲通撰其辭。上為改定數字。仲通以金填之。○楊國忠使人說安祿山。誣李林甫。與阿布思謀反。祿山使阿布思部落降者。詣闕。誣告林甫。與阿布思約為父子。上信之。下吏按問。林甫壻諫議大夫楊齊宣。懼為所累。附國忠意。證成之。時林甫尚未葬。二月癸未。制削林甫官爵。子孫有官者。除名。流嶺南。及黔中。給隨身衣及糧食。自餘貲產。竝沒。官近親及黨與。坐貶者五十餘人。剖林甫棺。抉取含珠。褫金紫。更



以小棺如庶人禮葬之。己亥，賜陳希烈爵許國公。楊國忠爵魏國公，賞其成林甫之獄也。○夏五月己酉，復以魏周隋後為三恪。○楊國忠欲攻李林甫之短也。衛包以助邪貶夜郎尉。崔冒貶烏雷尉。○阿不思為回紇所破，安祿山誘其部落而降之。由是祿山精兵天下莫及。○壬辰，以左武衛大將軍何復光將嶺南五府兵擊南詔。○安祿山以李林甫狡猾踰己，故畏服之。及楊國忠為相，祿山視之蔑如也。由是有隙。國忠屢言祿山有反狀，上下聽。○隴右節度使哥舒翰擊吐蕃，拔洪濟大漠門等城，悉收九曲部落。初，高麗人王思禮與翰俱為押牙，事王思禮。翰為節度使，思禮為兵馬使，兼河源軍使。翰擊九曲，思禮後期，翰將斬之。既而復召釋之。思禮徐曰：「斬則遂斬，復召何為？」楊國忠欲厚結翰，共排安祿山，奏以翰兼河西節度使。秋八月戊戌，賜翰爵西平郡王。翰表侍御史裴冕為河西行軍司馬。是時中國盛彊，自安遠門西盡唐境萬二千里，閭閻相望，桑麻翳野。天下稱富庶者無如隴右。翰每遣使入奏，常乘白橐駝，日馳五百里。○九月甲辰，以突騎施黑姓可汗登里伊羅蜜施為突騎施可汗。○北庭都護程千里追阿不思至積西，以書諭葛邏祿使相應。阿不思窮迫，歸葛邏祿。葛邏祿葉護執之，并其妻子麾下數千人，送之甲寅。加葛邏祿葉護頓毗伽開府儀同三司，賜爵金山王。○冬十月戊寅，上幸華清宮。楊國忠與虢國夫人居第相鄰，晝夜往來，無復期度。或竝轡走馬入朝，不施鄣幕，道路為之掩目。三夫人將從車駕幸華清宮，會於國忠第。車馬僕從充溢數坊，錦繡珠玉，鮮華奪目。國忠謂客曰：「吾本寒家，一旦緣椒房至此，未知稅駕之所。然念終不能致令名，不若且極樂耳。」楊氏五家隊各為一色衣，以相別。五家合隊，榮若雲錦。國忠仍以劔南旌節引于其前。國忠子暄舉明經，學業荒陋，不及格。禮部侍郎達奚珣畏國忠權勢，遣其子昭應尉撫先白之。撫伺國忠入朝上馬，趨至馬下。國忠意其子必中選，有喜色。撫曰：「大人白相公，郎君所試不中程式，然亦未敢落也。」國忠怒曰：「我子何患不富貴，乃令」

鼠輩相賣策，馬不顧而去。撫惶遽，書白其父曰：「彼恃挾貴勢，令人慘嗟。安可復與論曲直，遂置暄上第。及暄為戶部侍郎，珣始自禮部遷吏部，暄與所親言，猶歎己之淹回。珣之迅疾，國忠既居要地，中外餉遺輻湊，積緡至三千萬匹。○上在華清宮，欲夜出遊，龍武大將軍陳玄禮諫曰：「宮外即曠野，安可不備不虞？」陛下必欲夜遊，請歸城闕，上為之引還。○是歲安西節度使封常清擊大勃律，至苦薩勞城，前鋒屢捷，常清乘勝逐之，斥候府果毅段秀實諫曰：「虜兵羸而屢北，誘我也。請搜左右山林，常清從之。果獲伏兵，遂大破之。受降而還。○中書舍人宋昱知選事，前進士廣平劉廼以選法未善，上書於昱，以為禹稷臯陶同居舜朝，猶曰載采，有九德，考績以九載，近代主司，察言於一幅之判，觀行於一揖之間，何古今遲速不侔之甚哉。借使周公孔子，今處銓廷，考其辭華，則不及徐庾，觀其利口，則不若馮夫。何暇論聖賢之事業乎？」

資治通鑑卷第一百二十六

唐紀 玄宗至道大聖大明孝皇帝下之上天寶十二載



# 資治通鑑卷第二百一十七

## 唐紀三十三

### 玄宗至道大聖大明孝皇帝下之下

十三載。春正月己亥。安祿山入朝。是時楊國忠言祿山必反。且曰。陛下試召之。必不來。上使召之。祿山聞命。即至。庚子。見上於華清宮。泣曰。臣本胡人。陛下寵擢至此。為國忠所疾。臣死無日矣。上憐之。賞賜巨萬。由是益親信祿山。國忠之言不能入矣。太子亦知祿山必反。言於上。上不聽。○甲辰。太清宮奏。學士李琪。見玄宗皇帝乘紫雲。告以國祚延昌。○唐初詔勅。皆中書門下官有文者為之。乾封以後。始召文士元萬頃。范履冰等。草諸文辭。常於北門候進止。時人謂之北門學士。中宗之世。上官昭容專其事。上即位。始置翰林院。密邇禁廷。延文章之士。下至僧道。書畫。琴棋。數術之工。皆處之。謂之待詔。刑部尚書張均。及弟太常卿垺。皆翰林院供奉。上欲加安祿山同平章事。已令張垺草制。楊國忠諫曰。祿山雖有軍功。目不知書。豈可為宰相。制書若下。恐四夷輕唐。上乃止。乙巳。加祿山左僕射。賜一子三品。一子四品官。○丙午。上還宮。○安祿山求兼領閑廐羣牧。庚申。以祿山為閑廐隴右羣牧等使。祿山又求兼總監。壬戌。兼知總監事。祿山奏。以御史中丞吉溫為武部侍郎。充閑廐副使。楊國忠由是惡溫。祿山密遣親信。選健馬堪戰者數千匹。別飼之。○二月壬申。上朝獻太清宮。上聖祖尊號曰大聖祖高上大道金闕玄元大皇天帝。癸酉。享太廟。上高祖諡曰神堯。大聖光孝皇帝。太宗諡曰文武大聖大廣孝皇帝。高宗諡曰天皇大聖大弘孝皇帝。中宗諡曰孝和大聖大昭

孝皇帝。睿宗諡曰玄真大聖大興孝皇帝。以漢家諸帝皆諡孝故也。甲戌。羣臣上尊號曰開元。天地大寶聖文武證道季德皇帝。赦天下。○丁丑。楊國忠進位司空。甲申。臨軒冊命。○己丑。安祿山奏。臣所部將士。討奚契丹九姓。同羅等。勳効甚多。乞不拘常格。超資加賞。仍好寫告身。付臣軍授之。於是除將軍者五百餘人。中郎將者二千餘人。祿山欲反。故先以此收衆心也。三月丁酉朔。祿山辭歸范陽。上解御衣。以賜之。祿山受之。驚喜。恐楊國忠奏留之。疾驅出關。乘船沿河而下。令船夫執繩板。立於岸側。十五里一更。晝夜兼行。日數百里。過郡縣不下船。自是有言祿山反者。上皆縛送。由是人知其將反。無敢言者。祿山之發長安也。上令高力士。餞之長樂坡。及還。上問祿山慰意乎。對曰。觀其意怏怏。必知欲命為相而中止故也。上以告國忠。曰。此議。它人不知。必張垺兄弟告之也。上怒。貶張均為建安太守。垺為盧溪司馬。垺弟給事中垺。為宜春司馬。哥舒翰亦為其部將。論功。勅以隴右十將。特進火拔州都督。燕山郡王火拔歸仁。為驃騎大將軍。河源軍使王思禮。加特進。臨洮太守。成如璆。討擊副使。范陽魯吳。阜蘭府都督。渾惟明。竝加雲麾將軍。隴右討擊副使。郭英乂。為左羽林將軍。英乂知運之子也。翰又奏。嚴挺之子武。為節度判官。河東呂諲。為支度判官。前封丘尉高適。為掌書記。安邑曲環。為別將。○程千里。執阿布思。獻於闕下。斬之。甲子。以千里為金吾大將軍。以封常清。權北庭都護。伊西節度使。○夏四月癸巳。安祿山奏。擊奚破之。虜其王李日越。○六月乙丑朔。日有食之。不盡如鉤。○侍御史劾南留後李宓。將兵七萬。擊南詔。閣羅鳳誘之深入。至太和城。閉壁不戰。宓糧盡。士卒罹瘴疫。及飢死。什七八。乃引還。蠻追擊之。宓被擒。全軍皆沒。楊國忠隱其敗。更以捷聞。益發中國兵討之。前後死者幾二十萬人。無敢言者。上嘗謂高力士曰。朕今老矣。朝事付之宰相。邊事付之諸將。夫復何憂。力士對曰。臣聞雲南數喪師。又邊將擁兵太盛。陛下將何以制之。臣恐一旦禍發。不可復求。何得謂無憂也。上曰。卿勿



言。朕徐思之。○秋七月癸丑。哥舒翰奏於所開九曲之地。置洮陽澆河二郡。及神策軍。以臨洮太守成如璆兼洮陽太守。充神策軍使。○楊國忠忌陳希烈。希烈累表辭位。上欲以武部侍郎吉溫代之。國忠以溫附安祿山。奏言不可。以文部侍郎韋見素和雅易制。薦之。八月丙戌。以希烈爲太子太師。罷政事。以見素爲武部尙書。同平章事。○自去歲水旱相繼。關中大飢。楊國忠惡京兆尹李峴不附己。以災沴歸咎於峴。九月。貶長沙太守。峴禱之子也。上憂雨傷稼。國忠收禾之善者獻之。曰。雨雖多。不害稼也。上以爲然。扶風太守房瑄言所部水災。國忠使御史推之。是歲。天下無敢言災者。高力士侍側。上曰。淫雨不已。卿可盡言。對曰。自陛下以權假宰相。賞罰無章。陰陽失度。臣何敢言。上默然。○冬十月乙酉。上幸華清宮。○十一月己未。置內侍監二員。正三品。○河東太守兼本道採訪使韋陟斌之兄也。文雅有盛名。楊國忠恐其入相。使人告陟賊汚事。下御史按問。陟賂中丞言溫使求救於安祿山。復爲國忠所發。閏月壬寅。貶陟桂嶺尉。溫澧陽長史。安祿山爲溫訴冤。且言國忠讒疾。上兩無所問。○戊午。上還宮。○是歲。戶部奏。天下郡三百二十一。縣五千五百三十八。鄉萬六千八百二十九。戶九百六萬九千一百五十四。口五千二百八十八萬四千八百八十八。○二月辛亥。安祿山使副將何千年入奏。請以蕃將三十二人代漢將。上命立進書。給告身。韋見素謂楊國忠曰。祿山久有異志。今又有此請。其反明矣。明日。見素當極言。上未允。公其繼之。國忠許諾。壬子。國忠見素入見。上迎謂曰。卿等有疑祿山之意邪。見素因極言。祿山反已有迹。所請不可許。上不悅。國忠遂巡不敢言。上竟從祿山之請。它日。國忠見素言於上曰。臣有策。可坐消祿山之謀。今若除祿山平章事。召詣闕。以賈循爲范陽節度使。呂知誨爲平盧節度使。楊光翹爲河東節度使。則勢自分矣。上從之。已草制。上留不發。更遣中使輔璆琳以珍果賜祿山。潛察其變。璆琳受祿山厚賂。

還盛言祿山竭忠奉國。無有二心。上謂國忠等曰。祿山朕推心待之。必無異志。東北二虜藉其鎮遏。朕自保之。卿等勿憂也。事遂寢。循華原人也。時爲節度副使。○隴右河西節度使哥舒翰入朝。道得風疾。遂留京師。家居不出。○三月辛巳。命給事中裴士淹宣慰河北。○夏四月。安祿山奏破奚契丹。○癸巳。以蘇毗王子悉諾邏爲懷義王。賜姓名李忠信。○安祿山歸至范陽。朝廷每遣使者至。皆稱疾不出。迎盛陳武備。然後見之。裴士淹至范陽。二十餘日。乃得見。無復人臣禮。楊國忠日夜求祿山反狀。使京兆尹圍其第。捕祿山客李超等。送御史臺獄。潛殺之。祿山子慶宗尙宗女榮義郡主。供奉在京師。密報祿山。祿山愈懼。六月。上以其子成昏。手詔祿山觀禮。祿山辭疾不至。秋七月。祿山表獻馬三千匹。每匹執控夫二人。遣蕃將二十二人部送。河南尹達奚珣疑有變。奏請諭祿山。以進車馬。宜俟至冬。官自給夫。無煩本軍。於是上稍寤。始有疑祿山之意。會輔璆琳受賂事亦泄。上託以他事。撲殺之。上遣中使馮神威齎手詔諭祿山如珣策。且曰。朕新爲卿作一湯。十月。於華清宮待卿。神威至范陽。宣旨。祿山踞牀微起。亦不拜。曰。聖人安隱。又曰。馬不獻。亦可。十月。灼然詣京師。即令左右引神威置館舍。不復見。數日。遣還。亦無表。神威還見上。泣曰。臣幾不得見大家。○八月辛卯。免今載百姓租庸。○冬十月庚寅。上幸華清宮。○安祿山專制三道。陰蓄異志。殆將十年。以上待之厚。欲俟上晏駕。然後作亂。會楊國忠與祿山不相悅。屢言祿山且反。上不聽。國忠數以事激之。欲其速反。以信於上。祿山由是決意遽反。獨與孔目官太僕丞嚴莊。掌書記屯田員外郎高尚。將軍阿史那承慶。密謀。自餘將佐。皆莫之知。但怪其自八月以來。屢饗士卒。秣馬厲兵而已。會有奏事官自京師還。祿山詐爲勅書。悉召諸將。示之曰。有密旨。令祿山將兵入朝。討楊國忠。諸君宜即從軍。衆愕然相顧。莫敢異言。十一月甲子。祿山發所部兵。及同羅奚契丹室韋。凡十五萬衆。號二十萬。反於范陽。命范陽節度副使賈循守范陽。平盧節度副使呂



知誨守平盧。別將高秀巖守大同。諸將皆引兵夜發。詰朝。祿山出薊城南。大閱警衆。以討楊國忠爲名。勝軍中曰。有異議。扇動軍人者。斬及三族。於是引兵而南。祿山乘鐵轡。步騎精銳。煙塵千里。鼓譟震地。時海內久承平。百姓累世不識兵革。猝聞范陽兵起。遠近震駭。河北皆祿山統內。所過州縣。望風瓦解。守令或開門出迎。或棄城竄匿。或爲所擒戮。無敢拒之者。祿山先遣將軍何千年。高邈。將奚騎二千。聲言獻射生手。乘驛詣太原。乙丑。北京副留守楊光翹出迎。因劫之以去。太原具言其狀。東受降城亦奏祿山反。上猶以爲惡祿山者。詐爲之。未之信也。庚午。上聞祿山定反。乃召宰相謀之。楊國忠揚揚有德色。曰。今反者獨祿山耳。將士皆不欲也。不過旬日。必傳首詣行在。上以爲然。大臣相顧失色。上遣特進畢思琛詣東京。金吾將軍程千里。詣河東。各簡募數萬人。隨便團結。以拒之。辛未。安西節度使封常清入朝。上問以討賊方略。常清大言曰。今太平積久。故人望風憚賊。然事有順逆。勢有奇變。臣請走馬詣東京。開府庫。募驍勇。挑馬箠度河。計日取逆胡之首。獻闕下。上悅。壬申。以常清爲范陽平盧節度使。常清即日乘驛詣東京募兵。旬日得六萬人。乃斷河陽橋。爲守禦之備。甲戌。祿山至博陵南。何千年等執楊光翹見祿山。責光翹以附楊國忠。斬之。以徇。祿山使其將安忠志將精兵。軍士門忠。奚人。祿山養爲假子。又以張獻誠攝博陵太守。獻誠守珪之子也。祿山至藁城。常山太守顏杲卿力不能拒。與長史袁履謙往迎之。祿山輒賜杲卿金紫。質其子弟。使仍守常山。又使其將李欽湊將兵數千人守井陘口。以備西來諸軍。杲卿歸途中。指其衣。謂履謙曰。何爲著此履謙。悟其意。乃陰與杲卿謀。起兵討祿山。杲卿思魯之玄孫也。丙子。上還宮。斬太僕卿安慶宗。賜榮義郡主自盡。以朔方節度使安思順爲戶部尚書。思順弟元貞爲太僕卿。以朔方右廂兵馬使九原太守郭子儀爲朔方節度使。右羽林大將軍王承業爲太原尹。置河南節度使。領陳留等十三郡。以衛尉卿猗氏張介然爲之。以程千里爲潞州長

史。諸郡當賊衝者。始置防禦使。丁丑。以榮王琬爲元帥。右金吾大將軍高仙芝副之。統諸軍東征。出內府錢帛於京師募兵十一萬。號曰天武軍。旬日而集。皆市井子弟也。○十二月。丙戌。高仙芝將飛騎驍騎。及新募兵。邊兵在京師者。合五萬人。發長安。上遣宦者監門將軍邊令誠監其軍。屯於陝。○丁亥。安祿山自靈昌度河。以緼約敗船。及草木橫絕。河絕。一夕冰合。如浮梁。遂陷靈昌郡。祿山步騎散漫。人莫知其數。所過殘滅。張介然至陳留。纒數日。祿山至。授兵登城。衆懼不能守。庚寅。太守郭納以城降。祿山入北郭。聞安慶宗死。慟哭曰。我何罪而殺我子。時陳留將士降者。夾道近萬人。祿山皆殺之。以快其忿。斬張介然於軍門。以其將李庭望爲節度使。守陳留。壬辰。上下制。欲親征。其朔方河西隴右兵留守城堡之外。皆赴行營。令節度使自將之。期二十日畢集。○初。平原太守顏真卿知祿山且反。因霖雨。完城浚壕。料丁壯實倉廩。祿山以其書生易之。及祿山反。牒真卿以平原博平兵七千人防河津。真卿遣平原司兵李平問道奏之。上始聞祿山反。河北郡縣皆風靡。歎曰。二十四郡。曾無一人義士邪。及平至。大喜曰。朕不識顏真卿作何狀。乃能如是。真卿遣親客密懷購賊牒。詣諸郡。由是諸郡多應者。真卿杲卿之從弟也。安祿山引兵向滎陽。太守崔無詖拒之。士卒乘城者。聞鼓角聲。自墜如雨。癸巳。祿山陷滎陽。殺無詖。以其將武令珣守之。祿山聲勢益張。以其將田承嗣。安忠志。張孝忠爲前鋒。封常清所募兵皆白徒。未更訓練。屯武牢。以拒賊。賊以鐵騎蹂之。官軍大敗。常清收餘衆。戰於葵園。又敗。戰上東門內。又敗。丁酉。祿山陷東京。賊鼓譟自四門入。縱兵殺掠。常清戰於都亭驛。又敗。退守宣仁門。又敗。乃自苑西壞牆西走。河南尹達奚珣降於祿山。留守李愷謂御史中丞盧奕曰。吾曹荷國重任。雖知力不敵。必死之。奕許諾。愷收殘兵數百。欲戰。皆奔潰。潰去。愷獨坐府中。奕先遣妻子。懷印問道走長安。朝服坐臺中。左右皆散。祿山屯於閑廡。使人執愷奕。及采訪判官蔣清。皆殺之。奕罵祿山數其罪。顧賊黨曰。



凡爲人當知逆順。我死不失節。夫復何恨。橙。文水人。奕。懷慎之子。清欽。緒之子也。祿山以其黨張萬頃爲河南尹。封常清帥餘衆至陝。陝郡太守竇廷芝已奔河東。吏民皆散。常清謂高仙芝曰。常清連日血戰。賊鋒不可當。且潼關無兵。若賊豕突入關。則長安危矣。陝不可守。不如引兵據潼關以拒之。仙芝乃帥見兵西趣潼關。賊尋至。官軍狼狽。走無復部伍。士馬相騰踐。死者甚衆。至潼關。修完守備。賊至。不得入而去。祿山使其將崔乾祐屯陝。臨汝。弘農。濟陰。濮陽。雲中郡。皆降於祿山。是時朝廷徵兵諸道。皆未至。關中惴懼。會祿山方謀稱帝。留東京不進。故朝廷得爲之備。兵亦稍集。祿山以張通儒之弟通晤爲睢陽太守。與陳留長史楊朝宗將胡騎千餘。東略地。郡縣官多望風降走。惟東平太守嗣吳王祇。濟南太守李隨。起兵拒之。祇。禕之弟也。郡縣之不從賊者。皆倚吳王爲名。單父尉賈賁帥吏民南擊睢陽。斬張通晤。李庭望引兵欲東徇地。聞之。不敢進而還。○庚子。以永王璘爲山南節度使。江陵長史源洧爲之副。穎王璩爲劔南節度使。蜀郡長史崔圓爲之副。二王皆不出關。洧。光裕之子也。上議親征。辛丑。制太子監國。謂宰相曰。朕在位垂五十載。倦于憂勤。去秋已欲傳位太子。值水旱相仍。不欲以餘災遺子孫。淹留俟稍豐。不意逆胡橫發。朕當親征。且使之監國。事平之日。朕將高枕無爲矣。楊國忠大懼。退謂韓號泰三夫人曰。太子素惡吾家。專橫久矣。若一旦得天下。吾與姊妹併命在旦暮矣。相與聚哭。使三夫人說貴妃。衛士請命於上。事遂寢。○顏真卿召募勇士。旬日至萬餘人。諭以舉兵討安祿山。繼以涕泣。士皆感憤。祿山使其黨段子光齎李愷盧奕蔣清首。狗河北諸郡至平原。壬寅。真卿執子光。腰斬以狗。取三人首。續以蒲身。棺斂葬之。祭哭受弔。祿山以海運使劉道玄攝景城太守。清池尉賈載。鹽山尉河內穆寧。共斬道玄。得其甲仗五十餘船。攜道玄首謁長史李暉。暉收嚴莊宗族。悉誅之。是日。送道玄首至平原。真卿召載寧及清河尉張澹。詣平原計事。饒陽太守盧全誠。據城不受代。河間司法李

奂。殺祿山所署長史王懷忠。李隨遣遊奕將訾嗣賢。濟河。殺祿山所署博平太守馬冀。各有衆數千。或萬人。共推真卿爲盟主。軍事皆稟焉。祿山使張獻誠將上谷。博陵。常山。趙郡。文安。五郡團結兵萬人。圍饒陽。○高仙芝之東征也。監軍邊令誠數以事干之。仙芝多不從。令誠入奏事。具言仙芝常清撓敗之狀。且云。常清以賊搖衆。而仙芝奔陝。地數百里。又盜減軍士糧賜。上大怒。癸卯。遣令誠齎勅。即軍中斬仙芝及常清。初。常清既敗。三遣使奉表。陳賊形勢。上皆不之見。常清乃自馳詣闕。至渭南。勅。削其官爵。令還仙芝軍。白衣自效。常清草遺表曰。臣死之後。望陛下不輕此賊。無忘臣言。時朝議皆以爲祿山狂悖。不日授首。故常清云然。令誠至潼關。先引常清宣勅示之。常清以表附令誠上之。常清既死。陳尸蓬蔭。仙芝還至聽事。令誠索陌刀。手百餘人自隨。乃謂仙芝曰。大夫亦有恩命。仙芝遽下令誠宣勅。仙芝曰。我遇敵而退。死則宜矣。今上戴天。下履地。謂我盜賊。糧賜。則誣也。時士卒在前。皆大呼稱枉。其聲振地。遂斬之。以將軍李承光攝領其衆。河西隴右節度使哥舒翰病廢在家。上藉其威名。且素與祿山不協。召見。拜兵馬副元帥。將兵八萬。以討祿山。仍勅天下四面進兵。會攻洛陽。翰以病固辭。上不許。以田良丘爲御史中丞。充行軍司馬。起居郎蕭昕爲判官。蕃將火拔歸仁等。各將部落以從。并仙芝舊卒。號二十萬軍。于潼關。翰病不能治事。悉以軍政委田良丘。良丘復不敢專決。使王思禮主騎。李承光主步。二人爭長。無所統壹。翰用法嚴。而不恤士卒。皆懈弛無鬪志。○安祿山大同軍使高秀巖寇振武軍。朔方節度使郭子儀擊敗之。子儀乘勝拔靜邊軍。大同兵馬使薛忠義寇靜邊軍。子儀使左兵馬使李光弼。右兵馬使高潛。左武鋒使僕固懷恩。右武鋒使渾釋之等。逆擊。大破之。亢其騎七千。進圍雲中。使別將公孫瓊。嚴將二千騎擊馬邑。拔之。開東陘關。甲辰。加子儀御史大夫。懷恩。哥濫拔延之。曾孫也。世爲金微都督。釋之。渾部酋長。世爲阜蘭都督。○顏杲卿將起兵。參軍馮虔前真定。令賈深。藁城尉崔



安石郡人翟萬德內丘丞張通幽皆預其謀又遣人語太原尹王承業密與相應會顏真卿自平原遣臬卿甥盧遜潛告臬卿欲連兵斷祿山歸路以緩其西入之謀時祿山遣其金吾將軍高邈詣幽州徵兵未還臬卿以祿山命召李欽湊使帥眾詣郡受犒賚丙午薄暮欽湊至臬卿使袁履謙馮虔等攜酒食妓樂往勞之并其黨皆大醉乃斷欽湊首收其甲兵盡縛其黨明日斬之悉散井陘之衆有頃高邈自幽州還且至藁城臬卿使馮虔往擒之南境又白何千年自東京來崔安石與翟萬德馳詣醴泉驛迎千年又擒之同日致於郡下千年謂臬卿曰今太守欲輸力王室既善其始當慎其終此郡應募烏合難以臨敵宜深溝高壘勿與爭鋒俟朔方軍至併力齊進傳檄趙魏斷燕薊要膺今且宜聲云李光弼引步騎一萬出井陘因使人說張獻誠云足下所將多團練之人無堅甲利兵難以當山西勁兵獻誠必解圍遁去此亦一奇也臬卿悅用其策獻誠果遁去其團練兵皆潰臬卿乃使人入饒陽城慰勞將士命崔安石等徇諸郡云大軍已下井陘朝夕當至先平河北諸郡先下者賞後至者誅於是河北諸郡響應凡十七郡皆歸朝廷兵合二十餘萬其附祿山者唯范陽盧龍密雲漁陽汲鄴六郡而已臬卿又密使人入范陽招賈循郝城人馬燧說循曰祿山負恩悖逆雖得洛陽終歸夷滅公若誅諸將之不從命者以范陽歸國傾其根柢此不世之功也循然之猶豫不時發別將牛潤容知之以告祿山祿山使其黨韓朝陽召循朝陽至范陽引循屏語使壯士縊殺之滅其族以別將牛廷玠知范陽軍事史思明李立節將蕃漢步騎萬人擊博陵常山馬燧亡入西山隱者徐遇匿之得免○初祿山欲自將攻潼關至新安聞河北有變而還蔡希德將兵萬人自河內北擊常山○戊申蔡王琬薨贈諡靖恭太子○是歲吐蕃贊普乞黎蘇籠獵贊卒子娑悉籠獵贊立

肅宗文明武德大聖大宣孝皇帝上之上

至德元載春正月乙卯朔祿山自稱大燕皇帝改元聖武以達奚珣為侍中張通儒為中書令高尙嚴莊為中書侍郎○李隨至睢陽有衆數萬丙辰以隨為河南節度使以前高要尉許遠為睢陽太守兼防禦使濮陽客尙衡起兵討祿山以郡人王栖曜為衙前總管攻拔濟陰殺祿山將邢超然○顏臬卿使其子泉明賈深翟萬德獻李欽湊首及何千年高邈于京師張通幽泣請曰通幽兄陷賊乞與泉明偕行以救宗族臬卿哀而許之至太原通幽欲自託於王承業乃教之留泉明等更其表多自為功毀短臬卿別遣使獻之臬卿起兵纔八日守備未完史思明蔡希德引兵皆至城下臬卿告急於承業承業既竊其功利於城陷遂擁兵不救臬卿晝夜拒戰糧盡矢竭壬戌城陷賊縱兵殺萬餘人執臬卿及袁履謙等送洛陽王承業使者至京師玄宗大喜拜承業羽林大將軍麾下受官爵者以百數徵顏臬卿為衛尉卿朝命未至常山已陷臬卿至洛陽祿山數之曰汝自范陽戶曹我奏汝為判官不數年超至太守何負於汝而反邪臬卿瞋目罵曰汝本營州牧羊羯奴天子擢汝為三道節度使恩幸無比何負於汝而反我世為唐臣祿位皆唐有雖為汝所奏豈從汝反邪我為國討賊恨不斬汝何謂反也臊羯狗何不速殺我祿山大怒并袁履謙等縛於中橋之柱而髡之臬卿履謙比死罵不虛口顏氏一門死於刀鋸者三十餘人史思明李立節蔡希德既克常山引兵擊諸郡之不從者所過殘滅於是鄴廣平鉅鹿趙上谷博陵文安魏信都等郡復為賊守饒陽太守盧全誠獨不從思明等圍之河間司法李奐將七千人景城長史李暉遣其子祀將八千人救之皆為思明所敗○上命郭子儀罷圍雲中還朔方益發兵進取東京選良將一人分兵先出井陘定河北子儀薦李光弼癸亥以光弼為河東節度使分朔方兵萬人



與之。○甲子。加哥舒翰左僕射。同平章事。餘如故。○置南陽節度使。以南陽太守魯吳爲之。將嶺南黔中襄陽子弟五萬人屯葉北。以備安祿山。吳表薛愿爲潁川太守。兼防禦使。龐堅爲副使。愿故太子瑛之妃兄。堅王之曾孫也。○乙丑。安祿山遣其子慶緒寇潼關。哥舒翰擊却之。○己巳。加顏真卿戶部侍郎。兼本郡防禦使。真卿以李暉爲副。○二月。丙戌。加李光弼魏郡太守。河北道採訪使。○史思明等圍饒陽。二十九日不下。李光弼將蕃漢步騎萬餘人。太原弩手三千人。出井陘。己亥。至常山。常山團練兵三千人。殺胡兵。執安思義。出降。光弼謂思義曰。汝自知當死否。思義不應。光弼曰。汝久更陳行。視吾此衆。可敵思明否。今爲我計。當如何。汝策可取。當不殺汝。思義曰。大丈夫馬。遠來疲弊。猝遇大敵。恐未易當。不如移軍入城。早爲備禦。先料勝負。然後出兵。胡騎雖銳。不能持重。苟不獲利。氣沮心離。於時乃可圖矣。思明今在饒陽。去此不二百里。昨暮。羽書已去。計其先鋒來晨必至。而大軍繼之。不可不留意也。光弼悅。釋其縛。卽移軍入城。史思明聞常山不守。立解饒陽之圍。明日未旦。先鋒已至。思明等繼之。合二萬餘騎。直抵城下。光弼遣步卒五千。自東門出戰。賊守門不退。光弼命五百弩於城上。齊發射之。賊稍却。乃出弩手千人。分爲四隊。使其矢發發相繼。賊不能當。斂軍道北。光弼出兵五千。爲槍城於道南。夾呼沱水而陳。賊數以騎兵搏戰。光弼之兵射之。人馬中矢者太半。乃退。小憩以俟。步兵有村民告賊步兵五千。自饒陽來。晝夜行百七十里。至九門。南逢壁度。憩息。光弼遣步騎各二千。匿旗鼓。竝水潛行。至逢壁。賊方飯。縱兵掩擊。殺之無遺。思明聞之。失勢。退入九門。時常山九縣。七附官軍。惟九門藁城爲賊所據。光弼遣裨將張奉璋。以兵五百戍石邑。餘皆三百人戍之。○上以吳王祗爲靈昌太守。河南都知兵馬使。賈賁前至雍丘。有衆二千。先是。譙郡太守楊萬石。以郡降安祿山。逼真源。令河東張巡。使爲長史。西迎賊。巡至真源。帥吏民哭於玄元皇帝廟。起兵討賊。吏民樂從者數千人。巡選精兵千人。

西至雍丘。與賈賁合。初。雍丘令狐潮以縣降賊。賊以爲將。使東擊淮陽。救兵于襄邑。破之。俘百餘人。拘於雍丘。將殺之。往見李庭望。淮陽兵遂殺守者。潮奔妻子走。故賈賁得以其間。入雍丘。庚子。潮引賊精兵攻雍丘。賈出戰。敗死。張巡力戰却賊。因兼領賈衆。自稱吳王先鋒使。三月。乙卯。潮復與賊將李懷仙。楊朝宗。謝元同等四萬餘衆。奄至城下。衆懼。莫有固志。巡曰。賊兵精銳。有輕我心。今出其不意擊之。彼必驚潰。賊勢小折。然後城可守也。乃使千人乘城。自帥千人。分數隊。開門突出。巡身先士卒。直衝賊陳。人馬辟易。賊遂退。明日。復進攻城。設百礮環城。樓堞皆盡。巡於城上。立木柵以拒之。賊蟻附而登。巡束蒿灌脂。焚而投之。賊不得上。時伺賊隙。出兵擊之。或夜縋斫營。積六十餘日。大小三百餘戰。帶甲而食。裹瘡復戰。賊遂敗走。巡乘勝追之。獲胡兵二千人而還。軍聲大振。○初。戶部尚書安思順。知祿山反謀。因入朝奏之。及祿山反。上以思順先奏不之罪也。哥舒翰素與之有隙。使人詐爲祿山遺思順書。於關門擒之。以獻。且數思順七罪。請誅之。丙辰。思順及弟太僕卿元貞皆坐死。家屬徙嶺外。楊國忠不能救。由是始畏翰。○郭子儀至朔方。益選精兵。戊午。進軍于代。○戊辰。吳王祗擊謝元同走之。拜陳留太守。河南節度使。○壬午。以河東節度使李光弼爲范陽長史。河北節度使。加顏真卿河北採訪使。真卿以張滄爲支使。先是。清河客李萼。年二十餘。爲郡人乞師於真卿。曰。公首唱大義。河北諸軍。恃公以爲長城。今清河公之西鄰。國家平日。聚江淮河南錢帛於彼。以贍北軍。謂之天下北庫。今有布二百餘萬匹。帛八十餘萬匹。錢三十餘萬緡。糧三十餘萬斛。昔討默啜。甲兵皆貯清河庫。今有五十餘萬事。戶七萬。口十餘萬。竊計財足以三平原之富。兵足以倍平原之彊。公誠資以士卒。撫而有之。以二郡爲腹心。則餘郡如四支。無不隨所使矣。真卿曰。平原兵新集。尙未訓練。自保恐不足。何暇及鄰。雖然。借若諾子之請。則將何爲乎。萼曰。清河遣僕。銜命於公者。非力不足。而借公之師。以嘗寇也。亦欲觀大賢之



明義耳。今仰瞻高意，未有決辭定色，僕何敢遽言所爲哉。真卿奇之，欲與之兵，衆以爲憂，年少輕慮，徒分兵力，必無所成。真卿不得已辭之，募就館，復爲書說真卿，以爲清河去逆効順，奉粟帛器械，以資軍，公乃不納而疑之。僕回轅之後，清河不能孤立，必有所繫託，將爲公西面之彊敵，公能無悔乎。真卿大驚，遽詣其館，以兵六千借之，送至境，執手別。真卿問曰：兵已行矣，可以言子之所爲乎。募曰：聞朝廷遣程千里，將精兵十萬，出崞口討賊，賊據險拒之，不得前。今當引兵先擊魏郡，執祿山所署太守袁知泰，納舊太守司馬垂，使爲西南主人，分兵開崞口，出千里之師，因討汲鄴以北。至于幽陵郡縣之未下者，平原清河帥諸同盟，合兵十萬，南臨孟津，分兵循河，據守要害，制其北走之路。計其官軍東討者不下二十萬，河南義兵西向者亦不減十萬。公但當表朝廷，堅壁勿戰，不過月餘，賊必有內潰相圖之變矣。真卿曰：善。命錄事參軍李擇交，及平原令范冬馥，將其兵，會清河兵四千，及博平兵千人，軍于堂邑。西南，袁知泰遣其將白嗣恭等，將二萬餘人來逆戰。三郡兵力戰盡日，魏兵大敗，斬首萬餘級，捕虜千餘人，得馬千匹，軍資甚衆。知泰奔汲郡，遂克魏郡。軍聲大振，時北海太守賀蘭進明亦起兵，真卿以書召之，并力。進明將步騎五千度河，真卿陳兵逆之，相揖哭於馬上，哀動真卿，以堂邑之功讓進明。進明奏其狀，取捨任意，勅加進明河北招討使，擇交冬馥微進資級。清河博平有功者，皆不錄。進明攻信都城，久之不克，錄事參軍長安第五琦勸進明厚以金帛募勇士，遂克之。○李光弼與史思明相守四十餘日，思明絕常山糧道，城中乏草，馬食薦藉，光弼以車五百乘之，石邑取草，將車者皆衣甲，弩手千人衛之，爲方陳而行，賊不能奪。蔡希德引兵攻石邑，張奉璋拒却之。光弼遣使告急於郭子儀，子儀引兵自井陘出。夏四月，壬辰，至常山，與光弼合，蕃漢步騎共十餘萬。甲午，子儀光弼與史思明等戰於九門城南，思

明大敗。中郎將渾瑊射李立節殺之，瑊釋之，之子也。思明收餘衆奔趙郡，蔡希德奔鉅鹿，思明自趙郡如博陵，時博陵已降官軍，思明盡殺郡官，河朔之民苦賊殘暴，所至屯結，多至二萬人，少者萬人，各爲營以拒賊。及郭李軍至，爭出自效。庚子，攻趙郡，一日城降，士卒多虜掠。光弼坐城門，收所獲悉歸之，民大悅。子儀生擒四千人，皆捨之，斬祿山太守郭獻璆，光弼進圍博陵，十日不拔，引兵還恒陽就食。○楊國忠問士之可爲將者於左拾遺博平張鎬，及蕭昕，鎬昕薦左贊善大夫永壽來瑱。丙午，以瑱爲潁川太守，賊屢攻之，瑱前後破賊甚衆，加本郡防禦使。人謂之來嚼鐵。○安祿山使平盧節度使呂知誨誘安東副大都護馬靈督殺之。平盧遊奕使武陟劉客奴先鋒使董秦，及安東將王玄志同謀，討誅知誨，遣使諭海，與顏真卿相聞，請取范陽以自效。真卿遣判官賈載齎糧及戰士衣助之。真卿時惟一子頰，纔十餘歲，使詣客奴爲質，朝廷聞之，以客奴爲平盧節度使，賜名正臣。玄志爲安東副大都護，董秦爲平盧兵馬使。○南陽節度使魯炅立柵於澠水之南，安祿山將武令珣畢思琛攻之。

資治通鑑卷第二百一十七



# 資治通鑑卷第二百一十八

## 唐紀三十四

### 肅宗文明武德大聖大宣孝皇帝上之下

至德元載五月丁巳。吳衆潰。走保南陽。賊就圍之。太常卿張垆。薦夷陵太守虢王巨。有勇略。上徵吳王祗爲太僕卿。以巨爲陳留譙郡太守。河南節度使兼統嶺南節度使何履光。黔中節度使趙國珍。南陽節度使魯吳。國珍本牂柯夷也。戊辰。巨引兵自藍田出。趣南陽。賊聞之。解圍走。○令狐潮復引兵攻雍丘。潮與張巡有舊。於城下相勞苦如平生。潮因說巡曰。天下事去矣。足下堅守危城。欲誰爲乎。巡曰。足下平生以忠義自許。今日之舉。忠義何在。潮慙而退。○郭子儀。李光弼。還常山。史思明收散卒數萬。踵其後。子儀選驍騎更挑戰。三日。至行唐。賊疲乃退。子儀乘之。又敗之於沙河。蔡希德至洛陽。安祿山復使將步騎二萬人。北就思明。又使牛廷玠發范陽等郡兵萬餘人。助思明。合五萬餘人。而同羅曳洛河。居五分之一。子儀至恒陽。思明隨至。子儀深溝高壘。以待之。賊來則守。去則追之。晝則耀兵。夜斫其營。賊不得休息。數日。子儀光弼議曰。賊倦矣。可以出戰。壬午。戰于嘉山。大破之。軌首四萬級。捕虜千餘人。思明墜馬。露髻跣足。步走至暮。杖折槍還營。奔于博陵。光弼就圍之。軍聲大振。於是河北十餘郡。皆殺賊守將而降。漁陽路再絕。賊往來者。皆輕騎竊過。多爲官軍所獲。將士家在漁陽者。無不搖心。祿山大懼。召高尚。嚴莊。誦之曰。汝數年教我反。以爲萬全。今守潼關數月。不能進。北路已絕。諸軍四合。吾所有者。止汴鄭數州而已。萬全何在。汝自今勿來見我。尙莊懼。

數日不敢見。田乾真自關下來。爲尙莊說祿山曰。自古帝王經營大業。皆有勝敗。豈能一舉而成。今四方軍壘雖多。皆新募烏合之衆。未更行陳。豈能敵我薊北勁銳之兵。何足深憂。尙莊皆佐命元勳。陛下一旦絕之。使諸將聞之。誰不內懼。若上下離心。臣竊爲陛下危之。祿山喜曰。阿浩。汝能豁我心事。即召尙莊。置酒酣宴。自爲之歌。以侑酒待之。如初。阿浩。乾真小字也。祿山議棄洛陽。走歸范陽。計未決。是時。天下以楊國忠驕縱召亂。莫不切齒。又祿山起兵。以誅國忠爲名。王思禮密說哥舒翰。使抗表請誅國忠。翰不應。思禮又請以三十騎。劫取以來。至潼關。殺之。翰曰。如此。乃翰反。非祿山也。或說國忠。今朝廷重兵。盡在翰手。翰若援旗西指。於公豈不危哉。國忠大懼。乃奏。潼關大軍雖盛。而後無繼。萬一失利。京師可憂。請選監牧小兒三千。於苑中訓練。上許之。使劔南軍將李福德等領之。又募萬人。屯灊上。令所親杜乾運。將之。名爲禦賊實備。翰聞之。亦恐爲國忠所圖。乃表。請灊上軍隸潼關。六月。癸未。召杜乾運詣關。因事斬之。國忠益懼。會有告崔乾祐在陝。兵不滿四千。皆羸弱無備。上遣使趣哥舒翰進兵。復陝洛。翰奏曰。祿山久習用兵。今始爲逆。豈肯無備。是必羸師以誘我。若往。正隨其計中。且賊遠來。利在速戰。官軍據險以扼之。利在堅守。況賊殘虐失衆。兵勢日蹙。將有內變。因而乘之。可不戰擒也。要在成功。何必務速。今諸道徵兵。尙多未集。請且待之。郭子儀。李光弼。亦上言。請引兵北取范陽。覆其巢穴。質賊黨妻子。以招之。城必內潰。潼關大軍。唯應固守以弊之。不可輕出。國忠疑翰謀已。言於上。以賊方無備。而翰逗留。將失機會。上以爲然。續遣中使趣之。項背相望。翰不得已。撫膺慟哭。丙戌。引兵出關。己丑。遇崔乾祐之軍於靈寶西原。乾祐據險以待之。南薄山。北阻河。隘道七十里。庚寅。官軍與乾祐會戰。乾祐伏兵於險。翰與田良丘。浮舟中流。以觀軍勢。見乾祐兵少。趣諸軍使進。王思禮等將精兵五萬。居前。龐忠等將餘兵十萬。繼之。翰以兵三萬。登河北阜。望之。鳴鼓以助其勢。乾祐所出兵。不過萬人。



什什伍伍。散如列星。或疎或密。或前或却。官軍望而笑之。乾祐嚴精兵。陳於其後。兵既交。賊偃旗。如欲遁者。官軍懈不爲備。須臾伏兵發。賊乘高下。木石擊殺士卒甚衆。道隘。士卒如束。槍槊不得用。翰以氈車駕馬爲前驅。欲以衝賊。日過中。東風暴急。乾祐以草車數十乘。塞氈車之前。縱火焚之。煙焰所被。官軍不能開目。妄自相殺。謂賊在煙中。聚弓弩而射之。日暮。矢盡。乃知無賊。乾祐遣同羅精騎自南山過。出官軍之後。擊之。官軍首尾駭亂。不知所備。於是大敗。或棄甲。竄匿山谷。或相擠排。入河溺死。羸聲振天地。賊乘勝蹙之。後軍見前軍敗。皆自潰。河北軍望之。亦潰。翰獨與麾下數百騎。走自首陽山。西度河。入關。關外先爲三塹。皆廣二丈深丈。人馬墜其中。須臾而滿。餘衆踐之以度。士卒得入。關者纔八千餘人。辛卯。乾祐進攻潼關。克之。翰至關西驛。揭榜收散卒。欲復守潼關。蕃將火拔歸仁等。以百餘騎圍驛。入謂翰曰。賊至矣。請公上馬。翰上馬出驛。歸仁帥衆叩頭曰。公以二十萬衆。一戰棄之。何面目復見天子。且公不見高仙芝。封常清乎。請公東行。翰不可。欲下馬。歸仁以毛縶其足於馬腹。及諸將不從者。皆執之以東。會賊將田乾真已至。遂降之。俱送洛陽。安祿山問翰曰。汝常輕我。今定何如。翰伏地對曰。臣肉眼不識聖人。今天下未平。李光弼在常山。李祇在東平。魯吳在南陽。陛下留臣。使以尺書招之。不日皆下矣。祿山大喜。以翰爲司空。同平章事。謂火拔歸仁曰。汝叛主。不忠不義。執而斬之。翰以書招諸將。皆復書責之。祿山知不效。乃囚諸苑中。潼關既敗。於是河東華陰馮翊上洛防禦使。皆棄郡走。所在守兵皆散。是日。翰麾下來告急。上不時召見。但遣李福德等。將監牧兵。赴潼關。及暮。平安火不至。上始懼。壬辰。召宰相謀之。楊國忠自以身領劍南。聞安祿山反。卽令副使崔圓。陰具儲待。以備有急投之。至是。首唱幸蜀之策。上然之。癸巳。國忠集百官於朝堂。惶懼流涕。問以策略。皆唯唯不對。國忠曰。人告祿山反狀。已十年。上不之信。今日之事。非宰相之過。仗下。士民驚擾奔走。不知所之。市里蕭條。國忠使

韓號入宮。勸上人蜀。甲午。百官朝者。什無一二。上御勤政樓。下制云。欲親征。聞者皆莫之信。以京兆尹魏方進爲御史大夫。兼置頓使。京兆少尹靈昌崔光遠爲京兆尹。充西京留守。將軍邊令誠掌宮闈管鑰。託以劍南節度大使。穎王璣將赴鎮。令本道設儲待。是日。上移仗北內。既夕。命龍武大將軍陳玄禮。整比六軍。厚賜錢帛。選閑廐馬九百匹。外人皆莫之知。乙未。黎明。上獨與貴妃姊妹。皇子。妃主。皇孫。楊國忠。韋見素。魏方進。陳玄禮。及親近宦官宮人。出延秋門。妃主皇孫之在外者。皆委之而去。上過左藏。楊國忠請焚之。曰。無爲賊守。上愀然曰。賊來不得。必更斂於百姓。不如與之。無重困吾赤子。是日。百官猶有入朝者。至宮門。猶聞漏聲。三衛立仗儼然。門既啓。則宮人亂出。中外擾攘。不知上所之。於是王公士民四出。逃竄山谷。細民爭入宮禁。及王公第舍。盜取金寶。或乘驢上殿。又焚左藏大盈庫。崔光遠。邊令誠。帥入救火。又募人攝府縣官。分守之。殺十餘人。乃稍定。光遠遣其子。東見祿山。令誠亦以管鑰獻之。上過便橋。楊國忠使人焚橋。上曰。士庶各避賊求生。奈何絕其路。留內侍監高力士。使撲滅。乃來。上遣宦者王洛卿。前行告諭。郡縣置頓。食時。至咸陽望賢宮。洛卿與縣令俱逃。中使徵召吏民。莫有應者。日向中。上猶未食。楊國忠自市胡餅以獻。於是民爭獻糲飯。雜以麥豆。皇孫輩爭以手舂食之。須臾而盡。猶未能飽。上皆酬其直。慰勞之。衆皆哭。上亦掩泣。有老父郭從謹。進言曰。祿山包藏禍心。固非一日。亦有詣闕告其謀者。陛下往往誅之。使得逞其姦逆。致陛下播越。是以先王務延訪忠良。以廣聰明。蓋爲此也。臣猶記宋璟爲相。數進直言。天下賴以安平。自頃以來。在廷之臣。以言爲諱。惟阿諛取容。是以闕門之外。陛下皆不得而知。草野之臣。必知有今日久矣。但九重嚴邃。區區之心。無路上達。事不至此。臣何由得睹陛下之面。而訴之乎。上曰。此朕之不明。悔無所及。慰諭而遣之。俄而尙食舉御膳而至。上命先賜從官。然後食之。令軍士散詣村落求食。期未時。皆集而行。夜將半。乃至金城。縣令亦逃。縣



民皆脫身走。飲食器皿具在。士卒得以自給。時從者多逃。內侍監袁思藝亦亡去。驛中無燈。人相枕藉而寢。貴賤無以復辨。王思禮自潼關至。始知哥舒翰被擒。以思禮爲河西隴右節度使。卽令赴鎮。收合散卒。以俟東討。丙申。至馬嵬驛。將士饑疲。皆憤。怒陳玄禮以禍由楊國忠。欲誅之。因東宮宦者李輔國。以告太子。太子未決。會吐蕃使者二十餘人。遮國忠馬。訴以無食。國忠未及對。軍士呼曰。國忠與胡虜謀反。或射之。中鞍。國忠走至西門內。軍士追殺之。屠割支體。以槍揭其首於驛門外。并殺其子戶部侍郎暄。及韓國秦國夫人。御史大夫魏方進曰。汝曹何敢害宰相。衆又殺之。韋見素聞亂而出。爲亂兵所擣。腦血流地。衆曰。勿傷韋相公。救之得免。軍士圍驛。上聞諠譁。問外何事。左右以國忠反對。上杖屨出驛門。慰勞軍士。令收隊。軍士不應。上使高力士問之。玄禮對曰。國忠謀反。貴妃不宜供奉。願陛下割恩正法。上曰。朕當自處之。入門倚杖。傾首而立。久之。京兆司錄韋諤前言曰。今衆怒難犯。安危在晷刻。願陛下速決。因叩頭流血。上曰。貴妃常居深宮。安知國忠反謀。高力士曰。貴妃誠無罪。然將士已殺國忠。而貴妃在陛下左右。豈敢自安。願陛下審思之。將士安。則陛下安矣。上乃命力士引貴妃於佛堂。縊殺之。輿尸寘驛庭。召玄禮等入視之。玄禮等乃免胄釋甲。頓首請罪。上慰勞之。令曉諭軍士。玄禮等皆呼萬歲。再拜而出。於是始整部伍。爲行計。諤見素之子也。國忠妻裴柔。與其幼子晞。及虢國夫人。夫人子裴徽。皆走至陳倉。縣令薛景仙。帥吏士追捕誅之。丁酉。上將發馬嵬。朝臣惟韋見素一人。乃以韋諤爲御史中丞。充置頓使。將士皆曰。國忠謀反。其將吏皆在蜀。不可往。或請之河隴。或請之靈武。或請之太原。或請還京師。上意在入蜀。慮違衆心。竟不言所向。韋諤曰。還京。當有禦賊之備。今兵少。未易東向。不如且至扶風。徐圖去就。上詢于衆。衆以爲然。乃從之。及行。父老皆遮道請留。曰。宮闕陛下家居。陵寢陛下墳墓。今捨此欲何之。上爲之按轡。久之。乃令太子於後宣慰父老。父老因曰。至尊既不肯留某。

等。願帥子弟。從殿下。東破賊。取長安。若殿下與至尊。皆入蜀。使中原百姓。誰爲之主。須臾。衆至數千人。太子不可曰。至尊遠冒險阻。吾豈忍朝夕離左右。且吾尙未面辭。當還白至尊。更稟進止。涕泣跋馬欲西。建寧王倓。與李輔國。執鞚諫曰。逆胡犯關。四海分崩。不因人情。何以興復。今殿下從至尊入蜀。若賊兵燒絕棧道。則中原之地。拱手授賊矣。人情既離。不可復合。雖欲復至此。其可得乎。不如收西北守邊之兵。召郭李於河北。與之併力。東討逆賊。克復兩京。削平四海。使社稷危而復安。宗廟毀而更存。掃除宮禁。以迎至尊。豈非孝之大者乎。何必區區溫清爲兒女之戀乎。廣平王俶亦勸太子留。父老共擁太子馬。不得行。太子乃使俶馳白上。上總轡待太子。久不至。使人偵之。還白狀。上曰。天也。乃分後軍二千人。及飛龍廐馬。從太子。且諭將士曰。太子仁孝。可奉宗廟。汝曹善輔佐之。又諭太子曰。汝勉之。勿以吾爲念。西北諸胡。吾撫之素厚。汝必得其用。太子南向號泣而已。又使送東宮內人於太子。且宣旨欲傳位太子。不受。俶。皆太子之子也。○己亥。上至岐山。或言賊前鋒且至。上遽過宿扶風郡。士卒潛懷去就。往往流言不遜。陳玄禮不能制。上患之。會成都貢春綵十餘萬匹。至扶風。上命悉陳之於庭。召將士入。臨軒諭之曰。朕比來衰耄。託任失人。致逆胡亂常。須遠避其鋒。知卿等皆蒼猝從朕。不得別父母妻子。芟涉至此。勞苦至矣。朕甚愧之。蜀路阻長。郡縣褊小。人馬衆多。或不能供。今聽卿等各還家。朕獨與子孫中官。前行入蜀。亦足自達。今日與卿等訣別。可共分此綵。以備資糧。若歸見父母。及長安父老。爲朕致意。各好自愛也。因泣下霑襟。衆皆哭曰。臣等死生從陛下。不敢有二。上良久曰。去留聽卿。自是流言始息。○太子既留。莫知所適。廣平王俶曰。日漸晏。此不可駐。衆欲何之。皆莫對。建寧王倓曰。殿下昔嘗爲朔方節度大使。將吏歲時致啓。俶略識其姓名。今河西隴右之衆。皆敗降賊。父兄弟。多在賊中。或生異圖。朔方道近。士馬全盛。裴冕衣冠名族。必無貳心。賊入長安。方虜掠。未暇徇地。乘此速往。



就之。徐圖大舉。此上策也。衆皆曰善。至渭濱。遇潼關敗卒。誤與之戰。死傷甚衆。已乃收餘卒。擇渭水淺處。乘馬涉度。無馬者涕泣而返。太子自奉天北上。比至新平。通夜馳三百里。士卒器械。死亡過半。所存之衆。不過數百。新平太守薛羽棄郡走。太子斬之。是日至安定。太守徐穀亦走。又斬之。○庚子。以劔南節度留後崔圓爲劔南節度等副大使。○辛丑。上發扶風。宿陳倉。○天下至烏氏。彭原太守李遵出迎。獻衣及糗糧。至彭原。募士得數百人。是日至平涼。閱監牧馬。得數萬匹。又募士得五百餘人。軍勢稍振。○壬寅。上至散關。分扈從將士爲六軍。使穎王璵先行。詣劔南。壽王瑁等分將六軍。以次之。丙午。上至河池郡。崔圓奉表迎。車駕具陳。蜀土豐稔。甲兵全盛。上大悅。即日。以圓爲中書侍郎。同平章事。蜀郡長史如故。以隴西公瑀爲漢中王。梁州都督。山南西道。採訪防禦使。瑀。璵之弟也。○王思禮至平涼。聞河西諸胡亂。還詣行在。初。河西諸胡部落。聞其都護皆從哥舒翰。沒於潼關。故爭自立。相攻擊。而都護實從翰。在北岸不死。又不與火拔歸仁俱降賊。上乃以河西兵馬使周泌爲河西節度使。隴右兵馬使彭元耀爲隴右節度使。與都護思結進明等俱之。鎮。招其部落。以思禮爲行在都知兵馬使。○戊申。扶風民康景龍等。自相帥。擊賊所署宣慰使薛總。斬首二百餘級。庚戌。陳倉令薛景仙殺賊守將。克扶風而守之。○安祿山不意上遽西幸。遣使止崔乾祐兵。留潼關。凡十日。乃遣孫孝哲將兵入長安。以張通儒爲西京留守。崔光遠爲京兆尹。使安思順將兵屯范中。以鎮關中。孝哲爲祿山所寵任。尤用事。常與嚴莊爭權。祿山使監關中諸將。通儒等皆受制於孝哲。孝哲豪侈。果於殺戮。賊黨畏之。祿山命搜捕百官宦者宮女等。每獲數百人。輒以兵衛送洛陽。王侯將相。扈從車駕。留長安者。誅及嬰孩。陳希烈以晚節失恩。怨上。與張均張垆等。皆降於賊。祿山以希烈垆爲相。自餘朝士皆授以官。於是賊勢大熾。西脅汧隴。南侵江漢。北割河東之半。然賊將皆蠢蠢。無遠略。既克長安。以爲得志。日夜縱酒。專以聲色

寶賄爲事。無復西出之意。故上得安行入蜀。太子北行。亦無追迫之患。○李光弼圍博陵。未下。聞潼關不守。解圍而南。史思明踵其後。光弼擊却之。與郭子儀皆引兵入井陘。留常山太守王輔將景城河間團練兵守常山。平盧節度使劉正臣將襄陽。未至。史思明引兵逆擊之。正臣大敗。棄妻子走。士卒死者七千餘人。初。顏真卿聞河北節度使李充弼出井陘。即斂軍還平原。以待光弼之命。聞郭李西入井陘。真卿始復區處河北軍事。○太子至平涼數日。朔方留後杜鴻漸。六城水陸運使魏少遊。節度判官崔漪。支度判官盧簡金。鹽池判官李涵。相與謀曰。平涼散地。非屯兵之所。靈武兵食完富。若迎太子至此。北收諸城兵。西發河隴勁騎。南向以定中原。此萬世一時也。乃使涵奉牋於太子。且籍朔方士馬甲兵穀帛軍須之數。以獻之。涵至平涼。太子大悅。會河西司馬裴冕入爲御史中丞。至平涼。見太子。亦勸太子之。朔方太子從之。鴻漸暹之族子。涵道之曾孫也。鴻漸漪使少遊居後。葺次舍。庀資儲。自迎太子於平涼北境。說太子曰。朔方天下勁兵處也。今吐蕃請和。回紇內附。四方郡縣。大抵堅守。拒賊。以俟興復。殿下今理兵靈武。按轡長驅。移檄四方。收攬忠義。則逆賊不足屠也。少遊盛治宮室帷帳。皆倣禁中。飲膳備水陸。秋七月辛酉。太子至靈武。悉命撤之。○甲子。上至普安。憲部侍郎房琯來謁。見上。發長安也。羣臣多不知。至咸陽。謂高力士曰。朝臣誰當來。誰不來。對曰。張均張垆父子。受陛下恩最深。且連戚里。是必先來。時論皆謂房琯宜爲相。而陛下不用。又祿山嘗薦之。恐或不來。上曰。事未可知。及琯至。上問均兄弟。對曰。臣帥與偕來。逗遛不進。觀其意。似有所蓄。而不能言也。上顧力士曰。朕固知之矣。即日。以琯爲文部侍郎。同平章事。初。張垆尙寧親公主。聽於禁中。置宅。寵渥無比。陳希烈求解政務。上幸垆宅。問可爲相者。垆未對。上曰。無若愛壻。垆降階拜舞。既而不用。故垆懷怏怏。上亦覺之。是時。均垆兄弟。及姚崇之子尙書右丞奕。蕭嵩之子兵部侍郎華。韋安石之子禮部侍郎陟。太常少卿斌。皆以



才望至大官。上嘗曰：吾命相當，偏舉故相子弟耳。既而皆不用。○裴冕、杜鴻漸等上太子牋，請遵馬嵬之命，即皇帝位。太子不許。冕等言曰：將士皆關中人，日夜思歸，所以崎嶇從殿下。遠涉沙漠者，冀尺寸之功。若一朝離散，不可復集。願殿下勉狗衆心，爲社稷計。牋五上。太子乃許之。是日，肅宗卽位於靈武城南樓。羣臣舞蹈。上流涕歔歔，尊玄宗爲上皇帝，赦天下。改元以杜鴻漸、崔漪、竝知中書舍人事。裴冕爲中書侍郎。同平章事。改關內採訪使爲節度使。徙治安化。以前蒲關防禦使呂崇賁爲之。以陳倉令薛景仙爲扶風太守。兼防禦使。隴右節度使郭英乂爲天水太守。兼防禦使。時塞上精兵皆選入討賊，惟餘老弱守邊。文武官不滿三十人。披草萊，立朝廷。制度艸創。武人驕慢。大將管宗嗣在朝堂背關而坐，言笑自若。監察御史李勉奏彈之。繫於有司。上特原之。歎曰：吾有李勉，朝廷始尊。勉元懿之曾孫也。旬日間，歸附者漸衆。○張良娣姓巧慧，能得上意。從上來朔方。時從兵單寡，良娣每寢，常居上前。上曰：禦寇非婦人所能。良娣曰：蒼猝之際，妾以身當之。殿下可從後逸去。至靈武，產子三日，起縫戰士衣。上止之。對曰：此非妾自養之時。上以是益憐之。○丁卯，上皇制以太子亨充天下兵馬元帥，領朔方、河東、河北、平盧節度使。南取長安、洛陽，以御史中丞裴冕兼左庶子。隴西郡司馬劉秩試守右庶子。永王璘充山南東道、嶺南、黔中、江南西道節度使。以少府監竇紹爲之傅。長沙太守李峴爲都副大使。盛王琦充廣陵、大都督。領江南東路及淮南、河南等路節度使。以前江陵都督府長史劉彙爲之傅。廣陵郡長史李成式爲都副大使。豐王珙充武威都督。仍領河西、隴右、安西北庭等路節度使。以隴西太守濟陰鄧景山爲之傅。充都副大使。應須士馬甲仗糧賜等，竝於當路自供。其諸路本節度使魏王巨等，竝依前充使。其署置官屬及本路郡縣官，竝任自簡擇。署訖聞奏。時琦、珙皆不出閤，惟璘赴鎮。置山南東道節度使，領襄陽等九郡。升五府經略使爲嶺南節度使，領南海等二十二郡。升五溪經

略使，爲黔中節度使，領黔中等諸郡。分江南爲東西二道。東道領餘杭、西道領豫章等諸郡。先是四方聞潼關失守，莫知上所之。及是制下，始知乘輿所在。彙、秩之弟也。○安祿山使孫孝哲殺霍國長公主及王妃，馱馬等於崇仁坊，刳其心，以祭安慶宗。凡楊國忠、高力士之黨及祿山素所惡者，皆殺之。凡八十三人。或以鐵梃揭其腦蓋，流血滿街。己巳，又殺皇孫及郡縣主二十餘人。○庚午，上皇至巴西。太守崔渙迎謁。上皇與語悅之。房瑄復薦之。卽日拜門下侍郎。同平章事。以韋見素爲左相。渙，玄暉之孫也。○初，京兆李泌幼以才敏著聞。玄宗使與忠王遊。忠王爲太子。泌已長。上書言事。玄宗欲官之。不可。使與太子爲布衣交。太子常謂之先生。楊國忠惡之。奏徙斬春。後得歸。隱居潁陽。上自馬嵬北行。遣使召之。謁見於靈武。上大喜。出則聯轡。寢則對榻。如爲太子時。事無大小皆咨之。言無不從。至於進退將相，亦與之議。上欲以泌爲右相。泌固辭曰：陛下待以賓友，則貴於宰相矣。何必屈其志。上乃止。○同羅突厥從安祿山反者，屯長安苑中。甲戌，其酋長阿史那從禮帥五千騎竊廐馬二千匹，逃歸朔方。謀邀結諸胡盜據邊地。上遣使宣慰之。降者甚衆。○賊遣兵寇扶風。薛景仙擊却之。○安祿山遣其將高嵩以敕書繒綵誘河隴將士。大震關使郭英乂擒斬之。○同羅突厥之逃歸也。長安大擾。官吏竄匿。獄囚自出。京兆尹崔光遠以爲賊且遁矣。遣吏卒守孫孝哲宅。孝哲以狀白祿山。光遠乃與長安令蘇震帥府縣官十餘人來奔。己卯，至靈武。上以光遠爲御史大夫。兼京兆尹。使之渭北招集吏民。以震爲中丞。震，環之孫也。祿山以田乾真爲京兆尹。侍御史呂諲右拾遺楊綰奉天令安平崔器相繼詣靈武。以諲器爲御史中丞。綰爲起居舍人。知制誥。上命河西節度副使李嗣業將兵五千赴行在。嗣業與節度使梁宰謀。且緩師以觀變。綰德府折衝段秀實讓嗣業曰：豈有君父告急而臣子晏然不赴者乎。特進常自謂大丈夫。今日視之，乃兒女子耳。嗣業大慙。卽白宰。如數發兵。以秀實自副。將之詣行在。上又徵兵



於安西行軍司馬李栖筠發精兵七千人勵以忠義而遣之。○敕改扶風爲鳳翔郡。○庚辰上皇至成都從官及六軍至者千三百人而已。○令狐潮圍張巡於雍丘相守四十餘日朝廷聲問不通潮聞玄宗已幸蜀復以書招巡有大將六人官皆開府特進自巡以兵勢不敵且上存亡不可知不如降賊巡陽許諾明日堂上設天子畫像帥將士朝之人人皆泣巡引六將於前責以大義斬之士心益勸城中矢盡巡縛藁爲人千餘被以黑衣夜縋城下潮兵爭射之久乃知其藁人得矢數十萬其後復夜縋人賊笑不設備乃以死士五百斫潮營潮軍大亂焚壘而遁追奔十餘里潮慙益兵圍之巡使郎將雷萬春於城上與潮相聞賊弩射之面中六矢而不動潮疑其木人使牒問之乃大驚遙謂巡曰向見雷將軍方知足下軍令矣然其如天道何巡謂之曰君未識人倫焉知天道未幾出戰擒賊將十四人斬首百餘級賊乃夜遁收兵入陳留不敢復出頃之賊步騎七千餘衆屯白沙渦巡夜襲擊大破之還至桃陵遇賊救兵四百餘人悉擒之分別其衆媯檀及胡兵悉斬之滎陽陳留脅從兵皆散令歸業旬日間民去賊來歸者萬餘戶。○河北諸郡猶爲唐守常山太守王備欲降賊諸將怒因擊毬縱馬踐殺之時信都太守烏承恩麾下朔方兵三千人諸將遣使者宗仙運帥父老詣信都迎承恩鎮常山承恩辭以無詔命仙運說承恩曰常山地控燕薊路通河洛有井陘之險足以扼其咽喉頃屬車駕南遷李大夫收軍退守晉陽王太守權統後軍欲舉城降賊衆心不從身首異處大將軍兵精氣肅遠近莫敵若以國家爲念移據常山與大夫首尾相應則洪勳盛烈孰與爲比若疑而不行又不設備常山旣陷信都豈能獨全承恩不從仙運又曰將軍不納鄙夫之言必懼兵少故也今人不聊生咸思報國競相結聚屯據鄉村若懸賞招之不旬日十萬可致與朔方甲士三千餘人相參用之足成王事若捨要害以授人居四通而自安譬如倒持劍戟取敗之道也承恩竟疑不決承恩承瓚之族兄也是月史思明

明蔡希德將兵萬人南攻九門旬日九門僞降伏甲於城上思明登城伏兵攻之思明墜城鹿角傷其左脅夜奔博陵。○顏真卿以蠟丸達表於靈武以真卿爲工部尚書兼御史大夫依前河北招討采訪處置使并致赦書亦以蠟丸達之真卿願下河北諸郡又遣人願於河南江淮由是諸道始知上卽位於靈武徇國之心益堅矣。○郭子儀等將兵五萬自河北至靈武靈武軍威始盛人有興復之望矣。八月壬午朔以子儀爲武部尚書靈武長史以李光弼爲戶部尚書北都留守竝同平章事餘如故光弼以景城河間兵五千赴太原先是河東節度使王承業軍政不脩朝廷遣侍御史崔衆交其兵尋遣中使誅之衆侮易承業光弼素不平至是敕交兵於光弼衆見光弼不爲禮又不時交兵光弼怒收斬之軍中股票。○回紇可汗吐蕃贊普相繼遣使請助國討賊宴賜而遣之。○癸未上皇下制赦天下。○北海太守賀蘭進明遣錄事參軍第五琦入蜀奏事琦言於上皇以爲今方用兵財賦爲急財賦所產江淮居多乞假臣一職可使軍無乏用上皇悅卽以琦爲監察御史江淮租庸使。○史思明再攻九門辛卯克之所殺數千人引兵東圍藁城。○李庭望將蕃漢二萬餘人東襲寧陵襄邑夜去雍丘城三十里置營張巡帥短兵三千掩擊大破之殺獲大半庭望收軍夜遁。○癸巳靈武使者至蜀上皇喜曰吾兒應天順人吾復何憂丁酉制自今改制敕爲詔表疏稱太上皇四海軍國事皆先取皇帝進止仍奏朕知俟克復上京朕不復預事己亥上皇臨軒命韋見素房瑄崔渙奉傳國寶玉冊詣靈武傳位。○辛丑史思明陷藁城。○初上皇每酺宴先設太常雅樂坐部立部繼以鼓吹胡樂教坊府縣散樂雜戲。○又以山車陸船載樂往來又出宮人舞霓裳羽衣又教舞馬百匹銜盃上壽又引犀象入場或拜或舞安祿山見而悅之既克長安命搜捕樂工運載樂器舞衣驅舞馬犀象皆詣洛陽。○臣光曰聖人以道德爲麗仁義爲樂故雖茅茨土階惡衣菲食不恥其陋惟恐奉養之過



以勞民費財。明皇恃其承平，不思後患，彈耳目之玩，窮聲技之巧，自謂帝王富貴，皆不我如。欲使前莫能及，後無以踰，非徒娛己，亦以誇人。豈知大盜在旁，已有窺竅之心。卒致鑿輿播越，生民塗炭。乃知人君崇華靡，以示人，適足爲大盜之招也。

祿山宴其羣臣於凝碧池，盛奏衆樂。梨園弟子，往往歔歔泣下。賊皆露刃睨之。樂工雷海清，不勝悲憤，擲樂器於地，西向慟哭。祿山怒，縛於試馬殿前，支解之。祿山聞嚮日百姓乘亂，多盜庫物，既得長安，命大索三日，并其私財盡掠之。又令府縣推按，銖兩之物無不窮治。連引搜捕，支蔓無窮。民間騷然，益思唐室。自上離馬嵬北行，民間相傳，太子北收兵，來取長安。長安民日夜望之。或時相驚曰：「太子大軍至矣。」則皆走。市里爲空。賊望見北方塵起，輒驚欲走。京畿豪傑，往往殺賊官吏，遙應官軍，誅而復起，相繼不絕。賊不能制，其始自京畿鄜坊，至于岐隴，皆附之。至是，西門之外，率爲敵壘。賊兵力所及者，南不出武關，北不過雲陽，西不過武功。江淮奏請貢獻之蜀之靈武者，皆自襄陽取上津路，抵扶風，道路無壅，皆薛景仙之功也。

○九月壬子，史思明圍趙郡。丙辰，拔之。又圍常山。旬日城陷，殺數千人。○建寧王倓性英果，有才略，從上自馬嵬北行，兵衆寡弱，屢逢寇盜，倓自選驍勇，居上前後，血戰以衛上。上或過時未食，倓悲泣不自勝。軍中皆屬目向之。上欲以倓爲天下兵馬元帥，使統諸將東征。李泌曰：「建寧誠元帥才，然廣平兄也。若建寧功成，豈可使廣平爲吳太伯乎？」上曰：「廣平豈嗣也，何必以元帥爲重？」泌曰：「廣平未正位東宮，今天下艱難，衆心所屬，在於元帥。若建寧大功既成，陛下雖欲不以爲儲副，同立功者，其肯已乎？」太宗上皇，卽其事也。上乃以廣平王倓爲天下兵馬元帥，諸將皆以屬焉。倓聞之，謝泌曰：「此固倓之心也。上與泌出行軍，軍士指之，竊言曰：『衣黃者聖人也，衣白者山人也。』上聞之，以告泌曰：『艱難之際，不敢相屈以官，且衣紫袍，以絕羣疑。』泌不得已受之，服之入謝。上笑曰：『既服此，豈可無名稱？』出懷中敕，以泌爲侍謀軍國元

帥府行軍長史。泌固辭。上曰：「朕非敢相臣，以濟艱難耳。俟賊平，任行高志，泌乃受之。」置元帥府於禁中，俛入則泌在府，泌入俛亦如之。泌又言於上曰：「諸將畏天威，在陛下前，敷陳軍事，或不能盡所懷，萬一小差，爲害甚大。乞先令與臣及廣平熟議，臣與廣平從容奏聞，可者行之，不可者已之。」上許之。時軍旅務繁，四方奏報，自昏至曉，無虛刻。上悉使送府，泌先開視，有急切者，及烽火重封，隔門通進，餘則待明。禁門鑰契，悉委俛與泌掌之。○阿史那從禮，說誘九姓，府六胡州諸胡數萬衆，聚於經略軍北，將寇朔方。上命郭子儀詣天德軍，發兵討之。左武鋒使僕固懷恩之子玢，別將兵與虜戰，兵敗降之。既而復逃歸，懷恩叱而斬之。將士股栗，無不一當百。遂破同羅。上雖用朔方之衆，欲借兵於外夷，以張軍勢。以幽王守禮之子承家爲敦煌王，與僕固懷恩使于回紇，以請兵。又發拔汗那兵，且使轉諭城郭諸國，許以厚賞。使從安西兵入援。李泌勸上且幸彭原，俟西北兵將至，進幸扶風，以應之。於時庸調亦集，可以贍軍。上從之。戊辰，發靈武。○丙子，上至順化。韋見素等至自成都，奉上寶冊。上不肯受，曰：「比以中原未靖，權總百官，豈敢乘危，遽爲傳襲？羣臣固請，上不許。寶冊於別殿，朝夕事之。如定省之禮。上以韋見素本附楊國忠，意薄之。素聞房瑄名，虛心待之。瑄見上，言時事，辭情慷慨。上爲之改容。由是軍國事多謀於瑄。瑄亦以天下爲己任，知無不爲。諸相拱手避之。○上皇賜張良娣七寶鞍。李泌言於上曰：「今四海分崩，當以儉約示人。良娣不宜乘此。請撤其珠玉，付庫吏。以俟有戰功者賞之。」良娣自閤中言曰：「鄉里之舊，何至於此？」上曰：「先生爲社稷計也。」遂命撤之。建寧王倓泣於廊下，聲聞於上。上驚召問之，對曰：「臣比憂禍亂未已。今陛下從諫如流，不日當見陛下迎上皇還長安，是以喜極而悲耳。」良娣由是惡李泌及倓。上嘗從容與泌語，及李林甫欲殺諸將克長安，發其冢焚骨揚灰。泌曰：「陛下方定天下，奈何讎死者，彼枯骨何知？徒示聖德之不弘耳。」且方今從賊者皆



陛下之讎也。若聞此舉，恐阻其自新之心。上不悅曰：此賊昔日百方危朕，當是時，朕弗保朝夕。朕之全，特天幸耳。林甫亦惡卿，但未及害卿而死耳。奈何矜之？對曰：臣豈不知上皇有天下，向五十年，太平娛樂，一朝失意，遠處巴蜀，南方地惡，上皇春秋高，聞陛下此敕，意必以為用韋妃之故，內慙不懌，萬一感憤成疾，是陛下以天下之大，不能安君親，言未畢，上流涕被面，降階仰天拜曰：朕不及此，是天使先生言之也。遂抱泌頸泣不已。它夕，上又謂泌曰：良娣祖母，昭成太后之妹也。上皇所念，朕欲使正位中宮，以慰上皇心，何如？對曰：陛下在靈武，以羣臣望尺寸之功，故踐大位，非私己也。至於家事，宜待上皇之命，不過晚歲月之間耳。上從之。○南詔乘亂，陷越，僑會同軍，據清溪關，尋傳驃國皆降之。

資治通鑑卷第二百一十八

資治通鑑卷第二百一十九

唐紀三十五

肅宗文明武德大聖大宣孝皇帝中之上

至德元載冬十月辛巳朔，日有食之。既，上發順化，癸未，至彭原。○初，李林甫為相，諫官言事，皆先白宰相，退則又以所言白之御史，言事須大夫同署，至是，敕盡革其弊，開諫諍之塗，又令宰相分直政事，筆承旨，旬日而更懲林甫及楊國忠之專權故也。○第五琦見上於彭原，請以江淮租庸市輕貨，泝江漢而上，至洋川，令漢中王瑀陸運，至扶風，以助軍，上從之。尋加琦山南等五道度支使，琦作權鹽法，用以饒。○房琯喜賓客，好談論，多引拔知名之士，而輕鄙庸俗，人多怨之。北海太守賀蘭進明，詣行在，上命琯以為南海太守，兼御史大夫，充嶺南節度使，琯以為攝御史大夫，進明入謝，上怪之，進明因言與琯有隙，且曰：晉用王衍為三公，祖尚浮虛，致中原板蕩，今房琯專為迂闊大言，以立虛名，所引用皆浮華之黨，真王衍之比也。陛下用為宰相，恐非社稷之福。且琯在南朝，佐上皇，使陛下與諸王分領諸道節制，仍置陛下於沙塞空虛之地，又布私黨於諸道，使統大權，其意以為上皇一子得天下，則己不失富貴，此豈忠臣所為乎？上由是疎之。○房琯上疏，請自將兵，復兩京，上許之，加持節，討西京，兼防禦蒲潼兩關，兵馬節度等使，琯請自選參佐，以御史中丞鄧景山為副，戶部侍郎李揖為行軍司馬，給事中劉秩為參謀，既行，又令兵部尚書王思禮副之，琯悉以戎務委李揖，劉秩二人皆書生，不閑軍旅，琯謂人曰：賊曳落河雖多，安能敵我，劉秩、琯分為三軍，使裨



將楊希文將南軍自宜壽入劉貴哲將中軍自武功入李光進將北軍自奉天入光進光弼之弟也○以賀蘭進明為河南節度使○穎王璩之至成都也崔圓迎謁拜於馬首璩不之止圓恨之璩視事兩月吏民安之圓奏罷璩使歸內宅以武部侍郎李暉為劍南節度使代之暉視之兄也上皇尋命璩與陳王珪詣上宣慰至是見上於彭原延王玠從上皇入蜀追車駕不及上皇怒欲誅之漢中王瑀救之乃命玠亦詣上所○甲申令狐潮王福德復將步騎萬餘攻雍丘張巡出擊大破之斬首數千級賊遁去○房瑄以中軍北軍為前鋒庚子至便橋辛丑二軍遇賊將安守忠於咸陽之陳濤斜瑄效古法用車戰以牛車二千乘馬步夾之賊順風鼓譟牛皆震駭賊縱火焚之人畜大亂官軍死傷者四萬餘人存者數千而已癸卯瑄自以南軍戰又敗楊希文劉貴哲皆降於賊上聞瑄敗大怒李泌為之營救上乃宥之待瑄如初○以薛景仙為關內節度副使○敦煌王承寀至回紇牙帳回紇可汗以女妻之遣其貴臣與承寀及僕固懷恩皆來見上於彭原上厚禮其使者而歸之賜回紇女號毗伽公主○尹子奇圍河間四十餘日不下史思明引兵會之顏真卿遣其將和琳將萬二千人救河間思明逆擊擒之遂陷河間執李奐送洛陽殺之又陷景城太守李暉赴淇水死思明使兩騎齎尺書以招樂安樂安即時舉郡降又使其將康沒野波將先鋒攻平原兵未至顏真卿知力不敵壬寅棄郡渡河南走思明即以平原兵攻清河博平皆陷之思明引兵圍烏承恩於信都承恩降親導思明入城交兵馬倉庫馬三千匹兵五萬人思明送承恩詣洛陽祿山復其官爵饒陽裨將束鹿張興力舉千鈞性復明辨賊攻饒陽彌年不能下及諸郡皆陷思明并力圍之外救俱絕太守李系窘迫赴火死城遂陷思明擒興立於馬前謂曰將軍真壯士能與我共富貴乎興曰興唐之忠臣固無降理今數刻之人耳願一言而死思明曰試言之興曰主上待祿山恩如父子羣臣莫及不知報德乃興兵指闕塗炭生人大丈夫不

能剪除凶逆乃北面為之臣乎僕有短策足下能聽之乎足下所以從賊求富貴耳譬如鸞巢于幕豈能久安何如乘間取賊轉禍為福長享富貴不亦美乎思明怒命張於木上鋸殺之晉不絕口以至於死賊每破一城城中衣服財賄婦人皆為所掠男子壯者使之負擔羸病老幼皆以刀槊戲殺之祿山初以卒三千人授思明使定河北至是河北皆下之郡置防兵三千雜以胡兵鎮之思明還博陵尹子奇將五千騎度河略北海欲南取江淮會回紇可汗遣其臣葛邏支將兵入援先以二千騎奄至范陽城下子奇聞之遽引兵歸○十一月戊午回紇至帶汗谷與郭子儀軍合辛酉與同羅及叛胡戰於榆林河北大破之斬首三萬虜一萬河曲皆平子儀還軍洛交○上命崔渙宣慰江南兼知選舉○令狐潮帥眾萬餘營雍丘城北張巡邀擊大破之賊遂走○永王璘幼失母為上所鞠養常抱之以眠從上皇入蜀上皇命諸子分總天下節制諫議大夫高適諫以為不可上皇不聽璘領四道節度使鎮江陵時江淮租賦山積於江陵璘召募勇士數萬人日費巨萬璘生長深宮不更人事子襄城王瑒有勇力好兵有薛鏐等為之謀主以為今天下大亂惟南方完富璘握四道兵封疆數千里宜據金陵保有江淮如東晉故事上聞之敕璘歸觀于蜀璘不從江陵長史李峴辭疾赴行在上召高適與之謀適陳江東利害且言璘必敗之狀十二月置淮南節度使領廣陵等十二郡以適為之置淮南西道節度使領汝南等五郡以來瑱為之使與江東節度使韋陟共圖璘○安祿山遣兵攻潁川城中兵少無蓄積太守薛愿長史龐堅悉力拒守繞城百里廬舍林木皆盡暮年救兵不至祿山使阿史那承慶益兵攻之晝夜死鬪十五日城陷執愿堅送洛陽祿山縛於洛濱水上凍殺之○上問李泌曰今敵疆如此何時可定對曰臣觀賊所獲子女金帛皆輸之范陽此豈有雄據四海之志邪今獨虜將或為之用中國之人惟高尚等數人自餘皆脅從耳以臣料之不過二年天下無寇矣上曰何故對曰賊之驍



將不過史思明。安守忠、田乾真、張忠志、阿史那承慶等數人而已。今若令李光弼自太原出井陘，郭子儀自馮翊入河東，則思明志不敢離范陽，常山守忠、乾真不敢離長安。是以兩軍繫其四將也。從祿山者獨承慶耳。願敕子儀勿取華陰，使兩京之道常通。陛下以所徵之兵軍於扶風，與子儀、光弼互出擊之。彼救首則擊其尾，救尾則擊其首。使賊往來數千里，疲於奔命，我常以逸待勞。賊至則避其鋒，去則乘其弊，不攻城，不遏路。來春復命建寧，為范陽節度大使，竝塞北出，與光弼南北犄角，以取范陽，覆其巢穴。賊退則無所歸，留則不獲安。然後大軍四合而攻之，必成擒矣。上悅。時張良娣與李輔國相表裏，皆惡泌。建寧王倓謂泌曰：「先生舉倓於上，得展臣子之效，無以報德。請為先生除害。」泌曰：「何也？」倓以良娣為言，泌曰：「此非人子所言。」願王姑置之，勿以為先。倓不從。○甲辰，永王璘擅引兵東巡，沿江而下。軍容甚盛，然猶未露割據之謀。吳郡太守兼江南東路採訪使李希言、平牒璘，詰其擅引兵東下之意。璘怒，分兵遣其將渾惟明、襲希言於吳郡。季廣琛襲廣陵長史淮南採訪使李成式於廣陵。璘進至當塗，希言遣其將元景曜及丹徒太守閻敬之將兵拒之。李成式亦遣其將李承慶拒之。璘擊斬敬之，以徇。景曜承慶皆降於璘。江淮大震。高適與來瑱、韋陟會於安陸，結盟誓衆，以討之。○于闐王勝聞安祿山反，命其弟曜攝國事，自將兵五千入援。上嘉之，拜特進兼殿中監。○令狐潮、李庭望攻雍丘，數月不下。乃置杞州，築城於雍丘之北，以絕其糧援。賊常數萬人，而張巡衆纔千餘。每戰輒克。河南節度使魏王巨屯彭城，假巡先鋒使。是月，魯東平濟陰陷于賊。賊將楊朝宗帥馬步二萬將襲寧陵。斷巡後，巡遂拔雍丘。東守寧陵，以待之。始與睢陽太守許遠相見，是日，楊朝宗至寧陵城西北，巡遠與戰，晝夜數十合，大破之。斬首萬餘級，流尸塞汴而下。賊收兵夜遁。敕以巡為河南節度副使，巡以將士有功，遣使詣魏王巨，請空名告身及賜物。巨唯與折衝果毅告身三十通，不與賜物。巡移書責巨，巨竟不應。○

是歲置北海節度使，領北海等四郡。上黨節度使領上黨等三郡。興平節度使領上洛等四郡。○吐蕃陷威戎神威定戎宣威制勝金天天成等軍，石堡城、百谷城、雕窠城。○初，林邑王范真龍為其臣摩訶漫多伽獨所殺，盡滅范氏。國人立其王頭黎之女為王。女不能治國，更立頭黎之姑子諸葛地，謂之環王。妻以女王。二載春，正月上，皇上誥以憲部尚書李麟同平章事，總理百司。命崔圓奉誥赴彭原，懿祖之後也。○安祿山自起兵以來，日漸昏至，是不復睹物，又病疽，性益躁暴。左右使令，小不如意，動加箠撻。或時殺之。既稱帝，深居禁中，大將希得見其面。皆因嚴莊白事。莊雖貴用事，亦不免箠撻。閹宦李猪兒被撻尤多。左右人不自保。祿山嬖妾段氏生子慶恩，欲以代慶緒為後。慶緒常懼死，不知所出。莊謂慶緒曰：「事有不得已者，時不可失。慶緒曰：「兄有所為，敢不敬從。」又謂猪兒曰：「汝前後受撻，寧有數乎？不行大事，死無日矣。」猪兒亦許諾。莊與慶緒夜持兵立帳外，猪兒執刀直入帳中，斫祿山腹，左右懼，不敢動。祿山捫枕旁刀，不獲，撼帳竿曰：「必家賊也。」腸已流出數斗，遂死。掘牀下深數尺，以氈裹其尸埋之。誠宮中不得泄。乙卯旦，莊宣言於外云：「祿山疾亟，立晉王慶緒為太子，尋即帝位，尊祿山為太上皇。然後發喪。慶緒性昏懦，言辭無序，莊恐衆不服，不令見人。慶緒日縱酒為樂，兄事莊，以為御史大夫。馮翊王事無大小，皆取決焉。厚加諸將官爵，以悅其心。」○上從容謂李泌曰：「廣平為元帥踰年，今欲命建寧專征，又恐勢分，立廣平為太子，何如？」對曰：「臣固嘗言之矣。戎事交切，須即區處。至於家事，當俟上皇。不然，後代何以辨陛下靈武即位之意耶？此必有人欲令臣與廣平有隙耳。臣請以語廣平。廣平亦必未敢當。泌出，以告廣平。王俶俶曰：「此先生深知其心，欲曲成其美也。乃入固辭曰：「陛下猶未奉晨昏，臣何心敢當儲副。願俟上皇還宮。臣之幸也。上賞慰之。李輔國本飛龍小兒，粗閑書計，給事太子宮。上委信之，輔國外恭謹寡言，而內狡險，見張良娣有寵，陰



附會之與相表裏。建寧王倓。數於上前。詆訐二人罪惡。二人譖之於上。曰。倓恨不得爲元帥。謀害廣平王。上怒。賜倓死。於是廣平王倓。及李泌。皆內懼。倓謀去輔國及良娣。泌曰。不可。王不見建寧之禍乎。倓曰。竊爲先生憂之。泌曰。泌與主上有約矣。俟平京師。則去還山。庶免於患。倓曰。先生去。則倓愈危矣。泌曰。王但盡人子之孝。良娣婦人。王委曲順之。亦何能爲。○上謂泌曰。今郭子儀。李光弼。已爲宰相。若克兩京。平四海。則無官以賞之。奈何。對曰。古者。官以任能。爵以酬功。漢魏以來。雖以郡縣治民。然有功。則錫以茅土。傳之子孫。至于周隋。皆然。唐初。未得關東。故封爵皆設虛名。其食實封者。給繒布而已。貞觀中。太宗欲復古制。大臣議論不同。而止。由是。賞功者。多以官。夫以官賞功。有二害。非才。則廢事。權重。則難制。是以功臣居大官者。皆不爲子孫之遠圖。務乘一時之權。以邀利。無所不爲。竊使祿山有百里之國。則亦惜之。以傳子孫。不及矣。爲今之計。俟天下既平。莫若疏爵土。以賞功臣。則雖大國。不過二三百里。可比今之小郡。豈難制哉。於人臣。乃萬世之利也。上曰。善。○上聞安西北庭。及拔那。那大食諸國兵。至涼鄯。甲子。幸保定。○丙寅。劍南兵賈秀等五千人。謀反。將軍席元慶。臨邛太守柳奕。討誅之。○河西兵馬使蓋庭倫。與武威九姓商胡安門物等。殺節度使周泌。聚衆六萬。武威大城之中。小城有七。胡據其五。二城堅守。度支判官崔稱。與中使劉日新。以二城兵攻之。旬有七日。平之。○史思明。自博陵。蔡希德。自太行。高秀巖。自大同。牛廷介。自范陽。引兵共十萬。寇太原。李光弼。麾下精兵。皆赴朔方。餘團練烏合之衆。不滿萬人。思明以爲太原指掌可取。既得之。當遂長驅取朔方。河隴。太原諸將。皆懼。議修城以待之。光弼曰。太原城周四十里。賊垂至。而興役。是未見敵。先自困也。乃帥士卒及民。於城外鑿壕。以自固。作壘數十萬。衆莫知所用。及賊攻城於外。光弼用之。增壘於內。壞輒補之。思明使人取攻具於山東。以胡兵二千衛送之。至廣陽。別將慕容溢。張奉璋。邀擊盡殺之。思明圍太原。月餘不下。乃選驍銳

爲遊兵。戒之曰。我攻其北。則汝潛趣其南。攻東。則趣西。有隙。則乘之。而光弼軍令嚴整。雖寇所不至。警邏未嘗少懈。賊不得入。光弼購募軍中。苟有小技。皆取之。隨能使之。人盡其用。得安邊軍錢工三。善穿地道。賊於城下。仰而侮詈。光弼遣人從地道中。曳其足而入。臨城斬之。自是。賊行皆視地。賊爲梯衝土山。以攻城。光弼爲地道。以迎之。近城輒陷。賊初逼城急。光弼遣人詐與賊約。刻日出降。賊喜。不爲備。光弼使穿地道。周賊營中。搗之以木。至期。光弼勒兵在城上。遣裨將將數千人出。如降狀。賊皆屬目。俄而營中地陷。死者千餘人。賊衆驚亂。官軍鼓譟乘之。俘斬萬計。會安祿山死。慶緒使思明歸守范陽。留蔡希德等圍太原。○慶緒以尹子奇爲汴州刺史。河南節度使甲戌。子奇以歸檀及同羅奚兵十三萬。趣睢陽。許遠告急于張巡。巡自寧陵。引兵入睢陽。巡有兵三千人。與遠兵合六千八百人。賊悉衆逼城。巡督勵將士。晝夜苦戰。或一日至二十合。凡十六日。擒賊將六十餘人。殺士卒二萬餘。衆氣自倍。遠謂巡曰。遠懦不習兵。公智勇兼濟。遠請爲公守。公請爲遠戰。自是之後。遠但調軍糧。修戰具。居中應接而已。戰鬪籌畫。一出於巡。賊遂夜遁。○郭子儀。以河東居兩京之間。得河東。則兩京可圖。時賊將崔乾祐。守河東。丁丑。子儀潛遣人入河東。與唐官陷賊者謀。俟官軍至。爲內應。○初。平盧節度使劉正臣。自范陽敗歸。安東都護王玄志。鳩殺之。祿山以其黨徐歸道爲平盧節度使。玄志復與平盧將侯希逸。襲殺之。又遣兵馬使董秦。將兵以葦葎度海。與大將田神功。擊平原樂安。下之。防河招討使李銑。承制以秦爲平原太守。○二月。戊子。上至鳳翔。○郭子儀。自洛交。引兵趣河東。分兵取馮翊。己丑夜。河東司戶韓旻等。襲河東城。迎官軍。殺賊近千人。崔乾祐。踰城得免。發城北兵攻城。且拒官軍。子儀擊破之。乾祐走。子儀追擊之。斬首四千級。捕虜五千人。乾祐至安邑。安邑人開門納之。半入閉門。擊之盡殞。乾祐未入。自白逕嶺



亡去。遂平河東。○上至鳳翔旬日。隴右河西安西西域之兵皆會。江淮庸調亦至。洋川漢中。上自散關。通表成都。信使駱驛。長安人聞車駕至。從賊中自拔而來者。日夜不絕。西師憩息既定。李泌請遣安西及西域之衆。如前策。竝塞東北。自歸檀。南取范陽。上曰。今大衆已集。庸調亦至。當乘兵鋒。擣其腹心。而更引兵東北數千里。先取范陽。不亦迂乎。對曰。今以此衆直取兩京。必得之。然賊必再彊。我必又困。非久安之策。上曰。何也。對曰。今所恃者。皆西北守塞及諸胡之兵。性耐寒而畏暑。若乘其新至之銳。攻祿山已老之師。其勢必克。兩京春氣已深。賊收其餘衆。遁歸巢穴。關東地熱。官軍必困而思歸。不可留也。賊休兵秣馬。伺官軍之去。必復南來。然則征戰之勢。未有涯也。不若先用之於寒鄉。除其巢穴。則賊無所歸。根本永絕矣。上曰。朕切於晨昏之戀。不能待此。決矣。○關內節度使王思禮。軍武功。兵馬使郭英父。軍東原。王難得。軍西原。丁酉。安守忠等寇武功。郭英父戰不利。矢貫其頤而走。王難得望之不救。亦走。思禮退軍扶風。賊遊兵至大和關。去鳳翔五十里。鳳翔大駭戒嚴。○李光弼將敢死士出擊。蔡希德大破之。斬首七萬餘級。希德遁去。○安慶緒以史思明爲范陽節度使。兼領恆陽軍事。封嬀川王。以牛廷介領安陽軍事。張忠志爲常山太守。兼團練使。鎮井陘口。餘各令歸舊任募兵。以禦官軍。先是安祿山得兩京珍貨。悉輸范陽。思明擁彊兵。據富資。益驕橫。浸不用慶緒之命。慶緒不能制。○戊戌。永王璘敗死。其黨薛鏐皆伏誅。時李成式與河北招討判官李銑合兵討璘。銑兵數千。軍于楊子。成式使判官裴茂將兵三千。軍于瓜步。廣張旗幟。列于江津。璘與其子瑒登城望之。始有懼色。李廣琛召諸將謂曰。吾屬從王至此。天命未集。人謀已墮。不如及兵鋒未交。早圖去就。死於鋒鏑。永爲逆臣矣。諸將皆然之。於是廣琛以麾下奔廣陵。渾惟明奔江寧。馮季康奔白沙。璘憂懼。不知所出。其夕。江北之軍多列炬火。光照水中。一皆爲兩。璘軍又以火應之。璘以爲官軍已濟江。遽挈家屬與麾下潛遁。及明。不見。濟

者。乃復入城。收兵具舟楫而去。成式將趙侃等。濟江至新豐。璘使瑒及其將高仙琦將兵擊之。侃等逆戰。射瑒中肩。璘兵遂潰。璘與仙琦收餘衆。南奔鄱陽。收庫物甲兵。欲南奔嶺表。江西采訪使皇甫旉遣兵追討擒之。潛殺之於傳舍。瑒亦死於亂兵。旉使人送璘家屬還蜀。上曰。旉旉旉得吾弟。何不送之於蜀。而擅殺之邪。遂廢旉不用。○庚子。郭子儀遣其子旼及兵馬使李韶光。大將王祚。濟河擊潼關。破之。斬首五百級。安慶緒遣兵救潼關。郭旼等大敗。死者萬餘人。李韶光。王祚戰死。僕固懷恩抱馬首。浮度渭水。退保河東。○三月辛酉。以左相韋見素爲左僕射。中書侍郎同平章事。裴冕爲右僕射。竝罷政事。初。楊國忠惡憲部尙書苗晉卿。安祿山之反也。請出晉卿爲陝郡太守。兼陝弘農防禦使。晉卿固辭老病。上皇不悅。使之致仕。及長安失守。晉卿潛竄山谷。上至鳳翔。手敕徵之。爲左相。軍國大務悉咨之。○上皇思張九齡之先見。爲之流涕。遣中使至曲江祭之。厚恤其家。○尹子奇復引大兵攻睢陽。張巡謂將士曰。吾受國恩。所守正死耳。但念諸君捐軀命膏草野。而賞不酬勳。以此痛心耳。將士皆激勵請奮。巡遂椎牛大饗士卒。盡軍出戰。賊望見兵少。笑之。巡執旗帥諸將直衝賊陳。賊乃大潰。斬將三十餘人。殺士卒三千餘人。逐之數十里。明日。賊又合軍。至城下。巡出戰。晝夜數十合。屢摧其鋒。而賊攻圍不輟。○辛未。安守忠將騎二萬寇河東。郭子儀擊走之。斬首八千級。捕虜五千人。○夏四月。顏真卿自荊襄北詣鳳翔。上以爲憲部尙書。○上以郭子儀爲司空。天下兵馬副元帥。使將兵赴鳳翔。庚寅。李歸仁以鐵騎五千邀之於三原北。子儀使其將僕固懷恩。王仲昇。渾釋之。李若幽。伏兵擊之於白渠。留運橋。殺傷略盡。歸仁游水而逸。若幽神通之。玄孫也。子儀與王思禮軍合於西渭橋。進屯蒲西。安守忠。李歸仁。軍於京城西。清渠相守七日。官軍不進。五月癸丑。守忠僞退。子儀悉師逐之。賊以驍騎九千爲長蛇陣。官軍擊之。首尾爲兩翼。夾擊官軍。官軍大潰。判官韓液。監軍孫知古。皆爲賊所擒。軍資器械盡



奔之。子儀退保武功。中外戒嚴。是時。府庫無蓄積。朝廷專以官爵賞功。諸將出征。皆給空名告身。自開府特進。列卿大將軍。下至中郎將。聽臨事。注名其後。又聽以信牒授人官爵。有至異姓王者。諸軍但以職任相統攝。不復計官爵高下。及清渠之敗。復以官爵收散卒。由是官爵輕而貨重。大將軍告身一通。纔易一醉。凡應募入軍者。一切衣金紫。至有朝士僮僕。衣金紫稱大官。而執賤役者。名器之濫。至是而極焉。○房琯性高簡。時國家多難。而琯多稱病。不朝謁。不以職事為意。日與庶子劉秩。諫議大夫李揖。高談釋老。或聽門客董庭蘭鼓琴。庭蘭以是大招權利。御史奏庭蘭贖賄。丁巳。罷琯為太子少師。以諫議大夫張鎬為中書侍郎。同平章事。上常使僧數百人。為道場於內。晨夜誦佛。鎬諫曰。帝王當修德以弭亂安人。未聞飯僧可致太平也。上然之。○庚申。上皇追冊上母楊妃為元獻皇后。○山南東道節度使魯吳守南陽。賊將武令珣。田承嗣相繼攻之。城中食盡。一鼠直錢數百。餓死者相枕籍。上遣宦官將軍曹日昇往宣慰。圍急不得入。日昇請單騎入致命。襄陽太守魏仲犀不許。會顏真卿自河北至。曰。曹將軍不顧萬死。以致帝命。何為沮之。借使不達。不過亡一使者。達則一城之心固矣。日昇與十騎偕往。賊畏其銳。不敢逼。城中自謂望絕。及見日昇大喜。日昇復為之至襄陽取糧。以千人運糧而入。賊不能遏。吳在圍中。凡周歲。晝夜苦戰。力竭不能支。壬戌夜。開城。帥餘兵數千。突圍而出。奔襄陽。承嗣追之。轉戰二日。不能克。而還。時賊欲南侵。江漢賴吳扼其衝要。南夏得全。○司空郭子儀詣闕請自貶甲子。以子儀為左僕射。○尹子奇益兵圍睢陽。益急。張巡於城中夜鳴鼓嚴隊。若將出擊者。賊聞之。遂旦傲備。既明。巡乃寢。兵絕鼓。賊以飛樓瞰城中。無所見。遂解甲休息。巡與將軍南霽雲。郎將雷萬春等十餘將。各將五十騎。開門突出直衝賊營。至子奇麾下。營中大亂。斬賊將五十餘人。殺士卒五千餘人。巡欲射子奇。而不識。乃剡蒿為矢。中者喜。謂巡矢盡。走白子奇。乃得其狀。使霽雲射之。喪其左目。幾獲

之。子奇乃收軍退還。○六月。田乾真圍安邑。會陝郡賊將楊務欽。密謀歸國。河東太守馬承光以兵應之。務欽殺城中諸將不同己者。饒城來降。乾真解安邑遁去。○將軍王去榮以私怨殺本縣令。當死。上以其善用礮。壬辰。赦免死。以白衣於陝郡効力。中書舍人賈至不即行。下上表。以為去榮無狀。殺本縣之君。易曰。臣弑其君。子弑其父。非一朝一夕之故。其所由來者漸矣。若縱去榮。可謂生漸矣。議者謂陝郡初復。非其人不可守。然則它無去榮者。何以亦能堅守乎。陛下若以礮石一能。即免殊死。今諸軍技藝絕倫者。其徒寔繁。必恃其能。所在犯上。復何以止之。若止捨去榮。而誅其餘者。則是法令不一。而誘人觸罪也。今惜一去榮之材。而不殺。必殺十如去榮之材者。不亦其傷益多乎。夫去榮。逆亂之人也。焉有逆於此。而順於彼。亂於富平。而治於陝郡。悖於縣君。而不悖於大君歟。伏惟明主。全其遠者大者。則禍亂不日而定矣。上下其事。令百官議之。太子太師韋見素等議。以為法者。天地大典。帝王猶不敢擅殺。是臣下之權。過於人主也。去榮既殺人不死。則軍中凡有技能者。亦自謂無憂。所在暴橫。為郡縣者。不亦難乎。陛下為天下主。愛無親疎。得一去榮。而失萬姓。何利之有。於律。殺本縣令。列於十惡。而陛下寬之。王法不行。人倫道屈。臣等奉詔。不知所從。夫國以法理。軍以法勝。有恩無威。慈母不能使其子。陛下厚養戰士。而每戰少利。豈非無法邪。今陝郡雖要。不急於法也。有法。則海內無憂。不克。況陝郡乎。無法。則陝郡亦不可守。得之何益。而去榮未技。陝郡不以之存亡。王法有無。國家乃為之輕重。此臣等所以區區願陛下守貞觀之法。上竟捨之。至。曾之子也。○南充土豪何滔。作亂。執本郡防禦使楊齊魯。劍南節度使盧元裕發兵討平之。○秋。七月。河南節度使賀蘭進明。克高密琅邪。殺賊二萬餘人。○戊申夜。蜀郡兵郭千仞等反。六軍兵馬使陳玄禮。劍南節度使李暉。討誅之。○壬子。尹子奇復徵兵數萬。攻睢陽。先是。許遠於城中積糧。至六萬石。虢王巨以其半給濮陽濟陰二郡。遠固爭之。不能得。既而



濟陰得糧遂以城叛。而睢陽城至是食盡。將士人廩米日一合。雜以茶紙樹皮爲食。而賊糧運通。兵敗復徵。睢陽將士死不加益。諸軍饋救不至。士卒消耗。至一千六百人。皆饑病不堪。闕遂爲賊所圍。張巡乃修守具。以拒之。賊爲雲梯。勢如半虹。置精卒二百於其上。推之臨城。欲令騰入。巡豫於城鑿三穴。候梯將至。於一穴中出大木。末置鐵鉤。鉤之。使不得退。一穴中出一木。挂之。使不得進。一穴中出一木。末置鐵籠。盛火焚之。其梯中折。梯上卒盡燒死。賊又以鉤車鉤城上棚閣。鉤之所及。莫不崩陷。巡以大木末置連鑊。鑊末置大鑿。揚其鉤頭。以革車拔之。入城截其鉤頭。而縱車令去。賊又造木驢攻城。巡鎔金汁灌之。應投銷鑠。又於城西北隅。以土囊積柴。爲磴道。欲登城。巡不與爭利。每夜潛以松明乾蒿投之於中。積十餘日。賊不之覺。因出軍大戰。使人順風持火焚之。賊不能救。經二十餘日。火方滅。巡之所爲。皆應機立辦。賊服其智。不敢復攻。遂於城外穿三重壕。立木柵以守。巡亦於內作壕。以拒之。○丁巳。賊將安武臣攻陝郡。楊務欽戰死。賊遂屠陝。崔渙在江南。選補冒濫者衆。八月。罷渙爲餘杭太守。江東采訪防禦使。○以張鎬兼河南節度采訪等使。代賀蘭進明。○靈昌太守許叔冀爲賊所圍。救兵不至。拔衆奔彭城。○睢陽士卒死傷之餘。纔六百人。張巡許遠分城而守之。巡守東北。遠守西南。與士卒同食茶紙。不復下城。賊士攻城者。巡以逆順說之。往往棄賊來降。爲巡死戰。前後二百餘人。是時許叔冀在譙郡。尙衡在彭城。賀蘭進明在臨淮。皆擁兵不救。城中日蹙。巡乃令南霽雲將三十騎。犯圍而出。告急於臨淮。霽雲出城。賊衆數萬遮之。霽雲直衝其衆。左右馳射。賊衆披靡。止亡兩騎。既至臨淮。見進明。進明曰。今日睢陽不知存亡。兵去何益。霽雲曰。睢陽若陷。霽雲請以死謝大夫。且睢陽既拔。卽及臨淮。譬如皮毛相依。安得不救。進明愛霽雲勇壯。不聽其語。強留之。具食與樂。延霽雲坐。霽雲慷慨泣且語曰。霽雲來。睢陽之人。不食月餘矣。霽雲雖欲獨食。且不下咽。大夫坐擁彊兵。觀睢陽陷沒。曾無

分災救患之意。豈忠臣義士之所爲乎。因齧落一指。以示進明。曰。霽雲既不能達主將之意。請留一指。以示信。歸報。座中往往爲泣下。霽雲察進明終無出師意。遂去。至寧陵。與城使廉坦。同將步騎三千人。閏月。戊申夜。冒圍且戰。且行。至城下。大戰。壞賊營。死傷之外。僅得千人入城。城中將吏知無救。皆慟哭。賊知援絕。圍之益急。初。房琯爲相。惡賀蘭進明。以爲河南節度使。以許叔冀爲進明都知兵馬使。俱兼御史大夫。叔冀自恃麾下精銳。且官與進明等。不受其節制。故進明不敢分兵。非惟疾巡遠功名。亦懼爲叔冀所襲也。○戊辰。上勞饗諸將。遣攻長安。謂郭子儀曰。事之濟否。在此行也。對曰。此行不捷。臣必死之。○辛未。御史大夫崔光遠破賊於駱谷。光遠行軍司馬王伯倫判官李椿將二千人。攻中渭橋。殺賊守橋者千人。乘勝至苑門。賊有先屯武功者。聞之奔歸。遇於苑北。合戰。殺伯倫。擒椿。送洛陽。然自是賊不復屯武功矣。○賊屢攻上黨。常爲節度使程千里所敗。蔡希德復引兵圍上黨。

資治通鑑卷第一百二十九

唐紀 肅宗文明武德大聖大宣孝皇帝中之上至德二載



# 資治通鑑卷第二百一十

## 唐紀三十六

### 肅宗文明武德大聖大宣孝皇帝中之下

至德二載九月丁丑。希德以輕騎至城下挑戰。千里帥百騎開門突出。欲擒之。會救至。收騎退還。橋壞墜。塹中反爲希德所擒。仰謂從騎曰。吾不幸至此。天也。歸語諸將。善爲守備。寧失帥。不可失城。希德攻城不克。送千里於洛陽。安慶緒以爲特進。囚之客省。○郭子儀以回紇兵精。勸上益徵其兵。以擊賊。懷仁可汗遣其子葉護。及將軍帝德等。將精兵四千餘人。來至鳳翔。上引見葉護。宴勞賜賚。惟所欲。丁亥。元帥廣平王俶將朔方等軍。及回紇西域之衆十五萬。號二十萬。發鳳翔。俶見葉護。約爲兄弟。葉護大喜。謂俶爲兄。回紇至扶風。郭子儀留宴三日。葉護曰。國家有急。遠來相助。何以食爲。宴畢。即行。日給其軍羊二百口。牛二十頭。米四十斛。庚子。諸軍俱發。壬寅。至長安。西陳於香積寺北。灃水之東。李嗣業爲前軍。郭子儀爲中軍。王思禮爲後軍。賊衆十萬。陳於其北。李歸仁出挑戰。官軍逐之。逼於其陳。賊軍齊進。官軍却爲賊所乘。軍中驚亂。賊爭趨輜重。李嗣業曰。今日不以身餌賊。軍無孑遺矣。乃肉袒執長刀。立於陳前。大呼奮擊。當其刀者。人馬俱碎。殺數十人。陳乃稍定。於是嗣業帥前軍。各執長刀。如牆而進。身先士卒。所向摧靡。都知兵馬使王難得。救其裨將。賊射之中眉。皮垂鄣目。難得自拔箭。掣去其皮。血流被面。前戰不已。賊伏精騎於陳東。欲襲官軍之後。偵者知之。朔方左廂兵馬使僕固懷恩。引回紇就擊之。翦滅殆盡。賊由是氣索。李嗣業又與回紇出賊

陳後。與大軍夾擊。自午及酉。斬首六萬級。填溝塹。死者甚衆。賊遂大潰。餘衆走入城。迨夜。囂聲不止。僕固懷恩言於廣平王俶曰。賊棄城走矣。請以二百騎追之。縛取安守忠。李歸仁等。俶曰。將軍戰亦疲矣。且休息。俟明日圖之。懷恩曰。歸仁守忠。賊之驍將。驟勝而敗。此天賜我也。奈何縱之。使復得衆。還爲我患。悔之無及。戰尙神速。何明且也。俶固止之。使還營。懷恩固請往而復反。一夕四五起。遲明。謀至。守忠歸仁與張通儒。田乾真。皆已遁矣。癸卯。大軍入西京。初上欲速得京師。與回紇約曰。克城之日。土地土庶歸唐。金帛子女皆歸回紇。至是。葉護欲如約。廣平王俶拜於葉護馬前曰。今始得西京。若遽俘掠。則東京之人。皆爲賊固守。不可復取矣。願至東京。乃如約。葉護驚躍。下馬答拜。跪捧王足曰。當爲殿下徑往東京。即與僕固懷恩引回紇西域之兵。自城南過。營於滻水之東。百姓軍士胡虜見俶拜。皆泣曰。廣平王。眞華夷之主。上聞之喜曰。朕不及也。俶整衆入城。百姓老幼夾道歡呼。悲泣。俶留長安。鎮撫三日。引大軍東出。以太子少傅虢王巨爲西京留守。甲辰。捷書至鳳翔。百寮入賀。上涕泗交頤。即日遣中使啖庭瑤入蜀。奏上皇命左僕射裴冕入京師。告郊廟。及宣慰百姓。上以駿馬召李泌於長安。既至上。曰。朕已表請上皇東歸。朕當還東宮。復脩臣子之職。泌曰。表可追乎。上曰。已遠矣。泌曰。上皇不來矣。上驚問故。泌曰。理勢自然。上曰。爲之奈何。泌曰。今請更爲羣臣賀表。言自馬嵬。請留靈武。勸進。及今成功。聖上思戀晨昏。請速還京。以就孝養之意。則可矣。上即使泌草表。上讀之泣曰。朕始以至誠。願歸萬機。今聞先生之言。乃寤其失。立命。中使奉表入蜀。因就泌飲酒。同榻而寢。而李輔國請取契鑰付泌。泌請使輔國掌之。上許之。泌曰。臣今報德足矣。復爲間人。何樂如之。上曰。朕與先生累年同憂患。今方相同娛樂。奈何遽欲去乎。泌曰。臣有五不可留。願陛下聽臣去。免臣於死。上曰。何謂也。對曰。臣遇陛下太早。陛下任臣太重。寵臣太深。臣功太高。迹太奇。此其所以不可留也。上曰。且眠矣。留日議之。對曰。陛下



今就臣榻臥。猶不得請。況異日香案之前乎。陛下不聽臣去。是殺臣也。上曰。不意卿疑朕如此。豈有如朕而辦殺卿邪。是直以朕爲句踐也。對曰。陛下不辦殺臣。故臣求歸。若其既辦。臣安敢復言。且殺臣者。非陛下也。乃五不可也。陛下曩日待臣如此。臣於事猶有不敢言者。況天下既安。臣敢言乎。上良久曰。卿以朕不從卿北伐之謀乎。對曰。非也。所不敢言者。乃建寧耳。上曰。建寧。朕之愛子。性英果。艱難時有功。朕豈不知之。但因此爲小人所教。欲害其兄。圖繼嗣。朕以社稷大計。不得已而除之。卿不細知其故邪。對曰。若有此心。廣平當怨之。廣平每與臣言其冤。輒流涕嗚咽。臣今必辭陛下。始敢言之耳。上曰。渠嘗夜捫廣平。意欲加害。對曰。此皆出讒人之口。豈有建寧之孝友聰明肯爲此乎。且陛下昔欲用建寧爲元帥。臣請用廣平。建寧若有此心。當深憾於臣。而以臣爲忠。益相親善。陛下以此可察其心矣。上乃泣下曰。先生言是也。既往不答。朕不欲聞之。泌曰。臣所以言之者。非咎既往。乃欲使陛下慎將來耳。昔天后有四子。長曰太子弘。天后方圖稱制。惡其聰明。醜殺之。立次子雍王賢。賢內憂懼。作黃臺瓜辭。冀以感悟天后。天后不聽。賢卒死於黔中。其辭曰。種瓜黃臺下。瓜熟子離離。一摘使瓜好。再摘使瓜稀。三摘猶爲可。四摘抱蔓歸。今陛下已一摘矣。慎無再摘。上愕然曰。安有是哉。卿錄是辭。朕當書紳。對曰。陛下但識之於心。何必形於外也。是時廣平王有大功。良娣忌之。潛構流言。故泌言及之。○郭子儀引蕃漢兵追賊至潼關。斬首五千級。克華陰弘農二郡。關東獻俘百餘人。敕皆斬之。監察御史李勉言於上曰。今元惡未除。爲賊所污者。半天下。聞陛下龍興。咸思洗心。以承聖化。今悉誅之。是驅之使從賊也。上遽使赦之。○冬十月丁未。啖庭瑤至蜀。○壬子。興平軍奏破賊於武關。克上洛郡。○吐蕃陷西平。○尹子奇久圍睢陽。城中食盡。議棄城東走。張巡許遠謀以爲睢陽江淮之保障。若棄之去。賊必乘勝長驅。是無江淮也。且我衆饑羸。走必不達。古者戰國諸侯。尙相救恤。泥密邇羣帥。乎不如堅守以待。

之。茶紙既盡。遂食馬。馬盡。羅雀掘鼠。雀鼠又盡。巡出愛妾。殺以食士。遠亦殺其奴。然後括城中婦人食之。繼以男子老弱。人知必死。莫有叛者。所餘纔四百人。癸丑。賊登城。將士病不能戰。巡西向再拜曰。臣力竭矣。不能全城。生既無以報陛下。死當爲厲鬼。以殺賊。城遂陷。巡遠俱被執。尹子奇問巡曰。聞君每戰。皆裂齒碎。何也。巡曰。吾志吞逆賊。但力不能耳。子奇以刀抉其口視之。所餘纔三四。子奇義其所爲。欲活之。其徒曰。彼守節者也。終不爲用。且得士心存之。將爲後患。乃并南霽雲雷萬春等三十六人。皆斬之。巡且死。顏色不亂。揚揚如常。生致許遠於洛陽。巡初守睢陽。時卒僅萬人。城中居人亦且數萬。巡一見問姓名。其後無不識者。前後大小戰。凡四百餘。殺賊卒十二萬人。巡行兵不依古法。教戰陳。令本將各以其意教之。人或問其故。巡曰。今與胡虜戰。雲合鳥散。變態不恒。數步之間。勢有同異。臨機應猝。在於呼吸之間。而動詢大將。事不相及。非知兵之變者也。故吾使兵識將意。將識士情。投之而往。如手之使指。兵將相習。人自爲戰。不亦可乎。自興兵。器械甲仗。皆取之於敵。未嘗自修。每戰。將士或退散。巡立於戰所。謂將士曰。我不離此。汝爲我還決之。將士莫敢不還死戰。卒破敵。又推誠待人。無所疑隱。臨敵應變。出奇無窮。號令明賞罰。信與衆共。甘苦寒暑。故下爭致死力。張鎬聞睢陽圍急。倍道亟進。檄浙東浙西淮南北海諸節度。及譙郡太守閻丘曉。使共救之。曉素傲狠。不受鎬命。比鎬至。睢陽城已陷三日。鎬召曉。杖殺之。○張通儒等收餘衆。走保陝。安慶緒悉發洛陽兵。使其御史大夫嚴莊。將之就通儒。以拒官軍。并舊兵步騎。猶十五萬。己未。廣平王至曲沃。回紇葉護使其將軍鼻施吐撥裴羅等。引軍旁南山搜伏。因駐軍嶺北。郭子儀等與賊遇於新店。賊依山而陳。子儀等初與之戰。不利。賊逐之下山。回紇自南山襲其背。於黃埃中發十餘矢。賊驚顧曰。回紇至矣。遂潰。官軍與回紇夾擊之。賊大敗。僵尸蔽野。嚴莊張通儒等棄陝東走。廣平王俶郭子儀入陝城。僕固懷恩等分道追之。嚴莊先入洛陽。告



安慶緒庚申夜慶緒帥其黨自苑門出走河北殺所獲唐將哥舒翰程千里等三十餘人而去許遠死于偃師壬戌廣平王俶入東京回紇意猶未厭俶患之父老請率羅錦萬匹以賂回紇回紇乃止○成都使還上皇誥曰當與我劍南一道自奉不復來矣上憂懼不知所爲後使者至上皇初得上請歸東宮表彷徨不能食欲不歸及羣臣表至乃大喜命食作樂下誥定行日上召李泌告之曰皆卿力也泌求歸山不已上固留之不能得乃聽歸衡山敕郡縣爲之築室於山中給三品料○癸亥上發鳳翔遣太子太師韋見素入蜀奉迎上皇○乙丑郭子儀遣左兵馬使張用濟右武鋒使渾釋之將兵取河陽及河內嚴莊來降陳留人殺尹子奇舉郡降田承嗣圍來瑱於潁川亦遣使來降郭子儀應之緩承嗣復叛與武令珣皆走河北制以瑒爲河南節度使○丙寅上至望賢宮得東京捷奏丁卯上入西京百姓出國門奉迎二十里不絕舞躍呼萬歲有泣者上入居大明宮御史中丞崔器令百官受賊官爵者皆脫巾徒跣立於含元殿前搏膺頓首請罪環之以兵使百官臨視之○太廟爲賊所焚上素服向廟哭三日是日上皇發蜀郡○安慶緒走保鄴郡改鄴郡爲安成府改元天成從騎不過三百步卒不過千人諸將阿史那承慶等散投常山趙郡范陽旬日間蔡希德自上黨田承嗣自潁川武令珣自南陽各帥所部兵歸之又召募河北諸郡人衆至六萬軍聲復振○廣平王俶之入東京也百官受安祿山父子官者陳希烈等三百餘人皆素服悲泣請罪俶以上旨釋之尋勒赴西京己巳崔器令詣朝堂請罪如西京百官之儀然後收繫大理京兆獄其府縣所由祇承人等受賊驅使追捕者皆收繫之初汲郡甄濟有操行隱居青巖山安祿山爲采訪使奏掌書記濟察安祿山有異志詐得風疾昇歸家祿山反使蔡希德引行刑者二人封刀召之濟引首待刀希德以實病白祿山後安慶緒亦使人強昇至東京月餘會廣平王俶平東京濟起詣軍門上謁俶遣詣京師上命館之於三司令受賊官爵者

列拜以愧其心以濟爲祕書郎國子司業蘇源明稱病不受祿山官上擢爲考功郎中知制誥壬申上御丹鳳門下制士庶受賊官祿爲賊用者令三司條件聞奏其因戰被虜或所居密近因與賊往來者皆聽自首除罪其子女爲賊所污者勿問○癸酉回紇葉護自東京還上命百官迎之於長樂驛上與宴於宣政殿葉護奏以軍中馬少請留其兵於沙苑自歸取馬還爲陛下掃除范陽餘孽上賜而遣之○十一月廣平王俶郭子儀來自東京上勞子儀曰吾之家國由卿再造○張鎬帥魯吳來瑒吳王祇李嗣業李奐五節度徇河南河東郡縣皆下之惟能元皓據北海高秀巖據大同未下○己丑以回紇葉護爲司空忠義王歲遣回紇緡二萬匹使就朔方軍受之○以嚴莊爲司農卿○上之在彭原也更以粟爲九廟主庚寅朝享於長樂殿○丙申上皇至鳳翔從兵六百餘人上皇命悉以甲兵輸郡庫上發精騎三千奉迎十二月丙午上皇至咸陽上備法駕迎於望賢宮上皇在宮南樓上釋黃袍著紫袍望樓下馬趨進拜舞於樓下上皇降樓撫上而泣上捧上皇足嗚咽不自勝上皇索黃袍自爲上著之上伏地頓首固辭上皇曰天數人心皆歸於汝使朕得保養餘齒汝之孝也上不得已受之父老在杖外歡呼且拜上令開仗縱千餘人入謁上皇曰臣等今日復睹二聖相見死無恨矣上皇不肯居正殿曰此天子之位也上固請自扶上皇登殿尙食進食上品嘗而薦之丁未將發行宮上親爲上皇習馬而進之上皇上皇上馬親執鞚行數步上皇止之上乘馬前引不敢當馳道上皇謂左右曰吾爲天子五十年未爲貴今爲天子父乃貴耳左右皆呼萬歲上皇自開遠門入大明宮御含元殿慰撫百官乃詣長樂殿謝九廟主勸哭久之即日幸興慶宮遂居之上累表請避位還東京上皇不許○辛亥以禮部尙書李峴兵部侍郎呂諲爲詳理使與御史大夫崔器共按陳希烈等獄峴以殿中侍御史李栖筠爲詳理判官栖筠多務平恕故人皆怨諲器之刻深而峴獨得美譽○戊午上御丹鳳樓赦



天下惟與安祿山同反。及李林甫王鉞楊國忠子孫不在免例。立廣平王俶爲楚王。加郭子儀司徒。李光弼司空。自餘蜀郡靈武扈從立功之臣。皆進階賜爵。加食邑有差。李愬盧奕顏杲卿袁履謙許遠張巡張介然蔣清龐堅等。皆加贈官。其子孫戰亡之家。給復二載。郡縣來載租庸三分蠲一。近所改郡名官名。一依故事。以蜀郡爲南京。鳳翔爲西京。西京爲中京。以張良娣爲淑妃。立皇子南陽王係爲趙王。新城王僅爲彭王。潁川王倓爲兗王。東陽王佖爲涇王。僂爲襄王。僊爲杞王。僖爲召王。召爲興王。侗爲定王。議者或罪張巡以守睢陽不去。與其食人。曷若全人。其友人李翰爲之作傳。表上之。以爲巡以寡擊衆。以弱制強。保江淮以待陛下之師。師至而巡死。巡之功大矣。而議者或罪巡以食人。愚巡以守死。善過惡揚。錄瑕弃用。臣竊痛之。巡所以固守者。以待諸軍之救。救不至而食盡。食既盡而及人。乖其素志。設使巡守城之初。已有食人之心。損數百之衆。以全天下。臣猶曰。功過相掩。況非其素志乎。今巡死大難。不賸休明。唯有令名。是其榮祿。若不時紀錄。恐遠而不傳。使巡生死不遇。誠可悲焉。臣敢撰傳一卷。獻上。乞編列史官。衆議由是始息。是後赦令無不及李愬等。而程千里獨以生執賊庭。不沾褒贈。○甲子。上皇御宣政殿。以傳國寶授上。上始涕泣而受之。○安慶緒之北走也。其大將北平王李歸仁及精兵曳落河同羅六州胡數萬人。皆潰歸范陽。所過俘掠人物無遺。史思明厚爲之備。且遣使逆招之。范陽境曳落河六州胡皆降。同羅不從。思明縱兵擊之。同羅大敗。悉奪其所掠餘衆。走歸其國。慶緒忌思明之彊。遣阿史那承慶安守忠往徵兵。因密圖之。判官耿仁智說思明曰。大夫崇重。人莫敢言。仁智願一言而死。思明曰。何也。仁智曰。大夫所以盡力於安氏者。迫於凶威耳。今唐室中興。天子仁聖。大夫誠帥所部歸之。此轉禍爲福之計也。裨將烏承玘亦說思明曰。今唐室再造。慶緒葉上露耳。大夫奈何與之俱亡。若歸款朝廷。以自湔洗。易於反掌耳。思明以爲然。承慶守忠以五千勁騎自隨。至范陽。

思明悉衆數萬逆之。相距一里所。使人謂承慶等曰。相公及王遠至。將士不勝其喜。然邊兵怯懦。懼相公之衆。不敢進。願弛弓以安之。承慶等從之。思明引承慶入內廳。樂飲。別遣人收其甲兵。諸郡兵皆給糧。縱遣之。願留者厚賜。分隸諸營。明日。囚承慶等。遣其將竇子昂奉表。以所部十三郡及兵八萬來降。并帥其河東節度使高秀巖。亦以所部來降。乙丑。子昂至京師。上大喜。以思明爲歸義王。范陽節度使。子七人。皆除顯官。遣內侍李思敬與烏承恩往宣慰。使將所部兵討慶緒。先是慶緒以張忠志爲常山太守。思明召忠志還范陽。以其將薛萼攝恒州刺史。開井陘路。招趙郡太守陸濟降之。命其子朝義將兵五千人。攝冀州刺史。以其將令狐彰爲博州刺史。烏承恩所至。宣布詔旨。滄瀛安深德棣等州皆降。雖相州未下。河北率爲唐有矣。○上皇加上尊號。曰光天文武大聖孝感皇帝。○郭子儀還東都。經營河北。○崔器呂諲上言。諸陷賊官。背國從僞。準律皆應處死。上欲從之。李峴以爲賊陷兩京。天子南巡。人自逃生。此屬皆陛下親戚。或勳舊子孫。今一槩以叛法處死。恐乖仁恕之道。且河北未平。羣臣陷賊者尚多。若寬之。足開自新之路。若盡誅。是堅其附賊之心也。書曰。殲厥渠魁。脅從罔理。諲器守文不達大體。惟陛下圖之。爭之累日。上從峴議。以六等定罪。重者刑之於市。次賜自盡。次重杖一百。次三等流貶。壬申。斬達奚珣等十八人於城西南獨柳樹下。陳希烈等七人。賜自盡於大理。事應受杖者。於京兆府門上欲免。張均張垆死。上皇曰。均垆事賊。皆任權要。均仍爲賊。毀吾家事。罪不可赦。上叩頭再拜曰。臣非張說父子。無有今日。臣不能活。均垆使死者有知。何面目見說於九泉。因俯伏流涕。上皇命左右扶上起。曰。張垆爲汝長流嶺表。張均必不可活。汝更勿救。上泣而從命。安祿山所署河南尹張萬頃。獨以在賊中能保庇百姓。不坐。頃之有自賊中來者。言唐羣臣從安慶緒在鄴者。聞廣平王赦陳希烈等。皆自悼恨。失身賊庭。及聞希烈等誅。乃止。上甚悔之。



臣光曰。為人臣者。策名委質。有死無貳。希烈等或貴為卿相。或親連肺腑。於承平之日。無一言以規入主之失。救社稷之危。迎合苟容。以竊富貴。及四海橫潰。乘輿播越。偷生苟免。顧戀妻子。媚賊稱臣。為之陳力。此乃屠酤之所羞。犬馬之不如。儻各全其首領。復其官爵。是諂諛之臣。無往而不得計也。彼顏杲卿。張巡之徒。世治則擯斥外方。沈抑下僚。世亂則委弃孤城。壘粉寇手。何為善者之不幸。而為惡者之幸。朝廷待忠義之薄。而保姦邪之厚。邪。至於微賤之臣。巡徼之隸。謀議不預。號令不及。朝聞親征之詔。夕失警蹕之所。乃復責其不能扈從。不亦難哉。六等議刑。斯亦可矣。又何悔焉。

故妃韋氏既廢為尼。居禁中。是歲卒。○置左右神武軍。取元從子弟充。其制皆如四軍。總謂之北牙六軍。又擇善騎射者千人。為殿前射生手。分左右廂。號曰英武軍。○升河中防禦使為節度。領蒲絳等七州。分劍南為東西川。節度東川。領梓遂等十二州。又置荆澧節度。領荆澧等五州。夔峽節度。領夔峽等五州。更安西曰鎮西。

乾元元年春正月戊寅。上皇御宣政殿授冊。加上尊號。上固辭大聖之號。上皇不許。上尊。上皇曰。太上至道聖皇帝。先是。官軍既克京城。宗廟之器。及府庫資財。多散在民間。遣使檢括。頗有煩擾。乙酉。敕盡停之。乃命京兆尹李峴。安撫坊市。○二月癸卯朔。以殿中監李輔國兼太僕卿。輔國依附張淑妃。判元帥府行軍司馬。勢傾朝野。○安慶緒所署北海節度使能元皓。舉所部來降。以為鴻臚卿。充河北招討使。○丁未。上御明鳳門。赦天下。改元。盡免百姓今載租庸。復以載為年。○庚午。以安東副大都護王玄志為營州刺史。充平盧節度使。○三月甲戌。徙楚王俶為成王。○戊寅。立張淑妃為皇后。○鎮西北庭行營節度使李嗣業。屯河內。癸巳。北庭兵馬使王惟良。謀作亂。嗣業與裨將荔菲元禮討誅之。○安慶緒之北走也。其平原太守王暕。清河太守宇文寬。皆殺其使者來降。慶緒使其將蔡希德。安太清。攻拔之。生

擒以歸。高於鄴市。凡有謀歸者。誅及種族。乃至部曲州縣官屬。連坐死者甚衆。又與其羣臣。歃血盟於鄴南。而人心益離。慶緒聞李嗣業在河內。夏四月。與蔡希德。崔乾祐。將步騎二萬。涉沁水。攻之不勝而還。○癸卯。以太子少師號王巨為河南尹。充東京留守。○辛卯。新主入太廟。甲寅。上享太廟。遂祀昊天上帝。乙卯。御明鳳門。赦天下。○五月壬午。制。停采訪使。改黜陟使為觀察使。○張鎬性簡澹。不事。中要聞。史思明請降。上言。思明凶險。因亂竊位。力彊則衆附。勢奪則人離。彼雖入面。心如野獸。難以德懷。願勿假以威權。又言。滑州防禦使許叔冀。狡猾多詐。臨難必變。請徵入宿衛。時上以寵納思明。會中使自范陽及白馬來。皆言。思明叔冀忠懇可信。上以鎬為不切事機。戊子。罷為荊州防禦使。以禮部尚書崔光遠為河南節度使。○張后生與王伾。纔數歲。欲以為嗣。上疑未決。從容謂考功郎中知制誥李揆曰。成王長且有功。朕欲立為太子。卿意何如。揆再拜賀曰。此社稷之福。臣不勝大慶。上喜曰。朕意決矣。庚寅。立成王俶為皇太子。揆。玄道之玄孫也。○乙未。以崔圓為太子少師。李麟為少傅。皆罷政事。上頗好鬼神。太常少卿王與專依鬼神。以求媚。每議禮儀。多雜以巫祝俚俗。上悅之。以與為中書侍郎。同平章事。贈故常山太守顏杲卿太子太保。諡曰忠節。以其子威明為太僕丞。杲卿之死也。楊國忠用張通幽之譖。竟無褒贈。上在鳳翔。顏真卿為御史大夫。泣訴於上。上乃出通幽為普安太守。具奏其狀於上。上皇杖殺通幽。杲卿子泉明。為王承業所留。因寓居壽陽。為史思明所虜。裹以牛革。送於范陽。會安慶緒初立。有赦得免。思明降。乃得歸。求其父尸於東京。得之。遂并袁履謙尸。棺斂以歸。杲卿姊妹女。及泉明之子。皆流落河北。真卿時為蒲州刺史。使泉明往求之。泉明號泣求訪。哀感路人。久乃得之。泉明詣親故乞索。隨所得多少贖之。先姑姊妹。而後其子。姑女為賊所掠。泉明有錢二百緡。欲贖己女。閱其姑愁悴先贖姑女。比更得錢。求其女。已失所在。遇羣從姊妹。及父時將吏袁履謙等妻子流落者。皆



與之歸。凡五十餘家。三百餘口。均減資糧。一如親戚。至蒲州。真卿悉加贍給。久之。隨其所適。而資送之。袁履謙妻疑履謙衣衾儉薄。發棺視之。與臬卿無異。乃始慙服。○六月。己酉。立太壇於南郊之東。從王瓊之請也。上嘗不豫。卜云。山川爲祟。瓊請遣中使。與女巫乘驛。分禱天下名山大川。巫恃勢。所過煩擾州縣。干求受贓。黃州有巫。盛年美色。從無賴少年數十。爲蠱尤甚。至黃州。宿於驛舍。刺史左震。晨至驛門。肩鑣不可啓。震怒。破鑣而入。曳巫於階下。斬之。所從少年悉斃之。籍其贓數十萬。具以狀聞。且請以其贓代貧民租。遣中使還京師。上無以罪也。○以開府儀同三司李嗣業爲懷州刺史。充鎮西北庭行營節度使。○山人韓穎。改造新曆。丁巳。初行。穎曆。○戊午。敕兩京陷賊官。三司推究未畢者。皆釋之。貶降者。續處分。○太子少師房瑄。既失職。頗怏怏。多稱疾不朝。而賓客朝夕盈門。其黨爲之揚言於朝。云。瑄有文武才。宜大用。上聞而惡之。下制數瑄罪。貶幽州刺史。前祭酒劉秩。貶閬州刺史。京兆尹嚴武。貶巴州刺史。皆瑄黨也。○初。史思明以列將。事平盧軍使烏知義。知義善待之。知義子承恩。爲信都太守。以郡降思明。思明思舊恩而全之。及安慶緒敗。承恩勸思明降唐。李光弼以思明終當叛亂。而承恩爲思明所親信。陰使圖之。又勸上。以承恩爲范陽節度副使。賜阿史那承慶鐵券。令共圖思明。上從之。承恩多以私財募部曲。又數衣婦人服。詣諸將營。說誘之。諸將以白思明。思明疑未察。會承恩入京師。上使內侍李思敬。與之俱至范陽。宣慰承恩。既宣旨。思明留承恩館於府中。帷其床。伏二人於床下。承恩少子在范陽。思明使省其父。夜中承恩密謂其子曰。吾受命除此逆胡。當以吾爲節度使。二人於牀下大呼而出。思明乃執承恩。索其裝囊。得鐵券。及光弼牒。牒云。承慶事成。則付鐵券。不然。不可付也。又得簿書數百紙。皆先從思明反者將士名。思明責之曰。我何負於汝。而爲此。承恩謝曰。死罪。此皆李光弼之謀也。思明乃集將佐吏民。西向大哭曰。臣以十三萬衆降朝廷。何負陛下。而欲殺臣。遂榜殺

承恩父子。連坐死者二百餘人。承恩弟承玘走免。思明囚思敬。表上其狀。上遣中使慰諭思明曰。此非朝廷與光弼之意。皆承恩所爲。殺之甚善。會三司議陷賊官罪狀。至范陽。思明謂諸將曰。陳希烈輩。皆朝廷大臣。上皇自棄之。幸蜀。今猶不免於死。況吾屬。本從安祿山反乎。諸將請思明表。求誅光弼。思明從之。命判官耿仁智。與其僚張不矜。爲表云。陛下不爲臣誅光弼。臣當自引兵。就太原誅之。不矜草表。以示思明。及將入函。仁智悉削去之。寫表者。以白思明。思明命執二人。斬之。仁智事思明久。思明憐欲活之。復召入。謂曰。我任使汝。垂三十年。今日非我負汝。仁智大呼曰。人生會有一死。得盡忠義。死之善者也。今從大夫反。不過延歲月。豈若速死之愈乎。思明怒。亂捶之。腦流于地。烏承玘奔太原。李光弼表爲昌化郡王。充石嶺軍使。○秋。七月。丙戌。初鑄當十大錢。文曰。乾元重寶。從御史中丞第五琦之謀也。○丁亥。冊命回紇可汗曰。英武威遠毗伽闕可汗。以上幼女寧國公主妻之。以殿中監漢中王瑀爲冊禮使。右司郎中李巽副之。命左僕射裴冕送公主。至境上。戊子。又以司勳員外郎鮮于叔明爲瑀副。叔明。仲通之弟也。甲午。上送寧國公主。至咸陽。公主辭訣曰。國家事重。死且無恨。上流涕而還。瑀等至回紇牙帳。可汗衣赭袍。胡帽。坐帳中。榻上。儀衛甚盛。引瑀等。立於帳外。瑀不拜而立。可汗曰。我與天可汗兩國之君。君臣有禮。何得不拜。瑀與叔明對曰。羈者唐與諸國爲昏。皆以宗室女爲公主。今天子以可汗有功。自以所生女妻可汗。恩禮至重。可汗奈何以子壻傲婦翁。坐榻上受冊命邪。可汗改容。起受冊命。明日。立公主爲可敦。舉國皆喜。○乙未。郭子儀入朝。○八月。壬寅。以青登等五州節度使許叔冀爲滑濮等六州節度使。○庚戌。李光弼入朝。丙辰。以郭子儀爲中書令。光弼爲侍中。丁巳。子儀詣行營。○回紇遣其臣骨吸特勒。及帝德將驍騎三千。助討安慶緒。上命朔方左武鋒使僕固懷恩領之。○九月。庚午朔。以右羽林大將軍趙泚爲蒲同虢三州節度使。○丙子。招討党項使王仲昇。斬党項酋長



拓拔戎德傳首。○安慶緒之初至鄴也。雖枝黨離析。猶據七郡六十餘城。甲兵資糧豐備。慶緒不親政事。專以繕臺沼樓船。酣飲爲事。其大臣高尚。張通儒等。爭權不叶。無復綱紀。蔡希德有才略。部兵精銳。而性剛。好直言。通儒譖而殺之。麾下數千人。皆逃散。諸將怨怒。不爲用。以崔乾祐爲天下兵馬使。總中外兵。乾祐復戾好殺。士卒不附。庚寅。命朔方郭子儀。淮西魯吳。興平李奂。滑濮許叔冀。鎮西北庭李嗣業。鄭季廣。河南崔光遠。七節度使。及平盧兵馬使董秦。將步騎二十萬討慶緒。又命河東李光弼。關內澤潞王思禮。二節度使。將所部兵助之。上以子儀光弼皆元勳。難相統屬。故不置元帥。但以宦官開府儀同三司魚朝恩爲觀軍容宣慰處置使。觀軍容之名自此始。○癸巳。廣州奏。大食波斯圍州城。刺史韋利見。踰城走。二國兵掠倉庫。焚廬舍。浮海而去。○冬。十月。甲辰。冊太子。更名曰豫。自中興以來。羣下無復賜物。至是始有新鑄大錢。百官六軍。需賚有差。○郭子儀引兵。自杏園濟河。東至獲嘉。破安太清。斬首四千級。捕虜五百人。太清走保衛州。子儀進圍之。丙午。遣使告捷。魯吳自陽武濟。季廣琛。崔光遠。自酸棗濟。與李嗣業兵。皆會子儀於衛州。慶緒悉舉鄴中之衆七萬。救衛州。分三軍。以崔乾祐將上軍。田承嗣將下軍。慶緒自帥中軍。子儀使善射者三千人。伏于壘垣之內。令曰。我退。賊必逐我。汝乃登壘。鼓譟而射之。既而與慶緒戰。僞退。賊逐之。至壘下。伏兵起。射之。矢如雨注。賊還走。子儀復引兵逐之。慶緒大敗。獲其弟慶和。殺之。遂拔衛州。慶緒走。子儀等追之。至鄴。許叔冀。董秦。王思禮。及河東兵馬使薛兼訓。皆引兵繼至。慶緒收餘兵。拒戰於愁思岡。又敗。前後斬首三萬級。捕虜千人。慶緒乃入城固守。子儀等圍之。慶緒窘急。遣薛嵩求救於史思明。且請以位讓之。思明發范陽兵十三萬。欲救鄴。觀望未敢進。先遣李歸仁將步騎一萬軍于滏陽。遙爲慶緒聲勢。○甲寅。上皇幸華清宮。十一月。丁丑。還京師。○崔光遠拔魏州。丙戌。以前兵部侍郎蕭華爲魏州防禦使。會史思明分軍爲三。一出邢洛。一

出冀。一自洹水趣魏州。郭子儀奏。以崔光遠代華。十二月。癸卯。敕。以光遠領魏州刺史。○甲辰。置浙江西道節度使。領蘇潤等十州。以昇州刺史韋黃裳爲之。庚戌。置浙江東道節度使。領越睦等八州。以戶部尚書李峘爲之。兼淮南節度使。○己未。羣臣請上尊號。曰乾元大聖光天文武孝感皇帝。許之。○史思明乘崔光遠初至。引兵大下。光遠使將軍李處崟拒之。賊勢盛。處崟連戰不利。還趣城。賊追至城下。揚言曰。處崟召我來。何爲不出。光遠信之。腰斬處崟。處崟驍將衆所恃。既死。衆無鬪志。光遠脫身走。還汴州。丁卯。思明陷魏州。所殺三萬人。○平盧節度使王玄志薨。上遣中使往撫將士。且就察軍中所欲立者。授以旌節。高麗人李懷玉。爲裨將。殺玄志之子。推侯希逸爲平盧軍使。希逸之母懷玉姑也。故懷玉立之。朝廷因以希逸爲節度副使。節度使由軍士廢立。自此始。

臣光曰。夫民生有欲。無主則亂。是故聖人制禮以治之。自天子諸侯。至於卿大夫士庶人。尊卑有分。大小有倫。若綱條之相維。臂指之相使。是以民服事其上。而下無覬覦。其在周易。上天下澤履。象曰。君子以辨上下。定民志。此之謂也。凡人君所以能有其臣民者。以八柄存乎己也。苟或捨之。則彼此之勢均。何以使其下哉。肅宗遭唐中衰。幸而復國。是宜正上下之禮。以綱紀四方。而偷取一時之安。不思永久之患。彼命將帥統藩維。國之大事也。乃委一介之使。徇行伍之情。無問賢不肖。惟其所欲。與者則授之。自是之後。積習爲常。君臣循守。以爲得策。謂之姑息。乃至偏裨士卒。殺逐主帥。亦不治其罪。因其位任授之。然則爵祿廢置。殺生予奪。皆不出於上。而出於下。亂之生也。庸有極乎。且夫有國家者。賞善而誅惡。故爲善者勸。爲惡者懲。彼爲人下。而殺逐其上。惡孰大焉。乃使之擁旄秉鉞。師長一方。是賞之也。賞以勸惡。惡其何所不至乎。書云。遠乃猷。詩云。猷之未遠。是謂大諫。孔子曰。人無遠慮。必有近憂。爲天下之政。而專事姑息。其憂患可勝校乎。由是。爲下者常眊眊。



焉伺其上。苟得間。則攻而族之。為上者常惴惴焉畏其下。苟得間。則掩而屠之。爭務先發。以逞其志。非有相保養。為俱利久存之計也。如是而求天下之安。其可得乎。迹其厲階。肇於此矣。蓋古者治軍。必本於禮。故晉文公城濮之戰。見其師少長有禮。知其可用。今唐治軍。而不顧禮。使士卒得以陵偏裨。偏裨得以陵將帥。則將帥之陵天子。自然之勢也。由是禍亂繼起。兵革不息。民墜塗炭。無所控訴。凡二百餘年。然後○大宋受命。○太祖始制軍法。使以階級相承。小有違犯。咸伏斧質。是以上下有叙。令行禁止。四征不庭。無思不服。宇內乂安。兆民允殖。以迄于今。皆由治軍以禮故也。豈非詒謀之遠哉。

是歲。置振武節度使。領鎮北大都護府麟勝二州。又置陝虢華及豫許汝二節度使。安南經略使為節度使。領交陸等十一州。○吐蕃陷河源軍。

資治通鑑卷第二百一十

資治通鑑卷第二百一十一

唐紀三十七

肅宗文明武德大聖大宣孝皇帝下之上

乾元二年春正月己巳朔。史思明築壇於魏州城北。自稱大聖燕王。以周摯為行軍司馬。李光弼曰。思明得魏州。而按兵不進。此欲使我懈惰。而以精銳掩吾不備也。請與朔方軍同逼魏城。求與之戰。彼懲嘉山之敗。必不敢輕出。得曠日引久。則鄴城必拔矣。慶緒已死。彼則無辭以用其眾也。魚朝恩以為不可。乃止。○戊寅。上祀九宮貴神。用王璵之言也。乙卯。耕籍田。○鎮西節度使李嗣業。攻鄴城。為流矢所中。丙申。薨。兵馬使荔非元禮代將其眾。初。嗣業表段秀實為懷州長史。知留後事。時諸軍屯戍日久。財竭糧盡。秀實獨運芻粟募兵市馬。以奉鎮西行營。相繼於道。○二月壬子。月食既。先是。百官請加皇后尊號。曰輔聖。上以問中書舍人李揆。對曰。自古皇后無尊號。惟韋后有之。豈足為法。上驚曰。庸人幾誤我。會月食。事遂寢。后與李輔國相表裏。橫於禁中。干豫政事。請託無窮。上頗不悅。而無如之何。○郭子儀等九節度使圍鄴城。築壘。再重。穿塹三重。壅漳水灌之。城中井泉皆溢。構棧而居。自冬涉春。安慶緒堅守。以待史思明。食盡。一鼠直錢四千。淘膳裁及馬矢。以食馬。人皆以為克在朝夕。而諸軍既無統帥。進退無所稟。城中人欲降者。礙水深不得出。城久不下。上下解體。思明乃自魏州引兵趣鄴。使諸將去城各五十里為營。每營擊鼓三百面。遙脅之。又每營選精騎五百。日於城下抄掠。官軍出。輒散歸其營。諸軍人馬牛車。日有所失。樵採甚艱。晝備之。則夜至。夜備



之則晝至。時天下饑饉，轉餉者南自江淮，西自并汾，舟車相繼。思明多遣壯士，竊官軍裝號，督趣運者，責其稽緩，妄殺戮人。運者駭懼，舟車所聚，則密縱火焚之。往復聚散，自相辨讖，而官軍邏捕不能察也。由是諸軍乏食，人思自潰。思明乃引大軍直抵城下，官軍與之刻日決戰。三月壬申，官軍步騎六十萬，陳於安陽河北。思明自將精兵五萬敵之。諸軍望之，以為遊軍，未介意。思明直前奮擊，李光弼、王思禮、許叔冀、魯吳先與之戰，殺傷相半。魯吳中流矢，郭子儀承其後，未及布陳，大風忽起，吹沙拔木，天地晝晦，咫尺不相辨。兩軍大驚，官軍潰而南，賊潰而北。棄甲仗輜重，委積於路。子儀以朔方軍斷河陽橋，保東京，戰馬萬匹，惟存三千。甲仗十萬，遺棄殆盡。東京士民驚駭，散奔山谷，留守崔圓、河南尹蘇震等官吏，南奔襄鄧。諸節度各潰歸本鎮，士卒所過剽掠，更不能止。旬日方定，惟李光弼、王思禮、整勒部伍全軍以歸。子儀至河陽，將謀城守，師人相驚，又奔缺門。諸將繼至，衆及數萬，議捐東京，退保蒲陝。都虞候張用濟曰：蒲陝荐飢，不如守河陽。賊至，併力拒之。子儀從之。使都游奕使靈武韓遊瓌將五百騎前趣河陽，用濟以步卒五千繼之。周摯引兵爭河陽後至，不得入而去。用濟役所部兵築南北兩城而守之。段秀實帥將士妻子及公私輜重，自野戍渡河，待命於河清之南岸。荔非元禮至而軍焉，諸將各上表謝罪。上皆不問，惟削崔圓階封，貶蘇震為濟王府長史，削銀青階。史思明審知官軍潰去，自沙河收整士衆，還屯鄴城南。安慶緒收子儀營中糧，得六七萬石，與孫孝哲、崔乾祐謀閉門更拒思明。諸將曰：今日豈可復背史王乎？思明不與慶緒相聞，又不南追官軍，但日於軍中饗士，張通儒、高尚等言於慶緒曰：史王遠來，臣等皆應迎謝。慶緒曰：任公覲往，思明見之涕泣，厚禮而歸之。經三日，慶緒不至。思明密召安太清，令誘之。慶緒窘蹙，不知所為，乃遣太清上表稱臣於思明，請待解甲入城。奉上璽綬，思明省表曰：何至如此。因出表，徧示將士，咸稱萬歲。乃手疏唁慶緒，而不稱臣。且曰：願為兄弟之國，更作

藩籬之援，鼎足而立。猶或庶幾。北面之禮，固不敢受。并封表還之。慶緒大悅，因請歃血同盟。思明許之。慶緒以三百騎詣思明營，思明令軍士擐甲執兵以待之。引慶緒及諸弟入至庭下。慶緒再拜稽首曰：臣不克荷負，棄失兩都，久陷重圍，不意大王以太上皇之故，遠垂救援。使臣應死復生，摩頂至踵，無以報德。思明忽震怒曰：棄失兩都，亦何足言。爾為人子，殺父奪其位，天地所不容。吾為太上皇討賊，豈受爾佞媚乎？即命左可牽出，并其四弟及高尚、孫孝哲、崔乾祐，皆殺之。張通儒、李庭望等悉授以官。思明勒兵入鄴城，收其士馬，以府庫賞將士。慶緒先所有州縣及兵，皆歸於思明。遣安太清將兵五千取懷州，因留鎮之。思明欲遂西略，慮根本未固，乃留其子朝義守相州，引兵還范陽。○甲申，回紇骨啜特勒帝德等十五人自相州奔還西京，上宴之於紫宸殿，賞賜有差。庚寅，骨啜特勒等辭還行營。○辛卯，以荔非元禮為懷州刺史，權知鎮西北庭行營節度使。元禮復以段秀實為節度判官。○甲午，以兵部侍郎呂諲同平章事。乙未，以中書侍郎同平章事苗晉卿為太子太傅，王璵為刑部尚書，皆罷政事。以京兆尹李峴行吏部尚書，中書舍人兼禮部侍郎李揆為中書侍郎，及戶部侍郎第五琦並同平章事。上於峴恩意尤厚，峴亦以經濟為己任。軍國大事，多獨決於峴。於是京師多盜，李輔國請選羽林騎士五百，以備巡邏。李揆上疏曰：昔西漢以南北軍相制，故周勃因南軍入北軍，遂安劉氏。皇朝置南北牙，文武區分，以相伺察。今以羽林代金吾警夜，忽有非常之變，將何以制之。乃止。○丙申，以郭子儀為東畿山東河東諸道元帥，權知東京留守。以河西節度使來瑱行陝州刺史，充陝虢華州節度使。○夏四月庚子，澤潞節度使王思禮破史思明將楊旻於潞城東。○太子詹事李輔國自上在靈武，判元帥行軍司馬事。侍直帷幄，宣傳詔命，四方文奏，寶印符契，晨夕軍號，一以委之。及還京師，專掌禁兵，常居內宅，制勅必經輔國押署，然後施行。宰相百司，非時奏事，皆因輔國關白承旨，常於銀臺門決天下事。



事無大小。輔國口爲制勅。寫付外施行。事畢聞奏。又置察事數十人。潛令於人間聽察細事。卽行推案。有所追索。諸司無敢拒者。御史臺大理寺重囚。或推斷未畢。輔國追詣銀臺。一時縱之。三司府縣鞠獄。皆先詣輔國咨稟。輕重隨意。稱制勅行之。莫敢違者。宦官不敢斥其官。皆謂之五郎。李揆山東甲族。見輔國執子弟禮。謂之五父。及李峴爲相。於上前叩頭論制勅。皆應由中書出。具陳輔國專權亂政之狀。上感寤。賞其正直。輔國行事多所變更。罷其察事。輔國由是讓行軍司馬。請歸本官。上不許。制比緣軍國務殷。或宣口勅處分。諸色取索。及杖配囚徒。自今一切竝停。如非正宣。竝不得行。中外諸務。各歸有司。英武軍虞候。及六軍諸使。諸司等。比來或因論競。懸自追攝。自今須一切經臺府。如所由處斷不平。聽具狀奏聞。諸律令。除十惡殺人。姦盜造僞外。餘煩冗一切刪除。仍委中書門下。與法官詳定聞奏。輔國由是忌峴。○甲辰。置陳鄭亳節度使。以鄧州刺史魯炆爲之。以徐州刺史尙衡爲青密七州節度使。以興平軍節度使李奐兼豫許汝三州節度使。仍各於境上守捉防禦。九節度之潰於相州也。魯炆所部兵。剽掠尤甚。聞郭子儀退屯河上。李光弼還太原。炆慙懼。飲藥而死。○史思明自稱大燕皇帝。改元順天。立其妻辛氏爲皇后。子朝義爲懷王。以周摯爲相。李歸仁爲將。改范陽爲燕京。諸州爲郡。○戊申。以鴻臚卿李抱玉爲鄭陳穎亳節度使。抱玉安興貴之後也。爲李光弼裨將。屢有戰功。自陳恥與安祿山同姓。故賜姓李氏。○回紇毗伽闕可汗卒。長子葉護先遇殺。國人立其少子。是爲登里可汗。回紇欲以寧國公主爲殉。公主曰。回紇慕中國之俗。故娶中國女爲婦。若欲從其本俗。何必結昏萬里之外邪。然亦爲之勞面而哭。○鳳翔馬坊押官爲劫。天興尉謝夷甫捕殺之。其妻訟冤。李輔國素出飛龍廐。勅監察御史孫鑿鞠之。無冤。又使御史中丞崔伯陽刑部侍郎李曄大理卿權獻鞠之。與鑿同。猶不服。又使侍御史太平毛若虛鞠之。若虛傾巧士。希輔國意。歸罪夷甫。伯陽怒。召若虛詰責。欲劾奏之。若

虛先自歸於上。上匿若虛於簾下。伯陽尋至。言若虛附會中人。鞠獄不直。上怒。叱出之。伯陽貶高要尉。獻貶桂陽尉。曄與鳳翔尹嚴向皆貶嶺下尉。鑿除名。長流播州。吏部尙書同平章事李峴奏。伯陽無罪。責之太重。上以爲朋黨。五月辛巳。貶峴蜀州刺史。右散騎常侍韓擇木入對。上謂之曰。李峴欲專權。今貶蜀州。朕自覺用法太寬。對曰。李峴言直。非專權。陛下寬之。祇益聖德耳。若虛尋除御史中丞。威振朝廷。○壬午。以滑濮節度使許叔冀爲汴州刺史。充滑汴等七州節度使。以試汝州刺史劉展爲滑州刺史。充副使。○六月丁巳。分朔方置邠寧等九州節度使。○觀軍容使魚朝恩惡郭子儀因其敗短之於上。秋七月。上召子儀還京師。以李光弼代爲朔方節度使。兵馬元帥士卒涕泣遮中使。請留子儀。子儀給之曰。我餞中使耳。未行也。因躍馬而去。光弼願得親王爲之副。辛巳。以趙王係爲天下兵馬元帥。光弼副之。仍以光弼知諸節度行營。光弼以河東騎五百馳赴東都。夜入其軍。光弼治軍嚴整。始至。號令一施。士卒壁壘。旌旗精采。皆變。是時朔方將士樂子儀之寬。憚光弼之嚴。左廂兵馬使張用濟屯河陽。光弼以檄召之。用濟曰。朔方非叛軍也。乘夜而入。何見疑之甚邪。與諸將謀。以精銳突入東京。逐光弼。請子儀命其士。皆被甲上馬。銜枚以待。都知兵馬使僕固懷恩曰。鄴城之潰。郭公先去。朝廷責帥。故罷其兵柄。今逐李公。而彊請之。是反也。其可乎。右武鋒使康元寶曰。君以兵請郭公。朝廷必疑郭公。諷君爲之。是破其家也。郭公百口。何負於君乎。用濟乃止。光弼以數千騎東出。汜水。用濟單騎來謁。光弼責用濟。召不時至。斬之。命部將辛京果代領其衆。僕固懷恩繼至。光弼引坐與語。須臾。聞者白蕃渾五百騎至矣。光弼變色。懷恩走出。召麾下將陽責之曰。語汝勿來。何得固違。光弼曰。士卒隨將。亦復何罪。命給牛酒。○以潞沁節度使王思禮兼太原尹。充北京留守。河東節度使初潼關之敗。思禮馬中矢而斃。有騎卒盤屋。張光晟下馬授之。問其姓名。不告而去。思禮陰識其狀貌。求之不獲。及至河東。或譖



代州刺史河西辛雲京。思禮怒之。雲京懼。不知所出。光晟時在雲京麾下。曰。光晟嘗有德於王公。從來不敢言者。恥以此取賞耳。今使君有急。光晟請往見王公。必爲使君解之。雲京喜而遣之。光晟謁思禮。未及言。思禮識之。曰。噫。子非吾故人乎。何相見之晚邪。光晟以實告。思禮大善。執其手流涕曰。吾之有今日。皆子力也。吾求子久矣。引與同榻坐。約爲兄弟。光晟因從容言雲京之冤。思禮曰。雲京過亦不細。今日特爲故人捨之。即日擢光晟爲兵馬使。贈金帛田宅甚厚。○辛卯。以朔方節度副使殿中監僕固懷恩兼太常卿。進爵大寧郡王。懷恩從郭子儀爲前鋒。勇冠三軍。前後戰功居多。故賞之。○八月乙巳。襄州將康楚元。張嘉延。據州作亂。刺史王政奔荊州。楚元自稱南楚霸王。○同紇以寧國公主無子。聽歸。丙辰。至京師。○戊午。上使將軍曹日昇往襄州。慰諭康楚元。貶王政爲饒州長史。以司農少卿張光奇爲襄州刺史。楚元不從。○壬戌。以李光弼爲幽州長史。河北節度等使。○九月甲午。張嘉延襲破荊州。荊南節度使杜鴻漸棄城走。澧郎郢峽歸等州官吏聞之。爭潛竄山谷。○戊辰。更令絳州鑄乾元重寶大錢。加以重輪。一當五十。在京百官。先以軍旅皆無俸祿。宜以新錢給其冬料。○丁亥。以太子少保崔光遠爲荆襄招討使。充山南東道處置兵馬都使。以陳頴亭申節度使王仲昇爲申沔等五州節度使。知淮南西道行營兵馬。○史思明使其子朝清守范陽。命諸郡太守各將兵三千從己。向河南。分爲四道。使其將令狐彰將兵五千。自黎陽濟河。取滑州。思明自濮陽。史朝義自白阜。周摯自胡良。濟河。會于汴州。李光弼方巡河上。諸營聞之。還入汴州。謂汴滑節度使許叔冀曰。大夫能守汴州十五日。我則將兵來救。叔冀許諾。光弼還東京。思明至汴州。叔冀與戰不勝。遂與濮州刺史董秦及其將梁浦劉從諫。田神功等降之。思明以叔冀爲中書令。與其將李詳守汴州。厚待董秦。收其妻子。置長蘆爲質。使其將南德信與梁浦劉從諫。田神功等數十人。徇江淮。神功。南宮人也。思明以爲平盧兵馬使。頃之。

神功襲德信斬之。從諫脫身走。神功將其衆來降。思明乘勝西攻鄭州。光弼整衆徐行。至洛陽。謂留守韋陟曰。賊乘勝而來。利在按兵。不利速戰。洛城不可守。於公計何如。陟請留兵於陝。退守潼關。據險以挫其銳。光弼曰。兩敵相當。貴進忌退。今無故棄五百里地。則賊勢益張矣。不若移軍河陽。北連澤潞。利則進取。不利則退守。表裏相應。使賊不敢西侵。此猿臂之勢也。夫辨朝廷之禮。光弼不如公。論軍旅之事。公不如光弼。陟無以應。判官韋損曰。東京帝宅侍中。奈何不守。光弼曰。守之則汜水嶧嶺龍門皆應置兵。子爲兵馬判官。能守之乎。遂移牒留守韋陟。使帥東京官屬西入關。牒河南尹李若幽。使帥吏民出城避賊。空其城。光弼帥軍士運油鐵諸物詣河陽。爲守備。光弼以五百騎殿。時思明遊兵已至石橋。諸將請曰。今自洛城而北乎。當石橋而進乎。光弼曰。當石橋而進。及日暮。光弼秉炬徐行。部曲堅重。賊引兵躡之。不敢逼。光弼夜至河陽。有兵二萬。糧纒支十日。光弼按閱守備。部分士卒。無不嚴辨。庚寅。思明入洛陽。城空無所得。畏光弼捨其後。不敢入宮。退屯白馬寺南。築月城於河陽南。以拒光弼。於是鄭滑等州相繼陷沒。韋陟李若幽皆寓治於陝。○冬十月丁酉。下制。親征史思明。羣臣上表諫。乃止。○史思明引兵攻河陽。使驍將劉龍仙詣城下挑戰。龍仙恃勇。舉右足加馬鬣上。慢罵光弼。光弼顧諸將曰。誰能取彼者。僕固懷恩請行。光弼曰。此非大將所爲。左右言。裨將白孝德可往。光弼召問之。孝德請行。光弼問。須幾何兵。對曰。請挺身取之。光弼壯其志。然固問所須。對曰。願選五十騎。出壘門。爲後繼。兼請大軍助鼓譟。以增氣。光弼撫其背而遣之。孝德挾二矛。策馬亂流而進。半涉。懷恩賀曰。克矣。光弼曰。鋒未交。何以知之。懷恩曰。觀其攬轡安閑。知其萬全。龍仙見其獨來。甚易之。稍近將動。孝德搖手示之。若非來爲敵者。龍仙不測而止。去之十步。乃與之言。龍仙慢罵如初。孝德息馬良久。因瞋目謂曰。賊識我乎。龍仙曰。誰也。曰。我白孝德也。龍仙曰。是何狗彘。孝德大呼。運矛躍馬。搏之。城上鼓譟。五十騎繼



進。龍仙矢不及發。環走隄上。孝德追及。斬首攜之。以歸。賊衆大駭。孝德本安西胡人也。思明有良馬千餘匹。每日出於河南渚浴之。循環不休。以示多。光弼命索軍中牝馬。得五百匹。繫其駒於城內。俟思明馬至水際。盡出之。馬嘶不已。思明馬悉浮渡河。一時驅之入城。思明怒。列戰船數百艘。泛火船於前而隨之。欲乘流燒浮橋。光弼先貯百尺長竿數百枚。以巨木承其根。氈裹鐵。又置其首。以迎火船。而又之。船不得進。須臾。自焚盡。又以拒戰船於橋上。發礮石擊之。中者皆沈沒。賊不勝而去。思明見兵於河清。欲絕光弼糧道。光弼軍于野水渡。以備之。既夕。還河陽。留兵千人。使部將雍希穎守其柵。曰。賊將高庭暉。李日越。喻文景。皆萬人敵也。思明必使一人來劫我。我且去之。汝待於此。若賊至。勿與之戰。降則與之俱來。諸將莫諭其意。皆竊笑之。既而思明果謂李日越曰。李光弼長於憑城。今出在野。此成擒矣。汝以鐵騎宵濟。爲我取之。不得則勿返。日越將五百騎。晨至柵下。希穎阻壕。休卒。吟嘯相視。日越怪之。問曰。司空在乎。曰。夜去矣。兵幾何。曰。千人。將誰。曰。雍希穎。日越默計久之。謂其下曰。今失李光弼。得希穎而歸。吾死必矣。不如降也。遂請降。希穎與之俱見光弼。光弼厚待之。任以心腹。高庭暉聞之。亦降。或問光弼降二將。何易也。光弼曰。此人情耳。思明常恨不得野戰。聞我在外。以爲必可取。日越不獲我。勢不敢歸。庭暉才勇過於日越。聞日越被寵。任。必思奪之矣。庭暉時爲五臺府果毅。己亥。以庭暉爲右武衛大將軍。思明復攻河陽。光弼謂鄭陳節度使李抱玉曰。將軍能爲我守南城二日乎。抱玉曰。過期何如。光弼曰。過期救不至。任棄之。抱玉許諾。勒兵拒守。城且陷。抱玉給之曰。吾糧盡。明且當降。賊喜。斂軍以待之。抱玉繕完城備。明日。復請戰。賊怒。急攻之。抱玉出奇兵。表裏夾擊。殺傷甚衆。董秦從思明。寇河陽。夜帥其衆五百。拔柵突圍。降于光弼。時光弼自將屯中潭城外。置柵。柵外穿塹。深廣二丈。乙巳。賊將周摯捨南城併力攻中潭。光弼命荔非元禮出勁卒于羊馬城。以拒賊。光弼自於城東北隅。建小

宋旗。以望賊。賊恃其衆。直進逼城。以車載攻具。自隨。督衆填塹。三面各八道。以過兵。又開柵爲門。光弼望賊逼城。使問元禮曰。中丞視賊填塹。開柵過兵。晏然不動。何也。元禮曰。司空欲守乎。戰乎。光弼曰。欲戰。元禮曰。欲戰。則賊爲吾填塹。何爲禁之。光弼曰。善。吾所不及。勉之。元禮俟柵開。帥敢死士。突出擊賊。却走數百步。元禮度賊陳堅。未易摧陷。乃復引退。須臾。而擊之。光弼望元禮退。怒。遣左右召欲斬之。元禮曰。戰正急。召何爲。乃退入柵中。賊亦不敢逼。良久。鼓譟出柵門。奮擊破之。周摯復收兵。趣北城。光弼遽帥衆入北城。登城望賊。曰。賊兵雖多。囂而不整。不足畏也。不過日中。保爲諸君破之。乃命諸將出戰。及期不決。召諸將問曰。向來賊陳何方最堅。曰。西北隅。光弼命其將郝廷玉當之。廷玉請騎兵五百。與之三百。又問其次堅者。曰。東南隅。光弼命其將論惟貞當之。惟貞請鐵騎三百。與之二百。光弼令諸將曰。爾曹望吾旗而戰。吾麾旗緩。任爾擇利而戰。吾急麾旗。三至地。則萬衆齊入。死生以之。少退者斬。又以短刀置鞞中。曰。戰危事。吾國之三公。不可死。賊手萬一戰不利。諸君前死於敵。我自劉於此。不令諸君獨死也。諸將出戰。頃之。廷玉奔還。光弼望之。驚曰。廷玉退。吾事危矣。命左右取廷玉首。廷玉曰。馬中箭。非敢退也。使者馳報。光弼令易馬遣之。僕固懷恩及其子開府儀同三司瑒。戰小却。光弼又命取其首。懷恩父子。顧見使者提刀馳來。更前決戰。光弼連颺其旗。諸將齊進。致死。呼聲動天地。賊衆大潰。斬首千餘級。捕虜五百人。溺死者千餘人。周摯以數騎遁去。擒其大將徐瑣。玉李秦授。其河南節度使安太清走保懷州。思明不知摯敗。尙攻南城。光弼驅俘囚臨河示之。乃遁。丁巳。以李日越爲右金吾大將軍。○邛簡嘉眉瀘戎等州蠻反。○十一月甲子。以殿中監董秦爲陝西神策兩軍兵馬使。賜姓李。名忠臣。○康楚元等衆至萬餘人。商州刺史充荆襄等道租庸使韋倫發兵討之。駐於鄧之境。招諭降者。厚撫之。伺其稍怠。進軍擊之。生擒楚元。其衆遂潰。得其所掠租庸二百萬緡。荆襄皆平。倫見素之



從弟也。○發安西北庭兵屯陝。以備史思明。○第五琦作乾元錢。重輪錢。與開元錢。三品並行。民爭盜鑄。貨輕物重。穀價騰踊。餓殍相望。上言者皆歸咎於琦。庚午。貶琦忠州長史。御史大夫賀蘭進明貶溱州員外司馬。坐琦黨也。○十二月甲午。呂諲領度支使。○乙巳。韋倫送康楚元。詣闕斬之。○史思明遣其將李歸仁。將鐵騎五千。寇陝州。神策兵馬使衛伯玉。以數百騎擊破之。於礪子阪得馬六百匹。歸仁走。以伯玉爲鎮西四鎮行營節度使。李忠臣與歸仁等戰于永寧莎柵之間。屢破之。上元元年春正月辛巳。以李光弼爲太尉。兼中書令。餘如故。○丙戌。以于闐王勝之弟曜。同四鎮節度副使。權知本國事。○党項等羌。吞噬邊鄙。將逼京畿。乃分邠寧等州節度。爲鄜坊丹延節度。亦謂之渭北節度。以邠州刺史桑如珪。領邠寧鄜州刺史。杜冕。領鄜坊節度副使。分道招討。戊子。以郭子儀。領兩道節度使。留京師。假其威名。以鎮之。○上祀九宮貴神。○二月。李光弼攻懷州。史思明救之。癸卯。光弼逆戰於沁水之上。破之。斬首三千餘級。○忠州長史第五琦。既行。或告琦受人金二百兩。遣御史劉期光。追按之。琦曰。琦備位宰相。二百兩金不可手挈。若付受有憑。請準律科罪。期光即奏。琦已服罪。庚戌。琦坐除名。長流夷州。○三月甲申。改蒲州爲河中府。○庚寅。李光弼破安太清于懷州城下。夏四月壬辰。破史思明于河陽。西渚。斬首千五百餘級。○襄州將長維瑾。曹玠。殺節度使史翽。據州反。制以隴州刺史韋倫。爲山南東道節度使。時李輔國用事。節度使皆出其門。倫既朝廷所除。又不謁輔國。尋改秦州防禦使。己未。以陝西節度使來瑱。爲山南東道節度使。瑱至襄州。張維瑾等皆降。○閏月丁卯。加河東節度使王思禮。爲司空。自武德以來。思禮始不爲宰相。而拜三公。○甲戌。徙趙王係。爲越王。○己卯。赦天下。改元。○追諡太公望。爲武成王。選歷代名將。爲亞聖十哲。其中祀下祀。并雜祀。一切竝停。○是日。史思明入東京。五月丙午。以太子太傅苗晉卿行侍中。

晉卿練達吏事。而謹身固位。時人比之胡廣。○宦者馬上言。受賂爲人求官。於兵部侍郎同中書門下三品呂誣。誣爲之補官。事覺。上言杖死。壬子。誣罷爲太子賓客。○癸丑。以京兆尹南華劉晏。爲戶部侍郎。充度支鑄錢鹽鐵等使。晏善治財利。故用之。○六月甲子。桂州經略使邢濟奏。破西原蠻二十萬衆。斬其帥黃乾曜等。○三品錢行寢久。屬歲荒。米斗至七千錢。人相食。京兆尹鄭叔清。捕私鑄錢者。數月間。榜死者八百餘人。不能禁。乃勅京畿開元錢與乾元小錢。皆當十。其重輪錢。當三十。諸州更俟進止。是時。史思明亦鑄順天得一錢。一當開元錢百。賊中物價尤貴。○甲申。與王伾薨。伾張后長子也。幼曰定王侗。張后以故。數欲危太子。太子常以恭遜取容。會伾薨。侗尚幼。太子位遂定。○乙酉。鳳翔節度使崔光遠。破党項于普潤。○平盧兵馬使田神功奏。破史思明之兵于鄭州。○上皇愛興慶宮。自蜀歸。卽居之。上時自夾城。往起居。上皇亦間至大明宮。左龍武大將軍陳玄禮。內侍監高力士。久侍衛上皇。上又命玉真公主。如仙媛。內侍王承恩。魏悅。及梨園弟子。常娛侍左右。上皇多御長慶樓。父老過者。往往瞻拜呼萬歲。上皇常於樓下置酒食。賜之。又嘗召將軍郭英。父等。上樓賜宴。有劍南奏事官。過樓下拜舞。上皇命玉真公主。如仙媛。爲之作主人。李輔國素微賤。雖暴貴用事。上皇左右皆輕之。輔國意恨。且欲立奇功。以固其寵。乃言於上曰。上皇居興慶宮。日與外人交通。陳玄禮高力士。謀不利於陛下。今六軍將士。盡靈武勳臣。皆反仄不安。臣曉諭不能解。不敢不以聞。上泣曰。聖皇慈仁。豈容有此。對曰。上皇固無此意。其如羣小何。陛下爲天下主。當爲社稷大計。消亂於未萌。豈得徇匹夫之孝。且興慶宮。與閭閻相參。垣墉淺露。非至尊所宜居。大內深嚴。奉迎居之。與彼何殊。又得杜絕小人。熒惑聖聽。如此。上皇享萬歲之安。陛下有三朝之樂。庸何傷乎。上不聽。興慶宮先有馬三百匹。輔國矯勅取之。纔留十匹。上皇謂高力士曰。吾兒。爲輔國所惑。不得終孝矣。輔國又令六軍將士。號哭叩頭。請迎上皇居西內。



上泣不應。輔國懼，會上不豫。秋七月丁未，輔國矯稱上語，迎上皇遊西內，至睿武門。輔國將射生五百騎，露刃遮道，奏曰：「皇帝以興慶宮湫隘，迎上皇，遷居大內。」上皇驚幾墜，高力士曰：「李輔國何得無禮！」叱令下馬。輔國不得已而下。力士因宣上皇誥曰：「諸將士各好在。將士皆納刃，再拜萬歲。力士又叱輔國與己共執上皇馬鞚，待衛如西內，居甘露殿。輔國帥衆而退，所留侍衛兵纔庭老數十人。陳玄禮、高力士及舊宮人皆不得留左右。」上皇曰：「興慶宮，吾之土地，吾數以讓皇帝，皇帝不受。今日之徙，亦吾志也。是日，輔國與六軍大將素服見上，請罪。上又迫於諸將，乃勞之曰：「南宮西內亦復何殊，卿等恐小人熒惑，防微杜漸，以安社稷，何所懼也。」刑部尚書顏真卿首率百寮上表，請問上皇起居。輔國惡之，奏貶蓬州長史。○癸丑，勅天下重稜錢皆當三十，如畿內。○丙辰，高力士流巫州，王承恩流播州，魏悅流漆州，陳玄禮勒致仕。置如仙媛于歸州，玉真公主出居玉真觀。上更選後宮百餘人，置西內，備灑掃，令萬安咸宜二公主視服膳，四方所獻珍異先薦上皇。然上皇日以不懌，因不茹葷，辟穀，寢以成疾。上初猶往問安，既而上亦有疾，但遣人起居，其後上稍悔寤，惡輔國欲誅之，畏其握兵，竟猶豫不能決。○初，哥舒翰破吐蕃于臨洮，西關磨環川於其地，置神策軍。及安祿山反，軍使成如璆遣其將衛伯玉將千人赴難，既而軍地淪入吐蕃，伯玉留屯於陝，累官至右羽林大將軍。八月庚午，以伯玉為神策軍節度使。○丁亥，贈諡與王伾曰恭懿太子。○九月甲午，置南都於荊州，以荊州為江陵府，仍置永平軍團練兵三千人，以扼吳蜀之衝。從節度使呂誼之請也。○或上言：「天下未平，不宜置郭子儀於散地。」乙未，命子儀出鎮邠州，党項遁去。戊申，制子儀統諸道兵自朔方直取范陽，還定河北。發射生、英武等禁軍，及朔方、鄜坊、寧、涇、原諸道蕃漢兵共七萬人，皆受子儀節度。制下旬日復為魯朝恩所沮，事竟不行。○冬十月丙子，置青沂等五州節度使。○十一月壬辰，涇州破党項。○御史中丞李銑、宋州刺史劉展皆

領淮西節度副使，銑貪暴不法，展剛彊自用，故為其上者多惡之。節度使王仲昇先奏銑罪而誅之，時有謠言曰：「手執金刀起東方，仲昇使監軍使內左常侍邢延恩入奏，展倔僵不受命，姓名應謠，請除之。」延恩因說上曰：「展與李銑一體之人，今銑誅，展不自安，苟不去之，恐其為亂，然展方握彊兵，宜以計去之。」請除展。江淮都統代李暉俟其釋兵赴鎮，中道執之。此一夫力耳。上從之，以展為都統。淮南、東、南、西三道節度使密勅舊都統李暉及淮南東道節度使鄧景山圖之。延恩以制書授展，展疑之，曰：「展自陳留參軍，數年至刺史，可謂暴貴矣。江淮租賦所出，今之重任，展無勳勞，又非親賢，一旦恩命寵擢如此，得非有讒人間之乎。」因泣下。延恩懼曰：「公素有才望，主上以江淮為憂，故不次用公，公反以為疑，何哉。」展曰：「事苟不欺，印節可先得乎。」延恩曰：「可。」乃馳詣廣陵，與暉謀解印節，以授展，展得印節乃上表謝恩。牒追江淮親舊，置之心膂。三道官屬遣使迎賀，申圖籍，相望於道。展悉舉宋州兵七千趣廣陵。延恩知展已得其情，還奔廣陵，與李暉、鄧景山發兵拒之。移檄州縣言展反，展亦移檄言暉反。州縣莫知所從。暉引兵度江，與副使潤州刺史韋儼、浙西節度使侯令儀屯京口。鄧景山將萬人屯徐城，展素有威名，御軍嚴整，江淮人望風畏之。展倍道先期至，使人問景山曰：「吾奉詔書赴鎮，此何兵也。」景山不應。展使人呼於陳前曰：「汝曹皆吾民也，勿干吾旗鼓，使其將孫待封、強法雷擊之。」景山衆潰，與延恩奔壽州。展引兵入廣陵，遣其將屈突孝標將兵三千徇濠楚，王暉將兵四千略淮西。李暉關北固為兵場，插木以塞江口，展軍於白沙，設疑兵於瓜洲，多張火鼓，若將趣北固者。如是累日，暉悉銳兵守京口以待之。展乃自上流濟，襲下蜀。暉軍聞之自潰，暉奔宣城。甲午，展陷潤州。昇州軍士萬五千人謀應展，攻金陵城，不克而遁。侯令儀懼，以後事授兵馬使姜昌羣，棄城走。昌羣遣其將宗犀詣展降。丙申，展陷昇州。以宗犀為潤州司馬，丹楊軍使使昌羣領昇州，以從子伯瑛佐之。○李光弼攻懷州，百餘



日乃拔之。生擒安太清。○史思明遣其將田承嗣將兵五千，徇淮西。王同芝將兵三千人，徇陳許。敬江將二千人，徇兗鄆。薛鄂將五千人，徇曹州。○十二月，丙子，党項寇美原，同官大掠而去。○賊帥郭愔等引諸羌胡，敗秦隴防禦使韋倫，殺監軍使。○兗鄆節度使能元皓擊史思明，兵破之。○李暉之去潤州也，副使李藏用謂暉曰：「處人尊位，食人重祿，臨難而逃之，非忠也。」以數十州之兵食，三江五湖之險固，不發一矢而棄之，非勇也。失忠與勇，何以事君？藏用請收餘兵，竭力以拒之。暉乃悉以後事授藏用，藏用收散卒得七百人，東至蘇州，募壯士得二千人，立柵以拒劉展。展遣其將傅子昂、宗犀攻宣州，宣歙節度使鄭旻之棄城走。李暉奔洪州，李藏用與展將張景超、孫待封戰於郁墅，兵敗。奔杭州。景超遂據蘇州，待封進陷湖州。展以其將許嶧為潤州刺史，李可封為常州刺史，楊持璧蘇州刺史，待封領湖州事。景超進逼杭州，藏用使其將溫晁屯餘杭，展以李晁為泗州刺史，宗犀為宣州刺史，傅子昂屯南陵，將下江州，徇江西。於是屈突孝標陷濠州，王暉陷舒和滁廬等州，所向無不摧靡。聚兵萬人，騎三千，橫行江淮間。壽州刺史崔昭發兵拒之，由是暉不得西。止屯廬州，初上命平廬兵馬使田神功將所部精兵三千屯任城，鄧景山既敗，與邢延恩奏乞勅神功救淮南，未報。景山遣人趣之，且許以淮南金帛子女為賂。神功及所部皆喜，悉衆南下。及彭城，勅神功討展，展聞之，始有懼色。自廣陵將兵八千拒之，選精兵二千度淮，擊神功於都梁山，展敗。走至天長，以五百騎據橋拒戰，又敗。展獨與一騎亡度江，神功入廣陵，及楚州，大掠，殺商胡以千數，城中地穿掘略徧。○是歲吐蕃陷廓州。

資治通鑑卷第二百二十一

資治通鑑卷二百二十一

唐紀三十八

肅宗文明武德大聖大宣孝皇帝下之下

上元二年春正月癸卯，史思明改元應天。○張景超引兵攻杭州，敗李藏用將李彊於石夷門。孫待封自武康南出，將會景超攻杭州，溫晁據險擊敗之。待封脫身奔烏程，李可封以常州降。丁未，田神功使特進楊惠元等將千五百人西擊王暉。辛亥夜，神功先遣特進范知新等將四千人自白沙濟西趣下蜀，鄧景山將千人自海陵濟東趣常州。神功與邢延恩將三千人軍于瓜洲，壬子，濟江，展將步騎萬餘，陳于蒜山，神功以舟載兵趣金山，會大風，五舟飄抵金山下，展屠其二舟，沈其三舟，神功不得度，還軍瓜洲，而范知新等兵已至下蜀，展擊之不勝。弟殷勸展引兵逃入海，可延歲月，展曰：「若事不濟，何用多殺人父子乎？」死早晚等耳。遂更率衆力戰，將軍賈隱林射展中目而仆，遂斬之。劉殷許嶧等皆死。隱林滑州人也。楊惠元等擊破王暉于淮南，暉引兵東走，至常熟乃降。孫待封詣李藏用降，張景超聚兵至七千餘人，聞展死，悉以兵授張法雷，使攻杭州。景超逃入海。法雷至杭州，李藏用擊破之，餘黨皆平。平廬軍大掠十餘日，安史之亂亂兵不及江淮，至是其民始罹荼毒矣。○荆南節度使呂諲奏請以江南之潭岳郴邵永道連黔中之涪州皆隸荆南從之。○二月，奴刺党項寇寶雞，燒大散關，南侵鳳州，殺刺史蕭愨，大掠而西。鳳翔節度使李鼎追擊破之。○戊辰，新羅王金崑入朝，因請宿衛。○或言洛中將士皆燕人，久戍思歸，上下離心，擊之可破也。陝州觀軍容使



魚朝恩以爲信然。屢言於上。上勅李光弼等進取東京。光弼奏稱。賊鋒尙銳。未可輕進。朔方節度使僕固懷恩勇而愎。麾下皆蕃漢勁卒。恃功多不法。郭子儀寬厚曲容之。每用兵臨敵。倚以集事。李光弼性嚴。一裁之以法。無所假貸。懷恩憚光弼而心惡之。乃附朝恩言。東都可取。由是中使相繼。督光弼使出師。光弼不得已。使鄭陳節度使李抱玉守河陽。與懷恩將兵會朝恩及神策節度使衛伯玉攻洛陽。戊寅。陳於邙山。光弼命依險而陳。懷恩陳於平原。光弼曰。依險則可以進。可以退。若平原戰而不利。則盡矣。思明不可忽也。命移于險。懷恩復止之。史思明乘其陳未定。進兵薄之。官軍大敗。死者數千人。軍資器械盡棄之。光弼懷恩度河走保聞喜。朝恩伯玉奔還陝。抱玉亦棄河陽走。河陽懷州皆沒於賊。朝廷聞之大懼。益兵屯陝。○李揆與呂諲同爲相。不相悅。諲在荆南。以善政聞。揆恐其復入相。奏言。置軍湖南非便。又陰使人如荆湖。求諲過失。諲上疏訟揆罪。癸未。貶揆袁州長史。以河中節度使蕭華爲中書侍郎。同平章事。○史思明猜忍好殺。羣下小不如意。動至族誅。人不自保。朝義其長子也。常從思明將兵。頗謙謹。愛士卒。將士多附之。無寵於思明。思明愛少子朝清。使守范陽。常欲殺朝義。立朝清爲太子。左右頗泄其謀。思明既破李光弼。欲乘勝西入關。使朝義將兵爲前鋒。自北道襲陝。城思明自南道將大軍繼之。三月甲午。朝義兵至礪子嶺。衛伯玉逆擊破之。朝義數進兵。皆爲陝兵所敗。思明退屯永寧。以朝義爲怯。曰。終不足成吾事。欲按軍法斬朝義及諸將。戊戌。命朝義築三隅城。欲貯軍糧。期一日畢。朝義築畢。未泥。思明至。詬怒之。令左右立馬監泥。斯須而畢。思明又曰。俟克陝州。終斬此賊。朝義憂懼。不知所爲。思明在鹿橋驛。令腹心曹將軍將兵宿衛。朝義宿于逆旅。其部將駱悅。蔡文景。說朝義曰。悅等與王死無日矣。自古有廢立。請召曹將軍謀之。朝義俛首不應。悅等曰。王苟不許。悅等今歸李氏。王亦不聖矣。朝義泣曰。諸君善爲之。勿驚聖人。悅等乃令許叔冀之子季常召曹將軍。至則以其謀

告之。曹將軍知諸將盡怨。恐禍及己。不敢違。是夕。悅等以朝義部兵三百被甲詣驛。宿衛兵怪之。畏曹將軍不敢動。悅等引兵入。至思明寢所。值思明如廁。問左右。未及對。已殺數人。左右指示之。思明聞有變。踰垣至廡中。自韃馬乘之。悅僉人周子俊射之。中臂墜馬。遂擒之。思明問亂者爲誰。悅曰。奉懷王命。思明曰。我朝來語失。宜其及此。然殺我太早。何不待我克長安。今事不成矣。悅等送思明于柳泉驛。囚之。還報朝義曰。事成矣。朝義曰。不驚聖人乎。悅曰。無。時周摯許叔冀將後軍在福昌。悅等使許季常往告之。摯殺思明。以氈裹其尸。橐駝負來迎。悅等勸朝義執摯殺之。軍至柳泉。悅等恐衆心未壹。遂縊殺思明。以氈裹其尸。橐駝負歸洛陽。朝義卽皇帝位。改元顯聖。密使人至范陽。勅散騎常侍張通儒等殺朝清及朝清母辛氏。并不附己者數十人。其黨自相攻擊。戰城中數月。死者數千人。范陽乃定。朝義以其將柳城李懷仙爲范陽尹。燕京留守。時洛陽四面數百里州縣皆爲丘墟。而朝義所部節度使皆安祿山舊將。與思明等夷。朝義召之。多不至。略相羈縻而已。○李光弼上表。固求自貶制。以開府儀同三司侍中。領節中節度使。○術士長塞鎮將朱融。與左武衛將軍竇如玢等謀奉嗣岐王珍作亂。金吾將軍邢濟告之。夏四月乙卯朔。廢珍爲庶人。漆州安置。其黨皆伏誅。珍業之子也。丙辰。左散騎常侍張鎬貶辰州司戶。鎬嘗買珍宅故也。○己未。以吏部侍郎裴遵慶爲黃門侍郎。同平章事。○乙亥。青密節度使尙衡破史朝義兵。斬首五千餘級。○丁丑。兗鄆節度使能元皓破史朝義兵。○壬午。梓州刺史段子璋反。子璋驍勇。從上皇在蜀有功。東川節度使李旻奏替之子璋舉兵襲旻于綿州。道過遂州。刺史虢王巨蒼黃修屬郡禮迎之。子璋殺之。李旻戰敗。奔成都。子璋自稱梁王。改元黃龍。以綿州爲龍安府。置百官。又陷劔州。○五月己丑。李光弼自河中入朝。○初。李輔國與張后同謀。遷上皇於西內。是日端午。山人李唐見上。上方抱幼女。謂唐曰。朕念之。卿勿怪也。對曰。太上皇思見陛下。計



亦如陛下之念公主也。上泫然泣下。然畏張后。尚不敢詣西內。○癸巳。党項寇寶雞。○初。史思明以其博州刺史令狐彰爲滑鄭汴節度使。將數千兵。戍滑臺。彰密因中使楊萬定。通表請降。徙屯杏園度。思明疑之。遣其將薛岌圍之。彰與岌戰。大破之。因隨萬定入朝。甲午。以彰爲滑衛等六州節度使。○戊戌。平盧節度使侯希逸擊史朝義范陽兵。破之。○乙未。西川節度使崔光遠與東川節度使李奐共攻綿州。庚子。拔之。斬段子璋。○復以李光弼爲河南副元帥。太尉兼侍中。都統河南淮南東西山南東荆南江南西浙江東西八道行營節度。出鎮臨淮。○六月。甲寅。青密節度使能元皓敗史朝義將李元遇。○江淮都統李暉畏失守之罪。歸咎於浙西節度使侯令儀。丙子。令儀坐除名。長流康州。加田神功開府儀同三司。徙除州刺史。徵李暉鄧景山還京師。○戊寅。党項寇好時。○秋。七月。癸未朔。日有食之。既。大星皆見。○以試少府監李藏用爲浙西節度副使。○八月。癸丑朔。加開府儀同三司李輔國兵部尚書。乙未。輔國赴上。宰相朝臣皆送之。御厨具饌。太常設樂。輔國驕縱日甚。求爲宰相。上曰。以卿之功。何官不可爲。其如朝望未允。何。輔國乃諷僕射裴冕等。使薦己。上密謂蕭華曰。輔國求爲宰相。若公卿表來。不得不與。華出問冕曰。初無此事。吾臂可斷。宰相不可得。華入言之。上大悅。輔國銜之。○己巳。李光弼赴河南行營。○辛巳。以殿中監李若幽爲鎮西北庭興平陳鄭等節度行營。及河中節度使。鎮絳州。賜名國貞。○九月。甲申。天成地平節。上於三殿置道場。以宮人爲佛菩薩。武士爲金剛神王。召大臣膜拜圍繞。○壬寅。制去尊號。但稱皇帝。去年號。但稱元年。以建子月爲歲首。月皆以所建爲數。因赦天下。停京兆河南太原鳳翔四京及江陵南都之號。自今。每除五品以上清望官及郎官。御史刺史。令舉一人自代。觀其所舉。以行殿最。○江淮大饑。人相食。○冬。十月。江淮都統崔圓署李藏用爲楚州刺史。會支度租庸使。以劉展之亂。諸州用倉庫物無準。奏請徵驗。時倉猝募兵。物多散亡。徵之不足。諸將往

往賣產以償之。藏用恐其及己。嘗與人言。頗有悔恨。其牙將高幹挾故怨。使人詣廣陵。告藏用反。先以兵襲之。藏用走。幹追斬之。崔圓遂簿責藏用將吏。以驗之。將吏畏。皆附成其狀。獨孫待封堅言不反。圓命引出斬之。或曰。子何不從衆以求生。待封曰。吾始從劉大夫。奉詔書來赴鎮。人謂吾反。李公起兵滅劉大夫。今又以李公爲反。如此。誰則非反者。庸有極乎。吾寧就死。不能誣人以非罪。遂斬之。○建子月。壬午朔。上受朝賀。如正旦儀。○或告鴻臚卿康謙與史朝義通。事連司農卿嚴莊。俱下獄。京兆尹劉晏遣吏防守莊家。上尋勅出莊引見。莊怨晏。因言晏與臣言。常道禁中語。矜功怨上。丁亥。貶晏通州刺史。莊難江尉。謙伏誅。戊子。御史中丞元載爲戶部侍郎。充句當度支鑄錢鹽鐵。兼江淮轉運等使。載初爲度支郎中。敏悟善奏對。上愛其才。委以江淮漕運。數月。遂代劉晏。專掌財利。○戊戌。冬至。己亥。上朝上皇於西內。○神策節度使衛伯玉攻史朝義拔永寧。破灑池。福昌。長水等縣。○己酉。上朝獻太清宮。庚戌。享太廟。元獻廟。建丑月。辛亥朔。祀圓丘。太一壇。○平盧節度使侯希逸與范陽相攻連年。救援既絕。又爲奚所侵。乃悉舉其軍二萬餘人。襲李懷仙破之。因引兵而南。○寶應元年。建寅月。甲申。追尊靖德太子琮爲奉天皇帝。妃竇氏爲恭應皇后。丁酉。葬于齊陵。○甲辰。吐蕃遣使請和。○李光弼拔許州。擒史朝義所署潁川太守李春。朝義將史參救之。丙午。戰于城下。又破之。○戊申。平盧節度使侯希逸於青州北度河。而會田神功。能元皓於兗州。○租庸使元載以江淮雖經兵荒。其民比諸道。猶有貲產。乃按籍。舉八年租調之違負。及逋逃者。計其大數。而徵之。擇豪吏爲縣令。而督之。不問負之有無。貲之高下。察民有粟帛者。發徒圍之。籍其所有。而中分之。甚者什取八九。謂之白著。有不服者。嚴刑以威之。民有蓄穀十斛者。則重足以待命。或相聚山澤。爲羣盜。州縣不能制。○建卯月。辛亥朔。赦天下。復以京兆爲上都。河南爲東都。鳳翔爲西都。江陵爲南都。太原爲北都。○奴刺寇成固。○初。王思



禮爲河東節度使。資儲豐衍。贍軍之外。積米百萬斛。奏請輸五十萬斛於京師。思禮薨。管崇嗣代之。爲政寬弛。信任左右。數月間。耗散殆盡。惟陳腐米萬餘斛在。上聞之。以鄧景山代之。景山至。則鈎校所出入。將士輩多有隱沒。皆懼。有裨將抵罪當死。諸將請之。不許。其弟請代。兄死。亦不許。請入一馬以贖死。乃許之。諸將怒曰。我輩曾不及一馬乎。遂作亂。癸丑。殺景山上。以景山撫御失所。以致亂。不復推究亂者。遣使慰諭。以安之。諸將請以都知兵馬使代州刺史辛雲京爲節度使。雲京奏。張光晟爲代州刺史。○絳州素無儲蓄。民間饑。不可賦斂。將士糧賜不充。朔方等諸道行營都統李國貞。屢以狀聞。朝廷未報。軍中咨怨。突將王元振將作亂。矯令於衆曰。來日。修都統宅。各具舂鍤。待命于門。士卒皆怒曰。朔方健兒。豈修宅夫邪。乙丑。元振帥其徒作亂。燒牙城門。國貞逃于獄。元振執之。置卒食於前曰。食此而役其力。可乎。國貞曰。修宅則無之。軍食則屢奏而未報。諸君所知也。衆欲退。元振曰。今日之事。何必更問。都統不死。則我輩死矣。遂拔刃殺之。鎮西北庭行營兵屯于翼城。亦殺節度使荔非元禮。推裨將白孝德爲節度使。朝廷因而授之。○戊辰。淮西節度使王仲昇與史朝義將謝欽讓戰于申州城下。爲賊所虜。淮西震駭。會侯希逸。田神功。能元皓。攻汴州。朝義召欽讓兵救之。○絳州諸軍。剽掠不已。朝廷憂其與太原亂。軍合從連賊。非新進諸將所能鎮服。辛未。以郭子儀爲汾陽王。知朔方河中北庭潞澤節度行營兼與平定國等軍副元帥。發京師絹四萬匹。布五萬端。米六萬石。以給絳軍。建辰月。庚寅。子儀將行。時上不豫。羣臣莫得進見。子儀請曰。老臣受命。將死於外。不見陛下。目不瞑矣。上召入臥內。謂曰。河東之事。一以委卿。史朝義遣兵圍李抱玉於澤州。子儀發定國軍救之。乃去。○上召山南東道節度使來瑱。赴京師。瑱樂在襄陽。其將士亦愛之。乃諷所部將吏。上表留之。行及鄧州。復令還鎮。荆南節度使呂諲。淮西節度使王仲昇。及中使往來者言。瑱曲收衆心。恐久難制。上乃割商金均房。別置觀察。

使。令瑱止領六州。會謝欽讓圍王仲昇於申州數月。瑱怨之。按兵不救。仲昇竟敗沒。行軍司馬裴茂謀奪瑱位。密表。瑱偏疆難制。請以兵襲取之。上以爲然。癸巳。以瑱爲淮西河南十六州節度使。外示寵任。實欲圖之。密勅。以茂代瑱。爲襄鄧等州防禦使。○甲午。奴刺寇梁州。觀察使李勉棄城走。以邠州刺史河西臧希讓爲山南西道節度使。○丙申。党項寇奉天。○李輔國以求宰相不得。怨蕭華。庚午。以戶部侍郎元載爲京兆尹。載詣輔國固辭。輔國識其意。仍引元載代華。戊申。華罷爲禮部尙書。以載同平章事。領度支轉運使如故。○建巳月。庚戌朔。澤州刺史李抱玉。破史朝義兵於城下。○壬子。楚州刺史崔旆表稱。有尼真如。恍惚登天。見上帝。賜以寶玉十三枚。云。中國有災。以此鎮之。羣臣表賀。○甲寅。上皇崩于神龍殿。年七十八。乙卯。遷坐于太極殿。上以寢疾。發哀於內殿。羣臣發哀於太極殿。蕃官勞面割耳者四百餘人。丙辰。命苗晉卿攝冢宰。上自仲春寢疾。聞上皇登遐。哀慕疾轉劇。乃命太子監國。甲子。制。改元。復以建寅爲正月。月數皆如其舊。赦天下。○初。張后與李輔國相表裏。專權用事。晚年更有隙。內射生使三原程元振。黨於輔國。上疾篤。后召太子。謂曰。李輔國久典禁兵。制勅皆從之出。擅逼遷聖皇。其罪甚大。所忌者。吾與太子。今主上彌留。輔國陰與程元振謀作亂。不可不誅。太子泣曰。陛下疾甚危。二人皆陛下勳舊之臣。一旦不告而誅之。必致震驚。恐不能堪也。后曰。然則太子姑歸。吾更徐思之。太子出。后召越王係。謂曰。太子仁弱。不能誅賊臣。汝能之乎。對曰。能。係乃命內謁者監段恒俊。選宦官有勇力者二百餘人。授甲於長生殿後。乙丑。后以上命召太子。元振知其謀。密告輔國。伏兵於陵霄門。以俟之。太子至。以難告。太子曰。必無是事。主上疾亟。召我。我豈可畏死而不赴乎。元振曰。社稷事大。太子必不可入。乃以兵送太子於飛鳳廡。且以甲卒守之。是夜。輔國元振勒兵三殿。收捕越王係。段恒俊。及知。



內侍省事朱光輝等百餘人繫之。以太子之命遷后于別殿。時上在長生殿。使者逼后下殿。并左右數十人。幽于後宮。宦官宮人皆驚駭逃散。丁卯。上崩。輔國等殺后并係及亮王。備是日。輔國始引太子。素服於九仙門。與宰相相見。敕上皇晏駕。拜哭。始行監國之令。戊辰。發大行皇帝喪。於兩儀殿宣遺詔。己巳。代宗即位。○高力士遇赦還。至朗州。聞上皇崩。號慟嘔血而卒。○甲戌。以皇子奉節王适為天下兵馬元帥。○李輔國恃功益橫。明謂上曰。大家但居禁中。外事聽老奴處分。上內不能平。以其方握禁兵。外尊禮之。乙亥。號輔國為尙父。而不名。事無大小。皆咨之。羣臣出入。皆先詣輔國。亦晏然處之。以內飛龍廡副使程元振為左監門衛將軍。知內侍省事朱光輝。及內常侍啖庭瑤。山人李唐等二十餘人。皆流黔中。○初。李國貞治軍嚴。朔方將士不樂。皆思郭子儀。故王元振因之。作亂。子儀至軍。元振自以為功。子儀曰。汝臨賊境。輒害主將。若賊乘其釁。無絳州矣。吾為宰相。豈受一卒之私邪。五月。庚辰。收元振。及其同謀四十人。皆殺之。辛雲京聞之。亦推按殺鄧景山者數十人。誅之。由是河東諸鎮率皆奉法。○壬午。以李輔國為司空。兼中書令。○党項寇同官華原。○甲申。以平盧節度使侯希逸為平盧青淄等六州節度使。由是青州節度有平盧之號。○乙酉。徙奉節王适為魯王。○追尊上母央妃為皇太后。○壬辰。貶禮部尙書蕭華為峽州司馬。元載希李輔國意。以罪誣之也。○勅乾元大小錢。皆一當一。民始安之。史朝義自圍宋州數月。城中食盡。將陷。刺史李岑不知所為。遂城果毅開封劉昌曰。倉中猶有麴數千斤。請屑食之。不過二十日。李太尉必救我。城東南隅最危。昌請守之。李光弼至臨淮。諸將以朝義兵尙彊。請南保揚州。光弼曰。朝廷倚我。以為安危。我復退縮。朝廷何望。且吾出其不意。賊安知吾之衆寡。遂徑趣徐州。使亮節度使田神功。進擊朝義。大破之。先是。田神功既克劉展。留連揚州。未還。太子賓客尙衡。與左羽林大將軍殷仲卿。相攻于亮。聞光弼至。憚其威名。神功遽還。河南。衡仲卿相繼入朝。光弼在徐州。惟軍旅之事。自決之。自餘衆務。悉委判官張儵。儵吏事精緻。區處如流。諸將白事。光弼多令與儵議之。諸將事儵如光弼。由是軍中肅然。東夏以寧。先是。田神功起偏裨。為節度使。留前使判官劉位等於幕府。神功皆平受其拜。及見光弼。與儵抗禮。乃大驚。徧拜位等曰。神功出於行伍。不知禮儀。諸君亦胡為不言。成神功之過乎。○丁酉。赦天下。○立皇子益昌王邈為慶王。延為慶王。迴為韓王。○來瑱聞徙淮西。大懼。上言。淮西無糧。請俟收麥而行。又諷將吏留己。上欲姑息無事。壬寅。復以瑒為山南東道節度使。○飛龍副使程元振。謀奪李輔國權。密言於上。請稍加裁制。六月。己未。解輔國行軍司馬。及兵部尙書。餘如故。以元振代判元帥行軍司馬。仍遷輔國出居外第。於是道路相賀。輔國始懼。上表遜位。辛酉。罷輔國兼中書令。進爵博陸王。輔國入謝。憤咽而言曰。老奴事郎君。不了。請歸地下。事先帝。上猶慰諭而遣之。○壬戌。以兵部侍郎嚴武為西川節度使。○襄鄧防禦使裴茂屯穀城。既得密勅。即帥麾下二千人。沿漢趣襄陽。己巳。陳子穀水北。瑒以兵逆之。問其所以來。對曰。尙書不受朝命。故來。若受代。謹當釋兵。瑒曰。吾已蒙恩。復留鎮此。何受代之有。因取勅及告身示之。裴驚惑。瑒與副使薛南陽。縱兵夾擊。大破之。追擒茂于申口。送京師。賜死。○乙亥。以通州刺史劉晏為戶部侍郎。兼京兆尹。充度支轉運鹽鐵鑄錢等使。○秋。七月。壬辰。以郭子儀都知朔方河東北庭潞儀澤沁陳鄭等節度行營。及興平等軍副元帥。○癸巳。劍南兵馬使徐知道遣反。以兵守要害。拒嚴武。武不得進。○八月。桂州刺史邢濟討西原賊帥吳功曹等。平之。○己未。徐知道為其將李忠厚所殺。劍南悉平。○乙丑。山南東道節度使來瑒入朝謝罪。上優待之。○己巳。郭子儀自河東入朝。時程元振用事。忌子儀功高任重。數譖之於上。子儀不自安。表請解副元帥節度使。上慰撫之。子儀遂留京師。○台州賊帥袁晁攻陷浙東諸州。改元寶勝。民疲于賦斂者。多歸之。李光弼遣兵擊晁于衢州。破之。○乙亥。徙魯王适為雍

繼入朝。光弼在徐州。惟軍旅之事。自決之。自餘衆務。悉委判官張儵。儵吏事精緻。區處如流。諸將白事。光弼多令與儵議之。諸將事儵如光弼。由是軍中肅然。東夏以寧。先是。田神功起偏裨。為節度使。留前使判官劉位等於幕府。神功皆平受其拜。及見光弼。與儵抗禮。乃大驚。徧拜位等曰。神功出於行伍。不知禮儀。諸君亦胡為不言。成神功之過乎。○丁酉。赦天下。○立皇子益昌王邈為慶王。延為慶王。迴為韓王。○來瑒聞徙淮西。大懼。上言。淮西無糧。請俟收麥而行。又諷將吏留己。上欲姑息無事。壬寅。復以瑒為山南東道節度使。○飛龍副使程元振。謀奪李輔國權。密言於上。請稍加裁制。六月。己未。解輔國行軍司馬。及兵部尙書。餘如故。以元振代判元帥行軍司馬。仍遷輔國出居外第。於是道路相賀。輔國始懼。上表遜位。辛酉。罷輔國兼中書令。進爵博陸王。輔國入謝。憤咽而言曰。老奴事郎君。不了。請歸地下。事先帝。上猶慰諭而遣之。○壬戌。以兵部侍郎嚴武為西川節度使。○襄鄧防禦使裴茂屯穀城。既得密勅。即帥麾下二千人。沿漢趣襄陽。己巳。陳子穀水北。瑒以兵逆之。問其所以來。對曰。尙書不受朝命。故來。若受代。謹當釋兵。瑒曰。吾已蒙恩。復留鎮此。何受代之有。因取勅及告身示之。裴驚惑。瑒與副使薛南陽。縱兵夾擊。大破之。追擒茂于申口。送京師。賜死。○乙亥。以通州刺史劉晏為戶部侍郎。兼京兆尹。充度支轉運鹽鐵鑄錢等使。○秋。七月。壬辰。以郭子儀都知朔方河東北庭潞儀澤沁陳鄭等節度行營。及興平等軍副元帥。○癸巳。劍南兵馬使徐知道遣反。以兵守要害。拒嚴武。武不得進。○八月。桂州刺史邢濟討西原賊帥吳功曹等。平之。○己未。徐知道為其將李忠厚所殺。劍南悉平。○乙丑。山南東道節度使來瑒入朝謝罪。上優待之。○己巳。郭子儀自河東入朝。時程元振用事。忌子儀功高任重。數譖之於上。子儀不自安。表請解副元帥節度使。上慰撫之。子儀遂留京師。○台州賊帥袁晁攻陷浙東諸州。改元寶勝。民疲于賦斂者。多歸之。李光弼遣兵擊晁于衢州。破之。○乙亥。徙魯王适為雍



王。○九月庚辰。以來瑱爲兵部尚書。同平章事。知山南東道節度使。○乙未。加程元振驃騎大將軍。兼內侍監。○左僕射裴冕爲山陵使。議事。有與程元振相違者。丙申。貶冕施州刺史。○上遣中使劉清潭。使於回紇。修舊好。且徵兵。討史朝義。清潭至其庭。回紇登里可汗已爲朝義所誘。云唐室繼有大喪。今中原無主。可汗宜速來。共收其府庫。可汗信之。清潭致勅書曰。先帝雖棄天下。今上繼統。乃昔日廣平王與葉護共收西京者也。回紇業已起兵。至三城。見州縣皆爲丘墟。有輕唐之志。乃因辱清潭。清潭遣使言狀。且曰。回紇舉國十萬衆。至矣。京師大駭。上遣殿中監藥子昂。往勞之於忻州南。初毗伽闕可汗爲登里求婚。肅宗以僕固懷恩女妻之。爲登里可敦。可汗請與懷恩相見。懷恩時在汾州。上令往見之。懷恩爲可汗言。唐家恩信不可負。可汗悅。遣使上表。請助國討朝義。可汗欲自蒲關入。由沙苑。出潼關。東向藥子昂說之曰。關中數遭兵荒。州縣蕭條。無以供擬。恐可汗失望。賊兵盡在洛陽。請自土門。略邢洛懷衛而南。得其資財。以充軍裝。可汗不從。又請自太行南下。據河陰。扼賊咽喉。亦不從。又請自陝州。太陽津。度河。食太原倉粟。與諸道俱進。乃從之。○袁晁陷信州。○冬十月。袁晁陷溫州。明州。○以雍王适爲天下兵馬元帥。辛酉。辭行。以兼御史中丞藥子昂。魏琚爲左右廂兵馬使。以中書舍人韋少華爲判官。給事中李進爲行軍司馬。會諸軍節度使。及回紇子懷恩。同平章事。兼絳州刺史。領諸軍節度行營。以副适。○上在東宮。以李輔國專橫。心甚不平。及嗣位。以輔國有殺張后之功。不欲顯誅之。壬戌夜。盜入其第。竊輔國之首。及一臂而去。勅有司捕盜。遣中使存問其家。爲刻木首葬之。仍贈太傅。○丙寅。上命僕固懷恩與母妻俱詣行營。雍王适至陝州。回紇可汗屯於河北。适與僚屬從數十騎。往見之。可汗責适不拜舞。藥子昂對以禮不當。然回紇將軍車鼻曰。唐天子與可汗約爲兄弟。可汗於雍王叔父也。何

得不拜舞。子昂曰。雍王天子長子。今爲元帥。安有中國儲君。向外國可汗拜舞乎。且兩宮在殯。不應舞蹈。力爭久之。車鼻遂引子昂魏琚韋少華李進各鞭一百。以适年少。未諳事。遣歸營。琚少華一夕而死。戊辰。諸軍發陝州。僕固懷恩與回紇左殺爲前鋒。陝西節度使郭英乂。神策觀軍容使魚朝恩爲殿。自灑池入。潞澤節度使李抱玉自河陽入。河南等道副元帥李光弼自陳留入。雍王留陝州。辛未。懷恩等軍于同軌。史朝義聞官軍將至。謀於諸將。阿史那承慶曰。唐若獨與漢兵來。宜悉衆與戰。若與回紇俱來。其鋒不可當。宜退守河陽。以避之。朝義不從。壬申。官軍至洛陽北郊。分兵取懷州。癸酉。拔之。乙亥。官軍陳于橫水。賊衆數萬。立柵自固。懷恩陳于西原。以當之。遣驍騎及回紇。竝南山。出柵東北。表裏合擊。大破之。朝義悉其精兵十萬救之。陳於昭覺寺。官軍驟擊之。殺傷甚衆。而賊陳不動。魚朝恩遣射生五百人。力戰。賊雖多死者。陳亦如初。鎮西節度使馬麟曰。事急矣。遂單騎奮擊。奪賊兩牌。突入萬衆中。賊左右披靡。大軍乘之而入。賊衆大敗。轉戰於石榴園。老君廟。賊又敗。人馬相蹂踐。填尚書谷。斬首六萬級。捕虜二萬人。朝義將輕騎數百東走。懷恩進克東京。及河陽城。獲其中書令許叔冀。王仙等。承制釋之。懷恩留回紇可汗營于河陽。使其子右廂兵馬使瑒。及朔方兵馬使高輔成。帥步騎萬餘。乘勝逐朝義。至鄭州。再戰皆捷。朝義至汴州。其陳留節度使張獻誠。閉門拒之。朝義奔濮州。獻誠開門出降。回紇入東京。肆行殺略。死者萬計。火累旬不滅。朔方神策軍亦以東京鄭汴汝州皆爲賊境。所過虜掠。三月乃已。比屋蕩盡。士民皆衣紙。回紇悉置所掠寶貨於河陽。留其將安恪守之。十一月丁丑。露布至京師。朝義自濮州北度河。懷恩進攻滑州。拔之。追敗朝義於衛州。朝義睢陽節度使田承嗣等。將兵四萬餘人。與朝義合。復來拒戰。僕固瑒擊破之。長驅至昌樂東。朝義帥魏州兵來戰。又敗走。於是鄴郡節度使薛嵩。以相衛洛邢四州降于陳鄭澤潞節度使李抱玉。恒陽節度使張忠志。以趙恒深定易五州。



降于河東節度使辛雲京。嵩，楚玉之子也。抱玉等已進軍入其營，按其部伍。嵩等皆受代，居無何，僕固懷恩皆令復位。由是抱玉、雲京疑懷恩有貳心，各表言之。朝廷密爲之備。懷恩亦上疏自理。上慰勉之。○辛巳，制東京及河南北，受僞官者一切不問。○己丑，以戶部侍郎劉晏兼河南通水陸轉運都使。○丁酉，以張忠志爲成德軍節度使，統恒、趙、深、定、易五州。賜姓李，名寶臣。初，辛雲京引兵將出井陘，常山裨將王武俊說寶臣曰：「今河東兵精銳，出境遠，不可敵也。且吾以寡當衆，以曲遇直，戰則必離，守則必潰。公其圖之。」寶臣乃撤守備，舉五州來降。及復爲節度使，以武俊之策爲善，擢爲先鋒兵馬使。武俊，本契丹也。初名沒諾干。○郭子儀以僕固懷恩有平河朔功，請以副元帥讓之。己亥，以懷恩爲河北副元帥，加左僕射。兼中書令。單于鎮北大都護、朔方節度使史朝義走至貝州，與其大將薛忠義等兩節度合。僕固瑒追之。至臨清，朝義自衡水引兵三萬還攻之。瑒設伏擊走之。回紇又至，官軍益振。遂逐之。大戰于下博，東南賊大敗，積尸擁流而下。朝義奔莫州。懷恩都知兵馬使薛兼訓、兵馬使郝庭玉與田神功、辛雲京會於下博，進圍朝義于莫州。青淄節度使侯希逸繼至。○十二月庚申，初以太祖配天地。

代宗睿文孝武皇帝上之上

廣德元年春正月己卯，追諡吳太后曰章敬皇后。○癸未，以國子祭酒劉晏爲吏部尙書。同平章事。度支等使如故。○初，來瑱在襄陽，程元振有所請託，不從。及爲相，元振譖瑒言涉不順。王仲昇在賊中，以屈服得全。賊不得歸，與元振善。瑒與賊合謀，致仲昇陷。賊壬寅，瑒坐削官爵，流播州。賜死于路。由是藩鎮皆切齒於元振。○史朝義屢出戰，皆敗。田承嗣說朝義令親往幽州，發兵還救莫州。承嗣自請留守莫州。朝義從之。選精騎五千，自北門犯圍而出。

朝義既去，承嗣即以城降。送朝義母子於官軍。於是僕固瑒侯希逸、薛兼訓等帥衆三萬追之。及於歸義，與戰。朝義敗走。時朝義范陽節度使李懷仙已因中使駱奉仙請降。遣兵馬使李抱忠將兵三千鎮范陽縣。朝義至范陽，不得入。官軍將至，朝義遣人諭抱忠以大軍留莫州，輕騎來發兵救援之意。因責以君臣之義。抱忠對曰：「天不祚燕，唐室復興。今既歸唐矣，豈可更爲反覆？獨不愧三軍邪？」大丈夫恥以詭計相圖，願早擇去就，以謀自全。且田承嗣必已叛矣。不然，官軍何以得至此？朝義大懼曰：「吾朝來未食，獨不能以一餐相餉乎？」抱忠乃令人設食于城東。於是范陽人在朝義麾下者，竝拜辭而去。朝義涕泣而已。獨與胡騎數百，既食而去。東奔廣陽。廣陽不受。欲北入奚契丹。至溫泉柵，李懷仙遣兵追及之。朝義窮蹙，縊于林中。懷仙取其首以獻。僕固懷恩與諸軍皆還。甲辰，朝義首至京師。○閏月己酉夜，有回紇十五人犯含光門，突入鴻臚寺。門司不敢遏。○癸亥，以史朝義降將薛嵩爲相衛邢洛貝磁六州節度使。田承嗣爲魏博德滄瀛五州都防禦使。李懷仙仍故地爲幽州盧龍節度使。時河北諸州皆已降。嵩等迎僕固懷恩拜於馬首，乞行間自効。懷恩亦恐賊平寵衰，故奏留嵩等及李寶臣分帥河北，自爲黨援。朝廷亦厭苦兵革，苟冀無事，因而授之。○回紇登里可汗歸國，其部衆所過抄掠，廩給小不如意，輒殺人。無所忌憚。陳鄭澤潞節度使李抱玉欲遣官屬置頓，人辭憚。趙城尉馬燧獨請行。比回紇將至，燧先遣人賂其渠帥，約毋暴掠。帥遣之。旗曰：「有犯令者，君自戮之。」燧取死囚爲左右，小有違令，立斬之。回紇相顧失色。涉其境者皆拱手遵約束。抱玉奇之。燧因說抱玉曰：「燧與回紇言，頗得其情。僕固懷恩恃功驕蹇，其子瑒好勇而輕。今內樹四帥，外交回紇，必有窺河東澤潞之志。宜深備之。」抱玉然之。○初，長安人梁崇義以羽林射生從來瑒鎮襄陽。累遷右兵馬使。崇義有勇力，能卷鐵舒鉤。沈毅寡言，得衆心。瑒之入朝也，命諸將分戍諸州。瑒死，戍者皆奔歸襄陽。行軍司馬龐充將兵二千赴河



南。至汝州。聞瑱死。引兵還襲襄州。左兵馬使李昭拒之。充奔房州。崇義自鄧州引戍兵歸。與昭及副使薛南陽相讓為長。久之不決。衆皆曰。兵非梁卿主之不可。遂推崇義為帥。崇義尋殺昭及南陽。以其狀聞。上不能討。三月甲辰。以崇義為襄州刺史。山南東道節度留後。崇義奏。改葬瑱。為之立祠。不居瑱聽事及正堂。○辛酉。葬至道大聖大明孝皇帝于泰陵。廟號玄宗。庚午。葬文明武德大聖宣孝皇帝于建陵。廟號肅宗。○夏四月庚辰。李光弼奏。擒袁晁。浙東皆平。時晁聚衆近二十萬。轉攻州縣。光弼使部將張伯儀將兵討平之。伯儀。魏州人也。○郭子儀數上言。吐蕃黨項不可忽。宜早為之備。○辛丑。遣兼御史大夫李之芳等使于吐蕃。為虜所留。二年。乃得歸。○羣臣三上表。請立太子。五月癸卯。詔許俟秋成議之。○丁卯。制分河北諸州。以幽莫媯檀平薊為幽州管。恒定趙深易為成德軍管。相貝邢洛為相州管。魏博德為魏州管。滄棣冀瀛為青淄管。懷衛河陽為澤潞管。○六月癸酉。禮部侍郎華陰楊綰上疏。以為古之選士。必取行實。近世專尚文辭。自隋煬帝始置進士科。猶試策而已。至高宗時。考功員外郎劉思立始奏。進士加雜文。明經加帖。從此積弊。轉而成俗。朝之公卿。以此待士。家之長老。以此訓子。其明經。則誦帖括。以求僥幸。又舉人。皆令投牒自應。如此。欲其返淳朴。崇廉讓。何可得也。請令縣令。察考廉取。行著鄉閭。學知經術者。薦之於州。刺史考試。升之於省。任各占一經。朝廷擇儒學之士。問經義二十條。對策三道。上第即注官。中第得出身。下第罷歸。又道舉亦非理。國望與明經進士並停。上命諸司通議。給事中李栖筠。左丞賈至。京兆尹嚴武。並與綰同。至議。以為今試學者。以帖字為精通。考文者。以聲病為是非。風流頹敝。誠當釐改。然自東晉以來。人多僑寓。士居鄉土。百無一二。請兼廣學校。保桑梓者。鄉里舉焉。在流寓者。庠序推焉。勅禮部。具條目以聞。綰又請置五經秀才科。○庚寅。以魏博都防禦使田承嗣為節度使。承嗣舉管內戶口壯者。皆籍為兵。惟使老弱者耕稼。數年間。有衆十萬。又

選其驍健者萬人自衛。謂之牙兵。○同華節度使李懷讓。為程元振所譖。恐懼自殺。

資治通鑑卷第二百二十一

唐紀 代宗睿文武皇帝上之上廣德元年



續國譯漢文大成經子史部第十二卷

續國譯漢文大成經子史部第十二卷

二五

（Faint bleed-through text from the reverse side of the page, including characters like 續國譯漢文大成經子史部第十二卷 and 續國譯漢文大成經子史部第十二卷）

昭和四年七月廿八日印  
昭和四年七月卅一日發行  
昭和四年十二月十四日再版發行

（岡山製本）

續國譯漢文大成經子史部第十二卷  
【非賣品】

### 著者權所有

編輯者	國民文庫刊行會	東京市神田區小川町一番地
右代表者	鶴田久作	東京市本郷區西片町十番地
印刷者	吉原良三	東京市牛込區早稻田鶴卷町百七番地
印刷所	康文社印刷所	東京市牛込區早稻田鶴卷町百七番地

### 發行所

電話神田一八三三五番  
振替東京一八五七二番

### 國民文庫刊行會







654  
56





